

**ASO TOFI, 23 IUNI 2016**

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**SAUNOAGA FAAFEILOAI A LE FOGO FETALAI**

**FOFOGA FETALAI:** Ou te faasilasila atu ua toe amatalia Taulumaga ma galuega a le Fono Aoao Faitulafono.

**TULAFONO TAU FAAOFI O LE FAATATAUINA O TUPE  
FAAOPOPO (NU. 2) 2015/2016 MA LE TULAFONO TAU FAAOFI O  
LE FAATATAUINA O TUPE 2016/2017 - felafolafoaiga faaauau i luga o  
le faitauga faalua**

**FOFOGA FETALAI:** O le a faaauau le saunoaga a le sui usufono i tulaga tau tupe ma le tamaoiga o Samoa faapea faiga faavae tau tupe a le Malo e auala i luga o le faitauga faalua o le Tulafono Tau Faaofi e pei ona amataina mai i le aso Fono ananafi. E tolopo foi galuega a le Fono ananafi o saunoa le sui usufono faaalalafaga o Falealili.

Ia ae ou te le tapa le sui usufono e tulai mai e faaauau le saunoaga, ou te fautuaina le paia o lenei Palemene. E pei ona silafia, o le Kapeneta ma Minisita Lagolago o le Kapeneta, o i latou ia e i lalo o le faamalu o le Pule Faatonu, o le Tafatolu o le Faigamalo ma le Malo. Ia a o sui usufono mamalu o lenei Palemene o lo o faapena ona filifilia e avea ma Komiti Filifilia o le Palemene. Ia ua ou manatu e avatu i ai le faamuamua o saunoaga e tusa ai o le tatou galuega. Ona e i ai le manatu o le Fofoga Fetalai, e tataua ona maua le avanoa e talifuaitau le Malo i se taimi o le faaiuga o galuega o lenei aso. O le mea la lea ou te fautuaina ma le agaga faaaloalo ma le lotu maualalo, faamolemole sui usufono mamalu, e leai se mea e mafai e le Nofoa pe afai e aunoa ma lo outou lagolago mai. O le mea la lea, faagasolo le tatou galuega, e avatu lava le faamuamua i sui o Komiti Filifilia a le Palemene ia vagana foi ua tulai mai se sui usufono o lea itu, ia ona faapena lena ona fetuunai lo tatou galuega, ae o le manatu ina ia maua le avanoa o le Malo e saunoa ai ma talifuaitau ia ma nisi o mea o le a faapena ona faamalamalamaina e le Malo, ia e aafia uma ai lava, aua o le saunoaga a le Malo e faamalamalama itu eseese uma o faiga faavae ma le tamaoiga e tusa ai o le tatou Tulafono.

Ou te tapa ma le faaaloalo lau Afioga o le sui usufono mo Falealili Sasae, se i tulai mai, toe lima ou minute.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

**Afioga FUIMAONO TEO SAMUELU TEO (Falealili Sasae):** Faafetai i lau Afioga i le Fofoga Fetalai, manatu e tuua le aso ananafi, ua oo i le Afioga i le Minisita mo Galuega, Felauaiga ma Atinae Eseeese e faamanatu i auala galue aemaise o auala e ui i totonu o nuu o lenei itumalo, e aafia uma nuu e lima mo le silafia, o lo o i ai turisi i totonu o Salani, ia faapea foi Sapoe ma Utulaelae, ina ia alofagia auala ina ia faaleleia. E manatu e le toe ta i tua se faamatalaga, na ona ou see i fala gatete ma utuutu malie le salefu o le taeao o lea ua uma ona e toto le niu o le tuaoi, ia aua le vatapuia o le Atua foafoa ia ma le palealii o Ana galuega. E momoli le faafetai i le faiga malologa o lea ua alafai mai i faguga lelei le mamalu o le Maota nei.

Lau Afioga i le Minisita mo Punaoa Faalenatura ma le Siosiomaga, e fia oo se faamatalaga i taligalu, ia e tasi lenei o nuu na aafia i le mala faalenatura e oo mai i le taimi nei e le o i ai ni taligalu o Salesatele, ia Sapoe faapea foi Utulaelae.

O le Minisita mo le Soifua Maloloina, ia na o se talosaga e tuu atu i ou autafa lau Afioga Dr. Leao Tuitama, o sina Health Centre. Ou te talitonu ua lava le falemai lea i Poutasi e faaogaina mai e itumalo e lua, ae na o lo matou itumalo, na o se mea ina o i ai tagata e mafai ona fua ai le toto, fua ai le suka, fai fusiga ia aemaise o nai mai faafuasei i le leva o le po a o la e i ai sina vai manava ma nai panadol ia aua le faaogaina ae le i oo mai i le falemai autu.

Ia ona oo atu lea o se tala i le Afioga i le Minisita mo Leoleo, Auaunaga o Tineimu ma Faalavelave Tutupu Faafuasei, Falepuipui ma Auaunaga toe Fuataina, ia manatu o lea ua vaeluaina le itumalo, e alagatau foi ona i ai sina Ofisa i o tu totonu o lou itumalo ia aua lava le malupuipuia ma le saogalemu ia ma le faamalosia o le Tulafono.

E faamuliga se faamatalaga i le Minisita mo Aoga, Taaloga ma Aganuu lau Afioga i le Toetaufanua a le Malietoa lau Afioga Loau, e talitonu lava o lea ua e tulai mai i le foe. O lou soatau foi o se tagata e laitiiti, ua iloga la oulua tulai mai, e logologoa foi lua tala i le taimi o taaloga. Ia ae manatu i ai, atonu o le ala lea ua alagatau ai ona toe silasila i nisi vaega e atinae mai ai le lakapi. E talosagaina e le gata i faleaoga o ou itumalo i Salani ma Sapoe, ia a o se malae lakapi faava o Malo ina ia mafai ona atiae ai le taaloga lenei. E silafia masalo ai o le ala lea ua faaletonu fai ma faaletonu o le tatou au ona ua tau leai ni tama taaalo mai i le mea na afua mai ai le taaloga. Ia ae ou te manatu, ua tatau foi ona faaavanoa se lua taimi e fai ma oulua agai ai e ave le tomai ma faasoa le silafia ina ia mafai ona faaleleia lo tatou au. E manatu lava e leai o le tofi mai le Atua, e le i saga filifilia oulua i lenei taimi. A ou manatu i le filifiliga o Ieremia fai mai le Atua ia Ieremia, *ōna ou faia oe i le manava o lou tina ae e te le i fanau mai ma faauina oe e ave a oe ma Perofeta.* E ui lava e le o oe o se perofeta, ae ou te talitonu lava o oe na filifilia i lenei taimi e tulai mai, aua le faaleleia o lea vaega ma le faaloalo e talosaga atu ai ma le agaga o le loto mauualalo, o se malae e leai se malae o lou itumalo.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O lo o tele eleele i Salani ia faapea foi Salesatele, e mafai ona fausia ai se malae o si ou itumalo. E mafai foi ona fai mai se matou Iuni latou i le itumalo o Falealili Sasae, aua le atinaeina o le tatou taaloga lea faatasi ai ma taaloga e le gata i lakapi, ia a o taaloga afereti e i ai ia, mo mea o field events, aua ou te talitonu, e seasea maua se tatou pine auro i le mea lea o le tamoe, a o field events e i ai taaloga ia o le pulu mamafa, o le togi pulu foi lea salafalafa ia ma le javelin po o le tao, o taaloga ia e aoga i ai o tatou tagata aua e tino malolosi. Ia o le fuafuaga lena ma le manaoga, e aisi atu ai i lau Afioga i le Minisita, ia mo lea vaega ma lou agaga faaaloalo.

Lau Afioga i le Fofoga Fetalai ua iu manaoga o lenei itumalo, a o le agaga maualuga faafetai lo outou seei mai i le tofi i le faatautaia o le Maota Fono. Faafetaia galuega lelei na faatino e lo tatou Malo e le o po se lilo tulaga foi sa umia o le Minisita, lea foi ua e toe pale mai, malo faafetai. Ia tau ia ina ia faamanuia le Atua i ou faiva a manaia aua le faatautaia o le tatou Maota nei.

Lau Afioga i le Palemia, ia utupupuina fulu o le segaula i lau tofa, ia aua le taitaiina o le Faigamalo o Samoa, ina ia sao ma uli seia oo ai ina faaiu lenei lima tausaga. Manuia le Maota, ia ae ola le leo faafetai, soifua.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Falealili Sasae.*

**FOFOGA FETALAI:** Malo, faafetai. Ia e le tau faafuluina ia le saunoaga a le sui mamalu Ia malo faafetai i le manatu mai i le fautuaga a le nofoa, ia a o le tapena, ia faafetai sauni. Malo tapena aua le itumalo. Ia e tapa lau Afioga i le Sui Fofoga Fetalai, ia o le Afioga i le sui mamalu mai i le Gagaemauga Nu 3, le Afioga i le Sui Fofoga Fetalai ia tulai maia e te saunoa e tusa ai ma le tatou mataupu, faafetai.

**LAUGA FAA-TAUPOU**

**Tofa NAFOITOA TALAIMANU KETI (Gagaemauga Nu. 3):** Lau Afioga i le Fofoga Fetalai, ou te tulai ma lou faaaloalo e tatau ai ma le ava tele, e tusa ai ma le avanoa ua e tatala mai mo lenei itumalo, Gagaemauga Nu 3, e taumafai atu ai ni manatu a o ni lagona vaivai e tusa ma le Tala Faatatau o le Tupe ua taoto nei i le Maota mo lona pasiaina. Peitai, ae ou te le i asaasaina le tai sua ma le tai loloto, aua le faamoemoe o lou tulai, ou te muamua ona ou faafeiloai atu i le paia o le Maota o Samoa. O le Maota e le ato matatululuina e se tasi, ae o le fale lava e ato fulu. Aua o lele ua taotoga iasa le aso e pei o le tala ia Tooa ma Fitimaopoloa i taitai o le Malo. Faafetai i le Atua ua Ia faaae manuia faiga malologa sa folau ai i le pouliuli, a lea ua fotu malama, i Lona alofa ma Lona agalelei, lea ua tatou fesilafai ai i manuia, ae le o mala i lenei taeao. Malo le soifua.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Lau Afioga i le Fofoga Fetalai, se ua asaasa gata lava ia le alavaa o lenei taeao, aua ua le gata ina sousou, a ua galua foi, i sao o itumalo sa asa le gasu o le taeao. Ae ui lava i lea, o Matautu o le tautai ua masani i aso faapenei. Ua masani i le faitauga o galu, ua iloa foi apefoe e sao ai ma vave ona oo ai i le aloalo, e le tae otaota foi, lea ua mafua ai ona ou tu i Taumeasina, ae tepa i Matagofie e pei o le tala e fai i le fale Vaimauga. Aua o lele ua tau fai sunui ao o le lagi, i le lagi to i le ala ma le lagi to i le tai, ae a le lagi e to i le ea?, ina ua soo tuli taitai o le atunuu, lele ua atoa ai le faga i l ua, ina ua tau fai puea le matila ma le ofeloa, e pei o upu e fai i le gataifale. Ua saua foi i le matamata, lele ua nofoia pou o lauga, ua atoa tupe i le fala, e pei o le upu e fai i le faiva o taulafoga. I le paia sautuafafa o le Maota i Tiafau tauave nei, o tua o Lepea ma Vaitagutu ma Vaiala, lele lauivilu ai tulatoa ma le aufueloloa o le atunuu. Fai mai o le Maota o Samoa o le Maota o le T g tia, o le Maota o le T g manu a le atunuu aua upufai o lana faigamalo. A o le Maota foi o le faautugatagi, aua o le Maota e tapuaia e le mamalu o le atunuu.

Lau Afioga i le Fofoga Fetalai, se ua setogi lau seuga na lagatila i lenei taeao, lea ua e taia le tu tafaitoa, ma ua e faautuutu le salefu se i tea mea i Matautusa ma momoli lapalapa o malo i Fogaa, ae a se tatou utugataufa ia Keriso ma le atunuu tofi ma le atunuu mamala. Se i sula le aao laveai ma le agalelei o le Atua o Sapaota, ona o lo outou soifua maua e ala ai ona tepa i ula, ma tago e ula ua sei foi i ula o lenei taeao. Malo le fai o le faiva. O upu moni o oe o le maa faafuagalua i aso faapenei. Ae aua foi ne i galo o upu a le Tusi Paia aua neia ia te i tatou, aua neia ia te i tatou se mea e tasi. A o le viiga ma le faamanu i le Atua, e faasilisiliina lea i mea e manao ai le tagata. Ina neia ou momoo la i ia o le loloto, lenei uluai avanoa faaauuro ua e tatala mai, ae galo ai figota o le aloalo, aua o ona momoga e talimalie ai le mano ma le galala i aso uma, aemaise o lenei ua tu i tai le satele o lenei Paeaiga Iona XVI o le Palemene. O upu a e fai i le motusa, a oo ina faalelefulu, e muamua a ona lauvae manu a le Tuimanua. Po o le a le tele o manu, e ilogofie lava manu a le Tuimanua i ona lauvae.

Ae ou te le i taia la le tuluvao ma ou ma ou faamutituu le faiva o Lopala, se i nono ni manatu o lenei itumalo Gagaemauga Nu. 3, e uiga i le Tala Faatatau o le Tupe 2016/2017 lea ua faataoto nei i le Maota.

Lau Afioga i le Fofoga Fetalai, ou te muamua ona ou faatulou i le tapuaiga leoleoa, papa le gae o lau Afioga O Le Ao Mamalu o le Malo ma lau Masiofo, ae a le fala le see, i le tapuaiga a le Fono a Sui Tofia ma outou Masiofo, ma o le mamalu lava lea aua le paia o Aiga ma a latou Tama, Tama foi ma Aiga, le Usoga a Pule ma Tumua, Itua ma Alataua, Aiga i le Tai ma le Vaa o Fonoti, ae a Aiga o Tupu, Aiga o Nofo, Aiga o Papa ma Aiga Tafai. Se ua matalupe foi le seuga i le pa o le malu nei, o lea ou te faatulou atu ai i le afio mai o lau Afioga i le Palemia Susuga i le Alo o le Malietoa o le tama tau Punefu, o Tulaniu o Atua o oe o le Aloalii o le Laau na Fausia lau Susuga Tuilaepa Fatialofa Auelua Galumalemana Dr. Aiono Sailele Malielegaoi o oe o le Taitai o le Malo.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

E faatulou atu foi i lau Afioga i le Sui Palemia lau Afioga i le Sao Faapito Fiaame Naomi Mataafa faapea le saofaiga a Minisita mamalu o le Kapeneta ma le mamalu le vaea o Afioga i Sui Minisita.

Ou te faatulou foi i le tapuaiga a lau Afioga i le Faamasino Sili, Afioga i alii ma tamaitai o le Faamasinoga faapea le Ofisa ma le auunaga faa-Faamasinoga. Ou te faatulou ma le faaaloalo foi i lenei taeao i le eʻe mai o lau Afioga i le Fofoga Fetalai o le Maota o le Fono Aoa o Samoa faapea le paia maualuga o lupe papa na ta na faʻa mai i le fuifui, sui usufono mamalu uma o le Palemene i lona Maota. Ou te ofo alofa ma faatalofa atu foi i lau Susuga i le Failautusi Sili o le Maota ma lou sui ma le mamalu o le Ofisa o le Fono, malo le galulue faafetai le tautua le faatuaioia ina ia sologa manuia taulumaga o galuega a lenei Maota. Ou te faatalofa atu foi ma le faaaloalo i le mamalu o Faauluuluga o Matagaluega ma Faalapotopotoga Tumaoti a le Malo ua faatasi mai i lenei taeao, malo le onosai malo le tautua Malo, o outou lava e lima ma vae i ai le Faigamalo onosai i tiute ma faiva. Ou te faafeiloai foi i le paia o le Afaigaluega galulue a le Atua i so o se fatafaitaulaga o le atunuu, se ua faamalo tatalo. Ua manuia faiva o le Malo ona o la outou faanonogamanu i le Atua ua mata faigofie ai lo matou valaauina.

Ou te faatalofa foi i le faafofoga tapuai mai a le Faigamalo o Tutuila ma Manuʻa, le afio o lau Afioga i le Kovana ma le Lutena Kovana le paia o le Faigamalo i Maota e lua ma le mamalu i sui usufono uma o le Palemene. O le paia lava lea aua le motu o Salaia le paia i le Faleagafulu Sua ma Aitulagi, Saole ma Saleaamua, Ituau ma le Alataua ma le Launiu na Saelua. Ae tainane foi le paia o le Motusa i le Laau na Amotasi, Faatui o le Motu ma Tootoo o le Faleula ma upu ia te oe le Manuatele. O paia sauoo ia ma paia maualuluga ia o Samoa mai lava i le oneone le ufitia seia paia le pa sopoia o le a nuunuu atu faatini o Tausala. O upu lava e fai i le gataifale, se ta te momoo lava i ni ia ae manumanu i le upega aua o le upega e tautau ae fagota.

Ou te tautala ai ma le faaeteete e faafeiloa ai isi ou itumalo pele o Gagaemauga Nu. 3 e amata mai i fanuatanu ma asofaata silig ma fale faamaoia i tulag ma mala e oo atu lava i malo amata. Ae matua lava le tuu i lou tupua tausi i lou malaefono i Falefagamalo. O le paia lava lea aua le afio o le Aiga Sa Peset ma lo outou maopu, alaalatai o Leusoalii ma le nofo ituaiga o le Faleiva ma upu ia te oe Matautu o le faamaluga o Malo. E momoli atu le faafetai tele i le taele o loʻu loto i lo outou paia aua le afio o Suisala o le nofo a matua i le Aiga Sa Peseta, afio mai Lilo ma Lemaveve, alalatai le mamalu i le Atofaʻi ma tino o le Faʻi ma upu ia Matautu, faafetai i la outou faaaloalo. Ou te momoli atu foi i le agaga maualalo le faafetai i le tatou afioaga i Satoalepai, le paia aua le afio o Maiava aea le susu o Mataia o le Aiga Sa Peseta malii mai lau fetalaiiga Mauigoa o oe o le Aitutagata ma upu ia Satoalepai, faafetai i la outou faaaloalo. Ou te momoli atu le faafetai tele i le tatou afioaga i Fagamalo se o outou a o Tootoouli o lo o outou siʻi ma faafaileleina upu aua le mamalu o le Tupua o le Tui Fiti i Falefagamalo e tapuvae tasi i ai lo tatou itu o Malo i ana meatetele e fai.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Ou te momoli atu foi le faafetai tele i le tatou afioaga i Lelepa o le upu moni o tatou lava o le nuu e tasi, e tasi lo ta faalupega, tasi lo ta faasinomaga, tasi lo ta fatu, tasi le ta savali o Sua ma Faalea. O Matautu o le Muaautasi o le Usoga a Pule o oe o le Muaaufaalele a o le Muaautau foi e te lave i manino e te lave foi i le ava lea na afua ai ona ea le fua a Salafai na limulimua i Manono, lea na faaigoa ai le vaa na fealuai i le va o Upolu ma Savaii o le Limulimutau. O pine faamau na o Matautu. Ioe, si ou nuu pele o Avao si ou nuu o lo o tanu ai loʻu pute i le papa o Misi i le vaega tonu o lo o tu ai le maa faamanatu na liliu ai le Tusi Paia i le Gagana Samoa. O Iona uiga o le tama a le eleele, ua e masani i le saili malo lea ua ou oaoa ai i Faleseu ma ou see i Maaomalie. Aisea? Leota ma Aiga o oe o le Tama Faasausau o Matautu o oe ua faalanu maaveave, a o oe foi e te lave i le manino e te lave i le aau aua o oe foi o le Tama tau Lepea ma Vaitagutu. Lau fetalaiga Leaiauloto Galuvao ma Nafoitoo, lau Afioga Tuipoloa Tivai Tataimata Seuamuli ma Tiatia ma lo outou siapo lautele e le vaea. Faafetai i la outou faaloalo lea ua matou pale ua pale, ua titi foi ua titi, ua ula foi ua ula ona o la outou pule to ua mafua ai ona lagona so matou leo i le Maota mamalu lenei. A o ai le tagata faatauvaa ua outou filifilia ai au? Ioe o au nei a o oe taeao. E leitioa a toe fesili le auauna a le Atua ia Iese; -Iese e i ai se isi tama? Fai mai le tali a le toaina, ioe ae na o Tavita o lo o i le vao o ia o lo o leoleo manu a le aiga. Fai mai Samuelu; -alu se feau e sau, le tama lena na fetalai mai ai le Atua faauʻu loa. Loʻu nuu e, e tele au tamafanau e i ai faailoga ma le atamamai tele ae ua outou aumaia lava loʻu faatauvaa. Aisea? Ua outou fesili muamua i le Atua aua o le Atua o le Atua o Malo, o le Atua o lo tatou faasinomaga o Ia e faasinoala ma faatonufolauina lo tatou lumanai. O le mea lea faamanuia le Atua i le saofaiga a le tatou nuu. E faapitoaugafa sau faafetai i lou pitonuu o Vaipouliasa le paia aua le afio o Pese ma Mautele, alaialatai o le falefa o Sa Osofia ma le mamalu ia Sa Aula ma le faamaluga o Malo. Faafetai tele i lo outou fai use moni tou te manatua o lo outou vaitoʻa manogi ma le palapala i o outou tuamaota, a o lea ua fai nei ma vaimalu ma vai tele o Matautu e tua i ai le galala ma le vaivai. E leitioa upu e fai ia Falealili, -e ta fia paʻi e i le vai o tama. Ia tapuai laia ma le manuia se i taumafai so tatou sao ia Manuvao. Saleia o oe o le oneone sina e le i soona tuua oe e le Atua e te tupito i le tatou nuu e te tova i le Gagae ma le Gagaifo e fai oe talipupuni i taimi o faigata. Ua le ese foi oe ma le tagata vaai e pei ona aumai e Afioga Paia a le Atua, o ou faiva alofilima e ola ai le nuu. A lea na e tomua i malae i le taimi o le ta Faiga Palota, o lau tamua na maua ai aʻi na maua ai foi malo. Faafetai i le paia i le afio o le alo o le Lilomaiava lau Afioga Paleitoga, alaialatai o la outou toafa faapea Saleituga ma le Vainalelepa. Ia tapuai mai laia ma le manuia se i ou taumafai e taina nisi ai faasili mo lo ta itumao i lenei 5 tausaga o lenei Paeaiga.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafaiga faaauau i luga o le faitauga faalua**

O lau faafetai faapitoa mo le Aiga Sa Levi o lou itumalo, le Tama faaleagaga i lau Susuga i le tausi Matagaluega ia Rev. Pulea Tiumalu ma le faletua o le Ekalesia Metotisi i Avao, faafetai tele le tatalo faamanuia le Atua i le galuega. Lau Susuga i le faafeagaiga Leota ma Aiga ma Matautu Rev. Tavita Kirisimasi ma le faletua EFKS i Avao, faafetai le tatalo. Lau Susuga Siaki ma le faletua o le Ekalesia VOC i Saleia manuia ou faiva ma tofiga, e le galo afitia i le vao tusa lava pe faaopea i nuu ese ma Tumua nei. Ou te manatua lava le afiafi ina ua tolaulau le Faiga Palota, pau lava lea o la outou valaau, Nafoitua vivii ane ia lou loto i le Atua faafetai mo mea uma. Lau Susuga Sileli ma le faletua e le galo la outou tapuaiga EFKS i Fagamalo faafetai tele le tatalo, lua Susuga i Epikopo Samu ma Seuamuli ma lua faletua o le Ekalesia Mamona i Fagamalo, faafetai le tatalo. Lau Susuga Salesa ma le faletua o le Ekalesia Katoliko i Safai faafetai mo le galuega, lau Susuga Afa ma le faletua o le Ekalesia Assembly i Safai faafetai le tapuai, faafetai tatalo ia faamanuia le Atua i lo outou feagai ai ma le galuega ma le valaauina e le faigofie. E le galo Afioga i si ona vao lau Afioga i le Fofoga Fetalai i lau Afioga i le alii polofesa i lau Tofa Faamoetaulao Dr. Faale Tumaalii. Malo taalo faatausala, faafetai tele le faatamalii, e ui lava o le iuga o le faiga filifiliga a lo ta itumalo ou te faaauauina au galuega lelei e ala i le Nofoa lea ou te nofo ai i le Palemene, a o upu a le sui usufono, se o oe lava o le toa, faafetai i galuega e tele sa e taulamua ai mo se manuia o lo ta itumalo. O nisi mea ua maea a o nisi mea e le i maea ia o lea o le a ou faaauauina le ta galuega lelei mo ta tagatanuu. O upu masani lava o le Talalelei, tapuni le isi faitotoa ae tatala e le Atua le isi faitotoa i le tagata e matau ma faatuatua ia te ia.

O lau faafetai mulimuli i lau Komiti i Upolu nei ma Savaii, faafetai tele i lo outou lotomau i le mea moni, faafetai i la outou galuega sa outou fitaituga ai i le taimi o le Faiga Palota. A lea ua tatou futifuti manuula ina ua pasioa paioa, ua tonini foi tonana ina ua tali faaaliali le Atua o Sapaota i la tatou tatalo sa fauao, faupo ia sagai ane laia o ai o le tai e tauave faatasi lo tatou tofi aua nei toe mamulu. Ia e faafetai foi i si o matou aiga i Samoa nei ma atunuu i fafo, e le galo la outou lagolago malosi lea ua manuia ai lenei faamoemoe. Si ou toalua Susiana ma le fanau, faapea fanau a fanau ma fanau a fanau e le i tutupu mai, malo le lototelele i le Alii. Faafetai mo fautuaga ou te alu i lenei taaloga taumatemate, ae moni ai upu o tatou fono tatalo e faia soo, e leai se mea e faigata i le Atua. A lea ua tau lo outou ai, fai laia ma faaputuga maa i lena itu o le vai e fai ma molimau i le Silisiliese o le Atua. A fesili atu a outou fanau o le a tutupu mai a taeao, ona tau lea i ai o le Atua na Ia faia ia mea sili e le o le tagata. Faapea laia i nifo o le fatafaitaulaga ma susunu se i oo aæ lona manogi i le Atua e fai ma faaailoga o Lona alofa ma Lona faamaoni.

Lau Afioga i le Fofoga Fetalai ona ou oo mai lea i le faamoemoe o lenei taeao le Tala Faatatau o le Tupe 2016/2017. E fia faamauiina le faamalo ma le faafetai a lenei itumalo i lau Afioga i le Minisita o Tupe.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le faataotoga o le Sini Autu o le Tala o le Tupe o la e taoto ai ni upu lelei e faapea, *‘faamalosi i le faavae ma tapena mo a taeao.’* Ua ou manatu ua lalago faatasi lelei ma le faamoemoe o le taiala mo le atinae o Samoa 2016ó 2020 o lo o manino mai ai le taua o le ola fuafua tatau i seleni ua maua e o tatou lima, living within our means. O lau faitau atu i le Tala o le Tupe o lo o i ai se naunautaiga i lau Afioga e faaitiitia aitalafu mai fafo ae taumafai tatou lava auala ina ia aoina ai ni tupe ina ia mafai ona tua lava tatou i lo tatou lotoifale e aunoa ma se ola faalagolago. O le faafetai tele lea a lenei itumalo aua o le upu moni lau Afioga, e lelei a fesoasoani mai fafo ae le umi. Ua silafia lelei e lenei Maota e i ai taimi e ta aofai ai foreign aids, meaalofa e aafia ai lo tatou tamaoaiga, ae lelei lava lo tatou tapenapena mamao atu, tatou te le iloa taga e fai i le vasa pe a tatou motu ma le taula. Lau Afioga i le Minisita o Tupe, tatao i lena, matou te lagolagoina ma le faamoemoe le Tala o le Tupe.

Lau Afioga i le Fofoga Fetalai, e tuuina atu ni talosaga a lenei itumalo, e taumafai lava e faapuupuu se lauga e alofa atu i le galuega, ma le faamoemoe pei ona saunoa i ai lau Afioga i lenei taeao. E lua ni talosaga tetele ua tuuina atu e lenei itumalo i lau Afioga i le Minisita mo le Siosiomaga ma Punaoa Faalenatura, ua taoto i ou luma se talosaga tusitusia a lenei itumalo. Matou te valuvalusia ai aa o le fau. A silasila a outou Afioga i Matautu, tasi lenei o itumalo o lo o taoto ai le tele o faletalimalo, beach fales iloga o le atunuu. E autovaa atu foi le toatele o tagata tafafao e fia nonofo ai. Peitai, ua amata ona sola lona oneone sina ua amata ona sola. A o ou laitiiti, o le mea lava lea sa ou mimita ai. Peitai i lenei vaiata, ua sola le oneone, o mea ia e avaga mai ai, e tosina mai ai loto ma manatu o tagata tafafao mai e fai ai Samoa ma penina o le Pasefika, o tatou matafaga.

Lau Afioga i le Minisita mo Punaoa Faalenatura ma le Siosiomaga, o la matou tatalo, se i e asiati atu lava se i o matou talimalo i lau Afioga ma e silasila i le tulaga o lo o taoto ai le afaina tele o matou gataifale, ma le tele o faletalimalo lea e tua i ai le Malo i lana atinae o turisi, Tourism Industry, e lagolagoina tele e lenei itumalo. O le tatalo faatauvaa, na gata lava nai maa talu ona uma le afa o Valelia, e oo mai i nei aso, o la e lava e taumafai nisi vaega ua tele ina aia o itumalo, ae moomia le lagolago a le tatou Malo. Ma le faaaloalo lava. O upu lava e pei ona taua e se tasi o sui usufono i le taimi ua mavae, o ai ea na manatu o le a fai oe ma Masiofo e te laveai i manaoga ma faigata o lenei aso? Lau Afioga i le Sao Faapito, o le faaoololomaau lena i lo matou tulai mai, masalo na tuitui foi e tama ua mavae atu o lea foi ua matou toe tuitui atu ma le agaga faaaloalo i lau polo faasoa ma le lufilufilima lelei, o se taimi o i luma o lenei Paeaiga ua faatino, o lau pule lea, faafetai.

Lau Afioga i le Minisita mo Galuega, Felauaiga ma Atinae Eseeese, o lena foi ua taoto atu se talosaga tusitusia a lenei itumalo i galuega mo auala galue, o lea lava ua maitauina ma le totoa le Tala o le Tupe, tatou taumafai e tua lava tatou ia tatou ma le faamoemoe atu i le tele o mea.



23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le agaga o lenei itumalo lau Afioga i le Minisita mo Galuega, lau Afioga i le Palemia, o lena ua taoto i ou luma le matou talosaga tusinga, o le a se aso o le a se taimi e oo ai i ai lau faasoa, matou te momoli atu le faafetai tele i galuega faatino ua maea pei o le auala galue i Fagamalo. Ua toe o se aga ona maea lea o le talivai o lo o faatino nei i tua o Saleia ma le aualalaupapa. A o le agaga e fia fautuaina ai galuega tetele faapea, e i ai le talivai a Saleia, se i toe silasila ane lava a ouluga Afioga, i mea o inisinia....

**FOFOGA FETALAI:** Toe lima minute o le sui usufono.

**Tofa NAFOITOA TALAIMANU KETI:** I timuga ma tafega talu ai nei, na ati mai le vai, maimau le tele o tupe. Maimau e pe ana ou i ai i le amataga, na ona tanumaa o lalo, faasima le tumutumu. A oo ina sau tafega, e toe lolovaia uma Vaipouli ma Saleia, lea na tulai mai. O lona uiga e tatau ona toe silasila i ai ma asiasi i ai i ona tulaga foi o konekarate ina ia aoga le tupe a le Malo e fesoasoai mai i le tatou saogalemu aua ne i soona faaaogaina i le tulaga le talafeagai ma le faatinoga o galuega. O nai talosaga tetele ia a lenei itumalo, ae i ai nai fautuaga laiti o lea toe lima minute.

Lau Afioga i le Minisita mo Faamasinoga, o le matou fautuaga, aisea ea ua le toe faaauau ai le faatinoina o faamasinoga savali i itumalo taitasi, lea sa masani ona oo atu le faamasinoga ma faatino i itumalo. E i ai le itu taua e pei ona ou molimau a o ou galue i le Ofisa o Leoleo, sa fesoasoani tele i le puipuia o soligatulafono, aua a tulai se taulealea po o se tama solitulafono i totonu lava o lona itumalo, e maua uma i le vaai a lona itumalo, e pei ni leoleo alii ma faipule, e matamuli e tulai. O lona uiga e taua tele le ave i tua o le service e faigofie i le atunuu, afai ua determine. e deter ai le atunuu mai le soliga o Tulafono, o le mea lea sa ou molimauina, o le fautuaga, se i toe silasila ane i ai, e a pe a toe faaauau le mea lenei, i lo le tau malaga mai i Tuasivi, e taugata femalagaaiga. a o le tiute lea o tatou Taitai o le Malo, e faafaigofie le auaunaga mo le mamalu o le atunuu. Ae taua mo le saogalemu ma le puipuia mai le soli o tulafono.

Lau Afioga i le Minisita mo Aoga, lau Afioga i le Toetaufanua a le Malietoa, e le toe tau fai atua se matou tala. O le talosaga lava lea e tasi, masalo pe na e silasila i le Televisi ma nusipepa, tamaiti o lenei itumalo. O le quality la e i ai o le matua lelei lava, lea na aifilofilo, na sili le isi tamaititi i le tusigatala, ma maua prize, tulaga lua isi i le Year 11, Year 12 ma le Year 13. O le agaga maualuga lau Afioga i le Minisita, e le mafai ona faatino pea ni nai vaega o asiasiga se i silafia ai e le Matagaluega tulaga o lo o i ai le quality o aoaoga ina ia faatupulaia pea ma improve a tatou aoaoga i o matou afioaga i tua ma Savaii. O le mea lea e tuu atu ai le fautuaga, o lena e i ina le uto a le faimea.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le isi foi vaega se i faamolemole fai ma asiasi ane, e manaomia lo lua tomai ma Tapuai. Tasi lenei o nuu e toatele ana tamafanau i le Manu Samoa, o le Itu o Tane o lo o faatino le matou galuega. O le mea lea, e moomia le fesoasoani.

Ia, faamuli sa matou fautuaga e le o se talosaga a o le fautuaga i le Minisita mo Faatoaga, e moomia lava e le matou itumalo le toe faamalosia o le totoina o tatou niu, aua e tua i ai si o tatou atunuu ma lenei itumalo. O le fautuaga, toe silasila ane ina ia faaauau pea le tatou polokalame lea e talia e le matou itumalo.

O nai motugaafa ia a lenei usugafono e faauma atu ai se matou lauga a lenei itumalo ma faapea atu ai i lau Afioga i le Fofoga Fetalai, faafetai mo le avanoa ua tatala mai mo lenei itumalo e tatala atu ai so matou vaivaiga aua le Fonousu a Samoa. Tau ia ina alofagia e le Atua, ua se toa ma lau Afioga i le fitaituga i le galuega. O la matou tatalo, ia alofagia e le Atua ia foai le tofa ma le moe foi i lau Afioga, ae a le faafoefoeina o le Maota o Samoa.

Lau Afioga i le Aloalii lau Afioga i le Palemia, malo le tofa, malo le faatoatoa, malo le onosai i le taitaiga o le tatou Malo, e tele fita ma faigata, ae lagolagoina e lenei itumalo. O le mea lea, ia alofagia e le Atua le tofa sasaa i lau Afioga aua le foeina o le Sa o Samoa. Ia, le lagolagosua a lau Afioga i le Sao Faapito ia i ai le tofa a le Atua i le saofaiga a le Kapeneta, ia lototetele, ia lilingi mai le lagi faamanuiaga e faafoefoe ai le tele o faafitauli na tagisa ai sui usufono mamalu uma o le Palemene aua le faaauauina o tiute ma faiva ua valaauina ai ae matou maloloina i le alofa ma le agalelei o le Atua. Faafetai.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Gagaemauga Nu. 3.*

**FOFOGA FETALAI:** Malo faafetai, e le tauilo lava le tiamalie o tia o le tautiaga aua le saunoaga a le sui usufono mamalu i lenei taeao, faafetai, malo tapena. Ou te tapa sui usufono, masalo pe toe toalima i le Taitaifono o le Komiti o Tupe sui usufono fou o lea Itu, ae lafo atu, tulai mai mo le saunoaga.

Ia, tulai mai le sui usufono mamalu mo Vaisigano Nu. 2.

**LAUGA FAA-TAUPOU**

**Afioga TAPULESATELE MAUTENI TAMASONE METULI II ESERA (Vaisigano Nu. 2):** Ou te tulai atu ma le ava tele i lenei taeao fou e pei ona i ai le Fonotaga a le tatou Palemene. Faafetai mo le avanoa lau Afioga i le Fofoga Fetalai, e le tele lava ni manatu ma ni fautuaga aua le tatou galuega.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

E itiiti foi se manatu i le Tala o le Tupe, ona faaiu lea i se tulaga foi e fia faailoa atu ai nisi o mea o lo o manaomia e lenei itumalo. O paia o le aso lenei, o paia o le Atua soifua, o paia o le tumu a le Atua, o le Atua le Tama, le Atua le Alo, le Atua le Agaga Paia.

Tulouna ia le Aufaigaluega paia a lo tatou Atua Silisiliese, a o paia faale-Aganuu, o le malu o paia e le popo, o paia e faavavau. Tulouna ia le tapuaiga a Lana Afioga Mamalu O Le Ao o le Malo Tutoatasi o Samoa. Tulouna ia le faafofogaaga ma le tapuaiga a Samoa atoa ma si ou itumalo. Tulouna paia faa-Palemene, o paia o le Maota Fono Aoaofaitulafono. Ona ou gagana lea ma ou faapea, tulouna ia Lana Afioga Mamalu O Le Ao o le Malo Tutoatasi o Samoa lau Afioga Tui Atua Tupua Tamasese Efi tainane lau Masiofo. Tulouna le paia i Sui o le Fono a Sui Tofia, lau Afioga Tuimalealiifano Vaaletoa Sualauvi le II ma lau Masiofo, lau Afioga Le Mamea Tuiletufuga Ropati Mualia ma lau Masiofo, lau Tofa Tuiloma Pule Lameko ma lau Masiofo. Tulouna lau Afioga i le Palemia lau Susuga Tuilaepa Auelua Fatialofa Lupesoliai Neioti Aiono Dr. Sailele Malielega. Lau Afioga i le Sui Palemia lau Afioga Fiamme Naomi Mataafa. Le paia i le Kapeneta, Minisita Lagolago aemaise sui usufono mamalu uma o le Palemene.

Tulouna lau Afioga i le Fofoga Fetalai lau Afioga Leauepepe Taimaiono Toleafoa Faafisi ma le mamalu o le Ofisa o le Fono Aoaofaitulafono, tulouna lau Afioga i le Faamasino Sili, lau Afioga Patu Tiavaasue Falefatu Sapolu. Tulouna le afio o Faamasino uma, tulouna le mamalu o le Ofisa o Faamasinoga. Tulouna le mamalu i Faauluuluga o Matagaluga ma Faalapotopotoga a le Malo o Ulu o Pisinisi.

Ae tulouna ia le tapuaiga i lena itu o le vai i lau Afioga i le Lutena Kovana ma le mamalu o Sui o le Maota, ae tainane le atoa o le motu i Sasae. Ia nuunuu atu ia, ona ou faapea lea, tulouna ia le paia i Tama ma Aiga, Tama ma o latou Aiga, Pule ma Tumua, Ituau ma Alataua, Aiga i le Tai ma le Vaa o Fonoti. O paia lava ia i Aiga o Tupu, Aiga o Nofu, Aiga o Papa ma Aiga na Tafaiifa.

Tulouna le paia i le motu i Sasae i le Faleagafulu, susu Sua ma le Aitulagi, Ituau ma Alataua, Saole ma Saleaamua. Le paia i le motu i Manua i le afio o le Laau na Amotasi, Faatui o le Motu ma le mamalu o le Tootoo o le Faleula ma upu i le Manuatele.

O paia na o le Tama o i le lagi e afua mai i Malaetele seia paia Fili ma Puletuu. A o le paia o le mea nei nei ou laaloa, afio mai oulua Tama a le Fale, Afio mai Faumuina, susu mai Mataia, susu mai Seiuli o le Alo o Malietoa, afio mai Tapaau e lua o Letele ma Mataafa, tulouna oe Faleata o oe le Tauaitu o le saofaiga a Atua. Tulouna lo outou Toafa o Igoamatua, le Pulelua ma le Faiga ma le nofo a Pule.

Ona oo lea o se faamatalaga i si ou itumalo. Tulouna ia le paia o si ou itumalo o Vaisigano Nu. 2 o Sataua, Papa ma Fagasa, o le paia lava lea o le afioga i Aiga ,e faapea le falefa o Sataua ma Lealuga.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O Aiga o Tupu, Aiga o Nofo, Aiga o Papa ma Aiga na Tafaiifa. Susu mai alii o le nuu ma Luapitofanua ma Ufagalilo ma lo outou Maopu, faapea foi le fetalaiga ia Aumua ma Maninoa, o Utuutu ma Faitau. O paia ia ua liligo ma pa ai le fogatia le faanuualii ma le tupua i faupapa ia iloga ia paia na. Ae mua ia se faamatalaga ma se faamalo i si ou itumalo o Vaisigano Nu. 2 aua e fai mai le isi fuaitau; ÷ tulagamua le suemutu a le tamalii ae talitali le tulafale. O lea ua aøe malo le taumafai ua manuia le Faiga Palota, o lea ua tu i matagiolo ma sausau i le moana. Le tapuaiga i Faafeagaiga uma o Ekalesia uma o lou itumalo aemaise uso a auauna o lo o faanonomanu aua se manuia o le itumalo ma Samoa atoa. Faafetai i la outou tatalo ma la outou tapuaiga.

E momoli atu le faafetai tele mo le galuega a lau Komiti, faafetai le tauivi faafetai i lo outou galulue maeaea ma le faamaoni, faafetai i lo outou finagalo manumalo, o lea ua iu ma le manuia lau faatamasoaliiiga. Le mamalu e i aiga uma o si ou itumalo ma le taumafaiga aua se manuia mo tagata uma, faafetai i la outou lagolago.

Ae ou te faatauaina lava lau faafetai i le Tofa Motuopuaa Uifagasa Dr. Aisoli Vaai o le sa tulai mai i le Nofoa o le itumalo ona o lona finagalo malie atoatoa, e tapuaia ma lagolago i lou pale mai. Faafetai mo galuega lelei sa e faatino ua faamalo le malolo faatausala. Ae o se leo o le tautalaga i nai o maua aiga uma i Samoa nei ma atunuu mamao, faafetai i lo outou finau malo ma le finau faatamalii. Ua manuia faiva o le tama, faafetai, faafetai, faafetai tele mo galuega ua iu i le tulaga manuia ma e viia ai pea Lona alofa tunoa.

Lau Afioga i le Fofoga o le Fetalai, o le a faaleo ia nai manatu ma nai fautuaga aua fuafuaga alu i luma mo le manuia lautele o tagatanuu uma. Ou te fia faailoa atu foi i lau Afioga i le Fofoga Fetalai, e lagolagoina e lenei sui usufono le Tala Faatatau o le Tupe 2016/2017, ma o le a fai i ai se manatu itiiti i se taimi o mulimuli mai.

Ae e muamua lava ona ou aveatu le faamalo ma le faafetai i lau Afioga i le Palemia ma le Faigamalo mo galuega lelei uma ua faatino i nei tausaga e tele ua tulai mai ai lena Vaega Faaupufai. Faafetai le galulue ma le alofa mo le lumanai manuia o Samoa ma ona tagata. O nai motugaafa mo le Faigamalo e faatupu manatu ma lagolago atu ai i lenei galuega i lenei Paeaiga aua e fautele lo ta Sa. E auala atu se manatu lau Afioga i le Fofoga o le Fetalai i le Palemia ma Minisita o le Kapeneta. O si vaega lau Afioga i le Fofoga Fetalai o le vaega muamua, ia silasila lau Afioga i taumafaiga ma fuafuaga mo le faaleleia atili o tulaga i aoaga i totonu o Samoa. E i ai lava le talitonuga o lo o faagasolo faapea ia tulaga i fuafuaga a le Malo. Ia faataua ma ave pea le faamuamua i aoaga e le gata i vasega laiti a o vasega mauualuluga ma lunistesite i potu aaoaina i tomai eseese ma tomai faamatata aua le atinaeina o Samoa. E faafetaia lava le taumafaiga a le Malo pei ona i ai le fesoasoani tau tupe i totogi o aoaga i vasega laiti. Ae a talafeagai i se finagalo a le Malo ia iai se fesoasoani mo tamaiti aoga ma nai o latou matua mo le faatupeina o aoaga i le lunistesite ina ia faigofie ai le olaga aaoaina.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

A tusa ai, ia fesoasoani le Malo e taumafai ia faia se tulaga faaunegatupe e faafaigofie ai ona maua tupe mo le totogiina o pili i le Iunivesite mo le potu aoaoina o tomai eseese ma tomai faamatata ma ia aiaia ma faatulaga lelei, ina ia lelei faatino le toe totogiina o ia tupe e tamaiti aoga ma matua. E ese mai ai se lagolago a Faletupe ina ia mautu ma aloaia lelei ai le ola aoaoina. Ua matauina lava le i ai o lenei faafitauli tuga i aiga ua agavaa fanau mo le ulufale atu i Iunivesite i le tau sailia o ni pili aoga. Ae tatalo atu ai mo se tulaga fesoasoani i le finagalo o le Malo. O le isi tulaga ia faataua pea le tulaga e faatatau i le aoaoina lelei o faiaoga e le gata o faiaoga o vasega laiti a o vasega maualuluga. Ua tulai mai pea ma molimauina le tulaga faaletonu i nisi o mataupu i le l'atoatoa o le tulaga tau le agavaa o faiaoga, ma atili ai le toaitiiti pea o tamaiti aoga e aoaoina mo nisi o mataupu, e i ai le matematika ma le faasaenisi. Ia tumau pea le maua e faiaoga o avanoa e toe suesue atili ai lo tatou tomai eseese faafaiaoga ina ia ogatasi ai ma tulaga o le soifuaga faaaoga alu alu i luma i metotia ma faiga faafaiaoga. E faafetaia foi le Malo i le tulaga ua mafai ai ona toe galulue nisi o faiaoga ua malolo ae o lo o lava pea le malosi o le tino ma le mafaufau e faatino ai le latou galuega. Ae tatalo foi i le Malo ia faamautu pea le tulaga lelei o totogi o faiaoga.

O le isi vaega lona lua lau Afioga i le Fofoga Fetalai, ia silasila le Malo i taumafaiga mo le faateleina o galuega mo tagata uma e moomia ni galuega i Samoa nei ma ia taumafai pea ia i ai ni pisinisi tetele i totonu o le tatou atunuu. E talosaga atu i le Malo ina ia taumafai pea mo ni pisinisi tetele mai fafo ia faatinoina i Samoa nei aua le faaogaina o taleni ma tomai o tatou tagata. Ua maitauina lava le toatele o fanau ua iu mai i aoaoga, ae ua le maua lava ni galuega. O nei taumafaiga a le Malo mo ni pisinisi tetele e pei o le Yazaki Samoa, ina ia faaulu mai i Samoa nei e moomia lava le i ai pea o fuafuaga fesoasoani, po o faatosina a le Malo mo pisinisi faapenei tau amata e faamautu ma faatosina mai ai nei ituaiga pisinisi tetele. E talitonu lava e le tatau ona faimea tuulafoai le Malo i lea tulaga, ae ia taulamua ma finau malosi ina ia lava nei ituaiga pisinisi i Samoa. O le isi tulaga lau Afioga ia silasila pea i ai le Malo, o le taumafai lea ina ia faatupulaia ni avanoa mo galuega faa-Matata po o le Aperenitisi aua lava le taumafai ina ia mauagofie ni galuega faigaluega mo le toatele o tamaiti iu mai i aoga maualuluga ma le Iunivesite e fia aoaoina atoa ai ma tagata matutua e agavaa mo le aoaoina mo ia ituaiga galuega. Ia taulamua le Malo i le faatinoina o faatosina e auala i fesoasoani mo pisinisi e fia auai i sea fuafuaga mo le faafaigaluegaina o tagata e agavaa mo le faaopoopoina pea o nei avanoa faigaluega mo le atunuu. Ia mautinoa lelei foi ia aua lava nei faatamala le Malo atoa ai ma le aufaipisinisi i le aoaoina o potu mo tomai faa-Matata.

O le vaega e tolu lau Afioga i le Fofoga Fetalai, i le tulaga lava tau galuega mo o tatou tagata. E tatalo atu i le Malo ia silasila i se faiga e mafai ai ona agavaa galuega faavaitaimi e i ai le tau apu ma le tau vine. E pei ona malaga ai o tatou tagata i Niu Sila e galulue ai ina ia agavaa lea tulaga mo le Quota po o le Seʻi mo le Nofomau a Niu Sila pei ona i ai nei.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Ia faatumauina ma faamausali atili pea le faiga paaga a Samoa ma Niu Sila faapea foi ma le tatou faigapaaga ma Ausetalia mo galuega faavaitaimi pei ona auina atu ai o tatou tagata e faigaluega ai. Ae i le tulaga lea i le tatou faiga paaga ma Niu Sila, ia maua pea ia avanoa e o atu ai e galulue i Niu Sila i galuega faavaitaimi nei. Ia vaavaalua pea ma le avanoa o le Quota i tausaga taitasi o lo o i ai nei ma Niu Sila. Ona o se tulaga la ina ia faafaigofie ai ia le isi vaega lea o le Quota, ia toe silasila le Malo i le tulai mai pea o le faafitauli o le l maua o ni galuega aua le faamalieina o le isi vaega taua lea o le Quota a Niu Sila ae ia faatauinau pea le Malo o Niu Sila mo se faiga e agavaa le galuega faavaitaimi mo lea Quota i ni tulaga talafeagai lelei, ina ia faigofie ai ona maua e o tatou tagata avanoa faanofomau agai atu ai i le avefa ma tagatanuu o Niu Sila.

Ona ou oo mai lea lau Afioga i le vaega lona fa. Ia silasila le Malo i taumafaiga ma fuafuaga mo le faaleleia atili o le tulaga i faatoaga ma faigafaiva. O si tulaga muamua lea, ia mataala le Matagaluega ma ia taofiofi i nisi o faaitaiga po o ni tulaga faavaifofo le mautonu ma le talafeagai e toe faaofi mai i Samoa e nisi o a tatou paaga. Ua tele ni tulaga faaletonu i laau, manu felelei po o nisi foi vaega o meaola ma meatoto ua matauina le tulai mai ma aafia ai lo tatou siosiomaga, ona o ia fuafuaga ma faaitaiga le mautonu. E lelei lava le silasila totoa i nei tulaga faaletonu, ia aua ai lava neʻi toe aafia lo tatou siosiomaga i ni manu faalafua po o ni tulaga pagatia i meatoto ma manu. O le isi tulaga e tele lava nisi meatoto ua taumafai pea le Matagaluega o Faatoaga ma Faigafaiva e faatino ma atinae ae le o tulaga lelei lava. O lea e taua ai se manatu ia se fuafuaga mo le toe atinaeina o meatoto ua molimauina tulaga lelei mo Samoa, e i ai le koko samoa i nuu ma itumalo e lelei ai lea tamaoiga aemaise ai lo matou itumalo ma ia faatauina lea tulaga e le Matagaluega ma ia faia i se tulaga faapaaga, aua o se fua o faaeleeleaga ua matauina le moomia mo le fofoga taumafa aemaise o fale gaosioloa atoa ai ma le auina atu i fafo. E talosaga atu i le Malo ina ia fesoasoani e faamautuina le maketi i fafo mo koko ona o lo o mafai pea ona avefa lea fua o faaeleeleaga ma tamaoiga mo le tele o aiga o le atunuu atoa ai ma ni maketi mo isi meatoto either ma mea gaosi. O le isi tulaga lau Afioga i le Fofoga Fetalai, ia faatau pea ma faamalosiā e le Matagaluega le fagotaina o le gataifale i tulaga e faasaoina ai ia ma figota i faiga e saogalemu ma malu ai pea ogasami o Samoa aua le fofoga taumafa ma le atinaeina o le tamaoiga o le lautele o tagata o le atunuu, ona e le gafatia pe mafai foi e le toatele o tagata, ona o le utiuti o le faasoā, ona faatino nisi o ituaiga nisi tulaga faafaigafaiva i le sami loloto.

O le isi tulaga e fia agai i ai se faamatalaga, ia toe silasila pea le Malo i se avanoa e faatino ai se Faleāia i le itu Asau, aua o lo o mautu ai le uafu i Asau mo le fetaulaiga mo vaafagota ma fale e faatino ai se atinae. E le gata i lea, o lo o tulaga lelei pea le tele o -ia i ogasami o le itu Asau.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Ma o le talitonuga, e ono mafai ona avea lea atinae, ma fuafuaga e faigofie ai ona faatamaoaiga ai le toatele o tagata o le itumalo faapea foi le lautele o le atunuu e maua ai o galuega ma tomai o faa-faigafaiva. O le a faapea foi ona maua ai ma avanoa i nisi o pisinisi ma auaunaga e moomia mo ia ituaiga nofoaga, o atinae e tau i le tamaoaiga. O le tulaga mulimuli, ia silasila pea le Malo i le uunaia ma le faamautuina ma tauologologo pea le Matagaluega mo le lelei faatino o ona tiute.

Ia faapupuu atu isi vaega ia e 3 o lo o totoe ona o le finagalo o le Fofoga Fetalai, tele nua le popolega o lo o i ai nei le lalolagi e faatatau i le tulaga e tatau i le suauu ma le penisini po o le fossil fuel o lo o faaaogaina i taavale afi. E tasi lenei o aafiaga, po o le faafitauli e pito ogaoga o le faaleagaina o le siosiomaga, e ui lava ina itiiti ia Samoa nei, tulaga faaletonu atoa ai ma le amanaia ma ia iloga se fesoasoani a le Malo, e alagataua lava i le Malo, silasila totoa, ina ia fuafua ma tapenapena mo le faaulufale mai o taavale afi, faaaogaina ai ituaiga paoa po o malosiaga e fesoasoani i le faasaoina o le siosiomaga. Ae faafetaia lava le Malo, ona o le taumafai pea ma le taulamua i le fausiaina mo le faaaogaina loa o malosiaga faafouina i le Renewable Energy mo le eletise o si o tatou atunuu. O le isi popolega tele lau Afioga ua leai lava se finagalo o le Malo i le tulaga lea o le faaofi mai o le tele o taavale tuai second hand e aunoa ma se aiaiga mo le tapulaa e faatagaina ona faaulufale mai. E faatatau lea i le maualuga ma le malosi o le kasa o le ea leaga engine emission e aafia ai le siosiomaga. O se tulaga ua matua puipuia malosi lava e atunuu atiae, e moni e laititi lo tatou faatupu kasa leaga, ae moomia lava so tatou sao mo le puipuga o le siosiomaga, ona o o tatou motu ma isi atumotu laiti ua maitau lava le aafia tele i faafitauli o le siosiomaga.

O le vaega e 6 lau Afioga, o le a faataatia ua le lava le taimi, ae o le vaega e 7, silasila le Malo i le taumafaiga ma fuafuaga mo le faaleleia atili o le auaunaga tau soifua maloloina. E faafetaia le Malo ona o le tulaga maoae ua i ai falemai i totonu o le tatou atunuu, ae tatau foi ona ogatasi mautu o falemai ma le lelei ma le mautu o le faaaogaina ma le faatinoina o auaunaga tau soifua maloloina. Ia lagolago ma uunaia malosi e Malo ia faatulaga faagasolo lelei ia galuega ia tusa ai ma aiaiga o faatinoga. E tatalo atu ia faamautu lelei i fomai mo falemai taitasi e ese mai ai i Motootua ma Tuasivi, ma ia faapea foi i isi tofiga ma auaunaga ina ia saogalemu ai le faaaogaina ma maua ai le ola soifua lelei o gasegase uma. O le mea moni o lo o faaletonu pea le tulaga o le lei o ni fomai mo nisi falemai. Ia ma lea, ua maitauina lava le faaletonu pea, maua ma le leai o vai manaomia, ia silasila pea le Malo mo le soifua manuia o tagata ina ia ogatusa le lelei o meatotino, le Pulega ma le faagaoiina o le Matagaluega, atoa ai ma le faatinoga o galuega....

Ia o le a taatia le tulaga lea i le vaega lona 8.....

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

**FOFOGA FETALAI;** Ua maea lou taimi, ae o se manatu le sui usufono mamalu, ua ou matau atu i le tele o le tapenaga. Malo faafetai sauni e faapena lava ia le galuega faasui usufono a le Palemene. E maitau atu i le tele o le tapenaga ma le lava saunia foi o lou finagalo a peitai, e manatu i le tatou galuega. Ae o lo o maua pea avanoa tai lua e tai 15 minute i mea taitasi, e faamanatu atu, ia o i ina foi e faaoso mai ai se isi vaega o lou finagalo. Ae manatu i le tapenaga a le sui usufono, pei o le ala lea o lou faauilavea ma le agaga faaloalo.

**Afioga TAPULESATELE MAUTENI TAMASONE METULI II ESERA:** E leai se tulaga lea lau Afioga i le Fofoga Fetalai e faatautee i lau saunoaga ae nei teā foi ua faapea nisi sui ua ta faifai mea faatasi ona i ai lea o nisi tulaga faapena. A o le manatu e pei ona e saunoa, o le a faapena ona fai.

Ae lau Afioga i le Fofoga Fetalai, faafetai, ua faataunuina lau lauga i le aso lenei. E taua tele lenei aso i si ou aiga. Ia manuia tele le tapuaiga O Le Ao Mamalu o le Malo o Samoa, malo foi le faafogafoga, aemaise si ou itumalo, e amata mai i mauga tetele seia paia mauga iti. Fai mai le isi fuaitau e masani ai tautai o le faiva loloto e faapea, ò e to iu le asa. O lona uiga, e taumafa lava le ia ua polo, ma sii le atu o le vaa, e asa lona faatamasoaliiiga. O le talosaga i le Malo, ia manatua mai si o matou itumalo o Vaisigano Nu. 2, nai o matou nuu o Papa, Sataua ma Fagasa. Le Palemia e ma le Faigamalo, o lena ua solo le lavalima, ua manuia lau faatautaiga, ia fasoasoalelei lou tamaoaiga, lau ato ponapona nei vale faasoa. Ia folau ia i peau o manu, ae matou tapuaia outou faiva a manaia. Soifua.

*Na faaalua le agaga fiafia o sui usufono o le Maota i le patipati o latou aao ina ua maea le Saunoaga Faa-Taupou a le sui usufono mo Vaisigano Nu. 2.*

**FOFOGA FETALAI:** Ia malo faafetai tapena, malo sauni, malo foi saunoa faatoeaiina, ae le gata i lea, o le saunoa tuusao, ia o uiga ia o le galuega malo faafetai. E le tau laeia pe tau faafuluina se faamatalaga ae o le faafogafoga tapuai mai foi le itumalo tele le avanoa e pei ona e saunoa i ai, faafetai. Ia e tapa se tasi o sui usufono o fia saunoa e tusa ai o le tatou galuega. Ia, tulai maia lau Afioga i le sui usufono mamalu., Faasaleleaga Nu. 2, lau Afioga i le sui mamalu, saunoa ia e tusa ai o le tapenaga.

**LAUGA FAA-TAUPOU**

**Afioga PAU SEFO TAUMATA PAU (Faasaleleaga Nu 2):** Faafetai mo le avanoa ua tuuina mai i lenei sui usufono. Ua maea ona e valaau i le Atua ma momoli laau i Fogaa e faafetaia Lona alofa e tusa ai ma lenei taeao fou i le taimi ua sola.



23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolaloaiga faaauau i luga o le faitauga faalua**

Ua mafai ai ona tatou potopoto i galuega fai, aua le Fonousu a Samoa i lenei taeao fou. Ae le i avatua ni manatu o lenei itumalo agai i le Tala o le Tupe ma le Tala Faaopoopo, e ao lava ona muamua ona ou faatulou i le Paia o le Maota o Samoa. Afio i lau Afioga i le Fofoga Fetalai, afio le Taitai o le malo, lau Afioga i le Palemia, afio o tamaitai ma alii Minisita o lau Kapeneta, faapea foi sui usufono mamalu uma o lena itu o le Maota, liliu mai i lea itu o le Maota, sui usufono mamalu uma lea ua tofia nei o se itu malosi e agaia le tou Faigamalo.

E faatulou foi i le taupaiga a Lana Afioga Mamalu O Le Ao o le Malo ma lana Masiofo, Sui o le Fono a Sui Tofia ma latou Masiofo, Faamasino Sili ma le vasega o Faamasinoga, ae a le tapuaiga a ekalesia e fia o lo o salalau nei i le atunuu, o lo o nonomanu aua se manuia mo Samoa, mo nei ma taeao ma talatu. E faatulou foi i le tapuaiga a Samoa, i le paia i Aiga ma Tama, Tama ma o latou Aiga, Usoga a Tumua ma Pule, Aiga i le Tai ma le Vaa o Fonoti. E ao foi ona ou oo atu i le la itu o le vasa, le tapuaiga a Tutuila ma Manua, Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Faatui Tootoo o le Faleula ma upu ia te oe le Manuatele. O paia faataotooto ia o Samoa e lua, amata mai Saua seia paia Analega.

Ona ou manatu ai lea faapea i lau Afioga i le Fofoga Fetalai, masalo o le vailiu lea se i ou liliu atu i le tapuaiga a si ou itumalo. Le afio o Aiga SaMalietoa faapea foi le Usoalii, Le nofo a Ituaiga o Manu ma Siuafanua, le Malelega e taunuu i Fuifatu ma faaleo ai, faapea foi Sapapalii. Ae a si ou nuu pele o Safotulafai, le afio o Leilua ma Leusoalii, Sa Alalatoa ma Malietoa ma le Matua, fetalaiga ia Tuilagi ma Namulauulu, Maopu Tufuga ma le Naaimalae, faapea foi si ou pitonuu i uta o Puese le afio o Salevalasi le paia o le Aiga Salevalasi, afio Tagaloa o le Lautinalaulelei ma upu ia te oe Safotulafai. O paia faataotooto lea o si o matou itumalo. Faamalo faafetai mo le iuga o le faiga palota, faamalo le taumau mo lea 20 tausaga o tau alo lo tatou sa, e ui ina lapealapea e tasi le aso ma toe alu tasi le aso ma toe alu, ae leaga e faapena na finau le sui usufono lenei. Fai mai o le tama na maileia Malo, o le faaumi lena o lou matai, Paumaileimalo. Faafetai mo le tou tapuaiga, Susuga i Faafeagaiga ma outou faletua, Afioga ia Patele ma Tamaitai Sa, Susuga i Epikopo ma outou faletua, faafetai i la outou faaea. Lo tatou itumalo o lo o i Salafai, manatua foi e o lo o aumau i Tumua nei, tou tau mau ma tou loto mau, lea lava ua mafua ai ona ou tauaveina le tatou Nofoa i lenei Paeaiga i le lima tausaga.

Faafetai faapitoa i le sa nofoia le Nofoa o le matou itumalo le Susuga Papalii. Faafetai le malolo faatamalii, aemaise foi le tasi o sui o le matou nuu, ia lafo mai ma tapuai mai. O le a se malosi o ia te au, o le a ou taumafai e tauave lo tatou Nofoa aua se manuia o le tatou itumalo.

Ona oo mai lea i le autu o lenei Fonotaga Tala o le Tupe 2016 seia oo i le 2017 lea ua amatalia. I le laupepa muamua o lo o faasino mai ai le taua tele o le Tala o le Tupe, aua so o se Tala o le Tupe e ao lava ona matau, ona silasila ma matau, po o fea e aumai ai tupe, e faagaioi ai polokalame a le Malo.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

A lea ua maua mai nei, o faamealofa mai fafo, tele le vaegatupe lea, lea e faapea mai e \$242miliona, o se tupe tele. O lea foi ua aumai lea Tala o le Tupe e faaali i atinae, ae pau lava o lea o lo o fautua mai le Afioga i le Minisita o Tupe, e ao ina silasila totoa le faaaogaina. Ae ou te talitonu, e le o lea, lea tatou te tilotilo i Paeaiga talu ai, o lo o lelei le faaaogaina o le seleni. Lelei le fuafuaga aua le atinaeina o le tamaoiga, pau lava le mea e ao ona tatou tulimatai, po o lava le vaega tupe aemaise le vaega lea e nono mai ai tupe. Ma e ou te talitonu, e le o lava le tupe o nono mai, aua atinae fai o le Malo. A tatou tilotilo i tausaga talu ai, o lea e aumai i le Tala o le Tupe 2011, na tau faaletonu ai ona ua afaina tatou i faalavelave faalenatura. O ia tausaga e tau mai i le tausaga talu ai, o lea ua faagasolo ina lelei, aua e aoga mea e tutupu. A o le fesili, o lava tupe e nono mai? E le mafai e se Malo ona atinae pe a leai ni tupe nono. E fiu lava e taumafai e faaputu, a o se Malo lava pei o le Malo nei o Samoa, o se Malo tau atiae, lea e i ai le upu, tau atiae, ae le o se Malo atiae. O lona uiga, aua ne i o tatou fefefe e nono mai tupe, aua e tatou te le ausia le lumanai o se atunuu pe a le nono tupe, ina ia lava tupe e faagaioi ai fuafuaga a le Malo. Aua o se Malo lava e atinae, e fuafua i tupe. O le atunuu o tatou, e leai se suauu o puna ai. O lea foi e aumai i le fautuaga a le Minisita, ia tatou faateete e aua ne i o tatou laasia le 50% o le nonogatupe. Ae a tatou tilotilo i le nonogatupe lea e i ai nei, e maualalo pasene. O lona uiga, o lea e i ai le avanoa e tatou te nono mai ai, ae le ausia le 50% lea. O lea ua tatou tilotilo nei i fuafuaga a le Malo i le talafatai o Apia. O fuafuaga lelei ia ua le toe poloka, auala i le taeao, aoga, o le falemai, o le faipisinisi. E mafua aisea? E tele maga-auala e vave ona fesootai. A tatou fefefe e aumai tupe e faagaioi ai, o loko uma ai. Ona i ai lea o le taofi lau Afioga i le Minisita, nono mai tupe, matua nono mai lava tupe mo tatou taimi nei aua le atinaeina o le Malo mo tatou tagata. Aua a le nono mai tupe e faoa le tamaoiga. E faoa i fea? E faoa e tagata faipisinisi mai fafo. O lea ua tatou talanoa nei i le sau lava o le faipisinisi mai fafo faatu le pisinisi, tapuni le faleoloa o lea aiga. Ona o le a? Le lava le tupe e faaoga mo le atinae o aiga taitoatasi. Ae a lava le tupe, o i ina e atinae ai le Malo. Nono mai se tupe pe fia miliona.....

**Afioga Hon Faumuina Tiatia Faaolatane Liuga (Palauli le Falefa):** Lau Afioga i le Fofoga Fetalai....

**FOFOGA FETALAI:** Se i tulai mai le faauilavea.

**Afioga Hon Faumuina Tiatia Faaolatane Liuga:** E talu ai e le o se lauga faa-taupou, ou te fia fesili i le sui usufono o lo o saunoa, pe o le a tonu lava le tele o le tupe lea e manao e toe nono mai? Ma lou faaaloalo lava.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

**FOFOGA FETALAI:** Ia talu ai ona o le sui usufono ua tatou faatasi soo i totonu o le Palemene, ma e faapena foi ona toe faamaui i tua lona tootoo. E le gata i lea, ia o le sui usufono faitauina, pei o lana saunoaga faa-taupou lenei. Ia e moni lava le fesili a lau Afioga o se tasi o Komiti o Tupe a le Malo, ia ae lafo atu ia i lau Afioga i le sui usufono o lo o saunoa, ia e aoga foi le fesili e manino ai ma malamalama auga tonu o lou finagalo. Pe fia ni nai seleni o e faamoemoe i ai e faamatuu mai e.....

**Afioga PAU SEFO TAUMATA PAU:** Faafetai. Se ua tau galo foi le....Pe mafai ona ou talosaga atu se i fai sau malologa, ae faafetai.

O le tali vave atu e tusa ai foi ma le fesili a le sui usufono, aumai se \$200miliona e lelei lena e faaagaaga e tuu i le Faletupe o Atinae, e o uma i ai tagata e o e loan mai.

**FOFOGA FETALAI:** I se tului maualalo a? I se tului maualalo. Po o lou finagalo lena, ae o lea ua faamalieina le fesili.

**Afioga PAU SEFO TAUMATA PAU:** Faamolemole e 3% e aumai e faagaioi ai atinae laiti.

**FOFOGA FETALAI:** Ia faagaioi ia le saunoaga a le sui usufono.

**Afioga PAU SEFO TAUMATA PAU:** O le mea lea e fautuaina ai le Minisita o Tupe, o le a faapuupuu atu. Ua lava taimi ia e tauaofia ai fonu e nofo atu ai, ae malaga i fafo e asamo i fafo e lau mai ni tupe iinei. Ae afai e fia maua sana aumalaga, ua lava maua ma Olo e ma te o atu e fesoasoani ia ia i le taumafaiga mai o tupe.

**FOFOGA FETALAI:** Malo faafetai.

**Afioga PAU SEFO TAUMATA PAU:** Ona oo mai lea mo Atinae. Faafetai o lea ua fofola mai atinae taiepi o uafu, o fuafuaga alualu mamao ia a le Malo, ina ia tele ni vaega e aumai ai oloa. A o le popolega, atonu e leai ni vaa, aua e le iloa po o le a le isi uta a le vaa e toe alu ma ia. O lona uiga, e tai tasi vaa i masina, popole vaa i lau mai le oloa ae leai ni oloa e ave. E faapena foi malae vaalele, e pauu vaalele ae leai ni faletalimalo. O fuafuaga alualu mamao ia ina ia tepa i ai le Malo. Ona uma lea o le fautuaga i le Tala o le Tupe.

Ae o le a faagasolo atu i isi Minisita ia, o le Minisita o Fesootaiga, Faamatalaga ma Fesootaiga Vavave Faaneionapo. Se i silasila i se faiga ina ia mafai ai ona tau taofiofi le faatauga o telefoni i tamaiti e tai 4 ma le 5 tausaga, ina ia taofia lea mea i le fesootaiga ma matua, e fonu atu po o fea la e i ai, ae fai mai o la e i tuu, e tu le pasi ae oso i lalo.

23 IUNI 2016

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le Minisita mo Faamasinoga ma Pulega Tau Faamasinoga, e talitonu o lena ua avatu e nisi o sui usufono i le agai i luma o le tolo, tolo o faamasinoga.

O le Minisita mo Aoga, Taaloga ma Aganuu, e talosaga atu i se malaga aua e na o le fa aoga o si o matou itumalo.

O le Minisita mo Tina & Tamaitai, Atinae o Nuu ma Afioaga ma Agafesootai, faamolemole fia maua se...e fia faalauiloa ni atinae o tina ma tamaitai o si o matou itumalo.

O le Minisita mo Galuega, Felauaiga ma Atinae Eseeese, o lo o i ai auala laupapa ua 20 tausaga o avatu, o le auala laupapa lea i Sapapalii ma le auala laupapa lea i Tapueleele, o le auala galue i Fusi ma Fuifatu ma Tapueleele, e le i faia lava i ai se fesoasoani.

O le Minisita mo Leoleo, Auaunaga o Tineimu ma Faalavelave Tutupu Faafuasei, Falepuipui ma Auaunaga toe Fuataina, ave uma lava pagota a Savaii ia i Savaii e maua le fesoasoani e faufautua aim atua i pagota ia, aua a latou togisala mo le lumanai.

O le Minisita mo Pisinisi, Alamanuia ma Leipa ma Faalapotopotoga o Eleele a le Malo, SLC, silasila totoa i ai.

Lau Afioaga i le Minisita mo Punaoa Faalenatura ma le Siosiomaga, se i silasila i taligalu. E 2mita mai le aualatele ona maua loa lea e le ogasami. O Sapapalii o lo o afaina lava e amata mai tua o le maota o le faafeagaiga, e lofia lava i se ituaiga sua.

Lau Afioaga i le Palemia, faafetai, faafetai i lou tulai mai. E momoli atu le agaga faafetai o lenei itumalo, ma e lagolagoina le Tala o le Tupe e lou sui usufono ma le itumalo. Manuia le fonu, soifua.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Faasaleleaga Nu. 2.*

**FOFOGA FETALAI:** Ia e sau lava le fuauli e toa le moa, malo faafetai. Atonu e manaia le faafofoga tapuai mai a le atunuu aemaise foi o Samoa, o lea ua kava atoa lava mea o le itumalo, ae le gata i lea, ua faapena ona oo lau fautuaga i alii ma tamaitai o le Kapeneta ua faasolopoa. Malo faafetai le fai o le faiva.

O lea o lo o lava pea le avanoa e tulai mai se isi sui usufono e tamua ma toe faaauau ai pe a toe talii mai le tatou malologa.

Malo faafetai, o lea ua tulai mai le sui usufono mo Salega Sasae, o se tasi foi o sui usufono sa tatou mafuta, e ese foi le itumalo na afio mai ai i le tatou Palemene talu ai, a o lea ua sui foi lona tulai mai, ae faapena foi i le itumalo e pei ona filifilia ai e fai ai o ia ma sui usufono o le Palemene.

Saunoa ia lau Afioaga e tusa ai o le tatou galuega.

23 IUNI 2016

### LAUGA FAA-TAUPOU

**Tofa OLO FITI AFOA VAAI (Salega Sasae):** Faafetai i lau Afioga i le Fofoga Fetalai ua maua so matou avanoa i lenei vaega o le taeao. O lea ua e silasila mai lau Afioga, o lea ua amata atu le matou Komiti o Tupe, masalo e uma loa au, o le Sui Taitaifono ma le Taitaifono, ona uma ai foi lea ma lauga o lenei Tala o le Tupe lau Afioga.

Ae ou te manatu o lea ua maea ona e seu le lupemua i lau faausugasega o le taeao, ua tai foi sua o le aso ma ua e tapule le inati o le Tuitoga aua le tatou taulaga faafetai i lo tatou Matai Silisiliese.

E talitonu le taofi lava lau Afioga i le Fofoga Fetalai sa taupale lava faavaa lelea i le matagi ia le tatou folauga. Peitai o lea ua tatou feiloai i lenei taeao fou i magafetau i le soifua laulelei ona o Lona agalelei o lo tatou Tama i le lagi.

E avea lenei taeao e faafeiloai atu ai i lau Afioga i le Fofoga Fetalai, lau Afioga i le Sui Fofoga Fetalai faapea le Afioga i le Palemia, Sui Palemia ma le aiga Kapeneta, o sui Minisita o le Kapeneta, faapea foi ona faafeiloai atu i lau Afioga o le Taitai o le matou Itu Agai ma lenei vaega atoa, malo lava le tapena i a tatou lauga.

Ae ua ou tulai atu ma le faaaloalo lau Afioga i le Fofoga Fetalai, tau ia ina taialalo le ia a Samoaleoi i se lagona vaivai e tusa ai ma le Tala o le Tupe ua taoto nei i le Maota. O paia ma mamalu o Samoa i ona tulaga faalupe uma lau Afioga, e talitonu lava le manatu o le a seu le tuli a le toa tamaitai i se lagona o Samoaleoi ma le Alataua, pe aisea? Aua ua taoto le pa i Fualaga i Malaeolema. E leai se tomai po o se mataalia na te toe ati pe toe soloa, aua o le pa ua mapue, o le pa na siimaa ai ia tuua ua mavae. Ou te manatu o paia na, e mai lava i le vavau e oo i le faavavau.

Lau Afioga i le Fofoga Fetalai ou te faamoni i le saunoaga a Palauli i le aso ananafi, o ia o le toala fanau o aiga o Samoa, ae ana le usu atu Lafainatau i le taupou o Salega o Moui i Fogasavaii, e le soifua mai Tonumaiepa Sauaiga lea ua talagafa ai Samoa. Ae avea lenei taimi ou te ofo alofa atu ai i le mafua faalepa i le tapuaiga a lo'u Itumalo o Salega Sasae, le paia lava lea aua le afio o le Tuiaana lau Afioga i le Matautia, afio oe Ui o le matua o le Tonumaiepa afifio Aiga Samoa le oi afifio foi aiga Sa Lilomaiava, afio le alalamaota, afio alo o Matautia, afifio foi maopu alalatai oulua Olo ma Sela le mamalu tele ia te oulua Atatogia ma Siatuvai faapea le Taupoloalii aea le mamalu tele i le Tootoo o le Alataua. Le paia e i le aiga Sa Levi o lo o faafaletulua ma faaafalelemalu i totonu o le tatou itumalo ia ua faafetai tatalo, faamalo le timai aua le filemu lea ua malu ai le tatou itumalo. Ia o paia na ma mamalu o le itumalo lea ua e faauegaina ai au aua sou finagalo ia ma se tatou tuualalo e matimati ai le atinaeina o le tatou Malo. O le upumoni e le mafai e upu ona faamatala le faaaloalo maualuga lea aua ua topule faatasi ma le musumusuga o le agaga o le Atua. E faafetai atu i lau filiga faatupu, faafetai seu faatamalii aua ua matala ia sega se naunautiga o lo'u nei tagata. O le upu moni e faatauvaa le auauna ae ou te tatalo atu i lau faamanuiaga e ala i talosaga e fesoasoani mai i so'u vaivai e tauave ai le tofi o le tatou itumalo. Ia nai ou uso tauva malo le taalo faatausala, malo faatamalii.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

E eseese a au na tatou taaalo ai ia a o Fata oe Tuna au, o Letufuga oe Leaula au aumaia laia lo outou faamanuiaga i si o outou uso ou te galue ai i lenei 5 tausaga ia ma faaauau atu ai lava.

Lau Afioga i le Fofoga Fetalai ona ou oo mai lea i manaoga o si ou itumaloí

**FOFOGA FETALAI:** Malo faafetai ou te vaelupeina le saunoaga a le sui usufono ona o lea ua matau atu ia o lea foi ua vavae foe i le tulaga o le saunoaga ia o lea foi ua taoto le laulau a siva tusa ai o lou finagalo aua foi le faafofoga mai o le Itumalo i paia ma mamalu o le itumalo, ona ou manatu lea o lea o le a e seæ mai i le Tala o le Tupe ma le tatou galuega. O le a vavae foe o le a fai se malologa a le Fono Aoaofaitulafono mo lana malologa 15 minute.

*Na faataatiaese Taulumaga a le Fono Aoaofaitulafono mo lana malologa masani i le itula e 10:50 i le taeao ma toe faaauau i le itula e 11:29 i le taeao.*

**FOFOGA FETALAI:** E faasilasila atu ua toe amatalia nei Taulumaga a le Fono Aoaofaitulafono.

E i ai le manatu ua maua le malosia faafouina i le paia o le Taitai o le Malo ma le Kapeneta faapea foi sui usufono mamalu uma o le Palemene e faaauau ai le tatou galuega. E faia le malologa le sui usufono o Salega Sasae ma ou te tapa le sui usufono e tulai mai e faaauau le saunoaga lau Afioga.

**Tofa OLO FITI AFOA VAAI:** Faafetai i lau Afioga i le Fofoga Fetalai mo le avanoa lona lua. Ou te manatu o lea ua palega auau le taliga o le sua i lau Afioga i le Fofoga Fetalai ia faapea foi le mamalu o sui usufono o le Fonousu a Samoa.

Lau Afioga i le Fofoga Fetalai ona ou oo mai lea i nai vaega ia o lo o moomia e si ou itumalo. O le vaega muamua lau Afioga o le vaitaumafa lea i lou itumalo e le o toe faaaogaina le vai i Sagone ona o le tulaga i le oona o le vai lea e le mafai ona taumafaina. O le taimi lenei o lea e faasau le vai taumafa o lou itumalo mai Fogasavaii ia ma faasafua mai ai le suavai i se vaega o Palauli Sisifo. O le upu moni lau Afioga i le Fofoga Fetalai e talosaga atu i le Afioga i le Minisita mo Galuega, Felauaiga ma Atinae Eeseese, ua i ai le tulaga vaivai o le suavai i le faaaogaina. Ou te le o mailoa po o le a se tulaga o iai le vai lea i Sagone ae na maua ia faamatalaga mai le Matagaluega ia o lena o le a toe viliina ia se isi vai i sona tulaga lelei. Ia e tatalo atu lava ma le agaga faaalalo lau Afioga i le alii Minisita e manaomia

lava le toe faaleleia o le vai lea ina ia malosi le suavai mo lou itumalo ia faapea foi se vaega o Palauli Sisifo.

**23 JUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le isi vaega o lo o i ai le fuafuaga a Fogasavaii i so latou mataaga i le matafaga ia e tele foi nisi o Turisi o lo o latou faaaogaina lea vaega i le faasee. Ia peitai lau Afioga e le o i ai se auala e agai i le matafaga i le taimi nei, e tatalo atu i lau Afioga ia a maua lava nai seleni ia e tatalo atu ma le agaga faaaloalo i se fesoasoani a le Malo i lea vaega.

O le falemai lenei i Foailalo lau Afioga i le Minisita mo le Soifua Maloloina, masalo o lea ua faaleo atu nisi o vaega fia faaleleia e se tasi o uso a sui usufono i Salega Sisifo i le tulaga o vailaau. Ae na ona ou faamanatu atu lau Afioga le standby generator lea faaoga e le falemai ou te talitonu na o le lua a nai moli o lo o feola ai i le afi moli lea. Ae manaomia lava le siaki lelei ina ia toe faaola ai le tatou potu ea malulu mo le teuina o tatou vailaau ma fualaau.

Ia lau Afioga i le Fofoga Fetalai e le umi se lagona i le Tala o le Tupe lenei nei teā ua ou toe fesiligia le matou Lipoti ona fai lea ma lape i sui nei aua ua leai se paganoa o lenei Tala o le Tupe e nenefu ai lau vaai ua manino lelei ia tulaga uma. Ae avea lenei avanoa ou te faafetai atu ai i faauluuluga o Matagaluega ia ma Faalapotopotoga a le tatou Malo le au galulue ia matauina le agaigai i luma o le tele o vaega i la outou tautua i le tatou Malo. Ia faapea foi ona avatu lau faamalo i lau Afioga i le Minisita e itiiti lava lou tino tulou, ia ae ua maeu ma tetele mea e te fealuai ma oe e atagia ai i lau saunoaga i le Tala Faatatau o le Tupe ia e tele lava le tulaga o le loto alofa ua leva ona e faaolioli e faatino ai ia lau galuega i se tautua i le tatou atunuu, faamalo silasila mamao faamalo foi le tofa loloto. A o nai vaega ia e fia avatu ai se fautuaga i le tatou Malo i le tulaga lea o le teuina o tafaala i nuu ma alaafaga lea o lo o faakonekarate. E i ai lava le manatu foi lele e manaia i se lagona vaivai e tuu pea i konekarate ia le tulaga foi lea i vaivao, ae lafo pea i nuu ma afioaga ia le teuina o latou alaafaga ma tafaala e faasoa atu ai foi le tamaoaga o lo o maua e konekarate mo tatou nuu ma alaafaga. O le isi fautuaga lau Afioga i le Fofoga Fetalai o le faatautaiina lea ma le faatinoina o le tele o atinae po o Projects a le tatou Malo. E matauina le tele o tupe faaalu i faatalanoaga ia ma le fauina o policies ma le tele ia o tupe a le Malo po o tupe ia faagaga i tatou atinae e toe alu i totonu o Matagaluega i le talanoa. A o le faatinoga lea iai e fai a si le lelei e le o lelei atili le faatinoga. O le a avatu pea lau faataitaiga, o le SACEP lea tele ina talanoa iai le mamalu o le Maota ou te iloa e tasi lenei o poloketi o lo o taliga i ai le atunuu i se fesoasoani. A o le tulaga lea aliaē mai e le o faamaoni le faiga o le poloketi lea, o lea foi ua oo i le tulaga o le a uma le taimi e faatino ai le Project lea ia a o lea e lei taitai ona uma le tupe na aumai. O isi o talosaga lea tuuina mai ia e fai lava sina ou ofo, o isi talosaga o talosaga a e ua maliliu 10 tausaga talu ona maliliu a o lea aumai i luga o faamaumauga ia. O se lagona e faanoanoa ai lau Afioga i le Minisita mo Faatoaga, se i e tagai ane lava i le tulaga lea, ua tele a tatou

atinae e taumafai iai le tatou Malo ia ae o le faatino a lea e lape ai le tatou taumafaiga.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O le isi vaega lau Afioga i le Fofoga Fetalai o le faamaumuina o faamaumauga a Matagaluega o le tatou Malo, e tele ia o lape o lo o fesiligia ai le auunaga ona o faamaumauga o fesootaiga i le va o lea Matagaluega ma lea Matagaluega. Ia o le a ou le talanoa atu i le tulaga masalo e i ai se taimi ona saunoa lea o le Taitaifono o le vaega lea a o se fautuaga e tataua ona tuuina atu i le mea lea o faamaumauga ia e le femalamalamaai ona o le tulaga o le lava o faamaumauga ma le lelei o faamaumauga. Ia pei na pau ia o nai vaega e aveatu ai se fautuaga a lenei itumalo lau Afioga i le Fofoga Fetalai.

Lau Afioga i le Minisita o Tupe, ia alo i ou faiva manaia ia manuia foi lou taumafai mai i le tulaga tofi ua ia te oe. Ia o lena ua faafofoga mai ua le tele a sau talanoa i le Tala o le Tupe ona na pau lea o se Tala o le Tupe matua manino ma malamalama lelei i ai lou sui usufono. A o isi Tala o le Tupe i tua atu e faale-lelei foi lele ona e nenefu mai lava le amataga e tau lava i tua o nenefu. Ae ua to lou pulou i lau Afioga ua malamalama lelei le Tala o le Tupe lea ua leai ai se tele o au fesili.

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoui:** Lau Afioga i le Fofoga Fetalai, sa ou manatu e le saunoa le sui usufono i lona faavalevlea sa i ai talu ai. Ae ou te faamalo i le Taitaifono o le Tupe e tele lana galuega e faamalamalama ai i sui usufono tuai ia sa i ai, ia aua o ia lea sa i ai i totonu o le latou campaign foi lea sa fai mai o lea sa nono mai tupe e totogi ai ia nonogatupe. E aofia ai ma ia lea, a o lea la faatoa malamalama ina ua faamalamalama i ai e le Taitaifono e leai ni mea faapena o lea la ou te faafetai ai. Sa ou manatu e le o o i ai sou leo aua o lea ua e nofo lava oe ma tau mai lou vaivaiga sa iai talu ai. E le afaina foi la pe ana faapea na o le tasi le Nofoaiga a o lea e tolu Nofoaiga a o lea faatoa e malamalama. O a la au mea sa fai? E leitioa e alu i o e sau ai i Salega aua o lona uiga e TKO oe i i ua iloa e Saleaula lou faaletonu ae le o se faaletonu na tau atu e se isi, o faaletonu na tou nonofo lava outou ma faasalalau mai i luga o le ea. O le mea lena o lea ou te fiafia ai, o lea faatoa e malamalama i le faataatiaga o le Tala o le Tupe lenei. E leai ni a tatou nonogatupe o aumaia, e totogi ai ni aitalafu. O le mea lena lea sa ou nofonofu po o le a tulai mai ia Leva-o polo lea ua aveese le Levaop ae tuu le olo, o le a sui, ae o lea lava e tumau lava lou... O le mea la lea lau Afioga i le Fofoga Fetalai, ua ou tulai atu ai, ana o au o le sui usufono tuai ou te le talanoa atu ai. Aua foi o lea ua ou nofo lava au ma tau mai faaletonu i le nofoaiga muamua ma le nofoaiga lona lua. Ae ia manatua le mea lenei, o le faataatiaga lea e alu atu i le Tala o le Tupe, o lea e faasolo ai. E te maua i lalo o le itulau lea, lona tolu, lena o lo o tau atu ai, faamanino atu a, e amata loa ona aveese ia tupe totogi, e muamua a statutory e aofia ai ma



nonogatupe a uma loa ona aveese mea na, o tupe e totoe ai mo le tausiga ma le atinae. Ua ou fiafia o lea na faamalamalama atu e le Taitaifono ia te oe, lea faatoa e malamalama ai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

**Tofa OLO FITI AFOA VAAI:** Lau Afioga i le Fofoga Fetalai.....

**FOFOGA FETALAI:** Se i tulai mai le sui usufono.

**Tofa OLO FITI AFOA VAAI:** Se o le pona lava lea o Au, o le fai ma vave lana oso, O le ta Levao ma le ta P, na tuu lava ia te oe ae ou sau nao le Olo. E le i faapea na ou toe alu ma au na tuu atu uma lava ia oe i le Paeaiga na tea nei, ae o le mea lea ou te talanoa atu ai, o le malamalama ma manino o le Tala o le Tupe, lea ua i ai i le taimi lenei. Ae o le Tala o le Tupe lea na tea atu nei ma tua atu, oka, se nenefu na i ai.

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoui:** Lau Afioga i le Fofoga Fetalai....

**FOFOGA FETALAI:** Se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoui:** Lau Afioga i le Fofoga Fetalai, o le ala lena lea na ou fai atu ai aua e te faitau loa i le Tala o le Tupe, e amata muamua mai lava i le mea lea. E amata mai i le faatulagana o tupe maua, ia ma le vaevaeina. A o mea la ia sa outou faia, a lea e alaala mai Aeau. Ua faafia ona outou aumaia i luga o le.. o lea e nono mai e le Malo ia tupe e totogi ai isi nonogatupe. Ae o lea foi e avatu i totonu o le Tala o le Tupe, ia a tatou nonogatupe uma ia sa i ai i aso ua tuanai, ma le vaegatupe lea e aveese. O lea e manino uma lava. O mea laa ia sa i ai mai lava i le amataga e le i suia, ae pei na o lou tagata lea ua sui. E le o suia lava le faatulagana, lea e tumau lava le avatuga o le Tala o le Tupe. O le mea lena lea ou te fai atu ai, o lea faatoa e malamalama i le tolu o nofoaiga. Ou te matua ofo.

**FOFOGA FETALAI:** Malo faafetai, o lea ua saunoa mai le sui usufono mamalu i le taimi lea sa le ioe i lou finagalo aua o le taimi lena o Levaopolo, ia a o le taimi lenei ua Olo, ia o lea la ua manino ma malamalama ae se i...E i ai le mea e fia faasao i le faauilavea a le Palemia, taimi sa outou, ia o le taimi la nei ua sau lava le sui ua ua leai se outou. Ia se i tulai mai le sui usufono pe sao le faauigaina e le Nofoa o le mataupu lea....

**Tofa OLO FITI AFOA VAAI:** Lau Afioga i le Fofoga Fetalai e sese lau Afioga, la e sao le Palemia o matou, silasila mai i le toatele o lau vaega lea ua i ai, o au ia i le saunoaga a le Afioga i le Palemia e sao.E tutusa lava le faataatiaga o le Tala o le Tupe, ae o le faasoa ma priorities lea, faatoa sao lava

lea talu ona tulai mai le Afioga i le Minisita lea e i ai nei, e alu le faasoa i tulaga le talafeagai....

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

**FOFOGA FETALAI:** Ia laa ese ia ma le tulaga lea e ala i le fautuaga a le Nofoa i lau Afioga i le sui usufono mamalu.

**Tofa OLO FITI AFOA VAAI:** Ma ua faauma atu. Manuia lau Afioga i le Fofoga Fetalai. Manuia le Fonousu a Samoa. Faafetai.

**FOFOGA FETALAI:** Ia malo faafetai, faafetai lava i le sui e pei ona saunoa. Ia tapa ma le faaloalo le sui usufono mo Faasaleleaga Nu. 1, e tulai mai e saunoa lau Afioga.

**Afioga HON GATOLOAIFAANA AMATAGA ALESANA GIDLOW (Faasaleleaga Nu. 1 i Sisifo):** Faafetai tele i lau Afioga i le Fofoga Fetalai o le Fono, le Fono usu a Samoa mo le avanoa, i se saunoaga faataupou a le itumalo o Faasaleleaga Nu 1 i Sisifo. Aua e ui ina e le o se taupou le sui usufono nei i le Maota, ae o le faaliliuina o le igoa fou o le matou itumalo, e taupou lava. Ma e ou te matuai avatu lava le faamalo i lau Afioga i le Fofoga Fetalai, i lou tulai mai ai e avea oe ma faatautaia o le tatou Fonousu, sui usufono mamalu o le Palemene o Samoa. E le fou le galuega, ma o gasu foi na e asaasaina i le taimi ua fano, ia lea foi ua e toe tulai mai ai nei, i lenei vaitau. Ma ou te talitonu foi i lenei Paeaiga lau Afioga i le Fofoga Fetalai, e na o se toa manumanu lava ma se tautai matapalapala e na te mafai ona faatonutonu folauina le Sa o Samoa i lenei Paeaiga ma lenei faigamalaga. Aua foi la lea e silasila mai, ia o matuai laua ia ua saofafai atu iinei, ma ua i ai le matou matupalapala mai le Afioga i le Palemia, matou te agaia le Malo, e fesoasoani ia Aeau, ma Olo ma Ili i le latou pitolaau na matuai gauliliina i le sailigamalo lea na tuanai atu nei. O lea la lau Afioga i le Fofoga Fetalai, ia utupupuina fulu o le segaula, aua lou toe tulai mai ai i le tofi faafoe ai le Sa o Samoa.

Ma e ou te faatulou atu, i sa ma faigata ma faiga o lenei Maota. Le afio o lau Afioga i le Palemia, le Afio o le Tamaitai Sui Palemia, Afioga i alii ma tamaitai Minisita, ae tainane foi le afio o Minisita Lagolago. Afio foi sui usufono mamalu uma o le Palemene, sui tofia o itumalo taitasi o Samoa, ae tainane le afio o faauluuluga o Matagaluega ma Faalapotopotoga Tumaoti o le Malo, faapea foi le afio o le Failautusi o le Fono ma le aufaigaluega o lo o vae ma lima i ai galuega a le Palemene.

Ou te faatulou ma faatalofa atu i le faafofoga tapuai mai a Samoa, le tapuaiga a Lana Afioga Mamalu O Le Ao o le Malo o Samoa ma lau Masiofo, faapea foi le tapuaiga a Sui o le Fono a Sui Tofia aemaise foi ma a latou Masiofo. E faatalofa atu i le tapuaiga a lau Afioga i le Faamasino Sili, ia ma le nofo a too, o alii ma tamaitai faamasino, i faamasinoga eseese. Ou te faatulou ma faatalofa atu i Suli ma Feoi o le Talalelei, i fatafaitaulaga e fia i

totonu o Samoa. O outou o lo o outou nofo tatalo ma faanonomanu aua se manuia o Samoa. E moni e mamao mala e fou mai, ae folau i lagima le Sa o Samoa, ona o a outou talosaga. Faafetai tatalo, fafetai tapuai mai.

**23 JUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E faatalofa atu i Amepasa, Komesina ma Faauluuluga o atunuu mai fafo, ma o lo o tatou galulue faatasi ma o lo o fesoasoani i le tauatiaeina o Samoa. Ou te faatulou atu i le tapuaiga a Samoa, o Samoa ua uma ona tofi, o ou paia ma sa, ua taoto ae ua se alaoo. O le a le oo i ai sa matou faamatalaga, ae faanuunu atu ia faatini o tausala, i le aufuelolooa, ma le au tulatoa, aua o le latou matafaioi lea. E faatalofa atu i le faafofoga tapuai mai a o tatou uso, le motu i Sasae, tulouna o ou sa ma faiga.

Ou te faatulou ma faatalofa atu i lou itumalo, Faasaleleaga Nu 1 i Sisifo, e moni lava ua vaeluaina lo tatou itumalo ia Sisifo ma Sasae, ae ou te talitonu e tumau pea fesootaiga faasiosiomaga ma faasinomaga, e tausai ai pea le nofo lelei, le nofo fealofani ia ma le felagolagomai i totonu o le itumalo o Faasaleleaga.

Ma ou te faamalo atu ai, i lou tuagane faipule, lau Afioa Sili Epa i lou tulai mai e avea oe ma uluai sui o le Palemene mo le itumalo o Faasaleleaga Nu. 1 i Sasae. Ou te faatulou atu i lou nuu ia Iva ma ona Atitala Salelavalu ma Lalomalava, o oe e iva i ai aiga o Malietoa. Le paia aua Sua ma le aumaga, Tusani ma le Aiga Sa Tusani, faapea foi le Taofia ma le Taumaopu, Saveiama ma Leitualasa, ma le mamalu ia te oe Sasilafaiga. Le paia o le Aiga Salevalasi, Afio le Tootoalii ia Tofilau, ma le Matua ia Asomua. Lau Fetalai Leauanae, ma le Nofoituaiga ia oe Sasulu. Le paia i Alo o le Tagalaoa, Aitu Tagata ma Fofoga Fetalai faapea le mamalu ia Safune ma Taulauniu. Le Paia i le Tamaitai Gatoloaifaana ma le Falefa o Tuilagi ma le aiga Sa Gatoloai. Afio Taito ma Leusoalii, ma lo latou Matua ia Tanuvasa Manaia. Afio le Alo o Tamaalelagi ma le Toa Inafo, ia Tia ma Tuioti, Afio le Gafa ia Soana'i ma Patani, Susu lau Susuga ia Tuilaepa. Le mamalu ia Sa Fuamoa ma le nofo a ituaiga, le Tapufanua ma le Faleono ma le Salemuliaga. E le faagaloina le tapuaiga a faletua ma tausai, saoa ma aumaga.

E faatalofa atu i le tapuaiga a Ao o Faalupega ma o latou faletua o faafalelemalu i totonu o le itumalo aua le tauasuina o le ipu o le Talalelei, aua le ola faaleagaga mo le itumalo. E faatalofa atu foi i le Susuga i le Tiakono Toeaina, o le Matagaluega, lau Tofa ia Vaelua Sene Samau ma lou faletua. E ui lava foi ina malole manumalo lau Susuga Solomona Tuatagalao ma le faletua ia Aneli, ae le mafai ona faagaloina le galuega sa e fitaituga ai aua lava le Talalelei i totonu o Lalomalava. Faafetai tatalo, faafetai tapuai.

Lou itumalo e, ua le maugagana le tagata, o se tagata faatauvaa i lau pule to ma lau faaloalo. Ua ou tiu ai i luma o Malo, sa ou saili i ni upu, loto, ni upu mamao maualalo i lau faaeaea ma lou tuuavanoa mai i lou le agavaa ma lou le aoga Ae ua ou fia faaogaina ma ou fia gagana i upu o le Salamo, ua faapea, -Lou itumalo e, afai e galo oe ia te au, ia galo lava i lou lima taumatau, afai ou te le manatua oe, ia pipii ae lou laulaufaiva i lou gutu. Pe a le faasili oe i mea uma, ou te fialia i ai. O lau pule lea, ua malie malo, ua malie lau pule to,

ae ou te faamoemoe i lau tapuaiga ma au talosaga, la outou faapai mai a o ou alofaiva, ina ia maua se -ai mo le ta itumalo, ae tainane se sao o le tatou itumalo i le atinaeina o le tatou atunuu.

**23 JUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E fia avatu lau faamalo i e sa matou tamomoe faatasi i leni tausinioga faigata, aemaise lau Afioga ia Magele Mauiliu Magele. E le itiiti lou aoga, faapea au galuega sa faatino, e le gata i totonu o le ta itumalo, a o le Malo, a o ta tulai mai ai faatasi i le tofi o le itumalo. Ae aumaia lou faatuatuaga ma au talosaga, ia manuia ai se auunaga aua le itumalo ma le atunuu. Lau Afioga i le Fofoga Fetalai, o lea ua i lumamea le Tala Faatatau Autu o le Tupe, mo le tausaga faaletupe 2016 seia oo i le 2017. Ae le i oo i ai sau faamatalaga, lau Afioga i le Fofoga Fetalai, ou te fia faamauina le faamalo ma le faafetai i le Afioga i le Taitai o le Malo, le tofa mamao, le tofa toa, ma ou te talitonu foi o le tofa mai le Atua, o lo o faatino ai pulega tatau ma le manino, aua le silasila mai e le gata i le atunuu o lo o tapuai mai, a o malo mai fafo, o lo o maitau mai po o faapefea ona faatautaia e Taitai o Samoa lona tamaoiga mo ona tagata nuu e tele. E faapitoa se faamatalaga i le toe fetuunaiga o fuafuaga o Minisita Lagolago e pei ona i ai nei, tasi le Minisita Lagolago i le Minisita o le Kapeneta. Ou te talitonu lava lau Afioga i le Fofoga Fetalai, o se faatosina tele lea a o alo atu i faiga palota ua tuanai atu i sui usufono i le manatu ma le iloa i le tulaga sa i ai i le Paeiga talu ai, o le a tofu ma le taavale, ae peitai, o le faaiuga ua i ai nei, o se faaiuga amiotonu ma le alofa i le atunuu. O lea foi ua maioio ai tulaga o Pulega a Malo, le Executive Role ma le tulaga faaletulafono, legislative role. O le mea lea e fia faaleo ai le agaga faafetai ma le faamalo i lau Afioga i le Taitai ma le tofaloloto aua Samoa nei ma a taeao.

Lau Afioga i le Fofoga Fetalai, e matua ioeina ma lagolagoina e leni itumalo le Tala Faatatau o le Tupe ua talanoaina nei, e le gata ina faataatia mai ni fuafuaga lelei tatou te agai i ai, ae ua aumaia ai foi ma se feau taua mo le tatou atunuu atoa, ina ia tatou taufai galulue e faaoga lelei, tagiilima, faaoga lelei faamanuiga ua foai mai e le Atua mo Samoa e ala lea i laufanua lafulemu ma le lausiusi e ola ai so o se mea tatou te totoina ai.

Ou te avatu le faamalo ma le faafetai tele i lau Afioga i le Minisita o Tupe, le Ofisa Sili o Pulega ma le Matagaluega mo le tapena maeaea e silasila totoa i le faaogaina o a tatou tupe ua maua mo leni vaitau. E le selu atu i lau Afioga i le Minisita, aua o lau lava lea matafaioi ma sa e auauna ai foi mo le Malo, ae le gata i lea, leaga o oe o le tama o le elele, tama mai Faasalele, le itumalo e sa ai le leaga na o mea lelei lava. Na pau lava si tuualalo lau Afioga i le Minisita, se i e tagai ane i nai aitalafu a nai tagata faipisinisi tumaoti o lo o i ai pea le faafitauli lea o le tuai ona maua atu mo le totogiina o latou auunaga mai le tatou Malo. Lau Afioga i le Minisita mo Galuega, Felauaiga ma Atinae Eeseese, faafetai lava mo le tali mai i talosaga na tuu atu e ala lea i moli eletise po o le faaauuina foi o le eletise i nai aiga ua nofoia uta, ona o le taumafai pea e atiae ma lagolagosua mai i atinae a le tatou Malo ma faapea foi ona atiae ai nai o tatou tagata taitoatasi. Ae le gata i lea, o le taumafai ina ia lagolagosua foi i le faufautua a le tatou Malo ina ia mei i uta ia aua ai ne i

afaina pe aafia i tulaga ua i ai nei le siosiomaga i tai ua siisii i taimi uma, ae ia tele mai ni faigata i le lumanai a ua lava tapena ma agai i uta i nofoaga e saogalemu ma lelei mo latou.

**23 JUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Lau Afioga i le Minisita mo Tagata Tafafao Maimoa Mai Fafu faapea foi lau Afioga i le Minisita mo le Soifua Maloloina, faafetai o lo o lua afifio faatasi mai se i avatu ai se manaoga. O le vairasi lea o le ZIKA, ou te lagona, e pei e foliga e le o alu tele i ai manatu o le tatou atunuu, ae i le vaavaai mai a fafo, ua matua afaina lava le tatou Turisi, aua ua alu Samoa o se tasi o atunuu e afaina tele i le vairasi lea o le ZIKA. Ma e molimauiina e i latou o lo o feagai ma ia atinae o faletalimalo le tele o Malo ua toe le oo mai po ua le faaooina a latou tafaoga po o a latou faigamalaga mai i Samoa, ona o le latou fefefe foi ne i afaina i latou i le faamai lenei o le ZIKA. Ma ou te tatalo atu ai ma ou fautua atu i a oulua Afioga i se galuega tuufaatasi a le Matagaluega mo Tagata Tafafao Maimoa Mai Fafu ma le Matagaluega o le Soifua Maloloina, pe auai foi ma le Matagaluega a Tina ma Tamaitai ina ia laugatasia aua e moni e i ai polokalame faalauiloa i le tatou atunuu, ae le i taitai ona afaina ai pe taofia ai le manatu lea ua tuputupuae i tagata tafafao maimoa mai fafo, o Samoa e le o toe sefe mo tagata tafafao. E tatalo atu foi a maea ai ni polokalame ua silafia ua taofia lea vairasi, toe fai se tatou faalauiloa lautele e faailoa atu ai i fafo, o Samoa o se atunuu e tumau lona matagofie aemaise lona talimalo lelei. Aua e le o po malae o le atinae lea o tagata tafafao mai fafo o lo o tua i ai le tatou Malo, o le isi lea tamaoiga tele o lo o sau i totonu o le tatou atunuu.

Lau Afioga i le Fofoga Fetalai, o nai motugaafa na e tuualalo atu ai le tatou Malo aua foi lo tatou sa fautele. O le a foi se upu, o le a foi se gagana ua sala, ia, ave ia i nuu le aina se vaivaiga o le tagata. Ia alofagia e le Atua lau Afioga i le Fofoga Fetalai, ia faaaupagaina pea e le Atua sou finagalo, aua le taitaiga o le Fono a Samoa. Ia alofagia e le Atua lau Afioga i le Palemia, Sui Palemia, le Aiga Kapeneta faapea Minsita Lagolago. Ia maualuga pea le aoina o le masina i Lana Afioga Mamalu O Le Ao o le Malo ma Lana Masiofo, faapea Sui o le Fono a Sui Tofia ma a latou Masiofo. Ia mama le lagi i le Afioga i le Faamasino Sili ma le Faamasinoga o Samoa, ia maua se malos i faaululuga o Matagaluega ma Faalapotopotoga Tumaoti a Samoa, faapea le Failautusi o le Fono ma le aufaigaluega aua le tautuaina o le Maota Fono o Samoa.

Lou itumalo e, aua lava ne i to le timu i Malaeloa, aua foi ne i masaesae le lagi pe pau le la i Vaoiva, pe gasetoto le masina i Alofisa ma Maota, pe to le timu ma tafea le tauofe i Faleulu ma Pousea, aua foi ne i usu le Fono i Faleloa ma Avea, ia mamao ni taatii ma matagitogaina Lotomua ma Malaetiti, aua foi ne i usu le fono i Malaetele. Aua ne i to le timu i Pouata ma Falemaii, aua foi ne i usu le Fono i Maota ma Matavai. Ia lagi e mama le susu o le Aufaigaluega a le Atua. Ia manuia tele le Fono a Samoa. Ia soifua.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Faasaleleaga Nu. 1 i Sisifo.*

**23 IUNI 2016**

### **Lafo mo le Suia o Itula Fono**

**FOFOGA FETALAI:** Malo faafetai ua maea le saunoaga a le sui usufono mo Faasaleleaga Nu.1 i Sisifo..

Ou te tapa lau Afioga i le Palemia mo sou finagalo i se lafo e te fia saunoa i ai.

### **LAFO MO LE SUIA O ITULA FONO**

**Susuga Hon TUILAEP AUELUA FATIALOFA LUPESOLIAI LOLOFIETELE AIONO NEIOTI GALUMALEMANA DR. SAILELE MALIELEGAOI:** Lau Afioga i le Fofoga Fetalai ou te tulai atu ma le faaaloalo, *Ina ia faamaonia itula Fono nei, mo le aso, o le agaga ina ia tatou taumafai e vave faamaea ma pasia le tatou Tala o le Tupe, amata i le 9:00 malolo i le 1:00, ona toe amata ai foi lea i le ta o le 3:00 malolo i le 7:00, ona fai ai lea o sina malologa puupuu ona toe amata ai lea ma le agaga fiafia ma le faagaetia i le 7:30 ae faamaea i le afa o le 11:30 i le po a nanei.*

*Faaluaina e le Minisita mo Faatoaga ma Faigafaiva ma le Minisita mo Pisinisi, Alamanuia ma Leipa.*

*Na faamaonia le lafo.*

**FOFOGA FETALA** O le a faapena ona faagasolo galuega ma Tualumaga a le Fono Aoao. Ia, ou te tapa le sui usufono mo Vaimauga Sasae mo lau saunoaga.

### **LAUGA FAA-TAUPOU**

**Afioga SULAMANAIA FETAIAI TAUILILI TUIVASA (Vaimauga Sasae):** Faafetai i lau Afioga i le Fofoga Fetalai mo le avanoa, ae o le sui usufono lenei mo Vaimauga Sasae ua tulai atu. Ae le i faia se faamatalaga i le Tala Autu o le Tupe ua opea nei i le Maota, ou te tomanatu lava i le aso na tofi ai le Fofoga Fetalai o le Maota e avea ma Fofoga Fetalai, na saunoa ai le Fofoga Fetalai e faapea; O le tofiaina o au, o le a faafaigofie ou tiute aua ua leai se Itu Agai. O Ae sa matauina ananafi e lou sui usufono le faigata o le galuega a le Fofoga Fetalai i le tau vaovao mai o sui usufono fou ua le mafai ona taofia. Ou te faatusaina lava se i tulou e pei o le taavale afi, se i tulou, ua sau lava, e fiu le leoleo e talotalo atu, ae o la e alu lava. Ina ua maua atu e le leoleo, ona fai atu lea o le leoleo, e te iloaina le mea lea na ou talotalo

atu ai ia te oe, e le o le saosaoa po o se solitulafono, a o lou peleue lauga lena e omia i le faitotoa o lau taavale o lea e tautau mai fafo.

Masalo o se agaga faagaetia ia te au le tofiaina o au ou te vaesalaina le gasu o le taeao mai lava i le siufanua i Saua ina ua ae ma le manuia le aso ma le faamoemoe.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ae o le a mapu ia i logoe le tapulua o alii ma le galugalu o vaitoa aua o Samoa o le atunuu tofi, e talataua Toga ae tofi Samoa. Ua malepe le laau nai Siuofaitotoa ma Tulimataala, ua nofo ai nei au ma lou Tumua ma lou Ituau ma lou Alataua. E tasi lena faavae o Samoa. Ua malepe foi le tofiga nai le malae o le vavau, o lo o taoto ai le laau na fausia lele e tausi e Leulumoega ma Aana ma Sanaeseese, tasi lena faavae o le atunuu. Ua malepe le i'a na i Mulinuu ma Togafuafua ma Sepolataemo ua maua ao o Atua, uso o Atua, iu o Atua, atua o faiga, Atua o le Fauono, itu o le Tapaau ma le apaautane, ma Atua e le tonu. e matua le tuu ia te oe Lufilufi. Ua taoto foi Puleono ma Salafai, Fuifatu, Vaituutuu, o Finao, Vailoa, Tia ma Matia Ituau ma Faletoi.

E le faagaloina foi le motu i Sasae i Malotumau ma Fatulegae, o Laloifi ma le Falesau ma le Faleomavaega. Tulouna foi pou o masame ma Tuisaua ma le Malaetele o ou paia ia Samoa na lua, ae se i ou faasee ia i Muliava ma ou faalanu vai o nofoa aua le ee tapuai o le afaigaluega tofofi a le Atua i so o se fatafaitaulaga e fia o lo o nonomanu aua se manuia o le tatou Faigamalo nei. Aua le afio tapuai o Lana Afioga Mamalu O Le Ao o le Malo, afio le Afioga ia Tuiatua Tupua Tamasese Efi ma le Masiofo, afio foi sui usufono o le Fono a Sui Tofia ma latou Masiofo, afio le Afioga i le Faamasino Sili ma le Ofisa o Faamasinoga o Samoa. Afio lau Afioga i le Palemia ma le Sui Palemia ma lau Kapeneta, le Fofoga Fetalai ma le Sui Fofoga Fetalai ma le Palemene o Samoa, o paia ia o Aiga Sa Tupua ma Sa Malietoa, o le mamalu foi i le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi i lou loto lou itumalo pele o Vaimauga Sasae, i le amata mai Laulii i le afio o lau Afioga i le Sao Faapito, lau Afioga i le Saoalii lau Afioga Leniu, aemaise ai alo o Leniu, le Afioga ia Fuamatu ma Maposua, le matua ia Taliulu ma le aiga paia o Salevalasi. Lau fetalaiga Fuatimau o oe o le moa vinimua ia Tuamasaga aemaise ituala e fia ma oe Tuisamau.

E le faagaloina foi le tapuaiga a si ou nuu o Letogo aua le afio o le Afioga i le Fofoga o le Alataua Tuliaupupu, o le paia lava lea aua le Usoalii ma le matua i le Teialii, alo o Malietoa, alo o Tuliaupupu ae a Mautaua ma upu ia Tuisamau.

Si ou nuu o Vailele aua le afio o Samoa ma le falefia o alii, le mamalu i le Gautaala, le mamalu ia laua matua ma le mamalu ia Saleupolu.

Le tapuaiga i si ou nuu i Fagalii, o le paia lava lea aua le afio o le Alaalatama, Tuisugaletaua ma Luamanuvae, malii mai Pulemagafa ma le Faiga ma oe Saleupolu. E le galo foi nai ou pitonuu i Maugafiafia i tupu ma tamalii o le atunuu o lo o afio ma alala ai ona o ni fanua faatau tumaoti o lo o alala ma afio ai. Ia aea le afaigaluega a le Atua o lo o tapuaia le leoa le

paia o lenei fonotaga aemaise o lo o alofaiva i fata faitaulaga e fia o le aufaigaluega i totonu o si ou itumalo. E le faagaloina foi le tapuaiga a le Afioga i le Ofisa Sili ma le Matagaluega o Tupe Maua sa ou tautua ai i le tele o tausaga lenei ua ou pae mai ai i lenei faagatama talofa, talofa lava.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolaloaiga faaauau i luga o le faitauga faalua**

Ia eʻe maia i o outou seuga ma o outou taomagamutia sei liliu ane la outou sui usufono e fai se tatou sao aua le faagatama o le atunuu. Ou te fia talanoa i le Tala o le Tupe matagofie ua opea i le Maota, lau Afioga i le Minisita o Tupe e momoli le faafetai ma le faamalo ua opea i le Maota lenei tala matagofie. E leai se lagona o le suesue ae o le lagona o le faafetai ona o le faasoa ua iai. Na o nai vaega a e fia faaali ai se manatu ona o le tulaga lea i le Ofisa o le Siosiomaga o lo o toe faamatuu atu iai nisi o vaegatupe aua le aoina o le lapisi sei tulou. O le tatalo a lenei sui usufono o tulaga ia i loli lapisi ia po o konekarate ia e iai a le agaga o le sui a silasila atu o lea foi ua toe faaopoopo le \$610,000 mo le totoigiina o ia konekarate. Ae pe le mafai ona faamatuu lea vaega seleni agai i afioaga ma alalafaga, e maua atu po o se mea o le \$2miliona i le \$3miliona o lo o faagaga mo le aoina o le lapisi sei tulou. Ia ona iai lea o le manatu o le sui usufono na o se talosaga i le MNRE, le Minisita ia pe le mafai ona fuafua i le 49 o itumalo o le tatou Palemene ia pe fuafua tai \$50,000 a le itumalo ae aua le toe tuuina i konekarate ae tuu i itumalo e faasoasoina. A faapea la e \$50,000, o le faataitaiga o lou itumalo e fa nuu o lona uiga pe \$15,000 a le nuu i le tausaga ona o le fai alofa foi i le tele o le eleele lea i Tafaigata o le a uma teu ai le lapisi. Ae o lo o iai a tua maota o afioaga pei o le matou nuu ma le matou itumalo o lo o tele tua Maota e le o faaogaina e fai a e le nuu se i tulou le mea e lafoai ai le lapisi mama ma le lapisi mamafa.

Ia ona oo mai ai lea i le tulaga o le Tala o le Tupe i le vaega lea o le Ofisa Faatonu se i silasila ane le Afioga i le Minisita i lea vaega i le tupe o laisene. E pei o lea e matauina pe na o le \$100,000 o lo o tuuina mai i le laisene o le Ofisa Faatonu ae pei o lea e matau o le tele foi o ia Kamupani o lo o iai i le tulaga lea ia pe le o mafai ona ova atu i luga se tupe e maua mai ai i laisene ona a fuafua foi i tupe maua a ia Kamupani o lo o faatinoina ia pei o se vaega lena. Ia ae o lea e vaai atu foi o lea foi e toe faamatuu i ai e le Malo se grant i le Ofisa lea o le Regulator a o lea e matau o lo o lava a le tupe o lo o maua mai latou seleni e faatino ai lea fuafuaga. O le tulaga i le vavao o lo o i ai nei le aufaigaluega a le Malo i le tulaga lea o le long service ia e tatalo atu i le Afioga i le Minisita o Tupe po o le a le tulaga o lo o iai lea vaega ona o lo o mafatia le paia i le aufaigaluega a le Malo ona ua le maua lea faamanuiaga. Ou te tatalo atu ona o lea foi e aafia ai lenei sui usufono, e leai se agaga o le Tulafono. Ae o le lape lea i ai o le faatinoina e le Matagaluega lea faatinoina agai i totonu o Matagaluea a le Malo o i lea lape. Ia ae o le tala mai faimai ua saunoa mai ma avatu i luga o le FK. Ia ae a silasila o nai Faiaoga ma e ua loa ona faigaluega i le Malo a o lea ua faamuta le tulaga lea o le long service. O lea la e tatalo atu ai sei toe silasila if ope mafai ona toe tatala atu i



tua se avanoa ina ia mafai ona afiio loa le atunuu e faaoga le long service lea. A o le mea lea e tau popole ai ma faanoanoa ai ona ua faanatinati mai e le Matagaluega e ona Tulafono ma aveatu ai le faatanaga ia ae le o lelei ona soalaupule i tua i afioaga.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E avatu lau faafetai i le Afioga i le Minisita ona o le Tala o le Tupe, faafetai foi i le Matagaluega o Tupe Maua matauina foi le tele o tausaga sa pologa le aufaigaluega timuia ma laina ona o le tulaga sa faatino ai auunaga. Silafia o le vaega lea o tiute ma lafoga e aumai containers ia e tiute a i tai ae lei aveatua i tua. Ia ae faafetai o lea ua maua atu o lea ua toe faasaoina mai se isi seleni \$200,000 mai se mea sa iai mai le faatinoina o se fale e tiute ai oloa. Ia aua o le tulaga sa iai e le gata ina gapatia foi o le aufaigaluega i le timuia ma le laina ia ae o le mamalu foi o le atunuu aua e laa i fafo oloa ae faatino le galuega ia a o isi taimi e timuia ma laina. Ae faafetai i le tulai mai o le Minisita ma le Ofisa Sili foi i lenei vaitau ia lea ua fai ai se fale faapea e mafai ona faatino ai lea auunaga. O se manatu o le sui usufono i le vaega lea o le S Cable ia pei o le tele o nei tulaga tupe o lo o faatinoina e totogi ia na o se talosaga a po o le a le tulaga i le toe totogiina mai o le tatou tupe lea pe a faataunuu le tatou fuafuaga fou o lo o iai. Ia o lona uiga o le a le mafai ona toe faatino lea tulaga tupe lea faatino atu e pay ai le vaegatupe lea o le S Cable. Ia pei o nai vaega na ae matua lagolagoina e lenei sui usufono le tulaga i le Tala Autu o le tupe ia ma le Tala Faaopopo o lo o i ai nei.

Ia ae o le avanoa foi lenei e aveatu ai lau talosaga i si ou itumalo o faafofoga mai i atinae o lo o fia faatinoina. Ia amata atu i le Afioga i le Minisita lea, pau a lea o le Minisita aulelei lea iai le Afioga Afamasaga leaga o ia na matemate Malo. O le nuu lenei o Lauili lau Afioga i le Minisita o fesootaiga matua nenefu atoa mea ia o TV ona o le mauga. Ia e tatalo atu pe le mafai ona fai nisi pou i le va o Letogo ma Lauili e faamanino ai TV. A oo loa la i le taimi o le leaga o le tau ia e matua pogisa atoa le TV, e fia faaoga foi e si ou Nuu o Lauili le tulaga lea i le Broadpan pe mafai ona faaoo atu i ai le tosoina o se isi foi mea ia ona o le tele foi o si o matou nuu e fia o foi i le mea lea o le facebook ia ae o le faalavelave na o le telefoni ae o le tulaga foi gale o le tuuina atu i fale e faatinoina ai ia e le o maua lea auunaga.

O le Minisita mo Faamasinoga ma Pulega Tau Faamasinoga o lo o afio mai, ia e avatu le faamalo i le tele o le suiga fou lea ua iai lau Matagaluega ia e le toe o a se faamatalaga i le tulaga lea. Pau lava se talosaga ona o le tulaga lea i le tofiaina foi o alii Faamasino, ia aua o le taimi sa ou i ai i le service ae ta te fiu e apply atu ae fai mai e le oo tausaga i le tulaga e tatau ona manaomia ai e lau Afioga. Ia ae pei o lea e avatu tagata foi na, se i tulou ua litaea mai matagaluega ma ofisa, afai ua litaea o lona uiga, e le tatau ona toe faaogaina. Ia ae pei o le tele lava o nai Faamasino o tagata ua litaea mai isi Matagaluega lea ou te vaai ai, ia se i silasila ane i lea tulaga.

Le Minisita mo Aoga, Taaloga ma Aganuu ia o le tatalo a lenei nuu o Letogo ua ave le o atu o tagata e aumau ma faatau fanua i Vailele ma mea ua

faatumulia ai ia faleaoga a le nuu lenei o Letogo, o le tatalo la i ai le reserve a le MNRE i tuamaota o Letogo pe le mafai ona toe fai ai se tatou faleaoga i ina.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Fai ai se faleaoga e faalatele ma ai ia ma nai tagata foi o lo o alaala ai i ina ina ia mafai ona agai i ai ia faatasi ai ma se malae taalo aua leaga o e o lo o a lala i uta i Maugafafia ma Vailele-uta ma le tulaga lea e le o i ai se mea e agai e taaalo ai nai tagata ia, tuaia Letogo ia la e i ai a latou malae ma Vailele, ia a o nai tagata ia ua faatau fanua ma afifio ai i i, e le o i ai se tatou malae taalo e faatino ai. E pei o le tatalo atu i lau Afioga i le Minisita, se i tilotilo ane i se faleaoga ia po o se malae taalo foi o lea vaega.

Ia tatou oa tu i le Minisita mo Tina ma Tamaitai, Atinae o Nu'u ma Afioga ma Agafesootai, ia faafetai i le tulaga i le sao o le tofiaina o lau Afioga e taitaiina le Matagaluega lea o Tina aua ta te faalogologo mai a i fafo ae le i oo mai i totonu ia pei e le matagofie le tofi o se tama e alu e vaai se Matagaluega o Tina. Ia faafetai i le tofiga a le Afioga i le alii Palemia o lea ua tofi oe e te taitaiina ma vaaia ua fetau onomea foi faatasi ai ma lau Minisita Lagolago. Ia pau lava le tatalo pe mafai ona toe faaauau pea ia tulaga i leí . Na iai le Saina na taunuu mai iinei ia o le popolega o le mea lea o le laufala, ua sau le Saina e faatalatalanoa le mea lea o le laufala fai mai e fia manaomia ni laufala e toto iinei i Samoa ae laʻu atu i lona atunuu e faimai ai le ietoga. Ia aua o tatou a tatou i le ietoga lea fai toetiiti atoa le masina o lalaga. Ia o nai manumanuga na ina nei omai foi ia tagata mai fafo aveatu le tatou laufala ae lalaga mai tala mai le ietoga pei o se talaga ie mai se faleoloa.

Ia le Afioga i le Minisita o Tupe Maua ia o lo o matagofie lau Matagaluega pau a le mea o le tofogi o nai aufaigaluega o lo o ovataimi pei o le tou Matagaluega lea tele ina ovataimi. Ia pe le mafai ona faatino pea ia auaunaga aua o le tou Matagaluega o lo o feagai pea ma auaunga ia i le tiuteina o uafu ma vaalele.

O le Matagaluega o Faatoaga e tatalo atu i lau Afioga o le itumalo lenei ia o lo o manaomia a le tuuina atu o nai manupapalagi sei faatino ai o matou fuafuaga.

Ia o le Afioga i le Minisita mo Galuega, Felauaiga ma Atinae Eeseese, ia o le tatalo a le nuu lenei o Lauili talu lava ona faavae lenei nuu e le i faia lava se auala galue i luga i le mauga. A silasila foi i lenei nuu o Lauili o le nuu lenei e sai ai le tala e muafale i le moana ae tuafale i papa, fai o le moana i luma e aia mai ai le taligalu ia a o tua foi na o le o atu lava i tua tau loa i le mauga. E tatalo atu i lau Afioga i le Minisita mo Galuega, Felauaiga, ma Atinae Eeseese, pe le mafai ona faatino ni auala e agai i luga o mauga e le gata e o ai si ou nuu e aumai ai fua o faaeleleaga ia a o se mea foi e sosola ai pe a sau se Tsunami, ona e le mafai ona iai se tulaga mamao i uta o le nuu. Se i silasila ane i le vaega lea pitonuu i tai o Lauili ia ma le pitonuu mai ia faapena foi lau Afioga le auala. Ua tatalo mai foi si o matou nuu i le aualatele lea oso atu i

totonu o le nuu ia a tou silasila pe tout e afifio atu i Laulii toetiiti a oso auala i totonu o fale. Ia pei o le tatalo a le sui usufono pe le mafai ona taunuu loa i le mea e amata ai Laulii alu atu ai loa iina le auala faatoa toe ea ifo a i o aua pei o le mea lena e faetete ai foi i auala pe a oo i o ona toetiiti a oo i totonu o fale.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ae a faatino lea fuafuaga alu atu a i luga o le taligalu ae ea ane i le pitonuu i tai, ia o oe a o le tupu lau Afioga i le Minisita mo Felauaiga. E faapena foi le aualagalua a Letogo lau Afioga i le Minisita pe le mafai ona e silasila ane iai ia faatasi ai ma auala tuloto i uta i Letogo ma Vailele pe mafai ona e silasila ane i ai. Lau Afioga i le Minisita o le nuu o matou i Fagalii ia a tou silasila ua tele ina faaoga atu le auala le alu atu i Fagalii-uta sei tulou agai i lalo o le vai i le aoga lea Samoa Primary. Pe le mafai ona o la e faaogaina e le mamalu o le atunuu le malae vaalele i Fagalii ia ae a outou silasila i lalo mai o le malae vaalele i le pioga lena ma le vaiti e tatalo atu ai pe le mafai ona fai se auala savali po o se footpath e afifio ai ona e fai o le vaiti o le auala ae leai se mea e feoi ai ma savavali ai tagata i le auala faamolemole. Sei silasila ifo iai lau Afioga i le Minisita mo Felauaiga.

Ia lau Afioga i le Minisita mo Falepuipui ma Auaunaga toe Fuatana, e tatalo atu lenei itumalo i se falepuipui, pe le faia sou lala e avatu ai ni au Leoleo i le vaega lea a matou i Vailele uta po o Maugafafia. O le faaeteetega ona ua tele atu nai tagata e afifio atu i i ia ae pei o lea e tuafale foi nai aiga ia i pulega a alii ma faipule. E le gata foi i lea o le tele o e ua faatetea mai isi nuu ona oatu lea nofo lisi ai i fanua nei, e leai se mea o tupu ae mo le puipuiiga o nai tagata o lo o umia nai fanua ii pe le mafai ona fai ai se lala o sou Ofisa Leoleo e faigofie ma le tau vili soo mai, ae a iai a se tagata iina e le mafai ona toe iai se tagata e toe faatinoina sea vaega faapea.

Lau Afioga i le Minisita mo le Soifua Maloloina, o le tatalo foi a lenei itumalo i si ou nuu o Laulii, a faia se tatou lala ona ua tele a ina omai i le falemai. Ia ae pe le fai iina i Laulii i le pitonuu i tai i le vaega foi o lo o iai nai fanua ia sina lala pe taitasi a i le vaiaso ona i ai nai fomai e faatino ai lea auaunaga. E lelei foi lena e omai Atua le oo mai i le falemai ae omai lava ma faagata i i le falemai lea o le a faatu i le pitonuu lea o Laulii. O le tatalo foi i lau Afioga i le Minisita mo le Soifua Maloloina, ia pei o lea e matauina a le manaia o le auaunaga o lo o i ai ia afioga i tamaitai ma alii fomai o lo o auauna i le po. O lea ua e tofiaina ia auvaega ia fai latou private lea ua faatinoina ni auaunga i le po, ae o le tatalo pei e manaia pe a faaoga pea lau staff fomai i le po a o le vaega lea private e manaia le tuu mai i le ao pe manaia le tuu mai i le ao e faasikuea ai le tele foi na le o latou, ae o lea foi ua toe agai atu i lea auaunaga faafetai atu ai

Lau Afioga i le Minisita Fiamme po o lau Afioga i le Sao Faapito, ia e pei ona ou tatalo atu i le tulaga lea i le taligalu a Laulii, ia a outou silasila i ai ua matuai aia lava, ona o mafuaaga nei. Sa ou fesili atu po o le a le mafuaaga ae fai mai o lea ua faataga atu e lau Matagaluega le lauina o le oneone. Ia e fai la o le naunau foi i le atinae o le Malo, ia ae a outou silasila ai, o lou aiga i ina i

Laulii a louloua foi le tau, e sau a le sami ua oo mai foi i tuamaota. Ia o le tatalo pe le mafai ona silasila ane i se taligalu a lenei foi afioaga lea ua ou tatalo atu ai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E le gata i le alu atu o le taligalu e ea ifo i le pitonuu i tai, ia alu atu ai foi ma le auala, ona alu ai lava lea e free way e leai se isi e faalavelave aua foi o lea o le a le oso atu i fale ma totonu o le afioaga, ia e pei o nai motugaafa na a lenei itumalo.

Faafetai tele lava i lau Afioga i le Palemia mo le taitaina o le tatou Malo, ia o lo o lelei mea uma lava, le tapuaiga a Samoa ia o lo o aumai lava le lagolago i lau tapuaiga ma le faafoeina o le tatou Malo, ia o lo o faapena ona manuia ai ona tagata nuu.

Ia o lenei itula e le mafai ona tuua se avanoa ou te faafetai ai i lou itumalo, ia lou itumalo pele, ia taumafai e molimoli atu se agaga faafetai i lo outou faatupu ma lo outou faatamalii. Ia o ai ea le tagata o ai ua manatu mai ai?, ia o ai na manatu o le a fai Eseta ma masiofo? I la outou faaaloalo maualuga ma la outou faaeaea, o le upu moni, ia ua ou sula lea ua ula. Ua ou sula ua ou maua, ua ou sula ua ou afifi i la outou faaeaea i la outou tofa faatupu, tofa faatamalii ma le utaga faafaleupolu. Leitioa a saafi le fatupese, e uso a mo aso uma, ae o ou aiga ma ou nuu mo aso vale. E le faagaloina foi le aufaitatalo i la outou punapunou, ma tatalo i le ao ma le po, ia ma sema i le Atua le tofa, lenei ua oaoa ai nei i Faleseu, ae sao i maa o malie ona o lo outou titi faitama, ua mafua ai ona popo mosi futiafu e tasi, o au lava o la outou tamafanau. O la outou pule lea, ua ou sapaia faafatua eleele. Faafetai, faafetai tele lava. Ia manatu ifo manatu ane, o Sulamanaia i Letogo ma Laulii ma Leituau i Letogo, Togia i Vailele Naea i Fagalii, Fetaiai Tauiliili Tuivasa.

O le a faauma atu lau Afioga i le Fofoga Fetalai. Ia alofagia e le Atua, ia sao sao a lautolo la outou tofa faatupu, aua tuutauaiga i le alofaiva o le Palemia ma lana faigamalo aua se lumanai manuia o le faigamalo. Lou itumalo pele, e le galo outou i lau tapuaiga, manatua pea lo outou auauna i a outou tatalo.

E le galo foi lenei taimi ou te faafetai atu ai nei i lou uso sa ma tauva mai i le nofoa o lenei itumalo le Afioga Tuisugaletaua ia e momoli atu le agaga faafetai a o e tulai maifo e ave a oe ma fofoga foi o le tatou itumalo, ia faafetai le taalo faatausala, ia faafetai foi mo galuega lelei sa e faatino foi a o e tulai mai i lo tatou itumalo. Ia o le tala, ia e taaalo a uso a o taua e aiga, ia aua o taua o uso tuofe e le o se uso taufeagai. Ia manuia tele lau Afioga i le Fofoga Fetalai ia ma le tapuaiga a lenei Maota, ia ona o Iesu, soifua.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoga Faa-Taupou a le sui usufono mo Vaimauga Sasae.*

**FOFOGA FETALAI:** Malo, malo faafetai, malo tapena, malo foi le onosai i le faatinoga o faiva ma tiute aemaise o le taumolimoli mai o finagalo o le

itumalo. Ia e i ai le mataupu na ona faamanatu atu i a tatou sui usufono mamalu, o le mataitu lava i le tulaga ina ia faapena ona sologa lelei mo le tatou galuega, popole neʻi tulai mai se sui usufono i le tulaga masani o faauilavea. Na ona lapatai atu e le o sui usufono uma, o lo o i ai ni sui usufono ia e aofia ai ma sui usufono tuai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E faamanatu atu o le tatou Tulafono masani, i le faatinoga o le tatou lauga, o lauga i totonu o le Palemene, e faasa ona faitauina. Ia ua na o ni ootoga lava i tulaga e pei ona i ai ia le tapenaga a le faipule a latou ma le sui mamalu. Ia faapena ia e faaalua ma le agaga faaaloalo lea itu, ina ia manatu ina ia tausia ma faamalamalamaina a tatou Tulafono Tumau. Ia ma o le avanoa foi lenei e tapa ai se isi sui usufono, tulai mai e fia saunoa e tusa ai ma le tatou galuega.

**Susuga Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** Ia o se faamanatu i le tulaga o mataupu foi ia e laga i le Tala o le Tupe, ona e i ai le taimi e auiliili ai le Tala o le Tupe, mataupu uma e faasaga i le Tala o le Tupe, mataupu e laga mai i totonu o mataupu taitasi, e i ai le taimi tatou te agai i ai. Mulimuli e le mafai ona matou tali atu ma faasao nisi o mataupu pe afai e laga mai i le taimi o saunoaga faa-taupou. Na o le isi lena mataupu ae i ai nai isi vaega ia sa lagalaga ai ia mataupu i totonu o le vaega o le Tala o le Tupe, e i ai le taimi tatou te auiliili ia ona tagofia ai loa lea o ni fautuaga e aumai, ia ma malamalalama tonu ai i mataupu o lo o laga, ona e tele a nai vaega e aafia ai faiga faavae, ia ae le mafai ona matou tali atu.

**FOFOGA FETALAI:** Ia ua manino lea folasaga aua o itu taua na e ao ona silafia pea e le Maota, e le gata i sui usufono tuai ae faapea foi sui usufono fou, aua o tiute a o le Malo, so o se mea e taua ai le tulaga lea e faapena ona tulai mai e faasao, ia ae ona o le manatu lava i le tatou ava fatafata, ia o a outou saunoaga faataupou. Ia ae pei o le tulaga lena malo foi le Malo ona lavapapale mai, tatou te see atu i le iloiloga o le tatou Tulafono o le Tala o le Tupe ia ona faapena ona see atu i tulaga o mea taitasi. Ia mo le saunoaga lautele, saunoa i faavae ma le Tamaoaiga ma itu aoga o le tatou Tala o le Tupe. Faamanatu atu lea itu e pei ona malele le Afioga i le Palemia. Tulai mai le sui usufono mo Faasaleleaga Nu. 4, le Afioga i le Minisita Lagolago o le Va i Fafo.

**LAUGA FAA-TAUPOU**

**Afioga PESETA VAIFOU TEVAGAENA (Faasaleleaga Nu. 4):** Faafetai mo le avanoa, maua le laolao o lenei itumalo taumafai atu ai sona sao i le Fonousu o Samoa lona XVI o le Paeaiga o le Palemene. Lau Afioga i le Fofoga Fetalai, sa tele a se manatu e fia oo le lauga a Satuala lenei itumalo

Faasaleleaga Nu 4 i le tele o vaega o Matagaluega eseese, ae manatu, e manatu foi i le tatou taimi

O lenei lava o le a sauni le lauga, ae aumai le fautua a se tasi o lou itumalo, Peseta ia sweet le lauga, aua neʻa sour. O au la lea ua faigata ia te au, lau Afioga i le Fofoga Fetalai, pe faapefea ona ou malamalama, ona ou fai atu lea i le matai, o le a le uiga o le sweet? Ae fai mai, puupuu le lauga.

**23 JUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

A sour loa lona uiga ua umi lau lauga. O le mea lea lau Afioga i le Fofoga Fetalai, ia e le tele lava se motugaaafa a lou itumalo, ae avea ia lenei avanoa e faatalofa atu ai i le paia maualuga o le Maota, le Afio o lau Afioga i le Fofoga Fetalai, ia Afio foi lau Afioga i le Palemia, po o le Taitai foi o le tatou Tama. Afio lau Afioga i le Sui Palemia, mamalu o le aiga Kapeneta, ia faapea foi le mamalu o le la itu o le malu, mamalu o suifono uma. Ia e fia oo foi se faafeiloai atu i le paia maualuga i Faauluuluga o Matagaluega uma, ma Matagaluega Tumaoti ua mafai ona tatou potopoto mai i lenei aso, tatou te molimauina le uluai fonofono, o le Fonofono amata o lenei Paeaiga. E momoli atu foi le faamalo ma le faafetai i lau Susuga i le Failautusi, aao tusitusi o le Maota ma lou soatau, a o le tapuaiga mau a si o tatou atunuu. I le afio o lau Afioga O Le Ao Mamalu o le tatou Malo ma lau Masiofo, afio o Afioga a Sui o le Fonofono Tofia ma a outou Masiofo. afio o lau Afioga i le Faamasino Sili, le mamalu i Tamaitai ma Alii Faamasino, Ofisa o Faamasinoga o Fanua ma Suafa, ia ae a le tapuaiga a faletua ma tausima saoa, le aualuma ma le malosi o le tatou atunuu. E avea foi lenei avanoa e momoli atu ai le faamalo ma le avatu ai le faafetai i le tapuaiga a Auauna paia a le Atua, o lo o outou nonomanu ma faafaletulua i itu e fia o Samoa, aua la outou tatalo faifaipea i le po ma le ao, aua se manuia o Samoa.

Lau Afioga i le Fofoga Fetalai, e fia molimoli se manatu o lenei itumalo, e lagolagoina ai le Tala o le Tupe e pei ona faataatia i luga o le laulauafono.

Lau Afioga i le Minisita o Tupe, e momoli le faamalo ma le faafetai a lenei itumalo, faafetai foi i si ou itumalo, le paia ia Salelologa i le Falefia ma le Falesalafai. Ua filifilia lau Afioga e avea foi ma sui usufono, o le itumalo mo lenei foi Paeaiga. Na o le agaga maualuga ma le agaga faafetai ia te au, ia o oe foi o le Tama Satuala, faafetai ona o lenei tofiga ua tuuina atu e le Malo i lau Afioga, o se tofiga ua tala tatau, talafeagai, ona e talitonu lenei itumalo ua leva ona e tautua i le tatou Malo i tupe, o le ala foi lea ua sili ai ma talitonu lenei itumalo e talia le tala o le tupe i lenei taeao, ona o le vaavaai ma le maitau, ia e utiuti lava le faasoaga a si o tatou atunuu. E le o lava foi se tatou tamaoiga, ae ou te faafetai i le Atua, o lo o foai mai pea le ai i lea aso ma lea aso ina ia faapea ona maua e tagata uma o Samoa le soifua lelei. O le mea lea e momoli atu ai le faafetai i lau Afioga, ua leva foi ona e galue i tupe. O le ala lea e avatu ai le lagolago ma taliaina ai e lenei itumalo le Tala o le Tupe e pei ona faataatia. Ae ou te le i see ese i le vaega lea o le tulaga i le tupe, e fia oo atu se faamatalaga ona o se tasi o galuega lea e semamanu a tulai mai ai se faalavelave i tai i le uafu i tane suauu. Ou te manatu po o Matagaluega a lau Afioga lea e patino tonu i me tau suauu ma le penisini.

O le a le oo a sau faamatalaga i tane, a o se tuualalo a lenei itumalo lau Afioga i le Minisita, sei toe silasila ane lava i le pipeline lea e sau mai tai i le uafu, e oso mai i le ogatotonu o le taulaga e agai atu i tai i a tatou tane suauu i Sogi po o malupuipuia.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Silasila foi lau Afioga, lea o lo o feagai le tatou atunuu ma afa malolosi aemaise mafuie. Tele o mafuie ia e tai le misi a se taimi o le tausaga 6.7, 6.5. O isi taimi 5.7 le malosi o le mafuie, atonu tasi lea vaega taua lau Afioga i le Minisita o Tupe, lea o lo o tulai mai ai se isi vaega tupe tele o le tatou malo, lea o lo o tulai mai i le suavai, Matagaluega o le Suavai, le tele o suavai maimau. E talitonu o lo o lelei le faatinoina o ia galuega, ae peitai i lalo o paipa nei e tanumia i le manava o le eleele, a oo ina luluina e le mafuie, e faapena foi ona luluina. E tasi lea vaega masalo o lo o tele ai le liki lea o le suavai lea e tele e faitau miliona ma miliona le tupe maumau a le Matagaluega o Galuega, ona e mafua mai i mafuie. O le tuualalo lau Afioga sei toe silasila ane lava i pipe line ia, pe e leai se isi faiga. A matau i aso ia sa sau lava le vaa taula i tai i le pole la e i ai ona pamu sao lava lea o le suauu i tai i Sogi. Ae ua ese le mea lea ua i ai nei, ae atonu o se tulaga lelei sa taumafai foi le Malo e puipui.....

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** Lau Afioga i le Fofoga Fetalai.....

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** E leai se mea e popole ai le sui usufono. O lau Minisita Lagolago sa tatau ona fesili mai ia te au. Ae e te lei mauu i lalo na o au na ou mauu i lalo ma ou tilotilo i ai, i paipa na sa i ai, o le mea lene na ala ai ona sui ona e le talafeagai. O le paipa foi lene e sau i tai, e fai vaega o le uiga o lene mea, a tupu loa se faalavelave poloka. E leai lava se mea e te popole ai. Ae agai i nisi mea.

**FOFOGA FETALAI:** Se i tulai mai le sui usufono, o le mea lava lene ou te fautua atu ai ia outou Minisita lagolago. O le a e tafaga lava fai na mea ae le fesili muamua i lau Minisita, e faamanino atu lene tulaga. Faamaea mai le saunoaga a le sui usufono.

**Tofa Lealailepule Rimoni Aiafi:** Lau Afioga i le Fofoga Fetalai.

**FOFOGA FETALAI:** Tulai mai le sui usufono mo Faleata Sisifo.

**Tofa Lealailepule Rimoni Aiafi:** Ua lata i le ono tausaga o mafuta le Palemia ma lana Minisita Lagolago ae leai se fesootaiga o faia e laua. Afai e toe tupu se tulaga faapea ua tataua ona tagai le Palemia ae í .

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** Lau Afioga i le Fofoga Fetalai, e leai e fai lava a ma fonotaga i taimi uma taimi uma, se ivagana foi o ni mea faaletonu, ia o mea la na ma te leā fesootai ai.

**FOFOGA FETALAI:** Se i toaga e vaai le toeaina e faamalamalama atu mea ia. Saunoa le sui usufono e faaauau.

**Afioga PESETA VAIFOU TEVAGAENA:** O le mea lava lea e tupu i le sui usufono lea o Faleata, o maua lava mulumulugaveve ma lau toeaina e faapena. Ae e le o le manatu mai fua o oe ia i le ma pito laau ma le Palemia. E i ai foi nai taimi e avatu ai se fesoasoani i le Palemia. Lau Afioga i le Minisita o Tupe, atonu e i ai nisi mea ona ou oo atu lea i lou Ofisa e faauma atu.

Ou oo mai lea i le Matagaluega mo Aoga, Taaloga ma Aganuu, lau afioga i le Minisita mo Aoga, faamalo faafetai, e talitonu o lenei aso ma le aso ananafi, e tele lava ia sui usufono mamalu o lenei Palemene, e agai atu i lau Afioga ona o mea lava tau aoga. I le maitau i faalavelave tutupu i tamaitai aoga, e tai le misi lava se tausaga. I lau vaavaai ma ou tilotilo i mea e mafua ai nei mea, ona ua eseese tamaiti aoga mai lea aoga i lea aoga e tuufaatasi, ou te lagona o i lea e mafua ai. O lea e tatalo atu ai i lau Afioga i le Minisita mo Aoga, pe le mafai ona fai nai nisi aoga faapitoa, e pei o Samoa College i Savaii, Avele i Savaii. Aua o le mea moni lea e tupu i matua uma i nuu i tua ma matou i Savaii, pei a tau loa le Kolisi o Samoa ma Avele, e pei ni aoga foi ia pei e femitai ai matua. Pei e manao foi lele a le au mai lana tama i i, o le mafuaaga lena e taumafai lava e aumai, ae ou te talitonu lava au ia, afai ae fai lea tulaga faapea i Savaii. O le a le toe oo mai i inei le toatele o alo ma fanau i Upolu nei. Ae le iloa po o le tele nei o tamaitai lea e tutupu ai nei mea o tamaiti foi i o matou nuu ma nuu i tua. Ae ou te talitonu, e lelei foi lea e mafuta ai le tamaititi ma ona matua faapena foi i ona aiga. Aua o le tele lava o tamaiti nei e ola ma soifua i nuu i tua ma Savaii, o le lava ia o le aoaoina i tulaga foi ia, o le tautuaina o aiga. E faapena foi ona aoaoina lava e matua ia ana fanau i le olaga moni lava o Samoa moni. O lea ou te tatalo atu ai, pe le mata e le avea lea vaega e foia ai le mea lea e tupu i totonu o le taulaga, o le pisa soo o tamaiti aoga. Ae ou te talitonu a fai ni nai Kolisi faapea i si o matou motu o Savaii, ou te lagona o le a mama foi le avega i nai matua i Salafai, i le taugata o pasese ma le tau o mai i le mea mamao aemaise foi o nai aiga o lo o nonofo ai.



O se isi talosaga i lau Afioga, e manaia le APTC lea ua faatu nei i Vaivase, o le talosaga pe mafai ona tatalo i le Malo o Ausetalia e ona lea polokalame, pe le mafai ona fai se APTC i Salafai, e agai i ai le toatele. Faafetai i se tasi o aoga a le ekalesia Katoliko Don Bosco, o lea ua ou vaai i Savaii, manaia le faatinoina o le latou foi aoga i Savaii, faapena foi i le aoga lea i Tuasivi, e tele lava ina faatu a latou faiga faamatata eseese.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ae a i ai se matata eseese faapea a le tatou Malo i Salafai, e pei lava ona avatu le talosaga, a tele lava le avanoa, e le toe oo mai alo ma fanau i Savaii, ae o le a nonofo lava i Savaii, ia faaitiiti ai foi le tautaga o pasese, e fai o tupe ao pasese o lo o feagai ma matua. Lau Afioga i le Minisita mo Faamasinoga, se i avatu lava si tuualalo i lau Afioga, i se taimi e toe fofou ai le tulafono o faiga palota, ona e tele nai vaega e fia avatu ai se manatu, ina ia toe teuteuina le faiga palota, aemaise le tulaga lea e i ai fale palota faapitoa i Upolu nei. E tatalo atu lava i lau Afioga o le a se teuteuga ina ia tapunia ai lea fale palota, e faafaigofie mo matou i Salafai. Ae ou te talitonu o lo o i ai lava le auala, e mafai ona fai e faapalotaina ai nai tagata o lo matou itumalo i Salafai. Ae le o le tulaga lea i falepalota faapitoa. Ua tele lava nai faalavelave ma mea e tulai mai pea, ua faafaigata foi ua tele i tagata faigaluega o le Malo. Ona ou oo mai lea i lau Afioga i le Minisita mo Tina ma Tamaitai, lau Afioga se i toe silasila ane lava i ietoga foi lea a le tatou atunuu, masalo pei e te tau faafaigofie ma tau maua ai se faamama avega i o tatou aiga, pe a faia i se faiga e faatulafonoina. Ona aveese loa lea o le ie mafiafia lea e pei o se fala lili lea e faaoga nei. O le ie lea e tau o le ie fai faalavelave. Silasila foi lau Afioga, e fai o le mafatia o aiga e ona faalavelave, i le tasi o se sii aumai toetiiti limasefulu ie. Aua foi ua faafaigofie ona lalaga, afai o se faalavelaveí ..

**FOFOGA FETALAI:** Toe lua minute o le sui usufono

**Afioga PESETA VAIFOU TEVAGAENA:** Masalo o le a faagata ai ii manatu o le sui usufono. Ae malie lau Afioga i le Fofoga Fetalai, sei ou au ane lava i le Minisita o Galuega, e pei o nai auga ia o manatu o si ou itumalo. Lau Afioga i le Minisita o Galuega, ou te le toe agai lava i nisi o galuega fou ua uma ona faataatitia i lea foi Paeaiga mo si ou itumalo. E avatu lava le talosaga, ona o si tamai lologavai e le i mamao atu nei, ma o le faalua lea ona tulai faalavelave i se tasi o auala laupapa i si ou nuu i Lago. A silasila lau Afioga ua ou vaai i ai ma ou tilotilo i le mafatia o nai faletalimalo, e pei o nai pisinisi foi nei o lo o maua ai nai seleni, ua i ai i sia foi vaega o si ou itumalo. Lau Afioga i lau maitau, ua fai si papau o le fausiaina, design ina o le auala laupapa. Ona o le vai e fai si lautele, ae ona o le auala laupapa e fai si vaiti. O le a se faiga lau Afioga, toe silasila ane lava, e tatau ona toe faia se isi auala laupapa i Lano faapea foi i le auala sima. Sa ou talosaga atu ai foi i lea Paeaiga ua mavae atu. Le auala sima foi lea e i Lago, e pei lava foi ona e avatu i le taimi ua mavae. Atonu e tasi lea vaega e le o maua ai le atoaga o le

aoaina ma le tomaiti o tamaiti o si ou itumalo. Aua o le tele o taimi a tafe le vai lea, e le aooga ai lava ma tamaiti o lou itumalo. O le mea lea ou te tatalo atu ai i lau Afioga se i toe silasila ane lava i le auala sima lea. O nai aualagalue i si ou nuu i Asaga, pau lava lea o si ou nuu e lei faia lava se aualagalue, se i silasila lau Afioga i se avanoa e mafai ai ona faatino lea auala. Ua uma ona avatu i le Minisita sa i ai i lea foi Paeaiga le talosaga.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E momoli lau faafetai ma lau faamalo i le Matagaluega o Galuega ma le tatou Malo i le aualagalue o si ou nuu o Puapua faamalo faafetai. Ae pau lava lea o si tuualalo, o Puapua o se mea pe tusa ma le lima kilometer le mea o i ai maumaga ma faatoaga a si ou nuu. Faafetai mo le vaega 2 kilometer ua uma ona fausia. O le tatalo pe le mafai tau lava na o sina faalaugatasia ina ia sao ai taavale, agai i le mea o lo o i ai faatoaga ina ia faafaigofie foi i malosi o le nuu lenei ona asia a latou faatoaga i aso uma. Ao le agaga fiafia ma le agaga faafetai o lea ua maea aualagalue. Lau Afioga i le Minisita o Siosiomaga, faapena foi nai talosaga ua taoto foi i le Matagaluega i lea foi Paeaiga o nai taligalu mo si ou nuu o Asaga. Ona faapea lea o se faamatalaga, e faaii sau faamataga i le tapuaiga a si ou itumalo o Faasaleleaga Nu 4. E faigata la outou faaaloalo, ou te manatu e i ai se taimi ona avatu lea i luma, ao le taimi lenei e fou sau faafetai aloaia i la outou faatuatuaga ma le faiga filifili a lo tatou itumalo, ua e filifilia ai lou nei sui usufono e aveva ma sui usufono o lo tatou itumalo i lenei Paeaiga. Le paia o Satuala si o tatou nuu i lalo, filo ai le falefa o le aiga sa Vui, afio Falegaoti, afio Iiga le maopu o Satuala alalatai Foeo o oe o le matua fetalai Malaeulu aemaise le mamalu ia te oe Salemuliaiga. Ou te faatalofa atu foi i si o tatou nuu i Asaga faamalo galulue, i le paia maualuga e afio ai Matafeo ma lo outou aiga sa Matafe , ae faapea foi oe le matua fetalai ia Lualuataua ma lau fetalai Leatuavao le mamalu ia Salupat aemaise le malosi o si o tatou atunuu. Ou oo mai lea i si ou nuu pele o Puapua le paia maualuga o Sa Tuala e afio ai oe Peseta, alalatai ai le mamalu i le nofo ituaiga, e a le tapuaiga ia te oe le pule a Sealiimalietoa. O lea le tatou itumalo, e i luga ia te au le agaga fiafia ma le agaga faafetai ona o la outou faiga filifiliga. Ou te talitonu o le faiga filifiliga mai le Atua lea ua toe faamanuia ai lou nei tagata e vae ma lima e auauna ai aua si o tatou itumalo. Alo maia le tapuaiga i lenei foi lima tausaga, o le a ou taumafai, o le a lava se malosi e gata mai ai le taumafai i nisi foi o galuega, ua uma ona faaleo i lenei Paeaiga. O le a taumafai lava ina ia faatino i le tatalo atu i le tatou Malo. E aveva foi lenei avanoa e faafeiloai atu ai i se tasi foi, si ou uso na ma tauva i le faigapalota. Lau afioga Vui Sione, o mea a uso e faapena, e le manumalo uma ni vaa. O le agaga maualuga ia maua lo ta nofo fealofani. O le agaga faafetai, e manatu lava o le taua mafutaga o oe lava o le uso, atonu foi e i ai se taimi o le a ou malolo, ona tuu atu foi lea o le avanoa i lo tatou itumalo ma lau afioga. Ao le taimi nei, e pei foi ona molimauina e se tasi o mau o le Tusi Paia, o Afai lava e tapuni e le Atua le faitotoa, e na o le Atua lava na te toe tatalaina. O lona uiga, e i ai lava le taimi o le tagata. Afai o lou taimi lenei, lo tatou itumalo, faamalo le tapuai.

O le mea lea lau Afioga i le Fofoga Fetalai faamalo faatoatoa, ou te talitonu ona o oe o le Satuala e lava le faapalepale i lau Afioga. Manuia tele lau Afioga i le Palemia sui Palemia ma lau Kapeneta sui usufono mamalu o lenei Palemene. Manuia le Fonotaga.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou o le sui usufono mo Faasaleleaga Nu. 4.*

**FOFOGA FETALAI:** Ona o lea ua uma le taimi o le saunoaga a le sui usufono, ae ua tatou toai taunuu foi i le taimi o le tatou malologa i le aoauli.

O le mea lea ou te faasilasila atu ai, o le a faataatiaese Taulumaga a le Fono Aoaofaitulafono mo lana malologa se i aulia le itula e tolu i le aoauli nei, ona toe amata foi lea. Ma le faaloalo faafetai.

*Na faataatiaese Taulumaga a le Fono Aoaofaitulafono i le itula e 1:00 i le aoauli.*

*Na toe faaauau Taulumaga a le Fono Aoaofaitulafono i le itula e 3:18 i le aoauli.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofaitulafono. Malo faafetai le tauatai. Ua faapea ona faaavanoaina tiute foi o le Kapeneta ma sui usufono mamalu aemaise foi o Faauluuluga o Matagaluega ma Faalapotopotoga a le Malo e faaauau ai le tatou Fonotaga.

O le avanoa foi lenei e tuuina atu mo se saunoaga a se sui usufono o le Palemene. Ou te fautua atu ona e faamuliga i le saunoaga a le Taitaifono a le Komiti o Tupe, nei tei ua i ai se faitau a le mamalu o le Komiti, a maea le saunoaga a le Komiti o Tupe ona tali loa lea o le Taitaifono o le Komiti o Tupe ona tali loa lea o le Malo. A i ai se sui usufono, ona faapena lea ona tuuina atu le avanoa.

O le a tuu muamua atu ia i le sui usufono mo Falelatai ma Samatau.

**Afioga TAEFU LEMI (Falelatai ma Samatau):** Faafetai i lau Afioga i le Fofoga Fetalai ua maua foi lenei avanoa e avatu ai se motugaafa a lenei



lena, aø le mea e moni o le mea sili lava lena ona malosi.ø Aø le upu a le atunuu, ðO lalo lava e maua ai malo.ö O le ala foi lea o le taialalo o le ia a le aiga Sa Saumani. Tatalo i le Atua e aumai Lona finagalo. Afai o i ina faafetai i le Atua, afai o i inei, viia le Alii. Ua faia Lona finagalo, ua leai lava se fai loto. E leai se taupuleuø ma lana Afio.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

E i ai taimi, a fia momoli le Afioga a le Alii i Lona nuu o Isaraelu, na te faaaogaina isi nuu e pei ona tatou faitau i le Tusi Paia, le nuu o Papelonia, le nuu o Asuria ma le nuu o Peresia, e tele nisi nuu, na faaaogaina e le Atua e momoli atu ai Lana feau i Lona nuu. Le tatou faiga filifiliga na faia i sui o le aiga Tauaana ma Falelatai. Na faaaogaina e le Atua Samatau e aumai ai Lona finagalo. Ona faapea lea o le lagona, faafetai Leulumoega, faafetai i lau pule, faafetai i lau faautaga oø, faafetai i le upega lauga, faafetai i lau faafaleupoluga, faafetai i lau fatuaiga tausi, ua e le manatu lava po o ai le tagata, ae ua e silasila faaleagaga. Faafetai i lau puipuiga ma lau tausiga faa-Leulumoega i aiga, faafetai le faaeaea, faafetai le faaloalo. Ua e faia tofiga o le tatou itumalo, aua se isi e fai ma sui usufono o le tatou itumalo i le Palemene o Samoa. E faafetaia le Toatolu ma le Laau na Fausia, le paia o si ou nuu i Siufaga. Faafetai i lo outou saili malo, faafetai i lo outou tausi mamalu, tausi faavae i la outou tausiga ma le faaeaea, e faamuamua i le Afaigaluega paia a le Atua o tagata ese o mau faatasi ma i tatou. E moni lava le upu, ðE tetele lava i pesega, ae matua lava i le .ö O lo o mau pea le toovae, maua le filemu mai le Alii i totonu o lo ta itumalo. O lea ua tea i tua Apolima o fatia ua sola, ae sau malama o nuu, tuli i luma so tatou -ai. O le lelei lea o mea a aiga, aua o le upu a le tupu o Fonoti ia Melegalenuu, ðE taaalo a tama, aø se uso.ö Leaga o le tatou nonofo ai lena le paia o lo tatou aiga Tauaana. O le aiga, e tasi le aiga, tasi le nuu, o tatou faiganuu, ia ona o le valavala o nofoaga, ae tasi lava le nuu, tasi le aiga, tasi lana tama. Tama a le aiga Tauaana, tama a le falefitu o Leati Tagaloa. O lea tatou te tiu ai aua Samoa. E le mala ese i ina mala ese i inei, e tasi i taua. Ae ua iloa lelei le nonofo ai o aiga ma le lelei o le nonofo ai o uso, aua e galue ai le Mana o le Alii. Ave le aveai, e feiloai ane tama, ua lulu lima ma fusifusi.

E momoli lau faafetai i le tofa faatama o le nuu i lau afioga Anae, ua e saunoa e tuu maia o au e alu. Ua faalavelave tele nei mea ia te oe, ua fia fai sau malologa, ua le maua foi le malosi atoatoa, ua e fia malaga i atunuu mamao e saili malosi ma fai sau malologa. Ua ou manatu ua e faaloalo mai, ua ou manatu foi ma le alofa i lo ta itumalo, leaga o le aiga e tasi, o le ta nuu e tasi. Ona faapea lea o le manatu, ia oulua uso sa o tatou alo atu i le faalagamaea, tatou ave ia lea i uta. Avea ia lou vaivai e fai ma mamoe e osi ai le taulaga i le isi lima tausaga. O au nei, o outou taeao.

E fia momoli lau faafetai i lau Afioga i le Fofoga Fetalai i le Ofisa o Faiga Palota. Faafetai mo le galuega tapena lelei. E le laititi le galuega, o lea ua maea manuia mea uma i la matou matau. E tele lava nisi o mea e ao ona faaleleia, ma e ao foi ona vaai i ai ma silasila i ai, e ao foi ona fai i ai se upu

manu e leā lava lava ona tulai mai. O le tatou faatemokarasi e faavae i le faamatai. O le mea lena e ese ai Samoa mai le tele o isi atunuu e temokarasi. E ao ona faia ni aulape e mautinoa ai, o le matai Samoa o lo o i totonu o le lola palota i lona suafa matai. E okometi lava. E le faia sana filifiliga. He has no choice. E lesitala i le matai, leaga o le system lena o lea tatou te o ai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafaiga faaauau i luga o le faitauga faalua**

E faatoa fai lava foi le filifiliga a le matai, pe a faapea e lua pe tolu pe sili atu ona suafa matai, ia ona faatoa filifili lea. Aø lau tuualalo lau Afioga i le Fofoga Fetalai, afai e lua pe tolu pe sili atu suafa matai, ave le faamuamua i le suafa o le nuu lea e nofo ai, leaga o le nuu o lo o nofo ai ma fai ai le tautua. O la e fonu ai, galue ai, -ai ai, lotu ai. Ave la le faamuamua pe fia lava suafa matai, ave le faamuamua i le suafa lea. E tele suafa matai lau Afioga i le Fofoga Fetalai, o la e faalupe i le vao, uma ona fai saofai ae e leā lesitalaina. E -ai i mea fai a le nuu i le suafa matai, ae palota i le isi nuu i le suafa taulealea. Ua tatau ona fai i ai se fua, o le tatou faatemokarasi lea e i ai, e faataua ma faamuamua le faamatai. Ae ao foi ona silasila i le lesitalaina o matai, o le isi lava lea mea e ao ona toe silasila i ai tatou o le lesitalaina o matai. O lau fautuaga, se lesitala faatasi i le taimi e fai ai le saofai. Fai i le taimi e fai ai saofai. E gafa ma le saø o le aiga lea sa fealuai e faamaopopo ana nofo, faauma lana galuega lesitala ana matai. O le lelei foi o le faiga lea, e lavea atu ai ma le \$100 o le lesitala o le matai i le saosaoga o saofaga i le faiga o nofo. Ona uma lea o nofo, afio lelei mai lana susuga i le saø ma le sui o le Malo pe a, ona fai lea o le lesitala, fai faatasi. Aua o le mea lea e i ai nei, e uma ane ona fai le saofai ua o le au Niu Sila ma le au malaga mai fafo ma a latou seleni, ae nonofo tatou i Samoa e leai ni seleni, ona uma ane ai lava lea e leā lesitalaina lava le matai. O lau lea tuualalo lau Afioga i le Fofoga Fetalai.

Aø le lesitalaina lava ia o le aupalota o le isi lava lena mea e ao ona silasila lelei i ai ia fai lelei le resitala. Ou te fautuaina lava ma ou tatalo aua e i ai se taimi ona saunoa lea o le tatou Malo i se Komiti foi lea e faaauauina galuega faaleleia o le tatou faiga palota. A o le resitalaina lava ia o le au palota, se e tatau ona fai se tamai Komiti foi lenei a tatou e galulue faatasi. O Matagaluega ia e i ai o latou tiute e fesootai ma le resitalaina o palota, le ofisa e resitala ai matai, le ofisa o fuainumera faamaumauina la e i ai pepa fanau ma nafa ma tatou tusiga igoa lea e i ai le tusiga igoa i le faaiuga o le tausaga, le Matagaluega a Tina ma Tamaitai e nafa ma fesootai foi latou ma afioaga. Le Matagaluega o le Siosiomaga o latou e nafa ma tuaoi po o boundaries. Le Ofisa lea o Fesootaiga, le MCIT, o i latou e nafa ma le National Broadband Highway ua fai si umi o fai lea vaega ae le i iloga lava ona atagia le galulue faatasi ai po o le fesootai ai ma sui o Matagaluega uma. Ave i ai ma se sui o le Ofisa o le Fono, e lava lo latou silafia i manaoga o faipule ma le Palemene. E tatau ona faataoto loa faiga faavae lau Afioga i le Fofoga Fetalai, sosolo ai loa i luga le faatinoga, ia fai foi ma fai a latou fonu e mautinoa ai o lo o alu pea i luma le galuega ma resitala tagata i le mea e tatau ona resitala ai. E vave

ma faigofie leaga o lea ua i ai fesootaiga televavave ma le network lea laa maua e ala i le galulue faatasi o Matagaluega ia. E tatau foi ona mafai ona fai se resitala amata, provisional registration, e tatau ona mafai ona fai, o lea ua i ai le tatou mea e mafai ona fai ai, e atoa loa le 21, ua tatau ona mafai e le Ofisa ona resitala le tagata ua atoa le 21.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ia, na ona valaau lava e sau e pue le ata ma fai le finger print ma talanoa loa i ai o oe lea ua e resitala i Falelatai leaga o faamaumauga o lou pepa fanau na e fanau i Falelatai, alu atu le tusiga igoa ia Novema 2016 o i ina i Falelatai na aumai ai lou suafa. Ona faigofie foi lea ona fetuunai ma fai se tala i faamaumauga, o le a silafia e le ofisa i lenei taimi.

Lau Afioga i le Fofoga Fetalai, e i ai nisi suiga lelei sa tatou faia mai i lenei Paeaiuga ua mavae atu, o lo o ou tau maitauina lava ni sini lelei na ausia ona o ia suiga. Ua tatou talanoa i le faaumiumi o itula e o ai le fanau i aoga, sa tatou manatu lava e tele se lelei e maua mai lea faiga, ae peitai ane, ua ta vaai i le iuga o suega, le SLCC ma le SC o la e average lava tamaiti pei o le mea sa i ai a o tuua le aoga i le ta o le 2. O mea lava e fai ma faamanatu atu i le tatou Malo, o le tatou Malo lava lenei, o le a se isi faiga ina ia lelei ai le faatinoga, o a ni fua lelei na fua mai lea faiga, aua o mea ia e tulai mai i le pisa o tamaiti, e faaitino lava ma faatetele ona tulai mai i le lua itula mulimuli lea, i le va o le lua ma le ta o le fa, e vevesi ai le fanau.

O lau lea tuualalo i le tatou Malo lau Afioga i le Fofoga Fetalai se i silasila ane i ai, o le tatou faiga lea. Lau Afioga i le Fofoga Fetalai, o pitolaau lava a matua e agai i ai. O le mea ea o iloa e matua le mea o la e agai i ai a latou fanau aua e tatau lava ona malamalama le matua ia i lana fanau, e tatau ona iloa po o alu ma le telefoni, e tatau foi ona iloa po o aafia ai i fusuaga ia. O le faafitauli o le mea, ona e le o tasi le feau lea e ave e faiaoga ma matua, ma so o se isi lava e fautuaina le mataupu lea, leaga foi o le mea, e pisa tamaiti ae vaomisa isi tamaiti sa aoga ai i le aoga, e tietie i le taavale a tamaiti sa aoga ai, e talanoa ma faauo ma isi sa aoga ai, e taofia atu ma faia suesuega e isi foi sa aoga ai, e ono tele lava le mea pe a tatou tuufaua. Ou te faafetaia lava le faaiuga sa fai i le kolisi lea o le Malo, manaia tele le tulai mai o le Malo i le faaiuga lea, ma e ao lava ona tatou tutu malosi e faaali lea faaiuga i a tatou fanau aua e alu aso ae sau aso ae tatau ona alu i luma le faamoemoega o tatou fanau.

Lau Afioga i le Fofoga Fetalai, o le isi lea mea ua ou vaai i ai ma ou maitau faava o Malo, ua amata nei ona amanaia le leo o Ekalesia e Malo tetele ma Malo Afaatasi. Ua amata ona faalogologo mai, po o fea le mea o i ai le talanoa ma le tuufaatasiga o tapuaiga nei, aua o nisi o nei tapuaiga, o lo o saili i ai le filemu e malo tetele, i tapuaiga soofaatasi o fai. E fai lau tala, aua e i ai lava tatou mafutaga a Ekalesia, ae tele atu le mea lea ou te talanoa i ai lau Afioga i le Fofoga Fetalai, aua e i ai ma isi tapuaiga i totonu o Samoa e le o aofia i totonu o le NCC po o le National Council of Churches. O le tatalo lau Afioga i le Fofoga Fetalai, o se faafitauli lea e i ai ona o le model lea e

operate ai isi tapuaiga, o taitai lava o tapuaiga, o taitai foi na o Malo lea tatou te maitauina i Iran. O le ituaiga model lena o lea e manao ai le isi ituaiga tapuaiga lea. Ua i ai isi tapuaiga ua manao lava latou e fai lo latou lava Malo, le ISIS, ua fai lava le latou Malo e le talia ai isi tapuaiga, a maua ai isi ituaiga tapuaiga i totonu, talofa.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O le tatalo lea lau Afioga i le Fofoga Fetalai, e ao lava ona silasila i ai, e alu aso sau aso, toetiiti tulai mai se isi o tapuaiga ia e fai ma sui o lenei Palemene ona matamuli ai lea aua e muliai ona e saunoa mai lau Afioga e fai atu se tatalo, ae ese le Atua lea ua tatou agai i ai.

O le ala lea e valuvalusia ai aa o le fau ma faamanatu, toe silasila lava ona fai mai le tatou Faavae, e Faavae i le Atua Samoa, Samoa is founded on God. O le latou foi lena tau i le latou lotu. O lona uiga pe tatou te liulotu i le pito lea, ae le suia lava le faaupuga lea. O Samoa e Faavae i le Atua. Na pau lava o lea, e pei e ese le Atua lea e faavae i ai. O lau lea tatalo, aua e mautinoa lava e manino le Atua lea tatou te tapuai ai.

**FOFOGA FETALAI:** Faaiu mai le saunoaga a le sui usufono.

**Afioga TAEFU LEMI:** Lau Afioga i le Fofoga Fetalai, e pei o nai motugaafa na o lea sa tapena mai, aua e amatamea lava le le tatou Faavae i nei mea uma. O la e aumai le saolotoga mai le Faavae e ao lava ona tatou foi i le Faavae e saili ai se fofo o le mataupu lea. Lau Afioga i le Fofoga Fetalai, faafetai mo le avanoa ua ou saofai atu ai i lea pito e fai ma fesoasoani i le Sao Faapito ma le Matagaluega ou te talitonu o se Matagaluega tele lenei o le Siosiomaga, ma o se Matagaluega po o se vaega ua ave i ai le faamuamua a le lalolagi i lenei vaitau lau Afioga i le Fofoga Fetalai, o le Siosiomaga, suiga o le tau. Na ona tatalo i lau Afioga i le Minisita, se i tautuana aua o lea foi e ave i ai le tatou faamuamua i le Siosiomaga ma le suiga o le tau, ae tatau ona atagia i le Tala o le Tupe ma lau faasoa lena vaega. E pei o le uiga lea o se faamatalaga aua e tele le siosiomaga, e le laitiiti, e broad le mea., E tatalo atu ai i lau Afioga e ao ona toe mataitu nai vaega ia. Lau Afioga i le Fofoga Fetalai, ona o lea e le i uma lau 30 minute ae o lea ua e saunoa mai ua uma lou taimi, ia o le a ou alo e faamatafi le tatou nonofo ai ona ou nofo lea i lalo. Ia manuia tele le faafofogaaga a Samoa, mai Lana Afioga Mamalu O Le Ao o le Malo, Sui o le Fono a Sui Tofia, o le Aiga Sa Levi e tausia lo tatou ola faale-Agaga mai lea aso i lea aso. Ia manuia tele la outou tapuaiga. Le tapuaiga a Samoa o lo o faafofoga lelea mai ma tapuaia faiva o lou Palemene, ia manuia lau tapuaiga.

Manuia si ou itumalo o Falelatai ma Samatau, manuia lau Afioga i le Fofoga Fetalai, manuia le Fono.



**FOFOGA FETALAI:** Malo faafetai saunoa. O se isi sui usufono sa maitau atu sa tulai mai o le sui usufono mo Faasaleleaga Nu. 3, le Minisita Lagolago mo Tina ma Tamaitai.

Tulai maia e saunoa e tusa ai o le tatou Tala o le Tupe.

*23 IUNI 2016*

### LAUGA FAA-TAUPOU

**Afioga TOFA FOLENI LIO TAMA GALU (Faasaleleaga Nu. 3):** Faafetai i lau Afioga i le Fofoga Fetalai mo le avanoa, e faamauina pea le faafetai i le Atua ua tatou i ai i manuia i lenei afiafi toamalie ma le filemu mai le Atua. Ua tatou lagona foi e le o tea ese lava le Atua ma lenei Maota, ui lava i sina taimi sa fai ai sina malologa, ae filiese lava le soifua ma lo tatou ola. Ae momoli pea le faafetai i lo tatou Atua o lo o i ai Lona agalelei i le Fonousu a Samoa. Lau Afioga i le Fofoga Fetalai, e taumafai atu ia lenei usugafono mai Faasaleleaga Nu.3, e fai atu foi se sao aua le Tala o le Tupe pei ona folasia e lau Afioga i le Minisita o Tupe. Ae muamua ona ou faafeiloai ma ou faatulou i le paia o le Maota, pe tauave lava o le maota i Tiafau e tumau lava, o le Maota e fili ai le tofa ma le faautaga, o le Maota o Samoa, Maota e leai se isi e finau i ai, aua o le Maota lava ua mamalu ma maualuga. Tulouna ia le paia o le Maota, e faafeiloai atu ai i lau Afioga i le Fofoga Fetalai ma le Sui Fofoga Fetalai, malo lava le onosai, malo foi i le taitaiga o le tatou Fono.

E faafeiloai atu i le Palemia faapea foi le Afioga i le Sui Palemia, tulouna ia oulua paia, aua le taitaiga o le Malo faapea foi le tatou faigamalo, faapea foi le paia aua alii ma tamaitai Minisita o le Kapeneta, e faafeiloai ma faatulou atu i o outou paia, faapea sui usufono mamalu o le Palemene o Samoa, o i latou filifili mai itumalo o outou lava ua filia mai le fuifui aua lenei lima tausaga o le Palemene. Ia, e le galo le tapuaiga mamalu a Lana Afioga Mamalu O Le Ao o le Malo, Afioga Tui Atua Tupua Tamasese Efi ma lau Masiofo, faapea foi le tapuaiga i le Sui o le Fono a Sui Tofia, faapea foi le Afioga i le Faamasino Sili ma le Ofisa o Faamasinoga, o le tafatolu lea o Faigamalo aua le Malo o Samoa ma lana Fono e tusa ai ma lenei foi lima tausaga.

E le galo foi Faauluuluga o Matagaluega, Pisinisi Tumaoti ma Faalapotopotoga o lo o galulue aua se manuia o le Faigamalo ma ana atinae, i la outou feau ma le galuega e le selu atu foi i le tele o outou tiute, ae faamalo i faauluuluga o Matagaluega a le Malo, faalapotopotoga ma pisinisi eseese. E le galo le tapuaiga a Samoa i le paia i Aiga ma Tama, Tama ma Aiga, le usoga a Tumua ma Pule, Ituaa ma Alataua, Aiga i le Tai ma le Vaa o Fonoti. Faafetai Samoa, o le tapuaiga lava e manuia ai faiva o lou Palemene e pei lava ona i ai le tatou nonofo ai.

Le paia i le tapuaiga a le Aufaigaluega paia a le Atua, outou o lo o nonomanu aua se manuia o le afioaga, le Malo ma le tatou atunuu. Faafetai tatalo i le nofo a Faafegaiga i tapuaiga e fia ma Ekalesia e fia, faafetai i lo outou anapogi ma tatalo pea mo Samoa, atonu o la outou tatalo ma le mana o

talosaga, lea ua folau ai Samoa i le lagima, folau i le manuia ma le filemu moni mai le Atua. E le vaea le falaooto aua le tapuaiga a o tatou uso i Sasae, aua le paia ia Sua ma le Vaifanua, Fofu ma Aitulagi, tainane foi Saole ma Saleaamua ma le Launiu Saelua, le Faatui o le Motu, Tootoo o le Faleula ma upu ia te oe le Manuatele. O paia na o Samoa i Sasae ma Samoa nei lea ua tatou sapi ai, ua tatou manuia ai aua le Malo ma le tapuaiga mamalu. Tulouna ia laia outou paia, ou te le sagolegole ne i sese se upu ona avea lea ma lape o le failauga.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

A o outou paia faale-Malo, paia faale-Ekalesia, paia faaleatunuu, o paia lava ua popo, o Samoa o le atunuu tofi, e leai lava se faafiaatamai pe toe faaopopo pe toesea ia paia, ae nuunuu ia ia paia i le galuega tausi a Tumua ma Pule, aemaise o Faleupolu o Tofiga, o le latou galuega tausi lea.

Avea leni avanoa taua ou te faafeiloai atu ai si ou itumalo pele o Faasaleleaga Nu. 3, e amata mai le afioaga o Saipipi seia paia Siufaga. O le paia lava lea Taulagi, le Matua Fetalai ia Segi ma le Pule ia Leuu, faapea Salemuliaga, faamalo i loʻu itumalo faafetai i la outou pule to ma la outou faaaloalo lea ua manuia ai le tatou faiga filifiliga i lena masina ua teʻa. E momoli lau faafetai faapitoa i si ou nuu o Saipipi aemaise lava loʻu Tama toeaina ia Kaleve Leifi faapea le nofo a faafegaiga a le Ekalesia Mamona, Worship Center ma le Aso Fitu. Ia faafetai ia outou le aufaigaluega faafetai i la outou tatalo ma lo outou folafola o le finagalo o le Atua ia toafilemu ma manuia faiga filifiliga. Ia faafetai i le paia i le taulagi i lau Afioga i le Saʻo Tofa ma lo outou Aiga Sa Tofa ia faapea foi Suʻa o le maopu ia tainane le alo o Vaafusuaga ma Leusoalii faapea le mamalu i le Falefitu. Lau fetalai Totaaitu o oe o le tausi nuu, Sa Taufaga ma le mamalu ia Salemuliaga faafetai i lo tatou nuu. E le galo foi le faafetai i le mafutaga a Tina o Faletua ma Tausi o Saoao o lupe faasaʻosaʻo, ia faafetai i le mafutaga i Tina faapea Toleafoa ma le aualuma. Ia ae le gata i lea ae o so o se tama fanau a Saipipi o lo o aitaumalele o lupe faalele lea sa outou lagolago, e moni a le upu o le aiga o le mea e tasi. O le tatou nuu o le aiga e tasi aua ua tatou iloa lava tele tausaga, a tau le 40 tausaga e le o toe oʻo mai se tofi i Saipipi o se mea lea e lagona ai le loto faafetai. Faafetai i lou lotonuu faamaoni lea ua faailoa le tali o a tatou talosaga i le Atua a lea ua tatou i ai o lea ua maua so tatou tofi ona o le faamaoni o le tatou nuu, aiga uma o e sa galulue. Ia lafo mai laia o lo outou faatuatuaga o le a se mafai e mafai e leni tagata faatauvaa tatou faamoemoe i le Atua mea uma. Ia e le faagaloina si o tatou nuu i Saasaai aua Toleafoa ma Vaafusuaga, tua fetalai ia Segi ma le pule a Leuu ma Salemuliaga faafetai i lo outou lagolago mai. E faafetai faapitoa i lau Afioga Tea Peato, ia a tuu loa i upu o le taulagi ia e uso a Tofa ma Tea, o le mea lea faafetai i lau Afioga Tea o lea ua e faaaloalo atu i le Aiga Sa Tofa. O oe foi ua leva ona e galue ua leva foi ona e pale mai i le Palemene ma le Nofoa o le itumalo, e momoli atu le agaga faafetai. Faafetai i mafutaga a Tina, Faletua ma Tausi ia aemaise o Aualuma ma Tamaitai ia ma le malosi o le nuu ma Toleafoa ma le Aualuma ia ma le tatou nuu uma i Saasaai. Faafetai i lo outou tautua, faafetai i la outou

puleto ma la outou faaaloalo aua faiga filifiliga i le amataga o lenei tausaga. Ia e faafeiloai atu foi i le tatou nuu o Faga mai Salimu seia paia Siufaga ia o le paia a lea i le taulagi toaono o alii o Faga faapea foi lo outou Toafa Tagatamatutua ma le Faleaana ma Salemuliga. Ia malo faafetai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafaiga faaauau i luga o le faitauga faalua**

E avea lenei avanoa e momoli atu ai le agaga faafetai ona o le manuia ma le filemu lea sa tatou iai a o filifili ni o tatou tofi. Faafetai i lau Afioga Toala Tulouna faapea foi lau Afioga Unasa pei ona i ai, ia faafetai o tatou lava o le aiga e tasi. O le taulagi o le aiga e tasi o lea ua outou faaaloalo mai i le aiga Sa Tofa ia lafo mai la outou faatuatuaga. Ia e le faagaloina foi le Afioga ia Tuileutu Alaivaa lea sa seei i le Nofoa o le itumalo ia faafetai ia te oe le uso lea ua e faaaloalo mai, faafetai galue i lea foi 5 tausaga sa e pale mai ai ia faafetai i lau Afioga Tuileutu. Ia lafo mai laia o le a lava se mafai ou te galue ai ma auauna i le itumalo ia o le agaga lea. A o le agaga fiafia ma le agaga faafetai e ese le faigofie o le tatou filifiliga e leai lava se mea na g se filemu mea uma, o le mea lea o le mea mai le Atua, faafetai la outou pule lea ma la outou faaaloalo. Ia avea lenei taimi e faafetai atu ai i lau komiti mai lava i Saipipi sei pa'i mai i Siufaga ua outou mafatia i le ala, laina, timua, sautia ua outou uluulu matafolau ona o lo outou sailimalo ia maua so tatou sui e tauaveina upufai a le Malo aua le tatou itumalo. Ia malo galulue e le faigofie ia a o lea ua tau lo outou ai lea ua tali le Atua ona o lo outou faamaoni ma lo outou alofa moni i le itumalo ua manuia ai mea uma. Ia faafetai foi i ou aiga faafetai tele i ou aiga o paolo ma gafa uo ma e masani, ia faafetai mo le tofa ua a'e fai ai au ma auauna e galue mo le itumalo. Ia o le agaga faafetai lea i le tatou itumalo ae o lenei taimi ia o le a taumafai nisi foi o mea o lea ua vaavaai iai aua le itumalo. Ia o lea lava tatou feiloai lava i vaiaso uma, o lea lava tatou te talanoa, a feiloai ma fesilisili ia a o lea lava ou te iloa mea la e faaletonu i le tatou itumalo. Ia tapuai maia vaeatu le tapuaiga, o a lava ni manatu e aveatu i le aiga Kapeneta e tuu atu pea ma le agaga maualalo ma le loto e momoo aua le faataunuuna ia ae e fuafua lava nei mea uma.

A o le i oo se faamatalaga i manaoga o lenei itumalo faafetai i le Minisita o Tupe lau Afioga Sili faafetai i le tala malamalama o le Tupe i lenei tausaga. O lea ua vaavaai iai ia e matagofie lava, lea foi ua vaavaai o lo o iai tupe totoe ae le gata i lea o tupe mai fafo ia tasi lea mea taua. O tatou lava e saili a o le Atua e foai, o tatou lava e tuitui a o le Atua e tatala mai faamanuiaga, ia faafetai i le Malo i le alii Palemia aemaise le Kapeneta aua o le tatou saili ia lea ua siitia ai le tamaoiga siitia mea e fai. A vaavaai ia Samoa i lenei vaitaimi ia o le upu a lea e fai ma muagagana ua tele le suiga o Samoa. Aisea? Lelei atina'e tele atina'e o lea ua vaavaai ma molimau o eletise, auala o le suavai ae le gata foi i lea o maota ma laoa, seasea se nuu toe iai se fale samoa tele lava i maota ma laoa falepapalagi, fale mananaia, o faleaoga. Ia o

aiga foi ua manuia matamata le TV ma lelei mea e nonofo atonu o le siitaga lea, le naunautai o le manulauti foi lea a le Malo ia ola ma soifua lelei tagata o Samoa ia manuia tagata uma. O le mea lea faafetai i lau Afioga i le Minisita o Tupe mo le Tala o le Tupe ia ae pau lava le matou tala silasila pea o a nisi fesoasoani ia aapa i ai tatou faauouo aua o Samoa ia o lea ua tatou oese mai le upu lea, o Samoa e tau atiae. O lea ua tatou oese ma lea laina tatou meimei i luga o Samoa ua atiae lea ua siisii lona tamaoiaiga ia o le agaga fiafia lea.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O matou foi lea faatoa ofi mai ia o lea lava sa pati ma po ma tapuai mai faiva o le Malo a lea ua tatou tiu ai ma tatou aeaie i le manuia ona o tulaga pei ona iai.

Lau Afioga i le Minisita mo Galuega, Felauaiga ma Atinae Eseeese, ia ou te iloa e tele lava manaoga o lenei Maota ia o nai manaoga lava ia i mea e fia faaleleia. Faafetai mo le asiasiga lea sa e afio atu ai e le gata i lau Afioga ae na afio atu foi le alii Palemia i si afa lea na agi nei ia Aperila. Ia e le toe tau faiatua se matou talosaga o lona ua i lou Ofisa foi le talosaga. O le mea lea na tupu i Saipipi faafetai i le Atua na o le tasi le po ae ana lua pe tolu po o lona uiga ua leai se Saipipi ua tafua uma ma faaleaga uma ona o le malosi o le vai e tafe mai uta malosi foi le galu. O le sau mai Saipipi i Siufaga e matua maaleale lava, e ilitata tele i le suavai aemaise a le fafati mai o galu o aau e lata mai i uta e matua aafia lava lenei itumalo. O le talosaga la i lau Afioga ma le Minisita mo le Siosiomaga, e fia fai ni taligalu lelei fai ia malolosi, fai ia lelei aua o le faafitauli a lea o lenei itumalo o le vai lava fai o le sami a o le tafe lea sau i uta. O le tafe lea sau i uta o le tafe i Vaiaata a o le faalavelave e sau le alavai lea mai o i Maliolio Samalaeulu. A tutumu nei e pa uma atu i tai lea la e pa atu le isi alavai lea i Sapapalii ia ae lelei la Sapapalii e lua alavai a la e lelei la ua sima ma aualalauapa. A o le pa mai lea o le vai i gauta o Saipipi, Saasaai ma Faga e leai ni alavai ni proper drainage e tafe solo. Ia silafia foi o le vai e sue a e ia lona auala, tasi la lea talosaga le Siosiomaga se i silasila atu a i le taligalu ia ma le faaleagaina ia aemaise a o nai maumaga, toga niu, o maota ma laoa, o manupapalagi, o meaituaolo e tafea uma. E faaleagaina uma ma tafua i tai ia ma le manuia ai lava.

O lona lua i lau Afioga i le Minisita mo Galuega, Felauaiga ma Atinae Eseeese, o le auala lea ua fuafua mo Saipipi o le auala lea e taua tele, e alu atu tau i le faleaoga le primary school ma le Amoa College. Alu atu i uta tau i le pamuvai a le Malo ua tele aiga e matua tele le auala lea i lau Afioga ma le faafofogaaga a le Maota. O le auala lea e tau i uta i Vaiola College ma e a failelei le auala lea ma fai loa ma aualatele o le Malo tasi lea auala lelei aua o tamaiti nei i Vaiola e omai i le Itu o Tane o i la o le a assess ai le alu i uta ia ma faigofie i femalagaiga. E oo atu i uta i Vaiola, Tapueleele ia aemaise le Falepuipui ma le Ofisa o Leoleo, e faigofie a le auala lea pe a fai nei. O le auala foi lea e fesootai mai ai le isi aualagalua o Saipipi ia ma le aualagalua o Saasaai fetau uma i le auala lea ia o loa i uta. A o le taua lona o le a faigofie mo nai fanau aoga, o lona uiga e le toe tau oso se taavale i Safotulafai lea o le

a oso tasi ii e faapena foi i mea e moomia mo le o i le Itu o Tane e faigofie a le auala lea. O le mea lea lau Afioga i le Minisita ia e le toe tau faiatua o lena ua e silasila ae faafetai i lou afio atu. O la lava e fai le galuega i le taimi lenei, la lava e galue le taligalu ia ma mea ia. Ua e silasila iai e lua mea na motu i le auala, motu i totonu o le nuu ma le isi pito ia tele le afaina. O le vai foi mai uta i Saipipi ma Saasaai na tupu foi i le 1989 ia na motusia foi le auala tafea fale o aiga e oo i fanuaoti tulou na tafefea uma i le sami. Oka, oka se vaaiga faanoanoa na toe tupu foi i le 1991 o le mala a lea e tasi.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O le mea la lea e talosaga atu afai lava o le climate change o mea ua tutupu ma afaina ai le Siosiomaga o le fofu lava o nei lava aua le toe faatalia tatou galulue i le taimi lenei. Ia o le talosaga lena, aualagalua o le matou nuu i Saasaai fia maua foi, aualagaluega i Siufaga ma le matou nuu i Faga ia pau a ia o mea ia e talosaga atu ai o aualagaluega ia lelei. O le isi foi mea e silasila iai o le tele o le nuu lenei ma le itumalo ua agai i uta, e leai ma se aiga o toe nofo i tai ua agai uma a i uta ae tuu tai e alu ai le aualga o le Malo. O lona uiga mo le isi 50 tausaga lumanai ua i uta uma le nuu ae tuu tai mo le auala a le Malo. Ia o se vaavaai mamao lena iai ae lafo atu i lau Afioga i le Minisita mo Galuega. O le isi mea ne i galo o le uafu lea i Faga, o le uafu lea pei a o lea ua vaai e le aiga lea o Caferelli, le uafu lea sa ou vaai iai i le vaiaso lea i tua sa tu ai iina le helicopter. Na ou faapea lea oka se manaia ae faalelei le uafu lea e land ai helicopter aua la mea e tutupu faafuasei. E lelei le uafu lea e latalata i Tuasivi i le Falemai, latalata i le Ofisa o Leoleo ia ma e tuli mai iai le motu o Savaii. A I ai ni mea faafuasei ia e manaia tele, o la e teu e le aiga lea o Kafarelli se i tulou, ae a fesoasoani loa sina fesoasoani a le Malo e toe faalautele ai le uafu lea, manaia lava mo le land ai o helicopter. E faafetai foi i lea Kamupani taua tele, e i ai mea e tutupu faafuasei, o mai, faalavelave ae ia i ai se emergency case e fesoasoani aua le faafigofieina. O i la i le uafu lea i Faga e taua tele, ia ma o le uafu lea o le uafu i aso ia, o i ina sa faaee ai le popo, koko ia ma pusa fai ae lei I ai ni uafu i Salelologa, e pei o nai uafu a ia sa amata ai felauaiga. Lau Afioga i le Minisita mo Galuega, Felauaiga ma Atinae Esee ma le Afioga i le Minisita mo le Punaoa Faalenatura ma le Siosiomaga, ia o nai manatu na, a o lena lava ua nofofale i lou finagalo ia tulaga sa faaleagaina o lenei itumalo, o nai aualagalua e faaleleia ma ni moli ia faatasi ai ma puipuga na o le taligalu ia tuutuu laitiiti i tai, ia maua foi le avanoa e sasa ai le galu i tai ae aua ne'i oo mai i uta aua ua tele a se afaina o lenei itumalo.

Ona see mai lea i le Afioga i le Minisita mo le Soifua Maloloina, faafetai mo le falemai, la ua manaia le falemai lea sa tatala i lenei tausaga ia na ua matagofie galuega e faatino ai galuega a fomai. Ae pau lava si fale la e faaletonu o le fale e nonofo ai mai, o le maota lena e tausi ai e gasegase ua fai lava sina faaletonu. O le mea lea ona o le tasi lea Matagaluega e ave i ai le faamuamua ma le tele o seleni, o lena ua tatalo atu. O Tuasivi sa fai ma laumua o Savaii e le gata i le Falemai a o le Ofisa o Leoleo, Ofisa o Faamasinoga ia la foi ua i ai ma le Victim Support la o le a iai. E tele Ofisa i

Tuasivi ae sei vaavaai ane ina ia faaleleia, ia o le isi vaega i Tuasivi e fai lava sina laitiiti, o e foi e maliliu ma taotoo ai, ia lea ua vaavaai e pei o se container le mea la e tuu ai tagata feoti. Ia ae se i silasila i ai, afai la o Savaii e maliliu tagata e 20 i le vaiaso, e le ofi, o lona uiga e tatau a ona toe faatele le tatou Falemaliu lea i Tuasivi.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafaiga faaauau i luga o le faitauga faalua**

Ae faafetai i le Afioga Pau Sefo i lona falemaliu i Safotulafai o lea e vaelua mai i ai, o le mea o le maliu o aso uma. Ia ae ua ese foi nei aso o aso la a maliu loa teu ia a o aso nei, ia ua faatalitali pe tasi i le lua vaiaso o faatalitali. Ae faatalitali la i fea? E faatalitali i le falemaliu. O le mea lea lau Afioga i le Minisita mo le Soifua Maloloina ia o nai vaavaai na mo le Maota i Tuasivi. E tele lava gasegase ia ma le isi la fautuaga taua, o Fomai. O le mea o lo o tupu e tasi le fomai ae toluselau mai i le aso. Talofa e o isi e mamao mea e malaga mai ai, ia o le faafitauli a lea o lea e tupu le lava fomai, atonu foi e le na o Tuasivi ae faapena foi i Upolu nei ma Samoa atoa. O le mea lea sei vaavaai ane pe aisea ua itiiti ai fomai a o lea lava e i ai le aoga faafomai. Po o fea le mea ua ave iai a o fea foi le mea e faataua po o faataua le soifua o tagata ia po o faataua tupe. Ia a o le agaga a, ia tasi lena vaega sei silasila iai i le tatou Ofisa lea i Tuasivi ia ma le tatou Falemai i Tuasivi, e moomia lava le faaleleia ma lona siosiomaga e le o matua lelei.

O le matou aoga i Amoa College, lau Afioga i le Minisita mo Aoga, Taaloga ma Aganuu, faafetai mo le valaaulia lea sa faafiafia ai i le Tutoatasi. Ia a o si aoga lenei e vaapiapi lava le malae, e fia maua se malae lelei, e tele foi alo ma fanau a Amoa o lo o lelei i taaloga, e lelei Iva o lea i ai le Prince Edward Park a o le itumalo Amoa mai Puapua i Faga, ia e leai lava se mea faapea. O le mea lea lau afioga i le Minisita mo Aoga, e talosaga atu i se malae ia masina fesoasoani se i faaleleia ai le faleaoga o le aoga lea a Amoa. Ia silasila foi I ai i sia foi Kolisi o lo o moomia le fesoasoani.

**FOFOGA FETALAI:** Toe e minute o le sui usufono.

**Afioga TOFA FOLENI LIO TAMA GALU:** Faafetai, o le tulaga lea lau Afioga i le Minisita mo Aoga o le Course lea e omai ai faiaoga e toe o i le NUS, tasi lea course lea afaina ai le short o faiaoga, o le mea moni lea. A omai la faiaoga e o i le course, ia na o le toavalu faiaoga i Secondary School po o Kolisi, e le lava ona la ua o e fai a latou course, degree course. A o ai la a o atu e toe faiaoga i vasega? Tasi lea mea o lea e tupu ai le pau i lalo ona o le mea lea o le fetuunaiga o faiaoga. Ia ona omai lea i Apia nei tumu ai Kolisi, ia ae ua afaina ai foi polokalame a Kolisi aua e fai loa suega a le NUS nonofo loa faiaoga ia e study ia ona le o loa lea i le aoga, tasi lea mea o lea e tupu ua absent mai le galuega. O le mea lea se i silasila ane, e lelei le polokalame pe tau o le Second and Chance Education, e lelei mo faiaoga, ae

ana faapea lava e o loa e aoga ia full time i le aoga ma sue Degree o atu ai loa faiaoga e lelei. Ia a o le mea lea o le lua o galuega, ia e moni ai le upu, e faamaoni i le isi ia ae le faamaoni i le isi aua o lea o le a alu e aoga i le NUS toe alu e toe faiaoga ia e le taitai lava le taimi ma afaina ai tamaiti. O le isi vaega i le Ofisa o Aoga, o lea e lipoti mai le tele o suiga, ona ua teʻa lava ua tuu le vaega lea sa tau o Asiasi Aoga ua teʻa lava ua tuu.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

A o asiasi aoga sa faalupe o Tama o itumalo, o latou ia sa galulue mai i tua i nuu, o a faafitauli o nuu, faafitauli o komiti, faafitauli o faiaoga e faia uma lava. E omai ma lipoti i le Ofisa Tutotonu, e le gata la i lea ae ua tele materials ia ua tufa atu o equipment, ia o lea lava e fai ma leiloloa ma leaga. Ae ana toe fai le vasega lea o asiasi aoga aua o le latou galuega e o e review mai, e le gata i le curriculum ae o e monitor pe vaavaai galuega i tua. Ia e le mafai e le Ofisa ona o atu e tau vaai. E faapefea ona tau vaai ia aoga toetiiti 200 ua I ai nei i totonu o le atunuu. O le mea lea, na ona toe faamanatu atu tasi lena mea ana fai ni asiasi aoga ma toe fai le package lea o school review officer, e leai lava ni mea e tutupu. O mea ia e tutupu i Avele, ou te talitonu e mafai a ona foia e asiasi aoga i le latou va feagai ai. Ia tasi lena leaga e tasi lena vaega taua o le galuega, o le monitoring system, o le o e vaavaai ma lipoti ia ma fofo e latou faafitauli aemaise lava le mea o le faiaoga lea i ai nei. E short lava faiaoga i Kolisi ona ua tele ina omai i Apia nei ma galulue ai, ia a galulue foi la ma iu mai a latou degree, ia e lua tausaga o le bond ona o foi lea sue isi galuega a o lea sa sponsor e le Ofisa o Aoga, ona o lea i isi galuega toe faigaluega ai ae tuu le galuega na o atu ai. O lona uiga, o le a le mea e le tuu ai se 5 tausaga e fai ai le mea lea o le bond, ina ia manino lelei ia 5 i le 10 tausaga ia ona pule lea o ia. Aua o le faafitauli lava lea i Samoa atoa, e le lava faiaoga i luga e lelei le Primary School o la e lava faiaoga la foi e i ai le aufaigaluega, a o luga ia tatou Kolisi, e talitonu e le o lelei ma atoatoa. Ia lau Afioa i le Fofoga Fetalai ia ou te iloa na pau lea o nai manatu ia a o le agaga atoa lava lea. A o le Tala o le Tupe ua folasia i lumamea i le Maota Fono e matua lagolagoina e lenei itumalo, pau lava le mea ia tatou vaavaai pea mo le manuia ma le agai i luma.

Ona faaiu atu ai lea o se leo o lenei usugafono, tau ina ia manuia lau Afioa i le Fofoga Fetalai, maua le tofa faapea foi le Taitai o le Malo ia maua lou soifua maloloina e le gata i le tino a o le mafaufau sili le agaga ia faapea le aiga Kapeneta, le mamalu o sui usufono ia manuia pea. E le galo pea le tapuaiga O Le Ao Mamalu o le Malo, tau ina ia mama le lagi i le tapuaiga a Lana Afioa Mamalu O Le Ao o le Malo, Fono a Sui Tofia faapea le tapuaiga a Samoa, aua neʻa gau le tootoo pe gausia le fue. Ia alofa le Atua maua le upega lauga e puipuia ai Samoa ia ma le tatou Fono, ia manuia le aso faafetai.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Faasaleleaga Nu. 3.*

**FOFOGA FETALAI:** Ia malo faafetai i le saunoaga a le sui usufono mamalu o le itumalo aemaise le Palemene. Ia tapa lau Afioga i le Taitaifono o le Komiti o Tupe e te faaiu mai le saunoaga ona saunoa loa lea o le Malo. Tulai mai le Taitaifono o le Komiti o Tupe. E fia saunoa le sui usufono o Palauli Sisifo? Ia toe pau la lea o le sui usufono e saunoa ona saunoa loa lea o le Taitaifono o le Komiti o Tupe, saunoa le sui usufono mo Palauli Sisifo.

**23 IUNI 2016**

## LAUGA FAA-TAUPOU

**Afioga AFOA AMITUANAI FALEULU MAULI (Palauli Sisifo):** Faafetai i lau Afioga i le Fofoga Fetalai mo le avanoa. Lau Afioga i le Fofoga Fetalai faafetai ua maua se avanoa o leni sui usufono e momoli ai se leo o leni itumalo aua le Fonousu a Samoa e ala i le Palemene.

O le a ou le toe faloina le afaloloa aua paia sausaugata o Samoa i le afua mai Gagae seia paia le atualuga i le papa le gaeø o tupu ma tamalii faapea le fale le see ma faalupega o tofiga. Ua mapu ai nei i sasaga le utuga o le vai nai Maauga ma Nuuasala, aua o lea ua uma ona e momoli lapalapa o malo e ala i le faamua ma le tatou taulaga faafetai i le Atua ua Faavae ai le Malo o Samoa.

E talitonu ai se manatu o lea ua mapu i le vai le ata o le tama o Samoanagalo, ua tatou mimusa i le taeao ula na pasioa paioa aua o lea ua futifuti manuua ina ua liutino le tatou tatalo sa fauao faupo ina ia manuia Samoa ma lona Malo.

Ua paia le Maota i le afio o lau Afioga i le Fofoga Fetalai ae tainane o le afio o lau Afioga i le Palemia ma Afioga i Minisita o le Kapeneta faapea Minisita Lagolago ma le mamalu o le Palemene i ona tulaga faalupe. E le faagaloina Afia isi ona vao i le tapuaiga a Lana Afioga Mamalu O Le Ao o le Malo o Samoa ma lau Masiofo. Afio Sui o le Fono a Sui Tofia ma a outou Masiofo, o le tapuaiga lava lea i Tama ma o latou Aiga, o Aiga ma a latou Tama, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti. E le faagaloina le nofo tapuai mai a le Motu i Sasae ia Sua ma Vaifanua, Fofu ma Aitulagi, Saole ma Saleaamua, Tootoo o le Faleula ma upu i le Manuatele.

E le vaea le falaooto i le nofo tatalo i sui vaia a le Atua i susuga i Faafeagaiga Taulagi o lo o falelemalu i so o se fatafaitaulaga i se tafa o le atunuu ma taloa manuia o Samoa ma lona Malo.

Ona ou oo mai lea i lou itumalo pele o Palauli Sisifo i lou nuu o Taga. Afio le paia o Aiga Salevalasi, alaalatai lau tautalaga Faiumu, faapea foi le mamalu ia Falefa ma Faigata, ae tainane foi Faleupolu o Tofiga ia te oe le Salemuliaga. Isi ou nuu o Salailua ma Siutu, affio mai alo o Sina ma Lealaitafea, afio aiga Sa Amituanai e susu ai le Savaiinaea, afio le Aloalii ma alii o le Vaipaepae, alaalatai oulua Matua o le Aitutagata Tuato ma Tuitolovaa ma le mamalu ia Salemuliaga. Afio mai Sa Lauulu ma Suafa, alaalatai lau fetalai Faatoafe ma le nuu faigata. O si ou nuu o Satuiatua ma Gagaemalae. Afio Faatupuinai ma Tuuauato, afio le Falesefulu o



Pesefeamanaia, afio Fuifale ma Sa Lilomaiava ma le mamalu ia Gagaemalae o le Tama e tasi o Faleupolu o Tofiga. O si nuu o Foailuga, afio le Matua o Tauavamea ma Leuso, alo o Mailata ma Moefaganoa ma Itualamavae ma Tamalefale ma Sa Lilomaiava, le nofo ituaiga i le Ailaoa; ma si ou nuu o Foailalo, afio mai Letele ma Leaupepe Afio mai le Alo o Maiava, Alalatai le Falelua, seei ane ia i tou fala le see, ae se i ou momolia lo outou leo i le Fonousu a le atunuu.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Lau Afioa i le Fofoga Fetalai, ou te fia faaleo manaoga o si ou itumalo i le vaitaumafa o Palauli Sisifo. Ua ova ma le 15 tausaga le feagai ai o si ou itumalo i le faaletonu o le suavai, amata mai i Foailalo, Foailuga ma Satuiatua. O lo o maua mai se vai vili mai Sagone ia ma Fogasavaii i lalo o le Pulega o Suavai SWA, paga lea e mai le vai, ma e talafeagai e faaoga na o faleletaua e faaoga i ai. E ola tuu taimi foi, o vai e faatali i tane, o lo o taumamafa ai lo matou itumalo. O Salailua o lo o i ai lo latou vai tumaoti ua ova ma le 50 tausaga o i ai, ma ua manafoi se toe fia faaleleia i latou tane teu suavai. I Taga, o lo o ola mai le vai mai le vai vili a le SWA, ma e ola tuu taimi foi. E maitau atu o lo o faigata ma taugata vai o lo o vili mo pore holes e pei ona taua e lou uso faipule mai Sagone. E fai o le vai o le vai, taugata le eletise e mimitia mai le suavai, ae fai foi ma uma le suavai o le elele. Ou te talitonu o lo o i ai le fofu tumau long term solution i faafitauli o vai i Palauli Sisifo ma itumalo o lo o sosoo ai i Salega.

I si ou nuu o Salailua, o lo o i ai le vaipuna, i le talaloga e malulu e pei o le kiona, ma o lo o feinu ma ola ai le nuu i le ova ma le 50 tausaga. Ou te faatusaina le punavai lea, e pei o le vain a puna mai i le papa lea sa ta e Mose ma feinu ai le nuu o Isaraelu i na onapo. Ou te talitonu o le vaipuna leni, o se meaalofa lea a Ieova lo tatou Atua e faavae ai Samoa mo le atunuu, ma e tataua loa ona tapue ma tufa loa i o tatou tuaoi, o lo o galala i le fia inu. I le tele o taimi, o lo o maimau le suavai, e le mafai ona ofi tane e lua a le nuu o lo o i ai.

Lau Afioa i le Minisita mo Galuega, Felauaiga ma Atinae Esecese lau Afioa Papalii Niko, lau tuualalo faamolemole na o se lua lava pe tolu ni tane storage tetele e teu ma faasoa atu ai le suavai. Ou te talitonu o punavai ma le sami, e pule ai le Malo., ae soalaupule e alii ma faipule o Salailua le meaalofa a le Atua ua foai fua mai, e manuia ai le nuu ma nuu tuaoi. Ou te talitonu e na o lena ua faaauau polokalame a le vai i Savaii i lalo o le EU ma le SWA le Pulega o le Suavai, ma alofa se i toe silasila ane lava ma faasaoloto loa si o matou itumalo o Palauli i Sisifo leni pologa i le suavai.

Ou te fia tautala lau Afioa i le Fofoga Fetalai i le mala ua o tupu nei i le tatou atunuu, o le mala ua amata ona faatupulaia i leni vaitau ma ua manaomia se fofu tumau, long term solution mai le Palemene, aua ua le mafai e matua, Faafeagaiga Taulagi, pule alii ma faipule ona fofu. O le a lea mala?

O le faatupu vevesi le mafaufau, violence, e aofia ai le faamisa, ma le fasi tagata, talepe fale ma le faaleagaina o meatotino a tagata lautele pisinisi ma le Malo. O le vevesi a aoga i le tele o tausaga ma le vevesi a Avele mulimuli nei, o lena ua uma ona fai ai se fofo a le Kapeneta mo le taimi nei, faafetai. Ou te talitonu, e toaititi lava, pe tasi pe lua pe tolu e na faatupuina nei vevesi, a o lea e aafia uma ai le toatele o fanau matua ma le aoga taualoa o Avele e le i faamisa ma leai se agasala.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Ou te talitonu ia pau pea le samala i le ulu o le fao. Mo le fofo o lenei mala, ou te fia faatepa le Palemene i taiala o lo o i totonu o le Tusi Paia, o lo o i ai uma fofo o so o se faafitauli o lenei lalolagi ma faigata o tatou i ai nei. I le Esekielu 18:1-2 e faapea, ðua toe oo mai le afioga a Ieova ia te au e faapea, o le a le uiga o lenei faaupuga masani e tou te faia ia laueleele o Isaraelu e faapea, ua aina e Tama o vine moto ae magiagia ai nifo o le fanau. O lo o ola au, ua fetalai mai ai le Alii, pule Silisiliese o Ieova, e le faaauau ona outou faia lenei faaupuga masani Isaraelu. I le fuaiupu 20 e faapea; o le tagata ola e agasala e oti lava ia, e le nofosala foi le tama ona o mea sese a lona atalii. O le amiotonu a le ua amiotonu, ua i ona lava luga, o le amio leaga foi a le ua amioleaga e i ona lava luga. E fautuaina ai le Palemene, e fai se Tulafono e toe faatulagaina ai le solitulafono o le faatupu vevesi, violence, faamisa, fasi tagata ogaoga ia tutusa ma solitulafono e pei o le faasioti tagata, toso teine, fualaa faasaina e tai 10 tausaga i le Toese ma sueina faatopetope i latou o faia nei solitulafono ma loka i le pasima se i maea lona faamasinoga. A faamaonia solifatulafono, ia lokaina i le pasima po o ni potu high security ma aua nei toe tatalaina i fafo se i maea se tausaga i le pasima.

Lau Afioga i le Fofoga Fetalai, ona ou oo mai lea i le mataupu foi lea i tama, tina, uso ma tuafafine i le Ola Toefuataina i le Toese, e pei o tamaiti faatupu vevesi sa ou taua muamua, ua fai le agasala a pagota e toalua pe toatolu e sosola, a ua aafia ai weekends a nai tagata sa usitaia latou weekends. O le tele foi o nai uso ma tuafafine na sasi i tulafono laiti Betty Crimes e pei o aitalafu le togotia ma mea faapena, ou te tatalo atu i le Kapeneta e toe silasila atu i le faaauau pea o latou weekends ma latou o lo o usitaia tuutuuga o weekends. Ae loka pea i le pasima o pagota sosola soo e na o le toatolu pe toafa, ma faafoia ai foi le manaomia o leoleo e 200 e alu ai foi tupe e tele, e pei ona taua muamua e isi o sui usufono.

Ona ou oo mai lea i le aualatetele o Palauli Sisifo, lau Afioga i le Minisita mo Galuega Papalii Niko, ua ou maitau atu o lea faatoa oo atu atinae o auala galue i Palauli Sisifo, ua maea le auala galue e tasi i Salailua toe lua auala galue e le i faia, e le i maea le auala galue i Foailuga. E leai se auala galue i Foailalo, Satuiatua faapea lou nuu i Taga ma o lea e tatali atu lava le auala i Taga, i le mataaga foi lea o le Blowhole o lo o numera tasi i tagata tafafao mai atunuu i fafo. Lau Afioga i le Minisita mo Galuega, matou te taua oe o se

tupu, pe a uma atu le lua tausaga, ua maea le suavai ma tatou aualatetele i lenei Paeaiga.

Lau Afioga i le Fofoga Fetalai, e talitonu le agaga o Samoa e na o se atunuu laitiiti i le lalolagi, ae a faatusalia i le olaga atiae ma le matagofie, o lo tatou atunuu i auala a le Malo, o atufalega matagofie ma taumafa tatou te maua, o le ola i se atunuu e toafilemu ma saogalemu, ona faapea ifo lea o i tatou nei, ua faafetai le Atua e Faavae ai Samoa, ua faafetai i le tatou Faigamalo i le atinae ua oo i ai Samoa.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Lau Afioga i le Fofoga Fetalai, o le agaga faafetai ma le loto malie , e momoli pea i lou itumalo o Palauli Sisifo, tofiga ua mafai ai nei ona usufono i le Fono Aoa o Samoa . Ia faamanuia le Atua i lau Afioga i le Fofoga Fetalai, faapea le Palemene a Samoa ae ola pea le sui usufono o Palauli Sisifo, soifua ma ia manuia.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Palauli Sisifo.*

**FOFOGA FETALAI:** Malo faafetai, malo tapena, malo sauni, malo foi le manatu mai o le sui usufono i le galuega a le Fofoga Fetalai ina ia faapena ona faateleteleai le tatou galuega ina ia vave faatino galuega ma o outou finagalo e le paia o le Kapeneta.

Ae le i tuuina le avanoa i le Taitaifono o le Komiti o Tupe, se i tulai mai lava pe i ai se isi sui usufono e toe fia saunoa? Ia e toe toatasi le tatou sui usufono lea e fia saunoa. E toe toatasi la le sui usufono. E maitauina foi o le l mafaufau le tapa atu o le Fofoga Fetalai ae leai se isi e tulai mai luga, a o lea e maitau atu e tou te fia saunoa. O lona uiga tou te le o faamama i le galuega a le Fofoga Fetalai. E alu isi minute i le taumafai e tauanau outou vaeatu le paia o le Fonousu a Samoa. A o le tatou galuega e pei lava ona fai atu, tatou te galulue faatasi. O le mea la lea ua lelei o le a tuu atu le avanoa. Ia saunoa ia ae faamulimuli i le Afioga i le Taitaifono o le Komiti o Tupe.

Tulai mai e saunoa lau Afioga i le Minisita Lagolago o le Ofisa o Faatoaga. o Gagaemauga Nu. 2.

**Tofa Hon FAASOOTAULOA PATI TAULAPAPA (Gagaemauga Nu. 2):** Faafetai lava i lau Afioga i le Fofoga Fetalai mo le avanoa. E fai mea faalogo atu lava mea uma i lau Afioga, o lea e faatalitali atu faapea e amata atu i i ae faaiu mai o, ia ae ui i lea, e lelei lava le usitai i lo le gao o le mamoe poa.

Lau Afioga i le Fofoga Fetalai, ia e le tele lava ni mea e moomia e lenei itumalo, ma e o le agaga faafetai i le Atua i lenei afiafi, ia ua maua foi se avanoa po o se laolao e faaleo ai le agaga faafetai o lenei itumalo i le Afioga i le Taitai ma sui usufono mamalu o le Kapeneta ona o galuega lelei sa feagai

mo le tausaga ua tuana'i. E lagona e lenei itumalo le agaga faafetai, ona e talitonu ni mea lelei sa faatino ma fai mo Samoa atoa. O lea ua ou fiafia ai e tulai, e momoli atu le agaga faafetai i lau Afioga i le Fofoga o le Fetalai faapea le sui usufono mamalu uma ua tatou i ai i lenei afiafi.

Ou te manatu o le agaga faafetai, o le faafetai i le Atua pau lava lea o le agaga o le itumalo lenei ona ua taitaiina mai lo outou soifua ma lo tatou ola e faataunuaina ai le tatou Fonousu o le Palemene i lenei vaitau o le tausaga. E ui lava po o le a se fuafuaga po o le a se tofa ma se faautautaga, ae talitonu le faamoemoe, ana le seanoa le Atua, e galulue fua i tatou.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O le agaga faafetai lea ma o lenei foi itumalo e le tagisa, sa nofonofu foi pe fai se lauga pe leai, ae sa tulivae lava i le Atua i galuega lelei ma mea lelei aua Samoa atoa. O le agaga faafetai lea e talitonu le itumalo lenei o Samoa e Faavae i le Atua, o Samoa foi o le atunuu tofi e le o se atunuu taliola. E talatau Toga ae talatofi Samoa. O le maualuga o sa ma faiga e masani ai sui usufono mamalu uma o le Palemene mai lea itumalo ma lea itumalo, e leai se mea o lilo i le silafaga a le Atua. O outou finagalo ma outou moomooga molioo i finagalo ma faamoemoe o itumalo taitasi, po o le a lava se mea e finagalo i ai, a le afaatasi le Atua ma le Afioga i le Palemia ma le Kapeneta, e faapena lava lo tatou nonofo ai. Pau le mea faafetai i le Atua ua faia mai tatou e avefa ma meafaigaluega a le Atua ma le tatou atunuu, ina ia tatou soalaupuleina mea lelei. O le mea lea tatou te faafetai ai i le Atua, ma ou te fia faaoo foi se agaga faafetai i lou itumalo. Sa ou le manatu lava ou te toe foi mai i le Palemene, ae ou te talitonu, e i ai se feau taua mai le Atua ou te toe foi mai ai lou tagata matua i totonu o le Palemene lenei. Ma ou te iloa foi e tele se aoga o lou nofonofu atu ma faufautua atu i le tulaga o mea e fai. Aua po o le a lava le tulaga o le poto ma le atamai, ae tatou te talitonu na o le Atua o ia lava faapogai o mea lelei, e pei ona faavae Samoa i le Atua, o Atua mo Samoa. O le mea lea matou te momoli atu ai le agaga faafetai i le tulaga o mea fai a le tatou Malo, ua manuia le tatou Malo. E le o toe tagivale e pei o upu masani, tatou te le o toe o i se 100 maila o lea ua tatou o i le 200 maila, tatou te tamomoe e le o toe savavali. O le agaga faafetai lea ua i ai le tatou atunuu, ua tele le suiga o Samoa ua i ai.

E momoli atu ai le faafetai i le Taitai ma le Sui Taitai ma le aiga Kapeneta ona o galuega lelei sa ou tou faia i le la tausaga. I lenei tausaga, ia tatou tatalo i le Atua ina ia faapena ona i ai pea le filemu o le Atua e leai ni mea o lenei itumalo pei lava ona outou silafia sa outou galulue ma agalelei i mea fai a lenei itumalo. Na pau le mea lau Afioga i le Minisita mo Galuega, Felauaiga ma Atinae Eeseese na o nai auala lava e lua mo Saleaula i Savaii ma Saleaula i Salamumu nei. A e oo i ai, e faapena lava ona talosaga atu, a o mea uma ua maea galuega lelei sa faia e le tatou Faigamalo i taimi ua tuana'i. O le agaga faafetai lea.

E fia oo atu sau faafetai i Lana Afioga Mamalu O Le Ao o le Malo lau Afioga Tui Atua ma lau Masiofo, Afioga i le Faamasino Sili ma le Ofisa o

Faamasinoga, faapena foi le Palemia ma le Kapeneta ma sui usufno mamalu o le Palemene. Ona o le suafa o Iesu, Amene.

**FOFOGA FETALAI:** Malo faafetai i lau Afioga i le Minisita Lagolago o Faatoaga, o lea foi ua tulai mai le Minisita Lagolago mo le Matagaluega o Aoga, Taaloga ma Aganuu. Tulai mai le sui usufono mo Anoamaa Sasae e saunoa.

*23 IUNI 2016*

#### LAUGA FAA-TAUPOU

**Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa Sasae):** Malo faafetai i lau Afioga i le Fofoga Fetalai. Sa ou tau mafaufau lava pe fai se sao o lenei itumalo ae faafetai mo le avanoa. E le umi foi se matou faamatalaga, ua maitau foi i saunoaga, ua o se fau lava e tai finagalo o Afioga i sui usufono mamalu. E pei lava o lea e agai i le faafetai a itumalo ma nai manaoga aua lava le tapuaiga a itumalo. Ua taoto a o se alaoo paia o Samoa, e i ai foi le talitonuga o lenei itumalo, na ona uliuli lava o le moana, a ua iloa lava ala o i'a. E tele laau o le vao ae iloga lava le laau e malu i ai laau i lona paolo. Ona i ai lea o le matou manatu, o le a le toe taina i tua se matou faamatagaluega, o lea foi ua matau atu ua tuli tamoe le faamoemoe o le tatou Fonousu aua le talanoaina o le Tala o le Tupe.

O le a fagatonu ia le malama ma vili tonu le ifi a Maina, aua se faamoemoe mo manaoga laiti o lenei itumalo. E pei lava ona ou talanoa atu, e savili a faapuna o manu le tatou taeao na liugalua, o manu foi ma lupe sa vaeseese o lea ua fuifui faatasi i le Maota i Tiafau o le Maota o le Faautugatagi e saili i ai le tofa ma le moe aua Samoa mo nei ma taeao. O lenei aso o le aso lava a atofa aua le faamoemoe o le lauliuina o le tamaoaga o le atunuu, faafetai. O la e tapuai mai, o lea foi ua tetee i tai lo tatou sa, o lea ua tuanai peau iti, o aau iti, a o lea o le a tatou oo atu i aau mamao. Ona i ai lea o le manatu, e mua se faafetai ma se viiga i le Atua ona o lana puleto ma le pule faasoifua ua momoli mai ai le soifua o le paia o le Maota i lenei taeao na liugalua. Ua ou vaai la ua maua, aua e i ai le talitonuga o lou lelei o lea ua see ai nei le sa o Samoa i tai o penapenaga ae le o tua o tai. Ua tatou see foi i peau matamataloloa aua ua gase le peauvale, ae ua laga le peau aua le sa o Samoa. Ua uma foi ona tofi tofa le laau a le tamaitai aua le filiga o faigamalo, sa saili i le tai se agavaa ia Samoa ma lona fale ma lona sa, o lea ua tali le Atua e ala i ana tofiga. Tatou te faafetai ma viia le Atua i nai so o se mea.

Na o si au faapai i le tapuaiga a Samoa ne i fai ma lape o se matou leo, i le tapuai mai i maota ma laoa ma tui ai le muli o le papa ma feula mai le mulila e amata mai i le tai samasama seia paia le siufanua o le Alataua, le paia aua le Faatui ma Tootoo, le paia aua le nofo i le Faleagafulu, le paia i Aiga ma Tama, ae a le Usoga a Tumua ma Pule. O paia faataotooto na e le avea o lou sa Samoa ma lou atunuu paia e le avea i le tapuaiga malu i le aufaigaluega tofofi a le Atua i fatafaitaulaga e fia, i la outou faanonogamanu, o lea ua ae manuia o tatou faiva. Talu ai nei, sa poia i afa le folauga, ae peitai ane, ua toe

faia lava e le Atua mea silisili tatou te viia ai Lona suafa, ua faaseeloa ia matagi i le vasa, ma nuu e leai ni tagata, ae ua faasaoina ou laufanua Samoa. Aemaise foi le tapuaiga mau aua le tafatolu o Faigamalo, i Lana Afioga Mamalu O Le Ao o le Malo aemaise foi o Sui o le Fono a Sui Tofia, lau Afioga i le Palemia ma le Kapeneta, tainane le Fofoga Fetalai ma sui usufono mamalu o le Palemene, tainane foi le afio o le Faamasino Sili ma le paia o le Matagaluega o Faamasinoga. Ia o le mamalu lava lea o Matagaluega taitasi a le tatou Malo.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Ia, si o matou itumalo, o lo o taputapu mai foi ma tatalo mai, faafetai mo latou faaeaea lea ua papale ai lo outou sui usufono i upufai o Malo, e fai ai lo matou faatauvaa e fai ma outou sui usufono aua lenei Paeai. O le paia lava lea aua le afio o le Tapaau ma oe Lufilufi o le Tumua, ae a ou fuaiala. O le paia foi aua le falefitu o le itumalo i le afio o Aiga, Aiga o Tupu ma Aiga o Nofo, tainane i laua Matua ma le tofi faasolo i le aai o le Tupu. O paia taotooto na o si ou itumalo, faamalo le tatalo. I le paia o le Aufaigaluega o lo o talafaauto aua se manuia faale-Agaga o le itumalo. Le paia i le susu o le Toeaina ae faapea foi le Afioga Patele, ae a Faafegaiga e fia o faafalelemalu i totonu o le afioaga, o outou manu na ma outou mama na. O le tatalo a le sui usufono, ia to ni manu mai le Atua ma ia aoga le ea o le Anoamaa Sasae aua se faasiliga malosi faaletino.

Ia, e le tele lava ni manaoga o le itumalo....

**FOFOGA FETALAI:** Ou te faamalulu atu ia te oe le Tumua, o lena ua maea ona e ta le vaiafei ma e faapoipoi laau tuvanu taiane foi Samoa i lona aotelega. Ona ou manatu lea, ua vavae foi i i, o lea ua oo mai le tatou malologa masani.

O le a faataatiaese Taulumaga a le Fono Aoaofa Faitulafono mo lana malologa masani.

*Na faataatiaese Taulumaga a le Fono Aoaofa mo lana malologa masani i le itula e 4:59 i le afiafi ma toe amatalia i le itula e 5:30 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.*

**FOFOGA FETALAI:** Ou te toe faasilasila atu ua toe amatalia Taulumaga a le Fono Aoaofa Faitulafono. Ua manatu le Nofoa ua maua le malosi faaopoopo o sui usufono mamalu o le Palemene e faaauau ai le tatou galuega.

Malo faafetai i le Failautusi ma le Ofisa o le Fono Aoa o le tapenaina o le taumafataga aua le taliga o le sua.

E faia le malologa o saunoa le sui usufono mamalu mo Anoamaa Sasae, ou te tapa ma le faaaloalo lau Afioga, oe le Tumua e te tulai mai e te saunoa e faaaauu lau saunoaga.

**Afioga ALAIASA MOEFAAUOUO MALAGAITUTOGIAI SEPULONA MOANANU:** Faafetai mo le avanoa. Ia, ua palegaauu foi le faamalositiono a sui usufono mamalu o le Palemene, ua maua foi si faasiliga malosi e faaaauu ai le tatou galuega.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaaauu i luga o le faitauga faalua**

Ia, o le a oo mai se tala a Anoamaa Sasae i manaoga o si ou itumalo. E pei lava ona ou faailo atu, sa tilotilo foi, e le tagisa foi le itumalo, ua masani lava le itumalo ia, o le a le mea e maua, o lena.

Lau Afioga i le Minisita mo Galuega, Felauaiga ma Atinae Eeseese, o lena ua faaoo atu se project development a lenei itumalo i lau Afioga. E tuutuu atu i ou autafa sina poloketi mo lenei itumalo. O le 2001 e ese le sui usufono na tulai mai. O le 2006-2011, o le tausaga lava ma le faiga palota ma sui le sui usufono. O lea foi la ua sui mai le 2016, e tasi lava le tala a toeaiina, sole, vaai le tatou auala. O lona uiga, a le faia foi le auala, e le toe sau foi le sui usufono i le isi palota. O le mea lea, na ona tuu atu lava i ou tafatafa i lau faasoa, ia e alofagia lenei itumalo, e pei lava o lea e le o lavea i le faasoa foi lea a le tatou Malo. Ae ua iloa foi o le mea lea o le Tala o le Tupe o le balance sheet e tataua ona paleni le isi itu ma le isi itu. O le 1985 na fausia ai le atinae a le Malo lae i ai i le mea o le poloketi foi lea e alu ai le eletise i le vai. O lea la e oo mai lava i le taimi lenei, e le o tagisa lava le itumalo, na pau le mea o le vai ia ola lelei ai le eletise a le atunuu, ae ositaulaga lava Anoamaa Sasae. O le mea lea, na ona tuutuu atu faapena i le Minisita mo Galuega, leaga e i ai isi itumalo e aiuu i mea ia, a o Anoamaa Sasae, e faasafua ea ia aua le manuia o Samoa.

Lau Afioga i le Minisita o Tupe, o lau faamalosi ia te oe, manatua le upu foi lea a le Atua na fai ia Iosua ina o le a faaaauu le malaga foi lea i totonu o le nuu paia, fai mai, "A e lototele ma e faamalosi, ou te i ai ia te oe i aso uma o lou ola." O le mea lea, o lau faamalosi ia te oe le Minisita o Tupe, aua e te palaai, aua e te fefe, ioe. O le mea o le tupe, o le mea e sue, ioe, o le mea e maua. A e le tuitui, e le tatala mai foi mo tatou, ae aua e te atugalua, leaga o le olaga o tatou, e faigata lava ona e alu alu i luma e toe sau i tua. E leai, a e alu loa i luma, e tai pei lava o mea a le Atua, e te siitia mai le isi mea i le isi mea, i le isi mamalu i le isi mamalu, ae pei o le a taofiofi. O le mea lea, o lau lea faamalosi i lau Afioga ia lava lou loto e fai ai mea a le atunuu. O lea ua faafofoga mai, ua tagi uma mai Samoa. O ai e sulu i ai? E sulu mai i le Malo. O le mea lea tuutuu atu i ou tafatafa ia maua pea lau tofa, aua le polo faasoa aua Samoa. O lea ua matau atu, faafetai i lenei tupe tele ua aumai i le matou Matagaluega lea o aoaoga. E pau lava lenei o le atunuu i totonu o le lalolagi e aoga fua mai lava i lalo i le Year 1, e tau i luga i le Kolisi. O se mea

matautia lea ua faatu e le tatou atunuu. Ae fai fonu a nuu i Aso Toonai, o lea e tau aue atu le pulega a alii ma faipule i matua, se se i ave tamaiti i le aoga. E ui lava o i ai foi ni tulafono lea e i ai e compulsory aoga, ae i ai lava matua e faatautau lava i le tulaga o le fausia o manaoga o le Malo. O le matou lea tatalo i le atunuu, amuia outou, atonu foi o le mea lea ua tau le lelei ai aoga a le fanua, ona o la e maua fua le mea. Ua tatau foi ona toe tuu i ai sinaí í e tau aumai pili aua na o le bingo le mea lea e sosoo, po uma po uma o lea ua faaalu ai la le tupe lea, ae faagalo le fanau, o le oa mai le Atua, o le lumanai manuia lena o le aiga.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Faafetai i lau Afioga i le Minisita o Tupe, ona o le tele o lenei tupe. E na o le lua lava luá ia e tuu atu i le Minisita ona faai ai lea o le matou lauga. O le mea muamua, o lea ua aumai le Tulafono lea o le Fono a Nuú, Village Fono, o lea foi ua toe teuteu mai ai isi mataupu ia e toe tuu i ai i toeiina. E a pe a vaai se vaega tupe e maua ai tupe o le Fono lea. O la e tapuai mai toeiina ae tatou o foi lea, o luga o security boxes, o le malu puipuia o le atunuu, e tel tele le sao o alii ma faipule i le mea lenei. E le taitai ona gafatia e tatou leoleo lea e i ai, e le o faaaupegaina foi leoleo. Ana le tu malosai mai le pule lea a alii ma faipule, ia talofa e, e na ona ou tuu atu faapena i lau Afioga i le Minisita. O lona lua, sei vaai ifo le totogi o le afaigaluega a le Malo, ua sefulu tausaga e lei toe siia se totogi, o le mea lea ou te fai atu ai, e pei lava na ova sii i le isi vaitaimi. Ao le mea e tatau ona siisii malie foi lea, aua e pei lava e masani tele loa i lau tupe maua, ia ua vave a foi ona masani le faaogaina. O nai luá ia e lua, i lau Afioga i le Minisita, ia tautuana ma oe le faamoemoe. Faafetai mo le tatou atinae o le malae vaalele, o le matua atinae taua, o lea foi ua molimauina e le Tala o le Tupe, e tasi lenei o tupe tele o le a faaalu i lenei Paeaiga, o le atinaeina o le malaevaalele, aua lava le faatosinaina o turisi. Ae pau lava le isi mea, sei toe lalaga le tulaga o le tatou vaalele, pe le mafai ona toe tuu ifo i ai, ia fai sina o tatou kamupani vaalele fou, sui le igoa ae faaalu ai le tatou atinae lea, aua le agai i luma. Ona faai atu lea o s matou faamatalaga lau Afioga i le Fofoga Fetalai, e le mafai ona faagaloina si a matou komiti o le palota o lo o tapuai mai, ma nai ou aiga. O le anavatau lava o le palota a matou, o le pese lea a le ekalesia Katoliko, o le faatuatua ma le faalagolago, ae o le sili o ia mea o le alofa. O lea la ua ou pale mai, faafetai i lo outou alofa, faafetai o lea ua aumai lo outou talitonuga, ia faafetai. Faafetai foi i nai ou aiga, a taou loa loou aiga o lona uiga ua lavea uma ai tagata uma o aiga, e lavea atu ai ma isi tagata e le tatau ona taua. Ae o le suafa o le sui usufono mo le silafia, o Alaiasa Moefaauouo Malagaitutogiai, o lona uiga o le lufilufi o le Falefa ma le Falevao, o ou aiga uma lava na i o matou nuu ia, e le iloa pe toe fai nei foi se isi matai i le lumanai. E toatele aiga, ae faafetai i le Atua i la outou lagolago o lea ua pale ai. Viia foi le Atua i nei tofiga ua amanaia ai e le Malo. Ia tatou faafoi le viiga i le Atua. O le tulaga o leí í na o sina tala sei oo i si o matou nuu i Lufilufi. Lufilufi faafetai i lau susuga Faapa , aua le va ma le tam o le tatou nuu. O



lea lava ua taulu taulu, ua malo lava le finagalo o le Atua. O le mea lea, e le selu atu, leaga e tapaaui faasisina ia ma le tapaaui le fano. O oe lava o le fale Tuiatua e malu i ai Samoa. O le mea lea, ia faamalo fai o le faiva, malo tofa i le Atua, ia talosia ia faiva o le atunuu, aua le alofaiva o Le Ao Mamalu o le Malo, aua le alo faiva o le Palemia ma le Kapeneta, ia to ni man , aua Samoa tapuai. Soifua ma ia manuia ae ola le sui usufono mai Anoamaa.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou o le sui usufono mo Anoamaa Sasae.*

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

**FOFOGA FETALAI:** Malo faafetai. Tulai mai le sui usufono mo Vaimauga Sisifo Nu. 1.

**Tofa LENATAI VICTOR FAAFOI TAMAPUA (Vaimauga Sisifo Nu. 1):** Ou te faatalofa atu i le mamalu tele o lenei Maota, si ou alofa talofa lava. I lenei taeao liugalua, le foe a Ulualofaiga. Aua ua tau Tupu ua tau i Tumua ua tau i le Atua. Aua le afio a lau Afioga i le Palemia, Sui Palemia ma le nofo a Minisita o le Kapeneta faapea le afio o tou Afioga a sui usufono mamalu o le Palemene a Samoa. A o lou toe tulai mai i le foe, lau Afioga i le Fofoga Fetalai, ma e seei i le Nofoa pule o lenei Maota, se ua faamalo le galue. Ua faamalo tautua, ua faamalo le fai o le faiva, e pei o le fetalai i Lefauseu ma Ulumu. O le tala o le tusi, e te faia lava e oe mea sili ma e manumalo pea. Ia faamanuia tele le Atua i lou tulai mai. Fai oe ma too taumua o le sa o le Palemene o Samoa. Faafetai atu i lau Afioga i le Fofoga Fetalai, ona o lenei avanoa ua e tuuina mai, e tuuina atu ai se sao o lenei itumalo aua Tualumaga o le talanoaina o le Tala Faatatau o le Tupe e pei ona luga o le Laulau a Fono a le Palemene. Ae muamua ona ou faatulou ma ou faatalofa atu i le tapuaiga paia a lau Afioga O Le Ao Mamalu a lou Malo Samoa ma lau Masiofo, le tapuaiga mamalu i a outou Afioga i Sui o le Fono a Sui Tofia ma outou Masiofo. Lau Afioga i le Faamasino Sili ma lau Masiofo faapea le vasega o Faamasinoga. Ou te faatulou ma ou faatalofa atu i le mamalu maualuga i le nofo a Minisita a le Sakarameta Paia o le Aufaigaluega Paia a le Atua, o lo o faatunapaulia ma faafalelemalu i nuu ma afioaga, i le soo faataamilo o Samoa, aua o outou o anava o le taua faaleagaga, aua Iesu ma Lana Talalelei. Faamalo faafetai mo lo outou tatalo ma lo outou faanonomanu aua se manuia o Samoa ma lana Faigamalo.

Ou te faatulou ma ou faatalofa atu Samoa i ou paia agi nuinuitetele, ma ou mamalu e agi laufola i aufeauga ma tanugamutia. Tulouna le salafa o ou itu tafa toa ma ou sa vavaloloa. Aua e sili o ou aupai ua le tauilo ai lou gatogi . Ua uma ona tof taf le laau a tama, le na tafaafif tafaafitia tafaafitoto i aiga ma o latou tama, tama foi ma o latou aiga. O aiga o Tupu, aiga o Nofo, aiga o P p ma aiga na Tafaafif . Tulouna le va vavae o Tumua ma Pule, o le va tootoo ma le va fetalai. Tulouna le va vavae o Ituau ma Alataua, Aiga i le Tai ma le Vaa o Fonoti. O Tulati ma Tulatoa ma le aufueloloa ma outou o e faia

upu o Samoa. Ae o le a sunui lau o le f , ma faapitoaugafa se leo o le auauna faatauvaa aua e faigata le tapuaiga, a lou itumalo pele o Vaimauga Sisifo Nu 1. I le afifio o a outou afioga matua, lau Afioga Tofaeono Vui Faatali ma lau Afioga Tofaeono Fonoti Iupati, afifio o a outou afioga Tama, lau Afioga Patu Ativalu Tunupopo, lau Afioga Patu Tiavaasue Falefatu Sapolu ma lau Afioga Patu Sola Siaso. Afifio a outou afioga i Aoe, lau Afioga Asi Tuiataga Semisi Blakelock, lau Afioga Asi Tunupopo Sagagauatasi ma lau Afioga Asi Leuluai Peleupu.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O le afifio lava lea o aiga e tolu, afifio le Usoalii ia Luafau ma Tuiono ma Lupetaliaami. Alaalatai Laua na tai ia Tamapua ma Manogiamanu ma le mamalu o le nofo i le ituiga ia Fuata. Tainane le mamalu ia Ataga ma sa Atag , faapea le Launiu na Saelua. Taga ma Salaitia ma lo la mua na Fagatau. O paia faataotooto na o oe Vaimauga Sisifo Nu. 1 aua le paia maualuga i susuga i Faafeagaiga ma le Afaigaluega a le Atua, i le nofo a fatalua o le Talalelei. Le paia ma le mamalu i tupu ma ee, o failauga ma ponaoo, saao ma aualuma, faletua ma tausii aumaga ma ava aumaga e oo lava i tupulaga talavou ma le mamalu tele o le aupalota. E avatu foi le faamalo faapitoa i sui tauva sa fai i ai le filifiliga o le tatou itumalo. Malo le fai o le faiva faatamalii. Lou itumalo pele, o le tala e fai i le tiuga alofilima o Samoanagalo, e tofo e tino matagi lelei, ae tofo i lologamata ai o le tai. A lea ua vaai i mauga ua ou tepa i ula, ou te momoli atu le faafetai tele ona o lau faaeaea ma lau faaaloalo i le tagata augavale. Ua mamalu ma ua maualuga ua tautupu ma ua tautamalii faafetai faafetai, faafetai tele lava Vaimauga Sisifo Nu. 1. E pei na i ai le Paeiga ua tuanai, ou te le faia ni folafolaga ae na o lau tautinoga, ma lou agaga faamaoni, o le a ou tuuina atoatoa lou malamalama ma lou malosii, ou te auauna ai ma tautua oe lou itumalo, e ala i lou tofi faipule. E faapena foi ona ou faatagisia lau tatalo faifaipea ina ia faamanuia mai le Atua i lou alofaiva aua oe lou itumalo. Ia apele ma apepele outou uma i manuia faalanu maaveave o le Atua. Ae tapuai maia ae se i ou liliu ane se i fai so tatou sao aua le Tala Faatatau o le Tupe e pei ona i luma nei o le Palemene o Samoa.

Lau Afioga i le Fofoga Fetalai, ou te momoli atu le faamalo ma le faafetai tele i le Minisita o Tupe ma le Matagaluega. Aua ua outou sasaa faaoti le utu a le faimea, i le tapenaina o lenei galuega maeaea. Ua faamalo le galulue. Lau Afioga i le Fofoga Fetalai, e matua lagolagoina e lou nei sui usufono le Tala Faatatau o le Tupe 2016/2017, ma o le a leai foi se faamatalaga e faia i ai. Ae pau lava o lea, e fia tulitulumata gau pea le ufi a le tamaitai e tusa ai ma manaoga o tulaga fia faaleleia o lenei itumalo. Lau Afioga i le Palemia, Sui Palemia ma le paia maualuga o Minisita o le Kapeneta, o lena ua tauaoina atu talosaga tusitusia, i nisi o outou afioga. Ae tau ina ou toe faamanatu ma le faaaloalo tele.

Muamua, o le auala galue e agai atu i le faatanoa tele a le Malo i Magiagi. O lenei auala o lo o faaoga pea e le Ofisa o le Vai faapea le Ofisa o le

Malosiaga Faaletise aua foi le asia o lenei faatanoa vai. O lenei foi vaega o le nuu ua tele ina nofoia foi e tagata, ua usitaia lapataiga a le tatou Malo ia vaai eleele maualuluga e faapena ona nofoia nei lamatia i nofoaga maualalalo i ni faalavelave faalenatura.

Lua, moli auala mo le auala sopo po o le auala savali mai i Maagao i Faatoia. O nisi o aiga o lo o nonofo i lea vaega e manaomia le savalia o lea auala ina ia oo mai i le aualatele po o le main road lea e i Faatoia aua foi faataliga o le pasi mo galuega aemaise foi fanau aoga. Ae fai lava sina pogisa o lea vaega pe a oo mai le po. E lamatia ai foi le soifua, toatele tagata.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O lea e tatalo atu ai ma le agaga maualalo ni moli ina ia faamalamalama ai lea vaega ina ia saogalemu ai le mamalu o le atunuu o lo o faaogaina lea auala sopo.

Tolu, o le taligalu i Moataa, lau Afioga i le Fofoga Fetalai, manaia le faasolo mai o le taligalu, amata mai Mulinuu agai atu i Apia faasolo atu i Matautu ma Vaiala, misi Moataa ae toe ea mai Fagalii. O le tatalo ma le agaga maualalo, o le a se finagalo ae toe foi mai e faatumu le pu lea, ona agai atu loa i nisi o nuu ma afioaga i le itu i sasae o le tatou atunuu.

Fa, o le auala savali i le togotogo i totonu o Moataa. E pau lava lea o le auala savali sa faapena ona tuufaatasia e tama matutua nai toeiina, pe tusa ai ma le valusefulu tausaga talu ai. Sa matou asia foi ma le Ofisa o le Siosiomaga i tausaga ua tea, e tatalo atu ai ma le agaga faaloalo i le Minisita po o le sui Palemia, faamolemole se i tagai po o le a se tala mai i le lipoti ua faapena ona tuufaatasia e le Ofisa.

Lima, o le faleaoga tulagalua a Moataa, tatalo atu ai lau Afioga i le Minisita, o nei talosaga ua faapena ona avatu foi i nisi tausaga ua tea, ua fai lava sina leva, ae tatalo atu ma le agaga maualalo ona o lenei faleaoga, sa faapena ona ave ai foi le faamuamua a le tatou Matagaluega, ina ua maea le afa o Evani i le 2012, ae oo mai lava i le taimi nei, o lo o tatali mai pea si o tatou nuu po o le a se tala mai le tatou Matagaluega.

Ma le vaega mulimuli lau Afioga, o le fia faaleleia lea o le auala taavale mo aiga o lo o nonofo i le tuaoi o le itu i sasae o le malae taaalo po o le Apia Park. O le Paeaiga Iona XIV lau Afioga i le Fofoga Fetalai, o lea sa i ai faamaumauga e faapea, o le a fai le auala lea i lalo o le feagaiga ma le Ofisa o le Siosiomaga. O lea e tatalo atu ai ma le agaga maualalo pe mafai ona toe tagai i ai le tatou Matagaluega, aemaise foi le Afioga i le Minisita, i le tulaga ua oo i ai lea vaega. Lau Afioga i le Fofoga Fetalai ma le mamalu o le Palemene, pau ia o manaoga tuua po o manaoga ogaoga o lenei itumalo e fia faaleo atu mo le taimi nei, tausaga muamua o lenei Paeaiga atonu e lelei foi, faasoosoa atu i se taimi o i luma.

Lau Afioga i le Fofoga Fetalai, ae ou te lei nofo i lalo e momoli atu le faamalo ma le faafetai tele a lenei itumalo, i le tautua le faalogologo tiga o Faauluuluga ma aufaigaluega o Matagaluega ma Faalapotopotoga a le Malo. Faamalo le galulue faamalo i lo outou finafinai i mea lelei aua Samoa ma

lana faigamalo. Faafetai faapitoa i lau Afioga i le Failautusi ma lou lagolago faapea le Ofisa o le Fono Aoa. Ou te toe momoli atu le faamalo ma le faafetai tele i lou itumalo Vaimauga Sisifo Nu 1, faafetai tele mo le la outou tapuaiga.

Lau Afioga i le Fofoga Fetalai, faafetai tele mo le avanoa. Faamanuia le Atua i Taulumaga o totoe o le tatou Fonotaga. Soifua.

**FOFOGA FETALAI:** Ou te tapa le sui usufono mamalu mo Aleipata Itupa i Lalo.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

**Afioga TAFUA MALUELUE TAFUA (Aleipata Itupa i Lalo):** Faafetai i lau Afioga i le Fofoga Fetalai. E muamua ona ou faatulou ma ou faapai atu ma le faaaloalo i le paia o le Maota nei. Afio lau Afioga i le Palemia le Kapeneta faapea le paia i Minisita Lagolago, e le gata i lea faapea foi sui usufono mamalu o le matou Itu Agai e pei ona outou faaigoa ai matou. Ua leva ona fetuutuunai i lou mafaufau pe tatau ona ou lauga faa-Taitai o le Itu Agai ae ou manatu ae foi, e le i filifilia se taitai, ae o lea e fai mai le sui usufono mo Salega Sasae o ia o le taitai, ae ou tilotilo atu i lou itu taumatau o lea e alala mai sui usufono mo Palauli le Falefa ma le sui usufono mo Anoamaa Sisifo. E taitai uma lava tagata nei i la outou faafofoga i lauga. O mea o lauia lava ia e i le itu lenei ma le faaaloalo. Faafetai i lau Afioga i le Fofoga Fetalai mo le avanoa.

Ou te faatulou foi i le paia o Faauluuluga o Matagaluga, e le gata i lea o Faauluuluga o galuga Tumaoti a le Malo. O le Failautusi o le Fono ma le sui Failautusi aemaise le paia o le aufaigaluga a le Fono. Ou te faatulou i le tapuaiga a Samoa, ae le gata i lea o le Aufaigaluga tofoti a le Atua, i outou paia ma sa o le a ou le oo i ai o lea ua uma ona paelago e paia ma le mamalu o le au usufono nei na uluai saunoa ma fetalai ae lei oo mai i lou taimi. Faatalofa atu i si uo ia Lolo i Tutuila faapea foi le mamalu o le Faigamalo a Tutuila ma Manua. Talofa lava, a maua mai se tala i lenei itula o le aso, momoli atu alofaaga ma faamanuiaga i lau Afioga ma le mamalu o la outou Faigamalo.

O lau Afioga i le Fofoga Fetalai, e puupuu lava se tala i le afiafi ua vela foi le fala i lenei aso, ua leva foi ona ta fia faalogologo sei sausaunoa mai Minisita po o a ni vovoga o tapenaga a le aualii, e tali ai foi le fitaituga o a tatou sui usufono ua uma ona lauga e manaomia le fesoasoani. Ua ou tulai atu ma le agaga faaaloalo, ona e leaga le le faia o se upu nei faapea le itumalo, o le mea lea na sau ai na o le moe ma nofonofu. Faamalulu atu i lau Afioga i le Fofoga Fetalai, taumafai atu sina upu puupuu e le umi, pen a o le lima minute e tau ia o se e ala ai, e pei o le upu ia matou i tu . E le utupu ina lava le manao. O le manao lava ia e leai se tausili ma lea vaega. Ae lelei ona faau sao atu o matou manatu, e ala atu i a outou Afioga i Minisita. Ae le i faia la lea tulaga. Ou te mataua ma le totoe ia saunoaga a le Minisita o Tupe, sa faapea ai lana saunoaga, òE fua le manao i le seleni ua maua, faasoa tatau, fai mea

tonu ma vaai alofa i se lumanai manuia o si o tatou atunuu. Lau Afioga i le Minisita o Tupe, o lea na ou tilotilo i le lipoti a le Komiti o Tupe, o lea e fai mai ai o le vaiaso lea, o le a sii ai le tatou petroleum terminal levy, e amata i le aso muamau o Iulai. Ao le fesili la, faamata o se mea tonu lea ua faia ma se alofa mo le lumanai. E fuafua o le vaiaso lea e sii ai le tolu sene lea o a tatou levy, e saili ai le 11miliona lea e pei ona project i le tatou Tala o le Tupe. Pau lava lea o lau fesili ma le faaaloalo i lau Afioga, sei oo i lou taimi ona e saunoa mai lea.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Faafetai o lea foi e manino lava, o le taimi nei ua maualuga a tatou aitalafu, pe a fua i le tapulaa e tatau ona i ai e tusa ai ma tatou tulafono ma faiga faavae. Talu ai la o le maaleale o le tala i le tau, faapena foi ma le maaleale o le tamaoiga o le lalolagi. O le mamao o le tatou atunuu mai atunuu faipaaga, e pei o se lagona foi lea e lagolagoina ai se mau, tasi lea vaega faigata mo le tatou atunuu. Ae faamoemoe malosi lava i le vaega o a tatou exports po o a tatou atinae. Ia talu ai, e lagona lava le faanoanoa, e faafofoga mai le Minisita o Faatoaga, e faaletonu lava le tatou vaega foi lea sa lauga ai foi nisi o sui usufono. O le SACEP, na ou oo i le tama la e vaaia mea o le poloketi lea, ao lana upu o le faafitauli tele la e i ai, o le leai o se taavale e malaga atu ai e asiiasi ia matou i tua. Ae pei o lea ou te mataua le Tala o le Tupe ua lua tausaga talu ai, sefulu ea ma ona tupu taavale sa faatau mai, tasi lea vaega tupe na alu ai.

E ui i lea, o lea ua momoli atu se manatu i lau Afioga i le Minisita se i saili ane le vaega lea. O manu ainiu, ua matua faateteleina le malosi o le manu ainiu. Na ou oo lava i la outou Matagaluega e saili i ai po o le a le tulaga o manu ainiu. Ae na o le ataata lava o le tama e leai se tali na fai mai, fai mai o lea o le a taumafai e saili se fofo o le faafitauli. A o le faafitauli la ua leva ona i ai. Na ona faamanatu atu i lau Afioga se i silasila i le vaega o lo o latou vaaia lea vaega, po o le a le tulaga o lo o i ai. Ona ou oo mai lea i lau Afioga i le Minisita o Galuega, o lena ua uma ona avatu le tusi i lau Afioga ma le faaaloalo, e le tele lava foi ni mea o mananao i ai si o matou itumalo, e pei na o moomooga lava faalupe o naumati ae talosia ia ia ae le tai i lou finagalo, ma ni ou faiva malo i lou tofiga fou. Aua ua leva ona ou talosaga i Minisita ua tuanai atu e toalua, 2008 ma le 2011 ae o le tali lava na aumai ua lelei, e taatia atu. O lea lava e faataatia ai faapea le taatia atu. Na ua uma ona avatu le tusi i lau Afioga e uiga i le matou suavai nuu a uta, o lo o faaletonu lava talu ona uma le tsumani, o le saunoaga a le Minisita talu ai, a faapea e oso mai le vai i Tiavea sosoo mai le vai lea e sau mai Lalomanu, po o Satitoo aua o la e maua lava le suavai, o le a faamanuiaina alalafaga ia e i uta o le matou itumalo. Faafetai lava pe a maua se avanoa e asiiasi atu a i lau Afioga i le vaega lea. Lona lua, o lena ua uma foi ona logo atu lau Afioga i le tusi na avatu e uiga i alagalua o nai nuu nei, sa totoe mai i le taimi o le tsunami e lei faia ni o latou aualagalua, o Tiavea-tai aemaise lenei taimi e tatala i le vaiaso lea si a latou

falesa, le malumalu o le Atua. E faapea foi i le auala galue o Lotopue, Utufa'alalafa, a tau i se fuafuaga ma se faatatau, o si o matou auala i Saleaumua la e lei soo talu ona fai, ae aafia ai nai aiga pe a ma se luasefulu i le tolusefulu.

O moli auala ua uma ona ou talanoa atu i le Afioga i le Minisita, faafetai, tasi lea mea ou te masalo, o la e faafofoga mai pulenuu o le matou itumalo, faitau ane moli na e le o ola i le auala ona logo mai lea o le EPC o le latou matafaioi lea, e faapena ma vaipaipa papa, e tasi lea o vaega e aoga ona galulue faatasi ai ma sui o le nuu ma le ofisa o Tina ma Tamaitai faapea foi ma le tatou Matagaluega o le EPC ma le Ofisa o le Vai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Aua e manaia foi le fai o se sao o sui o le nuu latou te vaaia lea vaega. A iloa se mea o faaletonu ona logo mai lea o le Matagaluega. I le tulaga i le Ofisa o Aoga, faafetai i lau Afioga, ua maea foi ona ta talanoa, e uiga i le auala o si a matou aoga i Satitoa. O le upu a le toaina Satitoa ia te au, o Tafua pau lava le mea e manomia o le auala i le faleaoga ua matua lauleaga ua tau le mafai ona sao taavale a nai aiga aemaise mo le momoliina o fanau. E lua lava mea e fiafia i ai lo tatou itumalo i tua, o le ki atu o le moli ola lelei, ma le alu atu i le auala o la e smooth lelei o la e lamolemole mo le alu a le taavale aua le o i uta i le maumaga faapea foi ma le momoliina o nai tamaiti aoga. O nai faleaoga la ia i Satitoa faapea foi le faleaoga i Lotopue o Saleaumua, o le malosia ia o le palapala vatu le paia o le Maota leni, aemaise le faafofogaaga a Samoa. O si o matou Kolisi e pei ona ta talanoa ai ananafi, e manaomia lava le faatele o le malae o le Kolisi o Aleipata po o le Kolisi o Vaisuli. E tele foi nai tamaiti aoga lea ua lavea i le au a tatou, taumafai ai ia oo i le au tele. O la ua ave faasikolasipi i fafo, ae faafetai pe a maua se avanoa e asiasi atu ai lau Afioga aua le faateleina o lea malae e aoga mo le fanau.

Ona ou oo mai lea i le Siosiomaga. Ou te fesiligia pea pe faamata e talafeagai ona fesootai le falemai le SROS ma le Ofisa o le Siosiomaga, i le vaega lava lea ona o leni vaitau, ua tele ina o i vaega mapuepue o tatou nuu faapea ma Apia nei. Talu mai lologa ma le Tsunami o lea ua nonofo i nuu a uta, o le mea ua tupu e eli lava le septic a le aiga latou. E maualuga se manatu e agai i le water cable foi lea e i le palapala. O le fesili lea e fesili atu ai i le Matagaluega o Siosiomaga. Pe faamata e leai se seep leakage po o se liki mai septic nei, ona alu lea agai i le palapala maua atu ai se siama po o se virus i le tatou water cable, ma pe le aafia ai le tatou vai taumafa protocol water, a siligia la le vaega lea, e fia maua se tala pe fai ni siaki ma test, follow up le vaega lea, aua ua tele ina nofoia ia vaega o mauga faapea vaega mapuepue o le atunuu, e taua tele le taofia ai o nisi faamai e ono pipisi mai.

I le vaega lea o le Siosiomaga, e fesiligia foi le tatou sleep way i tua i Satitoa, faamolemole pe faamata o fai pea le vaega foi lea e faamama ai le vali pe a aveese mai le vaa. Sa ou talanoa i se tasi o konekarate sa i ai, e manaia le faamalamalamaga mai ia te au, o lea e i ai lava le ato foi lea e salu i ai le vali ona aveese lea, ae faafetai pe afai o fai lea faamoemoe ma e tatau foi ona monitor lelei. Mo le tou silafia, o si o matou itumalo le isi vaega o le nuu,

aemaise lava i tai i le alititai, ua le toe maua se fole, ua le toe maua se limu ua leai ni amu ua pepe i le gataifale lava lea, leai se sea leai se maisu, leai ni aveau starfish, ma ua leai foi ma se oneone paepae sa i ai e pei o aso ia. O lea la e fesiligia, pe o le mea o le poloketi lea sa fai i le laumei i le onosefulu e tau i le valusefulu, sa fai i gatai o Malaela, pe faamata o le mafuaaga lea, ua ai uma e le laumei le limu alu atu ai ma le fole ma mea uma lava e ono aina i le gataifale. O le mea foi lea sa avatu o le poloketi o le poloketi o le laumei. O le mea lea faamalulu atu ai i le Ofisa o le Siosiomaga, a maua lava nai laumei ua faaoga isi mea ae faasao isi mea laiti. E fai ai le vaega lea ua aveese le isi vaega mataai a le matou itumalo.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ou oo mai lea i le vaega lea e fai lava sií í masalo lava ua i ai ni fuafuaga, ao le konekarate foi lea e faamamaina o tatou auala, e leiloa po o le MNRE e faia le vaega lea po o le Ofisa o Galuega tetele, na ona fautua atu, o le tulaga o le mea la e i ai nei i luga o le mafa, ua pei lava o se mea o e faatafuga, tulou le faafogaaga a Samoa aemaise lau Afioga ma le mamalu o le Maota. Ua pei lava o se faatafuga Lemafa i le taimi nei. Alu alu lava lea aiga la e o e tafafao i Lalomanu foi mai togi le taga lapisi i luga o Lemafa a leai ua togi i lalo o le vanu la e i ai. O lea la e talosaga atu ai ma le faaaloalo i le vaega lea e faia le konekarate o le faamamaina o tafa ala i le autafa, pe faamata e le mafai ona faaopopo sina \$50 pe \$100 a le taimi lea e moa ai le vao, faamama ai ma le lapisi aua o tatou e faamoemoe tele se vaega tele i le turisi, ae masalo e leai se turisi e fia alu i le tatou auala ma malaga atu i tua, ma vaaia pea le tulaga lea o le tele o le lapisi, aemaise lava mea ia o plastic cups o atigifagu po o plastic bottles ma mea faapena, e matua le manaia i le vaai e mataga i le vaai a tagata maimoa mai fafo. E aoga mo le lumanai o le tatou atunuu. Afai lava o lea tatou te faamoemoe i se isi vaega tele o tagata tafafao maimoa mai fafo e maua mai ai seleni a le Malo, ia e tatau foi ona tatou puipui i le vaega lea, ia ma le faaaloalo e tautuana ifo le vaega lea. E tatau ona fai i ai se fuafuag, o se fuafuaga vave foi, na ou lauga muamua ai ae leai a ma se mea ua tupu. A ta alu atu a na o le moa a o le vao ae fau ai lava plastic cups ma isi mea, ia ma le isi mea, a o i i le mataupu lea, faamata e mafai ona tatou talosaga e pei o le mea la ua maua i Niu Sila ma Ausetalia. Ua amata ona faasa ia mea o ipu ia tatou te faaoga i maluu o ipu foi ia o polystyrene ia ma mea o plastic cups ma plastic bottles. O mea la ua faaoga i le taimi nei, a le biodegradable po o le vaega foi lele pe mafai ona toe faaoga pe pala ai i le palapala tulou, ia aua le aumaia, ioe, ua maua ipu faapea i Niu Sila ma Ausetalia, lea la e tuualalo atu ai ma le faaaloalo i lau Afioga i le Minisita, se i sailiili le vaega lea pe faamata e le maua e aoga mo tatou.

E faamulimuli atu ai i lau Afioga i le Fofoga Fetalai, o lea ua maea o le vailaau lea o le fanavao e tasi lea o mea o lea ua matua mafatia ai o tatou alititai o gataifale, ia e fesoasoani atu ua tatau ona fuafua e tau faasaina lea vaega ia e fuafua i le tatou siosiomaga. Ia faaiu atu ai lea lau Afioga i le Fofoga Fetalai, faamanatu atu o lea ua ou Taitaifono i le mea lea o le vaega foi lea, o le a ea le igoa o le mea, sa fai nei le matou fono, o lea e manino mai,

o le matua tele lava o le faaletonu o a tatou Annual Reports o Lipoti foi ia Faaletausaga. E talosaga atu ai i le Sector lea o le Infrastructure, faamolemole e tautuana a tatou Lipoti. E amata fono i le vaiaso lea, ia ma o le mea foi lea sa tu e fautua i le Palemia ma le Kapeneta e aua nei toe avatua ni tupe, ia ae toe manatu ae foi, ia e taua tele le avatu o le tupe aemasie mo galuega e tatau ona fai. Ae o le fautuaga lena lea na tuu e ave nei i le Palemia, e aua ne i toe avatua ni tupe, pe a le aumaia tou annual reports, aua e faapefea ona matou malamalama ma iloa mea o lo o faaoga tatau ai tupe?

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ou te talosaga atu ai ma le faaaloalo i a tatou Public Enterprises lau Afioga i le Minisita, se i faamanatu ane i a tatou Matagaluega Tumaoti, e taua tele le vaega lea mo le silasila a le Komiti i lenei itu o le tatou Maota ma le faaaloalo.

Ia o le faamulimuli atu lea o lau tautalaga lau Afioga ma le faaaloalo, o le Matagaluega lea o Leoleo, lea e alaala mai Sala, malie lau Afioga, e tatau lava ona fai ni nai roadblocks i tua o le auala fou foi lele o matou e alu atu i Samusu i Lalomanu, faapena foi ma le auala lea e alu i le coastal road ia o le tele o tagata e foi mai Lalomanu sa tafafao ai ma mikimiki nai pia, e omai pei ua fai lava si faatautala ma soona o taavale i nai saoga ia. O le popolega nei teʻa ua tupu mai se faalavelave. Ua tupu faalavelave, maliliu ai foi nisi ae na o ni roadblocks lava pe tai tasi tai lua i le vaiaso, e puipuia ai le vaega lea o le soona o o taavale i tua i si o matou itumalo ma le faaaloalo.

E faaiu atu le tautalaga i le vaega lea o le Police Academy faalogo lava o tau e nisi. O le mamafa ia o lou mafaufau i le vaega lea talu ai, o le tasi lenei vaega e tele le tupe a Samoa e maua ai, pe afai ae iu lelei nisi o tatou i le Police Academy e le gata i le o e galulue i mea foi ia o le Peace Keeping a le UN ia faapena foi pe a manaia pe afai e fai se tatou Police Academy i se taimi lata mai, ona train uma ai lea o le Marine, Security Guards, o le Fuimu ia ma le vaega lea e leoleo i le falepuipui ae ese mai i leoleo. E faapena foi ma tatou leoleo, ae fautua atu i lau Afioga i le Minisita, manaia pe a fai se entry point po o le vaega foi lele o le entry point o le faailoga degree ona oso lea i luga i le luasefulu ma ona tupu e amata ai. O le entry point lena e manaia e mafai ona o tatou tagata ia i fafo maua ia foi nisi seleni e tele e pei ona i ai i le au tau apu ma vaega faapena. Ia ona faagata ai lea o se tala lau Afioga i le Fofoga Fetalai, momoli atu ai le agaga faafetai ua vela le fala ua alu le aso ia ae momoli atu le agaga faafetai ma le faamalo.

E faaiu atu ai se tala e momoli atu ai le faafetai i si ou itumalo, ia e tusa foi ma le lagolago mai, ia o outou paia ma sa e leai e le tau oo i ai, o lena ua outou mamalu ma outou paia e le tau faalagiina o outou mamalu e tumau lava e faavavau. Ia agalelei le Atua i a tatou Faafeagaiga, agalelei le Atua i le tapuaiga a Samoa, ia manuia lau Afioga i le Fofoga Fetalai aemaise le Palemia ma le Kapeneta, Sui Minisita. Ia tapuai atu lenei itu ma le faaaloalo.



**FOFOGA FETALAI:** Malo, faafetai, ia tapa ma le faaaloalo le sui usufono mo Anoamaa Sisifo mo le saunoaga.

**Tofa Hon LAUOFO FONOTOE NUAFESILI PIERRE LAUOFO (Anoamaa Sisifo):** Faafetai i lau Afioga i le Fofoga Fetalai. E ese foi le manaia o le nofo atu i lenei itu ma vaavaai atu i o i le la itu, ioe. O upu tautino i a outou Afioga i Minisita Lagolago, aua tou te mumusu tou te omai i lenei itu, o le matua manaia lava.

*23 IUNI 2016*

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Lau Afioga i le Fofoga Fetalai, o le aso ua tatou saa i maaomalie ae siva i lagitau aua o lea ua lelepa i malae o totoā ae le o malae o le papa, o le malae o le manino ae le o le malae o le aava. Ae ou te manatu foi o paia o le Atua ua uma ona faalanu ma tapui i le taimi ua tea. Ona ou faapea lea, o le a nuunuu atu i le itupa gafua o le aiga Sa Levi o le latou lena matafaioi. A o paia foi faaifogata o Samoa, o paia faale-Atunuu, o paia faale-Malo i lona Tafatolu, paia faale-Talalelei, ou te talitonu lava ua maea ona tuulaupua, ma ua taoto a o se alaoo o se pa foi e le solo. E leai foi se atamai, o se pototo a o se vave na te toe suia lava se iota o paia o Samoa. Ona ou manatu lea o le a faataalolo atu i le au Tootoouli ma le au Tulatoa o lo o tausia upu o le atunuu.

Ia, lou itumalo, ou te talitonu lava ua mafanafana le tatou mafutaga, ua masani a tatou upu ua masani foi a tatou tala, e amata mai le Paeaiga Lona XIII, o lea ua oo mai i le Paeaiga Lona XVI, faafetai i lo outou faatuatuaina o au, faafetai le faaeaea. O lea ua sii i le tai le Sa o Samoa aua lana folauga i lenei foi lima tausaga o lana Paeaiga Faapalemene. O la matou tatalo, ia ulito lava le vaa o mala, ae folau i lagima le vaa o Samoa.

E faamauiina le faafetai i le Tala Faatatau Autu o le Tupe lau Afioga i le Minisita o Tupe. E talitonu lava e le faigofie le lufilufiina o le tamaoaiiga o le atunuu, ae i ai foi le talitonuga ua e masani ua e lava tapena, ua e lava taoso aua le matafaioi. E le selu atu, E ui lava ina ou vaai atu ua fai lava sina ou lima uū i lau faasoa, ae atonu foi ua lelei lena mo tatou. Afai o le agaga maualuga ia totogi nisi a tatou aitalafu, faafetai. O le taua lena. O le mea sili i lau vaai, o lo o faaauau ma faatauaina pea a tatou essential developments i totonu o a tatou priority areas. Malo faafetai le faasoa. Atonu ua talafeagai foi lea ma le economic outlook i lenei foi tausaga 2016 ma le agai atu i luma. Faamalo, manaia le Saunoaga i le Tala Faatatau Autu o le Tupe pe a ogatusa ma lona faatinoga, e taua lona faatinoga. O au fuafuaga e pei ona faataoto mai ina ia siitia ai le tupe maua a le atunuu ma le Malo, e lagolagoina e lou sui usufono ina ia increase ma siitia lau revenue base e te tua i ai i lau faasoa. Malo faafetai, e le o ni siitaga tetele, e le o ni siitaga maoae, e 3sene le sii o le tau o le suauu ma le penisini ma le tau o le faaogaina o facilities. E 28sene le siitia o le tau o le penisini o vaele. O nei mea uma, o mea ua tatou masani ai. O faiga foi faapisinisi i a latou tu ma aga, e faapena ona pasi atu i tagata lautele o lo o latou faaogaina ia oloa e faapea foi ma auaunaga, o lona uiga,

o le a tatou sauni ma o le a i ai foi ni nai siitaga. A fua atu i le aso 1 o Iulai e pei ona aumai i lau saunoaga, ia o lea o le a tatou talia lau Tulafono Tau Faaofi e faamamalu ma faatulafonoina ai ia au siitaga ia. Malo faafetai.

O le siitia o le 6.5% o le excise tax i le ava malosi e faaulufale mai le atunuu, o se fuafuaga lelei tele lea. E manaia le tatou o agai i le excise tax aua a tatou o i le tariff, ia ona aafia lea o tatou i aiaiga o feagaiga faafetauiga Faava o Malo e pei ua uma ona tatou sainia. Ia tatou aloese ai mai le tulaga lea o le tariff ae tatou o i le excise tax. E manaia, 100%.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Na pau lava lau fautuaga i lau Afioga i le vaega tonu lea, aua o lea la o le a le siitia le tau o oloa e gaosi i Samoa nei, le ava malosi. Se i silasila ane ma tagai ane i le Tulafono na pasia mulimuli lava i le Paeaiga na tea nei o le Competition and Consumer Protection pe le o i ai se feteenaiga. Afai e le o i ai se feteenaiga, ua 100%, tatou o i lea. O le siitaga o le tapaa, e 5%, e pei foi lava o le ava malosi. A sii le tau o le isi ava malosi mai fafo, tatou o i le ava taugofie lea e gaosia i Samoa. E lelei foi mo kamupani i Samoa. Sii le 5% o le tapaa, ou te talitonu ua lava tapena le kamupani gaosi tapaa lea o le BAT lea e i gatai i Vaitele i le siitaga lea. Ou te talitonu ua leva ona tapena i ai. Ae tele foi le tatou tupe o lo o maua mai i le excise tax lea e sau i totonu i lalo o le tapaa lea. E i ai le competition, o au foi ua faateia ina ua matou talanoa ma le Pulega, e i ai le latou competition o le tapaa Samoa. Sa ou faapea lava au ia e le o tele se faaaogaina o le tapaa Samoa i totonu o le atunuu. Ua ou te i i le aumai o le latou survey, ou tilotilo atu, e matautia foi le faaaogaina o le tapaa Samoa i totonu o le atunuu, ioe. O lona uiga e taugata le tapaa, le process tobacco. Ia o aga masani lava a tagata, e see i le mea taugofie, o le tapaa Samoa nisi o tagata. E talanoa i le vaega lea, manaia ia revenue measures, tilotilo i le itu lea o lea foi e faataoto mai o ni health measures.

**FOFOGA FETALAI:** Ua ou fautuaina le saunoaga matagofie a le sui usufono, malo faafetai, ua manino le saunoaga, ae pau o lea, ona tatou te le i oo atu i le tulaga o mea taitasi e tatou te talanoa ai le vaega lea, o lea ta te le i oo i le tamaoiga, a o faiga faavae ma tulaga o lo o i ai. Na ona fautua atu, a o lena e i ina le uta ma le tofa i lau Afioga. Ia saunoa le sui usufono mamalu.

**Tofa Hon LAUOFO FONOTOE NUA FESILI PIERRE LAUOFO:** Faafetai i lau Afioga i le Fofoga Fetalai, ae pei o lea sa ou agai i le lauga o le Tala Faatatau Autu o le Tupe, lea e aumai i totonu o le tusi lea, lea sa saunoa i ai le Afioga i le Minsita e faataotooto mai vaega ia, o lea la ou te agai atu i ai, ae faia lou finagalo ae le faia so matou loto.

O le vaega lea lau Afioga, afai foi la o le tulaga o le suka ma le masima, e ui lava la ina e le i manino mai i lau saunoaga po o a tonu oloa ia, ae atonu o le taimi e auiliili ai ona faamanino mai lea o vaega ia i tatou oloa ia e i ai le suka ma le masima o lea o le a tofogi tiute. Ae afai foi e faapea o mea o apainu

suamalie mai fafo, e lelei foi lena tulaga e fesoasoani foi la i tatou kamupani ia e i inei. O faiga faavae ia ua faataoto mai e aoga foi mo tatou kamupani o lo o i Samoa nei. A o le itu taua o le vaega lea o le fesoasoani i le faaleleia o le soifua maloloina o tagata. Aua o taumafa o oloa ia, o lo o maitauina e aafia tele ai le tulaga o le soifua maloloina. O lea la pei ona tatou vaavaai foi i le tulaga o le falemai faamamatoto, ia o lea ua faagaga mai se vaegatupe mo le faagaioiina o lea falemai e fesoasoani foi mo latou o lo o ua gasegase ia ae mafua mai lava i tulaga faapea pei ona faailoa mai foi e le Matagaluega o le Soifua Maloloina.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O lea maua i le lipoti o le masina na teʻa nei, pei a e iva (9) ea isi gasegase faaopopo. E i ai le Team lea a Fomai na malaga mai Ausetalia e fai le taotoga faapitoa ina ia mafai ai ona faamama ia toto o nai o tatou tagata ua gasegase i lenei foi ituaiga maʻi. Ona ou fesili ai lea i le Minisita mo le Soifua Maloloina i le tulaga o i ai le tatou Health Foundation pe ua faataatia po o faaauau. Ua mafua ona ou taua lea vaega, ona o le tualuga o nei mea uma o le faatauina lea o tatou faalauiloa. O faiga faavae ia a le Matagaluega o le faalauiloa o aafiaga tuga i le soifua maloloina ma tino o tagata, e mafua mai i le taumafaina o taumafa faapenei. O lea foi la e mafua ai i le tele o isi foi gasegase e auina atu i fafo, faaagaaga mai o se seleni e auina atu ai i fafo nisi o tatou gasegase i le tatou scheme foi lea o le Medical Scheme. E pei lava o le tausaga na teʻa nei na ausia le \$10miliona o tatou tupe ua alu i le auina atu o gasegase i fafo. Ae faafetai o lea ua aumai ia se isi foi vaega E faaagaaga e fesoasoani ai lava mo gasegase faapenei. A o lau talosaga i lau Afioga le Minisita o Tupe faapea le Minisita mo le Soifua Maloloina, pe ua le alagataua ona toe review le tatou polokalame lea i le tulaga o le agavaa o maʻi e auina atu i fafo i lalo o le polokalame lea, ina ia tatou tilotilo pea i le tulaga o le faasaoina o seleni. O le vaega lea ou te talosaga atu ai se i silasila ane i le tulaga lea aua e le faigofie. O lea foi ua ou faalogo atu nei i le taeao i le leitio ua tatala po o se fonotaga i inei na saunoa ai le Taitaifono a le NHS i le faaogaina o tatou masini fesootaiga ia mafai ai ona fesootai atu i fafo. E mafai ai foi ona talanoa mai fafo i inei ona faapena lea ona tuufaatasia se fautuaga mo le Malo i le auina atu o tatou gasegase i fafo ia po o nisi foi o fuafuaga.

Lau Afioga i le Minisita mo Pisinisi, Alamanuia ma Leipa, i le tilotilo atu i le vaega lea o le SBEC, e manaia pe a faaopopo se isi seleni i le Tala Faatatau o le Tupe o lumanai i le isi tausaga faaletupe. Ia faapea foi fesoasoani mo pisinisi laiti toe faaopopo i ai se isi vaega seleni, ona o lea ua matauina ua i ai Faalapotopotoga i Salafai ua i ai i totonu o le faasoa lea ma o se tulaga lelei foi ma le fiafia i le matau atu i ai. O le tatou Faalapotopotoga o Tagata Tafafao Maimoa mai Fafo, ou te talitonu lava e tele se galuega o lo o moomia pea i le tatou Faalapotopotoga o Tagata Tafafao Maimoa mai Fafo, ua tatau ona siisii i luga le tulaga lea. O lea lava e matauina ia le gasolosolo mai pea o tatou tagata tafafao mai ia pe i luga i lea masina ae i lalo i lea

masina. A oo lava foi i le tulaga i le vaauga lautele i le tausaga atoa, ia e le o i ai lava se sii maoae foi lea i luga, atonu foi o lea na saunoa nisi sui usufono i nisi vaalele e omai i Samoa. Ou te talitonu ua leva ona taumafai lena vaega e oo foi i le Malo o Saina, ia sa taumafai foi pe i ai ni o latou vaalele. E fesili atu ai i le Afioga i le Minisita, po o ua sainia le tatou Air Service Agreement ma le Malo o Saina? Aua o le auala lava lea e mafai ai ona malaga mai ia ni Kamupani Vaalele po o ni vaalele ia mai Saina e aumai tagata tafafao mai moomia e tatou faletalimalo.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O faletalimalo o lo o manaomia lava le tele o tatou tagata tafafao maimoa mai fafo, tele foi a latou aitalafu o lo o taumafai e totogi, ia ae o lo o faigata le tulaga o lo o feagai ai ma i latou. O lo o moomia ia vaega ia faaopoopo lau Afioga i le Minisita, ia ae se i silasila ane i ai.

E tele ia nai faifaatoaga laiti, o small farmers o lenei itumalo sa talanoa mai i le tulaga o le tatou polokalame lea o le SACEP. O le tulaga o lo o feagai ma latou, o le isi vaega o le latou sao po o le contribution lea aumai i le lipoti a le Komiti o Tupe e 30% le contribution. Ia ua faigata i nai isi faifaatoaga laiti ona ausia ia le contribution lea e mafai ai ona avea ma sui auai i totonu o le polokalame. Se i silasila ane e i ai mo aoaoga, e i ai mo business plan e tapena, ia e tele o nai isi tagata faifaatoaga laiti e le gafatia tulaga ia. Ae se i silasila ane pe mafai ona toe review ma toe iloilo ia vaega ia ina ia mafai ai ona participate uma ia tatou faifaatoaga.

Ia ma le isi vaega mulimuli i le mataupu lea ou te talanoa atu ai ma le faaaloalo, ina ia taumafai foi lele i lau vaai, ia i ai se direct link o a tatou faatoaga ia ma le poloketi lea ma le tatou export o tatou fua ia o faatoaga e auina atu i fafo. Aua pei e foliga mai i le taimi lenei pei foi ona saunoa nisi o sui usufono, e pei na o le tatou maketi lava i Samoa nei le local market lea o lo o faamanuiaina i tulaga ia ae moomia le avatu i fafo e fesoasoani foi i le siisii i luga o le tamaoaiga ia faapea foi tatou foreign reserves o lo o taumafai, aua lava le faasoa a le tatou Malo i tatou atinae e fai.

E le toe tele se faamatalaga lau Afioga i le Fofoga Fetalai, faafetai ua tofia lau Afioga Laauli i le Minisita mo Faatoaga ma Faigafaiva, faafetai. Se i toe silasila ifo i le tatou Nonu le ta nonu foi lea sa ta o faalauiloa i Saina, aua o le mea moni lava ia ua pala le nonu i lo'u itumalo, ua le iloa po o le a le mea o le a fai i nei nonu. A o lea na ta malaga i Saina ia ou te le iloa pe sefulu aai tetele o Saina na ma o faalauga ai au. Ia uma ona lauga o ifo ta pese ae faasiva au, a o na taimi uma lava a ou siva, ia ou te faapea atu i le isi ou itu, ia la foi e lalolalo mai ai ma lou uso o Tafua lea na matou o. Ae a ou tepa atu i tua ia o la e aiauli solo mai ai Peseta Vaifou, ia a o lea ua lua toe faamasino i nei mea o nonu. O le mea lea Peseta, se i tuu ia na mea, tai fai fai na mea te'i ua i'u se isi i se falepuipui, ae aua le fou o le falepuipui o Sala lea ua amata ona fau, se i tau taofiofi ai a tatou pagota ma le sosola.

E fesili atu i le vaega o le tatou National Broadband Highway po o le a se tulaga ua i ai? Pei lava o lea e faatino e le Kamupani foi lea mai Saina o le HUAWEI. Po o le a se tulaga o i ai le tatou polokalame lea? E momoli atu le faamalo i le tatou Samoa Submarine Cable, o se laasaga taua foi lea mo tatou fesootaiga ma atunuu i fafo. E taua tele i tagata tafafao maimoa mai fafo, faletalimao, pisinisi ma mea uma faapena. O le Privatisation Programme, o au ua ou teā i lou faitau atu i le Lipoti a le Komiti o Tupe ae ou tau atu i le faamatalaga lea aumai ai i SOEs ua gau. Ia ae faaliliu ifo i le faaperetania po o le Igilisi, fai mai ua bankrupt, ia o au la lenei ou te le o iloa ni SOEs o bankrupt.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O lea la na ou faafesili ai i le Afioga i le Taitaifono i le taimi e saunoa ai, se i tau faapulapula mai lea vaega po o le a tonu. Atonu e i ai ni Kamupani e le o ausia le tulaga i tupe mama tatou SOEs, manatua o le bankrupt, e i ai lona uiga foi lele faatulafono, e fai lava si matuia o le upu lea, ioe. O la e malamalama ma silafia lau Afioga i le Minisita o Tupe, ona ua talatalanoa mai ai le isi Faatonu ia te au, Director o le isi Board a le SOEs, ua tau popole foi lele i le mea lea o le liability o le director. O le a lafo atu, se taimi faamalamalama mai po o le a le sao o lea vaega, atonu pe le o le uiga tonu lena o lea sa manatu i ai le Komiti ai o se isi tulaga. Ae pei o le mafuaaga lena ua ou oo ai i le mataupu lea.

E faaiu atu le lauga a lenei itumalo, o le a o le agai e vailiili ma auiliili le tele o isi nai faafitauli na tulai mai i le faiga palota, aua e tele foi ona itu lelei sa i ai na matauina i lenei foi faiga palota, e momoi ai foi le faamalo i le Komesina o Faiga Palota, o le tele ia o nai itu lelei ma isi foi suiga fou sa matauina, e momoli atu ai le faafetai. A o le mataupu na o se faamanatu, ona sa agiga foi i le Nofoaiga ua tuanai i se faiga foi lea e toe tagai se i toe review ma toe iloilo le tatou Electoral System lea i ai nei, e toe silasila i vaega uma o tuaoi o itumalo, o lea foi sa luga i ai foi le Maota i lena Nofoaiga ia ma le tele o isi mea laiti, ae manaia aua o lea ua silia ma le 50 tausaga, a o lea tatou te o lava i le faiga lea. Se i toe silasila, e manaia le fai o se tatou study lelei foi lea ona aumai ai lea o ni fautuaga e silasila i ai le Malo mai le Maota, ia ona faapena lea ona tatou soalaupule i se faiga, pe afai lava foi ua talafeagai le sui o se isi ituaiga faiga palota tatou te o ai, ia tatou o ai. E tuu e a mea lelei ae le fai? O lea ua sui mai ia isi atunuu ia tuaoi, o Niu Sila ua sui Fiti ua sui, e fou foi le Electoral System la e faaoga mai e Tonga ia. Ae tatou tilotilo aua ua tele lava nai mea lavelave solo ia i ai i totonu o le tulaga lea. E pei a ona ou fai atu lau Afioga i le Fofoga Fetalai o le a ou le agai e vailiili uma nai faafitauli laiti ia na tulai mai.

Ae pau o lea nei misi ia au lou uso o Loau, Loau ou te matuai ou auai i le saunoaga a lou uso o Faumui Wayne. Faamalo, faafetai, o lea ua e tulai mai i le Matagaluega o Aoga, Aganuu ma Taaloga, o le tele o isi Paeaiga ia ua tuanai, e pei e tofi lava Minisita foi nei sa faiaoga i tatou aoga. O le tele o Polofesa isi ia o isi sa faiaoga i potu aoga foi ia mo le aoaoina o le potu

salalau le tofa manino, a o lou tulai mai matua 100%, ioe. O Loau o le isi lava faiaoga o faiaoga, masalo o le mea lea o lea e toatele latou te le o silafia, le faiaoga o mea tau taaloga, faiaoga foi o faipelega, ioe. Ae manatua foi o le Matagaluega lea o Aoga, Aganuu ma Taaloga. O lea la ua i ai suiga fou lea ua tatou o ai, tofi mai faiaoga o taaloga se i fai foi sona ia sao i totonu i le taumafaiga o le tatou Matagaluega lea. Ioe, malo faafetai, le po lea na fusu ai le tama lea o Laauli Joe Parker, ia o lea na fusu ai lau tama fusu. Na ou faamalo ma ou faatalofa atu ia oe ua malo lau tama fusu, a o le tagata na malo ai lau tama fusu, o le tagata tautaua foi lele o Fuiava Warren e 18 fusuaga faapolofesa leai se faiaoga, ae faiaoga i le tama a Loau, a o Loau lea na faiaoga ai. Silasila i le matuai 100%. Malo Loau, ia manuia lou tulai mai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Atonu o le fofoga foi lena o le misa o tamaiti aoga lea e i ai, fai ni maea fusu o aoga uma lava ia e te vaai i totonu o le atunuu. Aua e manatua foi, o mea nei o tamaiti aoga, e pei e ala ona fia fufusu ona la e o toatele, ae a tuu taitoatasi loa i totonu o le maea ma toe lalaga mai le taaloga lea, o le taaloga lea ua tele ai tatou pine auro i le tele o tausaga ua tuana'i. Ia atonu o le isi lena itu lelei o le mea lea. Ia malo faafetai. Atonu foi o se isi Nofoaiga ia tofi se faiaoga e matua faiaoga lava o aganuu, ia ona sui ai foi laia faapena ia ma sui sui ai faapena ma tatou faataitai i ai.

**FOFOGA FETALAI:** Tulai mai le sui usufono mamalu o Faleata Sisifo.

**Tofa LealailepuleRimoni Aiafi (Faleata Sisifo):** Lau Afioga i le Fofoga Fetalai se i tau malolo le Afioga i le sui usufono mamalu, tasi lea sui usufono lotoleaga lea e i ai nei. E manatua foi na o au lava na fusu i le Palemene lenei malo, a o lea ua sau folafola ia Loau na te faia mea nei. O le a le mea na le folafola mai ai ia au ou te faiaoga ma aʻo tama fusu. O Loau e le iloa aʻo ni tama fusu, o le malosilava o si tamaititi lea na fusu nei lea na malo ai, ma le faaaloalo lava.

**FOFOGA FETALAI:** Ia lelei, se i faauma atu le saunoaga a le sui usufono.

**Tofa Hon LAUOFO NUAFESILI FONOTOE PIERRE LAUOFO:** Ioe e saʻo Leala o fusuaga ia e i ai le tama a Loau o fusuaga moni, a o mea na sa lua faia ma le isi foi sui usufono, ia pei ni mea komi ia lea na e malo ai, a? Ia a o le tulaga tonu lea, Loau, to loʻu pulou ia oe, malo faafetai ia manuia lou tulai mai.

O le isi vaega lea ua ou vaai atu i ai o le tatou faasoia foi lea e ave i Ekalesia ma Aoga Primary Schools lea i ai le \$6miliona pe fia, a, se i toe tagai ifo i ina i le seleni lena, aua pei lava ou te vaai atu pei e tau fuafua le faasoia i luga o se formula foi lea mo pasene i le aofai o tamaiti aoga ma tulaga faapena, e a le mea e le tuu ai, pei e manaia pe a tuu i ai ma nai performance targets foi ia i totonu o le mea lena, e aofia ai i totonu o performance targets na, le 1 misa

ma le l fusu o tamaiti aoga. Ae afai ae faaletonu ma misa, tipi i lalo le seleni lena e faasoa i ai, ia ona toe taumafai mai foi lea o le aoga e toe atiae i luga le tulaga o le pulea lelei o tamaiti aoga ma le tulaga e i ai.

E faaiu le lauga lau Afioga, i le fuaiupu 11 o le Tulafono Faavae, talanoa mai i aiatatau o tagata e filifili ai lana tapuaiga e tapuai ai, o le tulaga lena o lo o i ai i totonu o le Faavae i lona parakalafa muamua a o lona faafiaupu 2, o lo o i ai le avanoa e mafai ai e le Malo ona pasia se Tulafono e taumafai e noatia ai le aiatatau lena. O lea ua taulagi le tulaga o se tatou teuteuga, ia malo faafetai, ona o mea ia sa saunoa foi i ai nisi o sui usufono, o tulaga ia faatupu faalavelave o nisi o ekalesia faapena, ina ia fuafua i tulaga faapea i totonu o le atunuu, pei o mea o la e tutupu i fafo.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ae pei o le tulaga ia i ai, afai o le fuafuaga lea, e 100%, fai se fuafuaga a le tatou Malo e silasila i le tulaga lea e i ai se Tulafono e toe tau faatonutonu ai pe noatia ai le aiatatau lea, i ona tulaga e talia i lalo o le Faavae. Ia o le tulaga lena.

Ae i ai lava le vaega tele lau Afioga, masalo o le a ou le agai tele i ai o le a faaiu atu lau lauga, o mea ia o social media, aua e le gata foi ina tatou o e teuteu le Faavae, o le mea foi lena o lea e tulai mai i aoga, e taumafai foi lea e control le mea lea o le social media o facebook o mea solo faapena, texts, lea e mafua ai mea faapena, aua e tatou te fiu foi tatou i nisi taimi e fai mea iinei, ia ae o atu lava tamaiti omiomi computer o la e sau ai mea ia i luga. A o le tulaga foi lena e tatau foi ona silasila le tatou Malo i polokalame faapena, atonu o lena ua i ai nisi o Tulafono e tau aiaia ai le vaega lena, a o se faatupu manatu, se i toe silasila totoa pe i ai nisi faiga faaopopo e toe fai e teuteu ai le vaega lea.

Lau Afioga ua iu lau lauga, ioe, e momoli atu lau faafetai tele i lau Afioga i le Fofoga Fetalai ma le paia o le Maota, o le tulaga foi lele, ia o lea o le a fetauai ia nisi o sui usufono ma sausaunoa, po o ai lea e taitai o le Itu Agai. Ia ou te talitonu e le taumatea lena tulaga, faafetai i lau faaloalo, aua a e saunoa mai loa, ia ua uma, leaga o Tulafono Tumau lena e i ai. O le a se tofa i le Afioga i le Palemia, ae aumai ia le taavale foi lea na fealuai ai Palusalua sou fealuai ai. Ia manuia le Fono, manuia le tapuaiga a Samoa.

**FOFOGA FETALAI:** Malo faafetai mo le saunoaga matagofie, ua taliga foi e fia faalogologo lenei tauafiafi, malo faafetai. Ua faapena ona maua le avanoa e saunoa ai foi se tasi o sui usufono matua foi o le Palemene, lau Afioga i le sui usufono mo Palauli le Falefa, ia ona sosoo ai lea ma le sui usufono mo Falealupo, ia ona faaiu ai loa lea i le saunoaga a le Taitaifono o le Komiti o Tupe, ia lafo loa i le Malo le galuega o le tatou Maota Fono.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai mo le avanoa e fai ai foi se faamatalaga a lenei itumalo. Faafetai foi i sui usufono na sausaunoa faataupou i lenei foi Fonotaga mamalu a le Palemene. E liliu lava ou tino pe a ou faalogo atu o faalupe mai le itu lenei o le Itu Agai ona e le o le agaga

lena o lea e nofonofu atu ai i inei. A tuu lava i le tulaga o le faavasegaga, e out number e le itu lenei le itu lena, e 14 i ae 13 le laina i luma a i ina. A fua i le isi itu, e tolu teine ia e i i, ae lua teine na e i ina, ai pe tou te faapea o Aeau e faalelelei ona aao, ae leai e saosaoa, o le matou halfback lea. A tuu foi i le faitauaofai o le atunuu, e out number foi e matou outou, aua o itumalo aupito sili nei ona tetele nei e nonofo atu i inei, aua na ona toatele o sui usufono i ina, ae a fua lava i le numera o le atunuu, o lea e i i. Ae na ona ou faapena atu. Ou te le fai atu la o le a matou lauga faa-Itu Agai. O le mafuaaga o le matou omai matou te vaavaai atu, e avatu ni fautuaga mo le atinae o le atunuu.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O au na tuu ou te le lauga, ae talu ai ona o le taua tele o le Tala o le Tupe lea o le a sosoo ai, e tatau ona ou faatatia atu fuafuaga alualumamao, e le gata i Upolu nei, aemaise lava o le motu i Salafai. O paia o le atunuu, ia nuunuu atu. O le paia o lenei Palemene, ia nuunuu atu e le suia e sau faamatalaga. Ou te le lauga foi i le Tala o le Tupe i le tulaga faa-Komiti o Tupe o lea ua tuu i le matou Taitaifono le Afioga ia Aliimalemanu.

E taua le mea lea na saunoa i ai le Tofa ia Lauofo, o lea ua vaai i le faa-Peretania, e sese le upu lena e faaoga. O le matou Lipoti, e state le statement na fai e le Pulega, o le vaega tonu lena na i ai, ona o le naunautaiga ma le Lipoti a le Komiti o Tupe, ina ia tele ni tupe e maua mai SOEs mo Tala o le Tupe i le agai i le lumanai, lena foi e avatu ai le fautuaga, ma o le a ou le toe taua le vaega lea.

Lau Afioga i le Palemia ma le Kapeneta, e faafetai atu mo atinae a le tatou atunuu, faafetai foi mo le atiaaina o le motu i Salafai. I le maitau faasui usufono o le la motu, ua fai si vavamamao o le atiaaina o Salafai ma le atiaaina o i inei. O le mafuaga lea ua mafua ai ona malaga mai ma malaga mai ma malaga mai o tagata i le motu i Salafai ona e leai ni galuega e maua. O le ki o le manuia o Savaii ia faamaea le uafu i Salelologa i ona tulaga uma, e leai ma se kamupani e fia alu i Salafai e fai ai se pisinisi pe a le o vaa lau oloa i Salafai.

O le tulaga lea e i ai nei lau Afioga i le Palemia ma le Kapeneta, faatoa alu lava le vaa lau oloa i Savaii pe a 9 containers pe sili atu. O le mea lea o lo o i ai nei, e le o se mea faigata le faamaeaina o le uafu i Salelologa. O le loloto o le uafu la e i ai i le taimi nei e valu mita. O le loloto e maua ai le papa i lalo, pe tusa ma le 40 mita lona loloto. O lona uiga, e matua tele le maa amu lea e i ai. Afai e aveese le maa amu mo le faalolotoina o le uafu i Salelologa ma maua ai foi materials e tanu ai le taulaga i Salelologa. E i ai le aupisinisi e le fia o i Salelologa e fai ai ni pisinisi ona e taugata oloa i Savaii aua e ui uma atu i inei. Tuu atu i le tau o taavale, o le loli, e 400 le tau o le loli i le alu, 400 le sau. O le tau e faaopoopo o le hire ina o loli, o le matua taugata lava. O le mea lea na ala ai ona tatalo atu ia faamaea le uafu i Salelologa. O lea foi na mamulu atu ai le isi au tala, tatou o ia tatou i Savaii e fai ai se tatou Malo aua foi e foliga mai e lua mea ia e fai, e ese lava le faiga o i inei ese le faiga o



Savaii. O le mea lea e tatau ai ona tatou matua galulue, galulue ia maua ni galuega mo tatou tagata, ina ia tau taofiofi ai tagata Savaii i le fetaomi mai pea i Upolu nei. Ua tatau foi ona silasila le Malo e relocate service ia i Tuasivi. A omai matou i le itu i sisifo, e toe pue le pasi e alu ai i Tuasivi, o le tatalo e tatau ona aumai uma services a le Malo ia i Salelologa. O lea foi e maitauina e lou nei sui usufono, a fai galuega ma le faafouina o Ofisa o le Malo, ae le mafai lava ona fai se faaiuga ave ofisa ia i totonu o le taulaga fou.

A o lau fautuaga i lau Afioga i le Palemia ma le Kapeneta, faamaea le uafu i Salelologa. Ia siitia le Matagaluega a Leoleo i totonu o Salelologa. Ua maea ona ave le 4 eka i le taulaga fou ina ia fai ai lea faamoemoe.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafaiga faaauau i luga o le faitauga faalua**

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** Lau Afioga i le Fofoga Fetalai, matua leva ona tuu atu le Minisita e te vaai ai i mea na a o le a le mea na tuai ai ona fai, a o lea sa e vaaia mea ia? O le mea lea, taatia mai lou finagalo, ae sa tuu atu le avanoa ia te oe e te galue ai.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai. Masalo a e silasila lau Afioga i le Palemia, e tele ni galuega sa e tuuina mai ou te faia, e tele. O a lava mea e fai i ai le Faaiuga a le Kapeneta, e fai, a o lea ua oo i le taimi ua tatau ai ona fai ni atinae i Savaii e tau taofiofi le omai pea o tagata Savaii i totonu o le taulaga. O lea ua tumutumu le taulaga, ae leai ni galuega, ae se i fai se galuega e toe taofiofi ai. Na ona ou alu ese lava toe tuu, na ou alu ese loa toe tuu. O lau talosaga i lau Afioga i le Palemia ma le Kapeneta, o le tatalo atu, faauma le uafu i Salelologa.

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr Sailele Malielegaoi:** Lau Afioga i le Fofoga Fetalai, na e alu ese ma le mea sa e i ai ona e see mai lea i le Tupe, o i ina sa tatau ona e finau ai. O le a e toe finau mai nei la ua e leai ma i? O le tulaga taua lena, ae te le i teletelevave lau alu, manatu i lou taimi.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, faafetai atu i le Afioga i le Palemia. O le taimi tonu lea sa feagai ai le Malo ma le toe faaauauina o le faaleleia o mea i le taulaga talu ai le afa o Evani, lea e \$470miliona le tupe o mea na faaleagaina. O le mafuaaga tonu lava lena, Tuilaepa, o le mea tonu lava lena na ave i ai le faamuamua a le Malo.

**Susuga Hon Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** O le mea la lena na ou fai atu ai, a oo loa ina tatou galulue, e fua galuega i le taimi lea e te i ai. A o le a foi ni tatou galuega e faataoto, ae a osofaia loa i tatou e mala, e taatia uma

lava mea uma, a o lea sa i ai le taimi sa tuu atu ia te oe e te galue ai. Ou te musu e te toe oo i ai, ae sa ou manatu e te manatu loloto i ai i tiute sa ou tuu atu ia te oe.

**FOFOGA FETALAI:** Ia, ua ou manatu ua lagona foi le vaivai o le paia o le Palememe, ona ou manatu lea, o lea ua ta tonu lava le taimi o le tatou malologa e tusa ai ma le lafo e pei ona faatu mai ina ia tatou i le 7:00 tatou toe amata ai i le 7:30. Ia, e lelei ona sailiili malosi, ona manatu lea o le a faataatiaese Taulumaga a le Fono Aoa Fautulafono mo lana malologa masani ae tatou toe amata i le 7:30, faafetai.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

*Na faataatiaese Taulumaga a le Fono Aoa mo lana malologa masani i le itula e 6:55 i le afiafi ma toe amatalia i le itula e 7:30 i le afiafi.*

*Na toe faaauau felafolafoga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.*

**FOFOGA FETALAI:** Ou te faasilasila atu ua toe amatalia Taulumaga a le Fono Aoa Fautulafono.

Ia e faia le tatou malologa e faapena ona saunoa le sui usufono mo Palauli le Falefa, ia ma ua ou manatu foi ua maua se isi faasiliga malosi e avatu ai le tatou galuega tatou te tuai taunuu atu ai i le siui o lenei po e tusa ai o a tatou fuafuaga mo itula faigaluega. O le mea la lea ou te tapa le sui usufono mamalu mo Palauli le Falefa e tulai mai e faaauau le saunoaga.

**Afioga FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai. Faafetai ua sao i alo se taumafataga sa gasea ai lau Afioga ma le ofisa mamalu.

E malolo le tatou Fono, o fai atu le tuualalo ia i le tatou Malo mo le faaleleia atili o le tatou taulaga i Salelologa. E tuuina atu ai ni nai mea ia e fai ai se faaiuga o le tatou Malo i le tulaga lea e fesoasoani ai i le itu i Sisifo o Savaii, ina ia foia ai le toe sopoia atu o Salelologa toe pue le pasi e o atu i Tuasivi ona o lo o i ai pea le tele o auaunaga a le Malo e pei o le Matagaluega o Leoleo, Faamasinoga. Ua maua ua fai le Faaiuga a le Kapeneta e ave i ai le tasi pe fa pe tolu ea eka i Salelologa mo le Matagaluega o Leoleo. Ia e i ai foi le lagona lau Afioga i le Taitai o le Malo ma le Kapeneta i le Matagaluega lea po o le Pulega Tau Faamsinoga, ona o le tele o tatou eleele ia i Salelologa e mafai ai ona faafaiogofie e lo matou motu ia le femalagaiga aemaise o le faamoemoe sa mafai ai ona faia le faaiuga a le Malo i lenei vaiata latou te taofia le 440eka o eleele i totonu o Salelologa e fai ai le taulaga. O lea la e

avatu ai le lisi lea mo services ia, ina ia tau taofiofi ai le migration o Savaii ia aemaise lava i le create ina ai o galuega i totonu o le vaega ua taua nei o le Taulaga mo le Motu tele o Salafai.

O le isi vaega lau Afioga i le Fofoga Fetalai, ona o lo o tele pea eleele nei, pe le mafai ona faatu ai se lala o le NUS i le motu tele i Salafai e ogatasi ma faiga faavae a le Malo i le faatutuina o Kolisi i nuu i tua ia aua ai neʻā toe femalagaai o tatou tagata, aemaise lava i le mafutaga ma matua ma aiga i mea o i ai ai o latou nuu ma aiga.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Lau Afioga i le Fofoga Fetalai, o le isi vaega e vaavaai atu i ai ona o le tele o nei eleele ua uma ona fuaina, ou te iloa na o le 100eka ua uma ona fai auala, ia ae pei o le tulaga lena e pei ona taua i le taimi ua fano, e taumafai ina ia atinae le taulaga i Salelologa e amata i le uafu faava o malo. Ou te iloa ua uma ona fai i ai le Faaiuga a le Kapeneta foi i lea vaitau e tuu i ai ia Salelologa o se tasi o uafu faava o malo ia mo le tatou atunuu.

O le isi vaega lau Afioga i le Fofoga Fetalai i le tulaga lea i le maitauina ai sa taua i le tele o saunoaga le l lava o faiaoga, ia ae ou te iloa ua fa pe lima nei tausaga talu ona in place ia le tatou National Broadband Highway. O le tele o le faatalatalanoaga ma nisi o Matagaluega ma Faalapotopotoga e foliga mai o la e lava e le o i ai se tuufaatasiga (coordination) i le va o Matagaluega i le faaogaina o lenei auaunaga aua e mafai e lenei auaunaga ona fai atu e le faiaoga e toatasi le aoga mo ni tamaiti se toatele i ni locations se tele. Ou te talitonu e le gata e faigofie ai le aoaoina o aoga, ae faigofie foi mo falemai i le tulaga talanoa atu ai le fomai i le teine tausī maʻā i le falemai faaitumalo e brief ai mea e tatau ona fai a o agai atu le fomai e fesoasoani i se tulaga mafatia o i ai falemai itumalo. I lau la lea vaavaai ai, e tatau ona faaleleia atili le coordination, i totonu lava o Matagaluega ma Faalapotopotoga a le Malo, ae fesoasoani foi le Malo i Pisinisi Tumaoti, aua o le mafuaaga lea ou te talitonu na faavae ai lenei atinae tele a le Malo na faaalu ai po o le US\$20miliona. O le isolation factor lea sa taua e se tasi o sui usufono mamalu i le tau mamao ese mai o tatou mai le tele o atunuu o le lalolagi, o le fofo lea. Ae o le mea lea, e mafai ai ona e talanoa i sekone i lau business partner i so o se vaega o le lalolagi i totonu o nai sekone e le mafai ona tele. O le isi faaiuga a le Malo na fai i lena vaitau, o le suiga lea o le time zone. O Samoa, talu ona sui le time zone, o lea ua oso le la i Samoa ae goto i Tutuila, o le time difference a tatou ma Tutuila e 24 itula e ahead ai tatou, ahead tatou ia Fiti, Niu Sila, Ausetalia, Asia ma isi, o lona uiga e muamua lava ala tatou fai a tatou galuega e tatou te momoe ae ua feala le aufaipisinisi i atunuu mamao, e te toe usu atu i le taeao, ua taunuu mai lau computer e meli i tali ua uma ona aumai. Ma e mafai foi so o se Matagaluega lava taiepi foi o le Matagaluega o Faamasinoga, e mafai ona le toe malaga Faamasino i Savaii ia ae fai atu ia le faatalanoaga o mea faapenei i luga o nei vaega, ou te talitonu o

se atinae lelei, ae e moomia lau Afioga i le Palemia ma le Kapeneta ma le tatou Malo, e tataua ona utilize nei mea fully. Ua leva ona aumai, ae le o faaaogaina i le mea e tataua ona faaaoga i ai.

Ia sa ou taua i lau lauga mulimuli i le Nofoaiga talu ai, lau Afioga i le Fofoga Fetalai, o lea ua tatou faalogo i tulaga o le fesuiaiga o le tau, climate change, o lea foi ua uma ona e saina i Feagaiga Faava o Malo e pei o le feagaiga lea sa e saina i Paris, ia ma le confirmation foi e saina i New York i se taimi e le i mamao atu. O lea ou te malamalama i tulaga o le faaaogaina o le Cabinet Development Committee i le tulaga e fai ai a tatou polokalame ma avatu atu ai ia proposal a Ministries ma Corporations e fai ai galuega fai a le Malo.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaaauu i luga o le faitauga faalua**

O le popolega lea ia te au, ona o le l matua atoatoa o coordination i totonu o le tatou Malo. O lau fautuaga ma le tuualalo, talu ai ona ua uma establish le Green Climate Fund, o le tupe leni o lena e silafia e lau Afioga e hundred billion dollars every year is a lot of money. Ae faalagolago po o a tatou proposals e ave. A avatu foi tatou proposals ua tautuauega, o alatupe nei faava-Malo e masani lava i le first come first serve principle ae leai a se mea i le ave faafaulai ai i o, ia ona faasoa mai lea, lea sa talanoa le tele o saunoaga a faipule i leni aso lau Afioga i le Palemia ma le Kapeneta i tulaga o le fesuiaiga o le tau ma le relocations o nuu mai mea o i ai nei i eleele maualuluga. Ua amata foi ona faaleagaina ia tatou vaitaumafa, ina ua siisii le suasami, o lona uiga ua amata ai ona alu i luga le vai oona ma afaina ai ia tatou vai i lalo o le manava o le eleele. O le uiga o lau tala o lo o taumafai atu nei, e mafai ai ona tatou faaaogaina nei tupe e amata ai ona galulue Matagaluega ma e o lau fautuaga, fai lava se Ministry stand alone e tau o le Ministry of Climate Change ia aua o le mea lea e i ai nei, e moi a o le MNRE la e i ai, ae salalau solo.

**Susuga Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** Lau Afioga i le Fofoga Fetalai....

**FOFOGA FETALAI:** Tulai mai le Afioga i le Palemia.

**Susuga Tuilaepa Auelua Fatialofa Lupesoliai Lolofietele Aiono Neioti Galumalemana Dr. Sailele Malielegaoi:** E leai lava se mea fou o mea ia e saunoa ai le sui usufono e fou, o le mea lena o lea e taumafai i ai le Malo e fai. Ae e le faapea foi e 100% ia tagata, a o mea uma na o lea e taumafai i ai le Malo e fai. O le tulaga foi o mea ia sa e taua, o le taimi nei e le i atoa se 100pilonia, ae o la e faitau lava e unai lava ia atoa le 100pilonia. O le tausaga lea na tea nei, lea sa ou auai i le fono lea sa fai i Peru. Sa ou saofai ai i totonu o fonotaga a Minisita o Tupe uma o le lalolagi, ae o le taimi muamua lea ua fono ai le vaega lea. E i ai la le tala a le Taitaifono o le Palemia o Farani, o le taimi muamua lea faatoa lote ai e Minisita o Tupe le mataupu tau Climate Fund, ae muamua atu, o lea sa lote e Minisita o le Environment, e le

malamalama i mea tau tupe. O le tulaga la lena lea sa oo i ai, e faapea o le masina nei o le tausaga nei e toe tapena ai le aofai o le tupe ua mafai ona ao. O la e fai mai isi ua oo i le 100pilonia, e 100pilonia i le tausaga nei, 100pilonia i le isi tausaga o lumanai, ae se i tau lava i le 2020. O mea la na i le taimi lenei, o lea e na o ona tapena, ma faatalatalanoa ae faatoa iloa maoti mea ia i le tausaga e 2020 ua atoa seleni nei. O le ala foi la lena lea e tapenapena ai a tatou o le upu foi lena lea e ave i a tatou Matagaluega lea e masani ona ou talanoa atu ai i le tulaga pe a faapea e faatino uma fuafuaga nei, o lona uiga e tele le mea e tatou te faalagolago i ai i le uunaia o tatou projects mo le tatou atinae o le tatou atunuu.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ae faalagolago uma mea na i le lelei o le implementation a tatou tagata ia lava ia tatou inisinia e latou te tapenaina ia mea o plans ma designs. O le tatou auala laupapa la e i Maliolio, ua fai si leva ona fai i ai le iuga, ae oo mai nei e lei maea a ona tusi ata. E 90 a tatou atinae la ua taoto nei mo le faagasoloina, pilonia 500 miliona le tulaga lena o le faagasologa o a tatou atinae ia e i ai nei, a o mea ia e tatau ona tapena muamua, o ata o mea e tatau ona tusi designs ma faamatalaga uma lava, ina ia aua nei i ai, e leai lava ma se atunuu faavalevaleyalea e tatala maia ni tupe, pe afai e le lelei ona faataoto ia tatou fuafuaga. E lelei lava le talanoa foi lele, fai lea, fai lea, fai lea, a o lea e lava o tatou tagata ma o le mea moni lava, e le o taitai ona lava o tatou tagata e i ai le tomai lea. E faigofie foi ona lafo faapea e le o lelei e le o lelei e le o lelei, ae mafua mai i le tulaga lea o tatou tagata ua lava qualify faatino galuega eseese nei O le lima tausaga talu ai lea na aumai ai le tupe lea e fai ai le aualalaupapa lea e i Leone, ae lea faatoa amata nei, ona o tulaga ia sa ou tau atu ai, sa ou talanoa atu ai. O le mea la lea, ina ia malamalama i ai le sui usufono o lo o talanoa nei, sa e i i, sa tatou faafeagai foi, ia o mea lava nei o lea tatou te taumafai e improve ia galuega faatino. Ma e o le mea e tele a tatou galuega ia ua faatino, ae sili atu ona tele, pe ana faapea e tau fai lelei atoa uma lava ia vaega eseese o le tatou tamaoaiga o i ai nei. E oo mai i le taimi lenei, o lo o faataoto foi isi a tatou fuafuaga mo fesoasoani mai fafo, ae tai pei o le fesoasoani mai a Iapani, ua leva ona faatalanoaina lena fesoasoani ia ma saina feagaiga ia la e oo mai nei o la e faatoa tau amatamata. Masalo e le o toe mamao ona amata lea i le tausaga nei, ma e pei uma a le tausaga fou e le i maea lava.

Lau Afioga i le Fofoga Fetalai, o mea nei tatou te talanoa i ai, e faatupe mai i fafo, ae i ai foi galuega e tatau ona tapena, ina ia puipui ai latou e ana tupe ia ia latou seleni ina ia aua nei faaoga sese. E faapena uma lava i atunuu uma o le lalolagi.

**FOFOGA FETALAI:** Malo, atonu ua manino lea tulaga, ae pei ona saunoa le Afioga i le Palemia. Ia lafo atu i le saunoaga a le sui usufono e sae sana vaega ua uma ona faamalamalama e le Afioga i le Palemia.

**Afioga FAUMUINA TIATIA FAAOLATANE LIUGA:** Faafetai atu i lau Afioga i le Fofoga Fetalai, faafetai atu foi i le Afioga i le Palemia mo le toe faamalamalamaina o le mataupu. E sao lelei le saunoaga, ae tasi lena matafaioi o tama o le atunuu e pei o lau Afioga o le faamanatu atu e pei ona tatou ma matou iloa ma silafia foi e le atunuu o lo o faafofoga mai, ia le tele sao lelei faamalo i lau Afioga mo galuega ua maea ona faatino. Ae o le tulaga lava ia i o tatou tagata, o le naunautaiga lena, ina ia fai ia tatou atinae ia manuia ai lo tatou atunuu, aua o le faamoemoega lava lena o lea tatou galulue ai, ina ia faatino ia tatou galuega i le tulaga tatou te pulupululima faatasi ai ina ia fai le mea sili mo le atunuu o lo o tapuai mai i o outou faiva.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Lau Afioga i le Fofoga Fetalai, ona maea atu ai lea o se tala a lenei itumalo, faafetai i Tapaau e Fa ma Faleupolu e Fa, le Alala Matuatata ma Tapaau Faasisina Ulu ma Maota ma Toiloto, faamalo le tapuai, manuia le po, Soifua.

**FOFOGA FETALAI:** Malo, Faafetai saunoa, ia ma e ou te manatu o le toe saunoaga lea, sosoo ai loa ma le Afioga i le Taitaifono ia i le tulaga o saunoaga o le sui mo le Tala Autu o le Tupe. Ia ua lelei o le toe lua ai lea o saunoaga sosoo ai lea ma le Taitaifono. Ia lau Afioga i le sui usufono mamalu le toe ulutaia o lena itu o le tatou Palemene, sui usufono mo Falealupo.

**Afioga Hon AEAU PENIAMINA LEAVAISEETA (Falealupo):** Lau Afioga i le Fofoga Fetalai, e ia te au le ava tele e tatu ai ma le faaaloalo, ou te tulai ai i le pau o le Fonousu a Samoa, ma lana Palemene i lenei itula. Ua i luma o le Atua Lona viiga le tatou faamanu ma le tatou faafetai, ona ua faapea ona faataunuuna fuafuaga a lau Afioga i le Fofoga Fetalai ma le tatou Palemene nei i ana galuega fai, e oo mai i lenei itula.

Lau Afioga i le Fofoga Fetalai, e talitonu ua faafofoga le Maotaga nei, silafia e le Maotaga nei le tulaga o lenei Palemene ona e fou le tulaga o lo o i ai nei. O le matua la o lau lauga, o le faafetai, ma le faamalo e tatau ai, leaga e ese lona tulaga o le mea e tatau ai. Lau Afioga i le Palemia, ma le na itu o le tatou Palemene, faamalo le tau, faamalo le tauatinae, faamalo le galulue mo vaega faaupufai, ae ou te talitonu o se tala faasolopito o le Palemene i tulaga ua oo i ai lo tatou Palemene. o le faafetai lea, sa ta tau mafaufau, pe ana fai nei e leai matou, ae na o outou, le tatou Palemene, po o le a le mea o le a oo i ai? Aua e manaia, ae o le vaaiga mai fafo, e faaigoa e latou ituaiga Palemene faapea, pe a tasi se vaega, dictatorship ae leaga a tatou e tele ideas e fai ai le mea na. Ui i lea, ua le o lea, e i ai se isi vaega ua faatotoe mai, e i ai la matou, matou te agaia lena itu. Atonu a e i ai se aoga o le toatolu lenei lau Afioga i le Fofoga Fetalai, o le aoga, atonu i le tatou va ma faalapopotoga tetele i fafo ma malo, e taua tele pe a tatou temokarasi, o lea ua tatou i ai nei, e ui lava la ina toalaia ai, ae lea o le a tatou temokarasi. E pei la e i ai se aoga o le toatolu lea, e tauleleia ai, e tau atagia ai, o le faatofalaiga a lea i ai tatou, i Samoa. I lou a talitonuga lau Afioga i le Fofoga Fetalai, sui mamalu ua ese a le tatou

aganuu, soifuaga faaSamoa., ou te talitonu e le maua i isi atunuu. E i ai le tatou va fesootai, e taua tele lena e opogi o le savali o le tautala tulouna lava, o le gagana faatulafonoina. O le mea lea e ese ai tatou e fanau mai ai iina le soifuaga ma le tupuaga o i tatou. Daily life, e taua ia, o le matagofie, o le mea lea e sologa lelei ai e sologa filemu ai, e le lagalaga ai le tatou atunuu, o le tiute ia, o lona uiga ta te mitamita ai na o Samoa nei. O lea la e faafetai i lau Afioga i le Fofoga Fetalai, ma ou te talitonu o lea foi le agaga i ai tatou. O le matua tauave la ia te au ma le tatou talitonuga, ona ua tatou tuu faatasi, faapea, sou sao se tatou sao aua si o tatou atunuu ma le tapuaiga leaga o iinei, e vete ai upufai o Malo.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ou te talitonu ma o le tapuaiga a si o tatou atunuu po o iina po o iinei, e tasi lava le faafitiga aleaga ia manuia le tatou atunuu mai iinei afua mai nei puleaga. O le faatuatuga la ia o lena e iina i lau Afioga i le Palemia ma lena itu, manaia le mafutaga, manaia le vaai. E i ai le mafuaaga, matou te lagolagosua atu, tatou galulue faatasi, sou sao o se tatou sao, aua le tapuaiga o si o tatou atunuu. Aua nei o tatou foi i tua, aua nei o tatou foi i tua i le 2010, o lena vaitau, leaga sa faaseseina i le mea lea o le numera, o le toatele a ua i ai tatou le pulega o so o se mea. Ae a tatou iloa le pule, so o se mea e te pule ai, pulega na tau sasi, ae faafetai ua i ai ni ata faataatia tatou te iloa e le lelei, e le manaia, e leai se isi e lelei ai. Le mamalu e o le tatou Palemene. ua matua si o tatou Palemene. Taua le numera ae a galulue faatasi ua atili malosi lelei ua matua lelei. O faamoemoega ia atonu o le talosaga foi o le tapuaiga lea, a si o tatou atunuu.

Outou na ua filifilia e le Palemene, so tou sao, so tatou sao, o le auga lea o se matou faalatalata atu i le tatou Palemene. Ua ou fiafia lava, nei tei ua pea ane o le toatolu, o lena itu o le malu, amanaia le toatolu, ia iai so latou aoga. Tatou galulue faatasi, o le auga lava lea i ai matou matou te le, o le faamalo ma le faafetai i lau Afioga i le Palemia ma lena itu. Lea ua silamio uma le atunuu o mai uma e lagolago le vaega faaupufai lea, e lelei ai lo tatou atunuu, o tatou uma lava na, ia o fea o le a matou o ai? Tuu atu o matou ae tatou galulue i luga o le tulaga ia, o le matou mau le mamalu i lau Afioga i le Fofoga Fetalai, sou sao, se tatou sao, ia avea lenei paeaiga e tulaga ese i paeaiga uma talu ona soifua mai le Malo Tutoatasi o Samoa. Ia a la, o le tatou paeaiga ua uma atu, ua matua tele ni mea fou mea taua, mea silisili mo le viiga o le tatou matai, ona o le tatou sao, o le matou momoo foi lena o lauga. Ia aua o le auga lea e tasi, tatou te fia galulue faatasi, matou lagolagosua atu tuu faatasi, aua ua faigofie a mea i lau iloa i le taimi lenei, aua a tutu faatasi nisi, e galulue i luga o le nota e taitaiina ai, ae a sao la, oka ua tatou sao uma, ona lelei uma a lea o le tatou atunuu. Lau Afioga i le Palemia ma la outou Afioga i tamaitai ma alii Minisita, o outou mama na.

Lau Afioga i le Minisita o Tupe, o le mea e mafanafana ai au nei, sa e galue, ua silafia lelei lava, o lea la ua e oo mai ii, na ona tuu faatasi lava, faigofie a, kiliki, kiliki tatou ia vave. Aua e te silafia lelei lava e lau Afioga o le tasi lea

agaga ou te faafetai ai lava, na o lenei. O le mea e tasi lava le faafitiga o aleaga i si o matou talitonuga, ou te fia i ai i se Palemene e uma atu so nice so pure, smooth, ae patipati le atunuu i le sologa lelei. Aua ou te talitonu o le nofoaiga lenei, e ese, e malosi, ua atoatoa, aua e tuu faatasi, e tele le numera, talitonu e faigofie lea. O lou mitamitaga lea, sou sao, so tatou sao, tutu faatasi mo le viiga o le Atua mo le tatou nofoaiga.

Lau Afioga i le Fofoga Fetalai, o le agaga lea o lenei usugafono, aua o le faatinoga uma e le tau avatua ni manatu, ua i Maota, ua i fale le matega, tasi a le faafitiga aleaga, tatou galulue faatasi ina ia manuia le atunuu. Tatou tuu faatasi laia, o le tatalo a lenei sui usufono ia toia i tatou e Lona filemu ma le iloa ina ia fua mai ai so tatou sao, mo le tatou atunuu.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Lau Afioga i le Fofoga Fetalai, na o se minute lava se tasi mo lou itumalo. Lo tatou itumalo, ua outou faafofoga mai, e tataua ona mua ni mea e tataua ai, i le Maota nei. Faafetai i le tapuaiga i lou itumalo. Auvaa ma Aiga, Tofa ma Tapuaiga, aemaise o le nofo a Faafeagaiga i totonu o le tatou afioaga, o Falealupo, o la outou pule lea, tapuai mai, o lo o matou galulue ma le faamoemoe tatou galulue faatasi i talosaga, ina ia to i manu le faamoemoe, faafetai mo lo outou faatuatuaina o lo outou auauna, aua lo tatou nofoa, aua so tatou sao ina ia viia ai le Atua. Lau Afioga i le Fofoga Fetalai, o se matou faataumataua atu lea ma le agaga le mamalu e o le tatou Maota, e ese le matagofie o lenei Paeaiga, alofa le Atua toia i tatou i Lona filemu, o se tatou sao, o Lona viiga, faafetai. Soifua.

**FOFOGA FETALAI:** Malo faafetai, faafetai saunoa i lau Afioga o le sui o Falealupo, o se tasi o sui o le toe ulutaia o le maota nei, ia masalo o le toe saunoaga lea, o le saunoaga a le Sui o Faleata Sisifo. Tulai mai e saunoa, po o le Afioga foi i le Minisita mo Fesootaiga, Faamatalaga ma Fesootaiga Vavave Faaneionapo. Saunoa le sui usufono mamalu.

**Tofa LEALAILPULE RIMONI AIAFI (Faleata Sisifo):** Ia momoli atu le faafetai i lau Afioga i le Fofoga o le Fetalai mo le avanoa, ia sa ou faaoioi atu i lau Afioga ia talu ai e pei o au lea e pei e taufalemau iinei i le tatou malae, o le ala lea o lou tapuai ai pea se i tuusaunoa sui usufono mamalu, ia ona maua lea o se avanoa e avatu ai se motugaafa a lenei itumalo. E ese le matagofie o lenei Fonotaga, mai lava i le aso ananafi seia oo mai i lenei aso o saunoaga matagofie a sui usufono mamalu, avatu le faamalo. O aso lava faapenei, ia o lauga amata o Paeaiga ia o lauga lava o le faafetai, tatou te faafetai ai i le Atua e Ona le malosi uma lava ma Lana valaauga o Ana tofiga ia i tatou, ia aua sa nofo tatalo Samoa, o le atunuu tatalo, so o se mea e sii ai Samoa i ana mea e fai, o le tapuaiga o le mea sili. O lea sa tapuai Samoa ma tatalo ia tofofi e le Atua ni ona Taitai ia lea ua tau lau o le faamoemoe pei ona iai lenei Paeaiga ia tatou faafoi le viiga i le Atua. Faafetai i le tapuaiga a le tatou atunuu mai lava i ona A o se i oo i ona Iŋu aemaise le aufailotu, ia faamalo le fai tatalo malo le tapuai. A o paia a o Samoa ia lele ua maeʻa ona



sula i le tele o saunoaga o le a laaloa ai se faamatalaga aua o paia a o Samoa e le avea.

E faafetai foi i sui usufono uma o lenei Palemene aemaise a i lenei Paeaiga e tulagaese mai le tele o Paeaiga le tulaga ua iai le tatou Faigamalo ia pei ua toe foi a i tua i le amataina o le Palemene o Samoa. Ae i lou lava talitonuga o Samoa a ia o lana ia a lea Palemene na o le Kapeneta a e maopoopo a o tatou uma a e Itu Agai aua e leai se sui usufono e sau i totonu o le Palemene e teteʻe i ni mea lelei pe lagolago i ni mea le lelei. O a mea lelei lagolago a o mea le lelei ia o mea na tatou te veloaaso uma i ai aua o le Malo a tatou.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O lenei la aso i le faalogologo aemaise le saunoaga a le sui usufono matua o Fonotoe, ua 10 tausaga o ou nofo mai i ina ma ou tilotilo mai ia te outou i lenei itu a lea faatoa ou iloa i le aso o lou nofoaga tonu a lena ua e saofai mai ai. Oka le manaia o lau lauga mai i ina, ua leva ona ou fia sau ii a lea ua ou sau ii pei ua ta toe fia alu atu ia ae pei e manaia a iinei sei ou nofonono laititi atu ai. Ioe, ia i lau faalogologo aua i le temokalasi lea ua i ai tatou o le temokalasi tonu a lea a Samoa sei tauina i atunuu i fafo e work le mea lea iai aua ua leva ona taumafai mai le tatou Itu Agai sa ta taumafai foi ta ita ma lo ta fiafia i lena taimi a o lea ua ou vaai atu ua leai se formal opposition ae ua toatele atu le Itu Agai i le taimi lenei. Ia tatou tatalo i le Atua i lenei Palemene e pei ona saunoa le sui usufono matua le Afioga ia Aeau, ia si ou tama o Aeau tatou galulue faatasi po o le a le tulaga e tulai mai. Ae i lau faalogologo i saunoaga a sui usufono mamalu, ua sao ai le upu a le Tusi, e leai ni mea fou i lalo o le la. O saunoaga nei amata a sui usufono uma o mea lava foi e tasi o galuega o auala, tamaoiga ma mea uma faapena. I lou la talitonuga e mavae atu foi tatou o le mea lava lea e talanoaina pea o le atinae faifaipea o le atunuu. A o le luitau i lou talitonuga o so o se Faigamalo o auala e faaleleia ai le auaunaga, le approach le taumafai lea e fesui, o lenei foi taimi po o le a se metotia ma ni auala e sili atu ai le service delivery le avatuina o le auaunaga i le atunuu e ese mai foi i isi mea na masani ai o luitau ia mo le faigamalo e faifaipea.

Lau Afioga i le Minisita o Tupe e le toe tele se faamatalaga i le Tala o le tupe aua o lau a faamatalaga i le Tala o le Tupe pe a ou lauga o le mea tatou te fiafia ai o lea tatou te omai e faasoa tupe o lea e maua le tupe e faatino ai le tatou galuega. Ia o lau Afioga ia o lena sa e i ai i totonu o le Malo e alu i tua i le Private Sector lea ua e toe foi mai i le Malo, o lona uiga o lea ua e taamilo atoa i le cycle lea ua e malamalama lelei foi i frustrations ia po o luitau ma mea e le o fiafia ai le Private Sector e galulue ma le Malo aua o lea tatou iloa o le manulauti a le Malo ia galulue faatasi ma le Private Sector. O lea la ua e oo mai i totonu ia galuega laia i le tulaga o iai. I lau lava tilotilo faasui usufono o le Palemene o le mea a lea e moomia se siitaga po o se improvement o mea o processes i le faatinoina o galuega i aso faipea. E pei lava o luitau ia a o mea masani. O lea ua i totonu le l fiafia o tagata i le tuai

ona totogi atu o tupe ma le tuai o le okaina o mea masani o pili. Ia ou te talitonu o mea la na lea ua tatou galulue agai i ai ina ia siitia. O lea foi ua laga mai e le tele o sui usufono aemaise le Komiti o Tupe mea ia o le SACEP ia ma poloketi faapea ua leva ona faatino mai ina ia topetope ia o mea uma ia o luitau ia lea o le a tatou faataaitiaina e tatau ona faataatia ni auala o mea faapea. I lau matau a aumai le funding mai fafo ma ona tausaga e 5 e tatau ona faaoga ai e tatau foi ona faamanino i tagata nei ia latou process e lua a tausaga o tau saili tagata e faatinoina galuega ma faia galuega. E uma ifo i le tausaga lona tolu o le a amata ae ua uma foi ma le taimi. Ia ae manatua o tatou o lea ua alu i le tala faasolopito o le region lenei aemaise o tatou paaga mai fafo i le lelei o le faasoaina ma le faaoga tatau o tupe nei.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O le tele foi o tatou alo ma fanau o lea ua o faigaluega i Organisation nei ma lala nei o Faletupe a le Lalolagi i Asia ma le World Bank ia tatou te mimita ai o lea ua gasolo mai e toe omai e fautua mai ma fai tatou galuega a o tama fanau a tatou la ua ave i fafo. O lona uiga o lea ua iai le tomai e faatino ai, o le tele a o nei mea o le commonsense. E pei o le uiga o lau faamatalaga sa ma talanoa ma se tasi o faipisinisi ananei faaali mai lona le fiafia e alu atu nei e aumai lana taavale i tua ua leva ona aumai ua \$4,000.00 le bond. A o lau faamatalaga o le process ave i o i lea ofisa aumai i lea ofisa a la e tutu ai a i luga o le uafu lana taavale, e le faapea la ua ou au iai aua ou te le o malamalama ae o lana faamatalaga lea. Ae o mea ia lea tatau ona tatou galulue iai ina ia faafaigofie aemaise le tatou aufaipisinisi aemaise ia malamalama lelei tatou tagata faigaluega ma tatou i le vision ma naunautaiga o le Malo. So o se taimi a e lauga ai le Budget, Tala o le Tupe e alu a le Tala o le Tupe sosolo i le STS i naunautaiga o le Malo i ana fuafuaga faataaitia mo le isi 5 tausaga.

O lea na outou faafofoga ma ou faalogologo i le mea lea na maemae le Taitai o le Malo i le isi mea lea na launch nei o le Leadership Samoa ou te talitonu ua tatau aua o le ituaiga level lea ua i ai le vaega lea e tatau ona matua malamalama lelei latou i le vision a le Malo ma le mea lea e agai i ai le Malo aua o latou ia o Taitai o le tatou Malo i le lumanai. O latou foi la ua galulue i galuega faataitai e tatau ona tatou tilotilo iai. O lea ua aumai i le Tala o le Tupe lau Afioga le mea lea o le toe review iga o le structure o le Malo. Ia ona oo mai lea i le tatou Faiga Palota ia e faafetai foi i le alii pule ma le taumafaiga o le tatou palota lea na uma atu nei ae pei a ona tou silafia ua lua nei Palota sosoo o silia pea tagata palota a lenei Itumalo. O lea ua saunoa le Taitai o le Malo o le a ave le faamuamua i le toe redefine iga o boundaries toe fetuunaiga o tuaoi ia o le a le toe oo la iai se manatu i lea tulaga o lea o le a tatou galulue i ai. O le fautuaga e pei e manaia ae vave fai a tatou suiga ia tapena uma i ai sui usufono e le gata o tatou a o sui e fia tauva mo le isi Palota aemaise a i le tilotilo i mea ia o le compulsory voting ma mea faapena. O mafatiaga ma vaivaiga ia sa tatou iai i le Palota na teta nei. O lau fautuaga i lau Afioga pe a tau ane ai o lea ua iai tatou Komiti Faapalemene e vaai le Faiga Palota e manaia ae ave sa o i le Komiti lea latou te faia le

galuega lea, i lo le toe fai foi o le Komisi Suesue toe aumai e alu le taimi alu le tupe a o latou ia o lea e lava le malamalama. Ae tatala le avanoa i le atunuu lautele e faaali ai o latou manatu i suiga talafeagai mo le agai i luma.

E fautuaina foi le Matagaluega o lea o le a toe fai foi le Census le faitau aofai o Samoa, fai le tonu e tatau ona galulue faatasi ma le vaega lea galulue faatasi mo le faitauina o tagata i le mea o lo o alala ai le toatele o tagata ina ia mafai ona access latou i records nei. Manatua foi pei ona taua e nisi o sui usufono atoa ai ma le lipoti o lea ua faataatia e le Malo le isi infrastructure tele lea, le National Broadband toeitiiti \$40miliona le tau.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O lenei infrastructure e matua fesoasoani tele i mea uma nei i le fesootaiga i le va o Matagaluega a le Malo ma o le fofu lea o le tele o faafitauli ia ua saunoa soo mai ai i aoga, i falemai ma mea uma na aemaise la mea nei o Faiga Palote ma mea nei. O le mea mataga tele i lou talitonuga o lou alu atu lea ma lau pepa o le NPF ae le talia e le Fale Palota ia o le a faapefea ona le talia o le pepa foi a le Malo. Ina ia mafai ona fesootai atoa Matagaluega a le Malo. E oo i le laisene avetaavale a e alu atu ma le laisene avetaavale o la e valid ma aoga e le faaogaina foi ona o le Tulafono. E pei o nai mea ia e tagai i ai ina ia improve i le agai i luma aemaise lava i totonu o tatou Matagaluega ma faaluuluga o Matagaluega, faamolemole aua ou te alo soo i le mea lenei o le Tulafono. O le Tulafono na o se taiala ae sui a i aso ua tatau ona sui ina ia faafaigofie le galuega a tagata. Ia ona ou oo mai lea i lau Afioga i le Minisita mo Aoga, ua ou alofa ia te oe ua ou vaavaai atu ua tumu lau diary. O le lauga a o lea e saina e tusi, e tusi e le gata i lea ua faatusa oe e nisi o Eseta le tupu tamaitai foi lea sa fai ma fofu i lona nuu. A o au lava ia e sao lava le igoa na faaigoa ai oe e si ou Tama, Keneti, Ioe na iloa e le toeaina e pei oe o President Kennedy foi lea o Amelika e te iai i le polokiki. E moi a la na tagatavaleina Peresetene Kennedy i totonu o le Malo i lana tautua afai o le iuga lea o le iuga foi lea e te oia iai pe a e tautua ma le faamaoni. O lea ua ou vaai atu nei ia oulua ma lau paga ia Lufilufi faimai nisi pei oulua o le twin towers ia ae leaga ua paia i lalo lea mea. A ou vaai ia oulua pei ua ou vaai i soo ia na tutuli e Mose e vaai le nuu o Kanana na o le toalua lava lea na foi mai ma faapea mai, e mafai ona tatou osofaia le nuu lea ma avefa ma o tatou nuu.

O lea la lau Afioga i le Minisita lea na taua e lou uso sui usufono ia Faumuina na i nei i le taulaga na aoga lea i Vaitele a ua avatu le tusi i lau Afioga o le 4 ai lea po o le 5 lea o au tusi i le Minisita mo Aoga a o lena ua toe tauaao atu i lau Afioga. E moni le Ofisa o Aoga i ana faiga faavae e le o toe faia e le Ofisa o Aoga ni faleaoga ae o lea tatou te malamalama e iai tatou paaga mai fafo lea tatou te faipaaga lea e faatinoina faleaoga i nisi o itumalo lea foi na fai ai ma le faleaoga i Ae. Ia pei o nai mea faapena e faufautua atu ai ta te galulue ai ona e tulagaese Vaitele ma i Falelauniu ma Nu nei i le tulaga faapena. Manatua foi o mea nei e i totonu lava o fuafuaga tuutuu

mamao a le Malo, ina ua faatino i Vaitele lea la na fai ai foi ma le fanua lea e fai ai se Faleaoga i se taimi talafeagai ia lea la ua tulai mai i le taimi nei. Na taua foi e nisi o sui usufono le luitau lea ua feagai ma lau Afioga ma le Matagaluega i le taimi nei i le tulaga o tamaiti aoga ia o le tulaga faanoanoa lea leaga o le lumanai lea o Samoa. Afai o le lumanai lea o Samoa, 215out e e. E le gata i aoga a o siva faale-lotu, faaleagaga sa faia i le agaga ina ia fealofani ai a ua le mafai. E le o le Malo e le o le Ofisa o Aoga, o outou matua ua leaga le faiga o tatou fanau ua spoil le faiga o tamaiti. E leai a se eseese o fanau nei a tatou ma le tatou au tai toafitu lea na o nei, ua spoil, ua le mafai ona aoi lelei tamaiti ua matua le ava i matua, le ava i faiaoga, le ava i Leoleo.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O se tulaga faigata lea, ae tatalo atu ia pei a o metotia foi nei e taumafai, le Ofisa o Aoga ia taumafai a tatou fanau a tutuli atu nei foi la ma o ua le talia i nisi aoga. Talofa e i le lumanai o ia tamaiti, o le luitau lea e masani ai oe i le luitau tatou te galulue faatasi ai. Ae le gata i lea lau Afioga i le Minisita o Tina ma Tamaitai a o tatou iai i le vaega lea, aua e pei a e faaataata lafoga au tala ia e fai atu soo ou te tafaofao i tai i Apia i po. E moni, a e alu la i po o aso lua i le mea lea fai ai show i tai i Matautu e uma loa le show gasolo mai nai tagata tafafao maimoa mai fafo ae laga atu loa ma tamaiti nei ma mea nei, ae fai o le laiti a o teineiti.

**FOFOGA FETALAI:** Toe lua minute o le sui usufono.

**Tofa LEALAILEPULE RIMONI AIAFI:** Uso ia faatoa amata foi alii aeí Faafetai i lau Afioga aua le popole laa uma. Ae alofagia e lau Afioga leaga o lea e fetuunai e tuuai e isi Matagaluega i le isi Matagaluega ae o lena ua i ina oe le tina ia lua galulue ma le Matagaluega po o le a se mea lelei ma se auala e foia ai leaga e sese le ata lea e ave e le vaega lea i fafo. E le o le ata lea o Samoa, e le o le ata lea.

Ia lau Afioga i le Minisita mo Galuega, faafetai lava ua faalua ona ou oo atu ma ta o e vaavaai mea e tiga lava ona timu ae ta o lava, malo faafetai. O lena ua avatu le tusi i lau Afioga i galuega e fia faatino i lenei 5 tausaga, ia pule a oe. O le a le mea e te mafaia ia fai, auala i Vaiusu, Toamua na ua avatu e taatia i ina e faasoaso e oe pe mafai i totonu o lenei 5 tausaga. A o nai mea ia lea fia ave i ai le faamuamua lau Afioga, muamua sa matou talanoa ma le vaega lea i le SPA a o faafofoga mai foi le Afioga i le alii pule o le SPA. O le galuega lea na tau fuafua i Vaiusu fai mai nai tama na tau taofi e isi matai o le nuu, ou te talitonu e le i taofiga ona o se agaga teteʻe, e ala ona taofi o le le malamalama o nisi foi o matai.

Ae finagalo malie lau Afioga nai toeiina matutua se toatasi po o se toalua tou te galulue faatasi i nai Komiti Faufautua e fesoasoani ia outou aua la foi e i ai le latou indigenous knowledge ia ma faamalumu foi aua e i ai le tatou Komiti lena e mafai ona tuu i ai se toatasi po o se toalua e fesoasoani e galulue ina ia aua nei faalavelave i galuega. E le o faapea o faalavelave o le

fia taofi, a taofi o le mea lelei ae o le fia malamalama. Ae le gata i lea lau Afioga lea foi na taua e le Afioga Faumuina le pa lea a le Ekalesia i Vaigaga le tatou auala, ia lena, e i ai le mea e tau o le mea lelei e i ai le mea e tau o le mea sili, a e faia la le mea sili, o lea e fai mai le upu a le Tusi, òe te silisili ai lava oe. O lea la ua sau nei la le pa lea lau Afioga gata i luma o le falesa ae toe o le faleaoga. E moni a au o le tulaga o le seleni, a o le tatalo i lau Afioga, po o le a lava se vaitaimi e maua ai le tupe, ia faaau le pa lea ona matagofie lea. Tai pei foi o le pa o le matou afioaga o Lepea le matagofie, ia faauma lelei le tatou auala e ese le matagofie o lea auala.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ae pei o le mea lena e talosaga atu ai, ina ne'i toe faaletonu ai le tatou galuega matagofie, ia o lena, aemaise o le auala galue pei ona taua, e manaia tele le finagalo o le sui usufono lea mai Asau ma nai sui usufono ia, e tusa lava pe le faatatauina, ae ia sua faagatasi i le o o tagata i uta ma tai, ae tau ina fai mo lenei taimi.

Lau Afioga i le Minisita mo le Soifua Maloloina, ia malo galue, ae pau lava lea o le mea lau Afioga, o tatou ambulance. E i ai si o tatou uso a sui usufono lea na tatou galulue ua tuua le malo i le amataga o le tausaga, o le tala mai a si ona faletua na o le taavale lava e leai se fomai e leai se masini, e leai se mea o i ai, se i tagai lau Afioga. O le masini taua lava o le mea lea o le oxygen le ea ia ma se tagata e taumafaia. O lea la ua sau nei na o le avetaavale ma le taavale, ia sa sili ai lava pe ana ave e le aiga le latou mai i le falemai i sa latou taavale. Ou te talitonu ana i ai se togafiti muamua faapea, e talitonu o le a i le tatou te le iloa le finagalo o le Atua, ae pei o nai fautuaga mo le agai i luma, aemaise o lea auaunaga taua, aua e leai se aoga e i ai ai le ambulance ae leai auaunaga faapea.

E le gata i lea o tatou meaai ia e auina mai fafo i le quality ma le standard, lea ua tax levy a tatou measuamalie ma meainu, ae se i vaai i le quality o meaai aemaise le packaging ina ia malamalama o tatou tagata i mea latou te faia.

Lau Afioga i le Minisita mo Faalapotopotoga o Tagata Tafafao Maimoa mai Fafo o le a uma atu lau Afioga, o lea ua tele le infrastructure, tele hotel ma tulaga faapena, e fautuaina ai nisi o sui usufono, ia tatou galulue ina ia toe maua ni a tatou vaalele e fesoasoani mo le aumaiga o tagata, po o le a lava le faiga e fai ai, ae fai le mea foi lea sa tatou galulue ai ma le Virgin pe a toe mafai ona fai se airline po o se mea faapena, e fesoasoani ai i le tatou atinae taua tele lea.

Ia lau Afioga i le Fofoga Fetalai, o le a tuu isi tatou pepa ia e lima e umi le tausaga ua lava lea lauga o lenei aso. E momoli atu le faafetai i lau Afioga, o oe lea faia le talafaasolopito ua faalua ona e saofai mai i ina, oka, ou te manao e te toe saofai ai foi i le isi Paeaiga, ona e leai lava se isi e tutusa ma oe, e uma loa oe Laauli loa.

Lau Afioga i le Palemia ma lau Kapeneta faafetai malo ia alo ane i o outou faiva, o le a matou lagolago atu foi i le mea e gata ai le mafai, aemaise le Afioga i le Minisita mo Fesootaiga, Faamatalaga ma Fesootaiga Vavave Faaneionapo, e talitonu o le a ta galulue faatasi aua se manuia o Samoa i lea foi mea ua ta galulue ai, ae ia manuia Samoa i lau faafofogaaga, manuia leni Palemene aemaise a tatou tamaitai ma alii pule, ia outou alolofa fai ma vaai le soifua maloloina ma malolo lelei. O lea sa ma o nei ma lau Minisita e asi le ma CEO ua tau faaletonu, o le le lava o le malolo. O le mea na ala ai ona fai computer ma laptop ina ia faafaigofie galuega, ae ua tele ina o tou o ma ave i le fale tou galulue mai ai. A manava loa, alu i le fale fai le lotu ma le fanau tausami o e fiafia. Fai mai isi e toe oso foi le la a taeao, a ia galulue maua le malosi aua le tautuaina o le tatou Malo. Ia soifua ma ia manuia.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

**FOFOGA FETALAI:** Malo, faafetai, faafetai i le saunoaga a le sui usufono, faafetai foi o lou faamamaavega i le galuega a le Fofoga Fetalai e ui ina tele lau tapenaga ae manatu atu foi i le mafiafia o le tapenaga ia a ua vave faaii lou finagalo ona o le manatu i le tatou galuega faafetai. Ia ma o le a tuuina tu le avanoa leni mo le saunoaga a le Afioga i le Taitaifono o le Komiti o Tupe, le Afioga i le sui usufono mamalu mai Alataua Sisifo.

**LAUGA FAA-TAUPOU**

**Afioga ALIIMALEMANU ALOFA TUUAU (Alataua Sisifo):** Faafetai mo lou avanoa. Lau Afioga i le Fofoga Fetalai o le Maota, faapea sui usufono mamalu o le Palemene, Samoa ua faatasi mai, ma Samoa ua faafofoga tapuai mai. Faafetai i le Atua Soifua, mo le Palemene o Samoa, faapea leni avanoa, ou te tulai atu ai ma le ava e taumafai muamua lava le uluai saunoaga a le itumalo o Alataua Sisifo, mo le Paeaiga Lona XVI a le Palemene o le Malo Tutoatasi o Samoa, ona muliai ai lea o se faamatalaga i le Tala o le Tupe.

Ona ou tu lilia lea, aua o le papa e gata le Maota o Samoa, e leai lava se faafia atamai po o se faafiamalosi, e mafai ona gafagafa le tautolopaa o le Ulufanua. E mafua ai ona faapeipei se matou tala, aua le afio o lau Afioga i le Fofoga o le Maota o Samoa, lau Afioga i le Fofoga Fetalai, o lo o taimatalii le Palemene, o lea foi e afio mai le Afioga i le Taitai o le Malo, le Afioga i le Palemia. O lo o taimatalii le pulega a Malo, afio le Afioga i le Sui Palemia, faapea Afioga i Minisita o le Kapeneta ma Afioga i Minisita Lagolago. O lea foi e alaala atu Afioga i sui usufono mamalu, o sui o Komiti Faapalemene, ua lafo mai i ai le faatuatuga e agaia le Malo, e ala i le faatinoina o matafaioi e aiaia le Palemene, i le mataituina o faatinoga a le pulega a le Malo.

Ua tatou faatasi foi ma Faauluuluga o Matagaluega ma Faalapotopotoga a le Malo, o le malosi o le pulega a Malo faapea sui o le au faasalalau ma auaunaga nofo tuavae a le Palemene o Samoa. O sa ia ma mamalu, o le a toa i le Maota o le Palemene. Ona segia lea o au i le ilaila masina, aua le faafofoga tapuai mai a Samoa, mai tuaoi tapui o le tauataata o le Gagae, seia paia le

tauafiafi o le Gagaifo, mai ona vaega maualuluga seia paia le tagutugutu o le vao filifili, ae a le ee o fata lele o o le vaatele o Samoa, le Afioga O Le Ao Mamalu o le Malo ma le Masiifo, faapea le ee papaaao a le nofoa tolu o Sui o le Fono a Sui Tofia, ma a outou Masiifo. A o le tapuaiga foi a le Afioga i le Faamasinoga Sili, ma le ituau feaatauagai o le Faamasinoga, aemaise lava faiva tatalo a le Aufaigaluega tofifi a le Atua, o lo o polapuipei e le pulega a alii ma faipule i afioaga ma alaalfaga.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O le paia lava lea aua Aiga ma latou Tama, Pule ma Tumua, Ituau ma Alataua, Aiga i le Tai ma le Vaa o Fonoti. Ae le galo i le loto, le tapuaiga a Tutuila ma Manua, o le Uso ma le Aiga, aua Sua ma le Vaifanua, o Fofoga ma Aitulagi, Ituau ma Alataua, Saole ma Saleaamua ma le Launiu na Saelua, faapea le Faatuiolemotu, Tootoo o le Faleula, ma upu i le Manuatele. O le maualuga lea o Samoa e le gafataulimaina e le vaivai, ona i ai lea o le taofi, taoto ia le laau ma ona lau.

Ona fai lea o lau faafetai, faafetai i le Atua i Lana valaau ma le faaaogaina o lou tagata faatauvaa, lea ua ou seei ai nei i le Nofoa o le itumalo Alataua Sisifo, ma ou vaavaai atu i lau Afioga i le Fofoga Fetalai, ma le maualuga o lenei Palemene, ma auai i le Maota o lo o fai ai tonufai a Samoa, ae sa lilo i manatu, e faitau ane ai. O lea le loto, ina ia tauaogaina le ola ma le malosi, mo si ou itumalo ma Samoa, ae sili ai le viiga o le Atua.

Lou itumalo pele o Alataua Sisifo, aua le paia o si ou nuu o Falelima, le afio o Tapaau ma Nofo a Faalupega, lau fetalai Fofoga o le Fofoga o Papa ma Faiga ma le mamalu i le Alataua. Le faafofoga a si ou nuu o Tufutafae, afio o Gisa ma Leusoalii, afio le Seuula ma le Aiolutepa, susu ai Toleafoa, afio Tuifaiga, alaalfaga ai lau fetalai Momoemausu ma le Lautinalaulelei, ma le mamalu i le Alataua. E faapitoaugafa sau faamatalaga i si ou nuu pele o Neiafu, aua le afio o le Tama na Faasau a le Alataua, o le Tapaau Tasi, lau afioga Tonumaipea o le Alataua, afio aiga o Samoeleoi, o le aiga Faitatau, o le aiga na au i Ao, o le aiga na au i Papa, alaalfaga lau Taatiti ma Tuiaufai, i le mamalu o le Nofoapule ma Faleauga, ma Upu ia te oe le Alataua. E le galo le tapuaiga le malolo a le Aufaigaluega paia a le Atua o lou nuu faapea le itumalo.

O lea ua pale i galutuu le seega papa a le tupu, ae sina ulu auma ina ua tau le autapale ma le faatinigauto ua ae malo lau tapuaiga leoleoa sa fauamalo i le alofaiva o la outou auauna, peitai e le galo i le loto oe ma lau tofa faalele, ua filifilia ai lou tagata faatauvaa e momoli mai lou finagalo i le Fonousu a Samoa. E lagona ai pea le faatauvaa, a o ai ea le tagata? A o le a foi se maataua e mafai ona ou avatu, e faailoa atu ai lou agaga faafetai? Pau o lea, ou te tulivae i le ao ma le po i le Atua o manuia, ia faamanuia i lo tatou

itumalo. O si ou manao, aua neʻi galo ita i si au tatalo faamolemole, aua e mana lau tapuaiga, e maua ai le malosi o le auauna, aua e le faigofie tofi ma tiute o le valaauina. E faapena foi si au tatalo fai tumau, ia aua neʻi liliu ese fofoga o lo tatou Atua, ma i lo outou paia ma mamalu ma ia pale pea Lona suafa i le viiga, i lo outou soifua faaaogaina. E faafetai atu foi i uso ma tuagane vaeatu o outou sa e le aveva, e sa tatou tauva i le faiga palota lautele a le atunuu, mo se tofi o la ta itumalo. O lea ua malama ulugalua i le tofa o lo tatou itumalo, ae manatua i le loto lo outou finagalo tamalii. Ae o le soifuaga ua maea tuumatamaga e le Atua soifua, o au nei, o oe taeao. Tatou taufai tatalo, aua e fou le alofa ma le agalelei o le Atua i aso uma. E fia faafetai foi i le Afioga Lafaitale, sa tauaveina le tofi o le Alataua Sisifo, i Paeaiga e lua ua mavae. O le a taumafai e faaauau galuega lelei sa fitaituga i ai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E fia fai lau faafetai i le Afioga i le Taitai o le Malo, le Afioga i le Palemia, taoto ia lou soifua lafoai mo Samoa, aua e sau aso e alu foi aso, a o lou sao taua mo Samoa e tautala aso, aua o au galuega lelei e mulimuli atu ia te oe, a o manuia foi o le Atua, e auga tupulaga. E manuia ai e tutupu mai ia te oe, vaeatu ou sa ma faiga. Ae o lau faafetai faapitoa, ona o le lalavega o au i se tofiga o Minisita Lagolago, ae aveva au ma se tasi o le Itu Agai faataitai, o sui usufono o Komiti Faapalemene, e mataituina faatinoga a le Malo, ma faatino isi matafaioi a le Palemene. O le mea moni, e pei na tau i ai se lagona le amanaia ina ua le tofi, ma i tofiga o Minisita Lagolago, ae ua amata nei Galuega a Komiti Faapalemene ma ua foi mai foi i le malaga muamua Faapalemene na o atu ai i Ausetalia, ua taoto mai le ata ma le taua o le galuega a Komiti o le Palemene. O lau faafetai lena, ou te le o fai atu o nisi o tulaga, ae o le taua o le atinae o lou sui usufono, ua manino le faamoemoe ma le taua o le galuega, faasui o Komiti o le Palemene i nei foi faatinoga o le valaauina.

Lau Afioga i le Fofoga Fetalai, e fia fai foi lau faafetai i ou aiga, e le gata i totonu o si ou itumalo ia ae faapea foi le salalau ai i Samoa nei ma atunuu i fafo. Faafetai le loto aiga, faafetai le fai afafine, faafetai le fai uso, faafetai le fai tuafafine, e lagona i le loto le mafanafana o a outou tatalo, faamanuia tele le Atua ia te outou uma. Faafetai foi i uo ma e pele i le loto, i la outou lagolago i leni taumafaiga, ua tau manuia i lo outou alofa, o e foi sa galulue faatasi i so o se tafa o le soifua galue, faafetai lagolago, faafetai tatalo. Alofagia e le Atua lo outou valaauina.

Lau Afioga i le Fofoga Fetalai ou te fia faafetai foi i lo matou aiga, le Afioga ia Leota Taatiti Manaia Kenape Tuuau ma le fanau, aua e tasi lava le auala e faigofie ai ma mafai ona saofaga se tina, i faalagamaea nei a le atunuu, o le finagalo malie o le tama o le aiga. Aua o le vaa sii vale lava se sa e fou folau i fafo, ae e le i taoto i le agatonu le lotoifale. Ia e lagona ai lava ma le faatauvaa ia alofaaga ma le loto faafetai, i le toalua ma le fanau, vaeatu leni Maota ma Samoa faafofoga mai.

Lau Afioga i le Fofoga Fetalai ma leni Maota, a o le i tuuina atu se manaoga o leni itumalo, e fia fai sau tala i lau vaaiga lautele i le soifuaga ua



tatou i ai nei. O Samoa o le atunuu faamanuiaina, e tele taimi e galo ai i ai tatou o Samoa o le atunuu faamanuiaina, ona e tupu pea le manao, ma le soifua faatusatusa. Ae a tatou vaavaai i le televise, i faalavelave tutupu i isi atunuu o le lalolagi, o le molimau ola lena, o Samoa, o le atunuu faamanuiaina O nisi o na atunuu, o atunuu e malolosi lo latou tamaoaiga, ma le puipuiga malu faafitafita, ae ua soifua i le fememeai ma le atuatuvaale, ona o faiga faaterorisi. O le mea mautinoa, o le malosiaga o nei atunuu malolosi, e tele ai foi le avanoa e toe atinae ai, mai ni puapuaga tau osofaiga ona e malolosi tamaoaiga. A faatusatusa i si o tatou atunuu e maaleale lona tamaoaiga, e matua faigata ona toe tau atinae, pe afai e tutupu ni puapuaga faapenei.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E pei ona tatou maitauina i afa e pei o Eveni na mavae atu nei, i le toe taufetuunaiga o mea e ave i ai le faamuamua a le Malo, ina ia aua nei nofo le auaunaga taua masani ae toe taumafai mea na faaleagaina. O i tonu lea e mafua ai lau tala, o Samoa o le atunuu e faamanuiaina, pe a tatou vaai i le televise i le soifua sauaina ma le matelaina i fafo, ona tatou molimauina lea o vavega o le alofa tunoa o le tatou Atua ia Samoa. Peitai, o nei foi vaaiga i le televise, e aumai ai ma le feau taua, o le ola mataala ma le soifua magafagafa, aemaise o tatou o taitai e puipui si o tatou atunuu, ina ia -aua neʻi oo mai nei sauaga, ona o talitonuga faale-Lotu, ona tatou te le iloa pe mafai ona tatou manumalo ai. E mafua ai le lagolago o le Alataua Sisifo o le finagalo faaalua o le Afioga i le Taitai o le Malo, le Afioga i le Palemia, ua tataua ona silasila i le faamautuina o le faavae o Samoa, na o ekalesia keirisiano, e faataga i Samoa. O le tiute lea o i tatou o taitai o Samoa, o le silasila i ni auala e puipui ai lo tatou atunuu. Ma ou te talitonu, e ui o lo o agai le saunoaga a le Minisita o Tupe i le autu o le Tala o le Tupe 2016/2017 i tulaga tau tupe, lea e faaautu e faapea, -faamalosi le faavae ma tapena mo taeao. Ae ou te manatu, o vaega uma ia o le soifua faamalosi le faavae ma tapena mo taeao, e aofia ai ma le faamautu o se lumanai manuia ma filemu ma saogalemu, mo tupulaga o Samoa o fai mai, i so o se tulaga moomia. O le tatou valaauina lea o taitai o Samoa ia tapena ia malosi mamalu Samoa mo a taeao. Lau afioga i le Fofoga Fetalai, ua manino le saunoaga a le Minisita o Tupe i le Tala o le Tupe 2016/2017, e faauouo lea autu ma le Tala o le Tupe 2015/2016 e faapea, -ia fua o tatou manao i le seleni ua tatou maua.

O lea e faapunafanau le Tala o le Tupe 2016/2017 e faapea, toe fetuunai tupe maua ma tupe faaalua ina ia fausia ai se faavae mautu mo le tamaoaiga mo le lumanai. O i lea e taoto ai le talitonuga o lenei itumalo, e folasia ai manaoga, ona lafo atu lea o le faasoasoaa a lo tatou Malo.

Lau Afioga i le Fofoga Fetalai e auala atu i le Nofoa nai talosaga nei a Alataua Sisifo, i Afioga i Minisita o le Kapeneta ma le pulega Malo. Lau Afioga i le Minisita o Tupe, sa ou faalogologo ma le totoa i le tele o manaoga a itumalo, talofa i lau tau faasoasoaa ma lau faamanatu mai ia i matou, e le mafai ona manuia se atinae, pe a tatou naunau i seleni tatou te le mafaia ona

tagolima i ai, faaopoopo ma le mau, e tatau ona fua le manao i le seleni ua maua. O le tuualalo, ia toa lou loto, o le a tatou galulue faatasi pea e ala atu i le Komiti o Tupe, ae na ona ou faapea atu, e le tagisa lou itumalo, lea o le a fua tonu atu lava le manao o Alataua i le seleni ua maua, ma o i ina e iloa ai le lagolago o lenei itumalo i le Tala o le Tupe ua folasia i le Maota.

Lau Afioga i le Minisita mo Aoga, Taaloga ma Aganuu, taoto ia ou paia, ae ou te manatua ai lava oe a o e taalo i le Manu Samoa i le saosaoa o lau tamoe ma le vave lasiina o le polo, o lea ou te manatua na umi ai lava ona i ai le talita i le SCOPA i nisi o tausaga ua mavae. E le taumate e faapena foi le faatinoina o lau auauunaga i le Matagaluega i le vave pasi o faaiuga i le aufaigaluega ma le saosaoa o le faatinoina o mataupu tuua.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Faamolemole se i tagai ane lava i le galuega mo le vaeluaina o aoga faaitumalo a le Itu Asau, po o le lua tausaga talu ai lea e faapea, o le a tuufaatasi Falealupo, Tufutafoe, Neiafu ma Falelima ma o le a fai lava le matou faleaoga Faaitumalo ona ua taumamao Sataua mo fanau aoga. Ua maua sa i ai se maliega o le a faatupe le matou aoga Faaitumalo e le Faletupe o le Asian Development Bank o se isi o a tatou paaga, faafetai pe afai o lea se fuafuaga o le a i ai, pau le mea e popole ai, i uma ane ua faatupe ai se isi faleaoga, ae o lo o fia vaai mai lava le matou itumalo i lou afio atu e faatino lea auauunaga taua mo fanau.

Lau Afioga i le Minisita mo Galuega, Felauaiga ma Atinae Eseeese, faafetai ua maea le auala galue a Tufutafoe ia Fepuari o le tausaga nei, e talitonu o lena ua oo tonu lava lau faasoa i auala galue a lou itumalo, aua ua 30 tausaga e le i toe fuaina o matou auala galue, ua toe lava la o auala galue o Neiafu ma Falelima e le i suaina. Matou te le manaomia se ta, ona e taugata, ona e tau faasoasoa tupe a le Malo. E pau le mea e moomia faamolemole, ia sua le auala galue ina ia sao taavale i uta i faatoaga, faaopoopo i ai ma le fia faaleleia o le auala-ta lenei í í Road mai Tufutafoe agai i Neiafu-tai, ona ua le toe mafai ona toe uia e ni taavale laiti. Ia ua uma manao o Alataua Sisifo i mea e ono faaalu ai tupe a le Malo, ma ua fua tonu atu lava le manao i le seleni ua maua.

E lua lava nai motugaafa lau Afioga i le Fofoga Fetalai aua le faaleleia o nisi auauunaga i lou itumalo, ae leai se tupe faaopoopo a le Malo e alu ai. Lau Afioga i le Minisita mo Fesootaiga, Faamatalaga o Fesootaiga Vavave Faaneionapo ma lou soatau, se ua faafetai, ua matua talafeagai lelei lava le tuufaatasi o oulua i le Matagaluega Faatekonolosi. Pei lava ona ou faamatalatala atu soo, le matua le iloa lava e si o matou nuu o Neiafu o mea e tutupu i Apia nei, ona e fai o le lola ai o se TV, ae tau le maua lelei mai foi ala leitio. Ou te talitonu e leai lava se isi o Neiafu o iloa o lea ua fai le lauga faa-taupou a le latou sui usufono. Faafetai o lea e maitau atu i le TV ma le leitio le faamanatu faifaipea a le Pule Faatonu po o le Regulator i kamupani o lo o faia lea auauunaga taua i leitio ma televise, ina ia totogi a latou laisene mo le auauunaga mo Samoa atoa.

Lau Afioga i le Minisita mo Fesootaiga, afai o le laisene o lo o tuuina atu mo le auunaga mo Samoa atoa, a lea e le o maua e Samoa atoa lea auunaga. Se o i ina e iloa ai lou toa i la oulua tofa fetuutuunai, ma lua fautua lelei ma le talafeagai ma lou soatau. O le a lafo atu le faaleleia o lea auunaga mo si ou nuu o Neiafu.

Lau Afioga i le Minisita mo le Soifua Maloloina, e faalogologo atu i saunoaga a sui usufono mai le motu tele o Salafai, e toetiiti lava le asa ma se talosaga mo se fomai i o latou falemai faaitumalo, aemaise foi le fia maua o fualaa ma vailaa manaomia. O le faaletonu la e tupu i le falemai i Salega, e tutusa lelei lava ma le faaletonu lea e tupu i le falemai i Satua, e na o pandols lava e maua i le tele o taimi i le falemai i Sataua lea e autovaa uma atu i ai itumalo o le Itu Asau, e tuli lava i Tuasivi le tele o talavai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O lea e ave le faamuamua a le Malo i le soifua maloloina i le Tala o le Tupe, ma ua faaititia tupe galue a Matagaluega uma a le Malo i le 10% ina ia mafai ona siitia tupe faaalu mo Matagaluega a le Soifua Maloloina faapea Aoga. Ou te talitonu la, e le o le tupe lea e ala ai ona leai ni vailaa i falemai i Savaii, a o le lape i le auunaga a e o lo o okaina vailaa ma faasoaso atu i falemai faaitumalo. O le tala masani a fomai e fai pe a uma ona tusi mai talavai, ua leai se tatou sapolai vailaa ma fualaa, ona ua leai se tupe, se i maua mai le allocation o le masina fou ona faatoa maua mai foi lea o ni a tatou fualaa ma ni vailaa. E matua le malamalama lava nai toeaia ma nai loomatutua i ia faaupuga. E talosaga atu ai ma le faamolemole, se i tagai ane i lea auunaga ina ia faaleleia.

Lau Afioga i le Minisita mo le Soifua Maloloina, afai ua paopapa sa matou tala, ia malu ave i fale lou finagalo mea uma o faaletonu o lo o tutupu i o matou falemai faaitumalo i Savaii.

Lau Afioga i le Fofoga Fetalai, ua taoto atu se lafovale o lenei itumalo i manaoga e patino ia Alataua Sisifo, e maitau atu e faapea uma foi isi itumalo o lo tatou atunuu, lafo atu pea ia i aao faasoaso lelei o le Kapeneta, o laau na filitofi e faatino le finagalo o Samoa. Ona i ai lea o le taofi, o le a foi le leo o Alataua Sisifo, o le a se upu ua taugalemalie i le faafofogaaga, a o se manatu ua faapaiafoga, tofa malie ma uta malie

Se i fai sina tala i le fesili e uiga i le Lipoti a le Komiti o Tupe. O le fesili e uiga i le faaogaina o le upu ōpauō. Pei ona sa tali mai ai le Matagaluega i sailiiliga, e talitonu o le agaga tonu o le tali a le Matagaluega e pei ona i le kopi faasamoa, ō le maua o ni tupe faasili, o le faaperatania tonu o le upu lea e masani ai matou o Accountants, o le Deficit. Atonu ua matuia tele le upu ua faaoga o le Bankruptcy. Ma o le aotelega o le Tala Faatatau i le Tupe, e avea ai au ma sui o le Komiti o Tupe Maua ma Tupe Totogi, e faapea atu ai. E matua lagolagoina le Tala Faatatau o le Tupe 2016/2017.

Lau Afioga i le Fofoga Fetalai, alofagia e le Atua lou malosi i so o se tulaga moomia aua tiute o lou valaauina, maua lau tofa aua le faautauga o le Maota o Samoa. Lau Afioga i le Palemia, ia saga utupupuina e le Atua fulu o le segaula i lou malosi. Ia foai le tofa poto aua lou too taumua i le sa folau o

Samoa. Lau Afioga i le Sui Palemia, a outou Afioga i Minisita o le Kapeneta, maua foi lo outou malosi ma le tofa mai le Atua, e fesoasoani i o outou tiute e le faigofie. Ia agalelei foi le Atua i le malosi ma finagalo o Minisita Lagolago, aua o outou tiute e lagolagosua. Maua foi se malosi o lenei itu o le Maota, i Taitaifono ma Sui Taitaifono Faapalemene, sili le latou tofa ma le soifua faale-Agaga, e tautoaluaaina ai faiva ma tiute o le valaauina. Ia agalelei foi le Atua i Faauluuluga o Matagaluega Faalapotopotoga uma a le Malo ma o latou sui o lo o tatou mafuta i lenei afiafi.

23 IUNI 2016

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Le tapuaiga a Samoa mai e ua i ai tofiga a le Atua ma lana Aufaigaluega tofofi, seia oo i le tupulaga lalovaoa, agalelei le Atua. O a ni mala o fou mai, tau ina ta ma faapoi ae folau i lagima le sa o Samoa. Si ou itumalo pele o Alataua Sisifo, o lea ua ta fia manusina, ina ua toa peau lagalaga o le vasa. O le a se vaivai, tofa malie ma uta malie, agalelei tele le Atua i lo tatou itumalo.

E faamuli ma le ai le faafetai tele i le Failautusi ma le Ofisa o lo o tautuaina le Palemene. O le matou tala lea ma le faaloalo. Manuia tele lau Afioga i le Fofoga Fetalai ma sui usufono mamalu uma o lenei Maota, faapea Samoa o faafofoga tapuai mai. Soifua.

*Na faaalua le agaga fiafia o sui usufono o le Maota i le patipati o latou aao i le maea ai o le Saunoaga Faa-Taupou a le sui usufono mo Alataua Sisifo.*

**FOFOGA FETALAI:** Malo faafetai, ua faafofoga le paia o le Palemene i le saunoaga a le Taitaifono o le Komiti o Tupe, e le gata i le saunoaga faataupou aua le faafofoga tapuai mai o le itumalo ae faapea foi ona saunoa e uiga i le lipoti. O le mea lea e momoli atu ai le agaga faamalo ma le agaga faafetai. Ma o le avanoa lenei e tuuina atu i le Malo. Tulai mai lau Afioga i le Palemia.

**Susuga Hon TUILAEP AUELUA FATIALOFA LUPESOLIAI LOLOFIETELE AIONO NEIOTI GALUMALEMANA Dr. SAILELE MALIELEGAOI:** Lau Afioga i le Fofoga Fetalai faapea foi le mamalu o sui usufono o le Maota. Ou te momoli atu le faamalo i saunoaga ua opea nei i le Maota, o uluai saunoaga o le tatou Paeaiga lenei. Ma sa ou matauina lelei le tulaga o le naunau ina ia siitia ia galuega fai, ua ou matauina foi ia atugaluga i le tulaga o le faaletonu o le faatinoga o nisi o galuega. O le mea moni e leai se atoa o ia tatou.

I le tolu vaiaso talu ai i le Aso Sa, sa talanoa atu ai le isi tagata ia te au i le ta o le 11:00, taati atu ia te au lona faanoanoaga, ona o le latou Savali mai Niu Sila e omai e fai ni Taotoga i le falemai i Apia, ua

cancel faafuasei atu. Ae o cancellation, e mafua i le leai o ni mea e fai ai fusifusiga, o se mafuaaga faatauva tele. O le ta o le 9:00 pe a poʻo le 10:00 i le aso na sosoo ai, o le Aso Gafua, sa ou valaauina ai le Minisita o le Falemai ma le latou Team atoa. Ia na ou fesili lea i ai, poʻo le a le mea lea ua mafua ai ona l faataunuu Taotoga? E leai ma se isi o latou e iloa poʻo ai lea na nofo ma cancel. Ae e moni sa short, ae leʻi umi fusi mo fusiga mo le falemai. E faapea foi i le vaiaso le la, o le Aso Lua o le vaiaso le la, na logoina ai au e pue laʻu vaalele mai Suetena ou te lele mai ai i Brussels i le ta o le 10:00. E ta le 10:00 ae logo atu ua cancel atoa ia flights.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Ia ona le maua ai lava lea o se vaa, ona ou tietie ane lea i le train i le isi aai puʻe ai le vaalele mo Brussels. E tapena atu o le a omai mai Brussels i Samoa nei, ae taʻu atu foi ua leai ma le computer o ma avanoa i vaalele ona e tilotilo ane ua misi le lele mai a aʻu ma le official mai Suetena i le vaalele lea na cancel. Ona cancel loa lea o avanoa e lele mai ai i Samoa, ae ua uma ona totogi. Latou te leʻi iloina e le Pulega o le Vaalele, o le vaalele lea na cancel i Suetena, o le mafuaaga o le Strike a Vaalele i totonu o Suetena. Ua ala ona ou t aua lau Afioga i le Fofoga Fetalai nei uiga, e tatou te leʻo i le parataiso. Tatou te le oʻi le lagi. Na o le lagi lava o tatou i ai, e leai se mea faaletonu e maua ai. Ae tatou te i ai loa i le lalolagi, anoano le mau faaletonu. There is no perfection in the world. E faapena foi la i lauga uma lava ia sa fau nei. E i ai le naunau. Le naunau ina ia fai lea mea, fai lea mea, fai lea mea. O le naunauga foi lena o lea e i le Malo. O le ala foi lena, o lea sa tele ai atinae sa fai e le Malo ma agai mai ai pea finagalo o le atunuu i le vaega lenei. Au e tiga lava po o le a le faaletonu, ae taumafai lava le Kapeneta i le mea e gata ai e faatino galuega fai.

I laʻu faalogologo i saunoaga, ese le oʻa, oʻa o manatu. O lea sa faagasolo mai lava talu ona usu le tatou Fono. Ma ou te manatu o le isi Fonotaga, a mafai ona faatulaga, o le isi lenei o Fonotaga maoaʻe i laʻu faalogo i finagalo faalia ma le tof sasaʻa i le faanaunautaiga ina ia siotia galuega mo le faaleleia atili o vaega eseese o le tatou atunuu. O le ala lea ou te manatu ai e tataua ona momoli atu laʻu faafetai ma le faamalo. Ae talu ai ona o le toatele o le Nofoaiga e fou, ou te manatu ai e tataua ona oo saʻu upu i ala o mea.

O le masina o Aperila na amata ai ona tapena le tatou Tala o le Tupe. Mai lava i le amataga i le 1962 seʻi tau mai lava i le tausaga 1989, o le Tausaga Faaletupe po o le Fiscal Year a Samoa, o Ianuari e tau i

Tesema. Ona oo mai loa i le 1989 tupu aʻe se manatu ia te au e tatau ona sui le Fiscal Year a le atunuu, ina ia tatou taumafai e tulata ma ogatasi ma Fiscal Year, Tausaga Faaletupe a Malo o lo o fesoasoani mai i Samoa tai pei o Niu Sila ma Ausetalia. Aisea? E faigofie ai ona faataoto a tatou Tala o le Tupe ma mafai ai ona aumai loa a latou seleni ma faagaioi ai loa e fesoasoani i le faagaioiga o a tatou atinae.

Ou te manatua lauga sa fai e teteʻe ai i le mataupu lea. Fai mai, e l kerisiano lea ituaiga tausaga faaletupe. E matu l kerisiano lava. Ae na pasia lava ma suia ai loa le Tausaga Faaletupe a lo tatou Malo mai i le aso 1 o Iulai seʻi tau i le faaiuga o Iuni.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O lea la ua toetiiti uma Iuni. Ma o le ala lea ua tatou faataupep ai, ina ia taumafai ia pasi le Tala o le Tupe, ae leʻi uma le masina o Iuni. Aʻo Aperila e alu ai le mea e taʻu o le Budget call, e sau mai ai i totonu o le Matagaluega o Tupe. Ona faasalalau loa lea i Matagaluega uma, tapena a outou Tala o le Tupe Alu, tapena foi ma a outou fuafuaga o Tupe Maua, ma ia oo mai i i le Matagaluega o Tupe ae leʻi taina le itula lea o le aso lea. Ona gasolosolo mai loa lea o Matagaluega uma i le Ofisa o Tupe e finau i le latou Tala o le Tupe ia sao. Masalo a tuufaatasi i le taimi lena mea e manao ai Matagaluega uma o le Malo, masalo pe oo i le \$2pilion. Ae le mafai ona faatafagaloa e le Matagaluega o Tupe. Aua e tatau lava ona oti le Tala o le Tupe i le seleni e mafai ona maua. Ona faatalanoa ai lava lea ma faatalanoa ai lava ma amata ona tatipi, tatipi, tatipi, tala na faataatia mai, seiloga lava ua talafeagai ma le tupe maua. Ona talanoa loa lea o le Matagaluega o le Tupe ma le Minisita o Tupe fofola iai le Tala faataitai; ia pe i ai foi ni tuualalo a le Minisita o Tupe ma faamatala uma lava mea uma, o le sitepu muamua lena.

O le sitepu lona lua o le aumai loa o le Tala o le Tupe i i le Kapeneta ia te au ma Minisita, ia pe lua tolu fonu. Ona toe valaau foi lea o Matagaluega uma e toe omai e feiloai ma le Kapeneta. O le isi avanoa lea mo talosaga faaopoopo. Ae fua lava i le tupe e mafai ona maua. Ma o i foi la e toe maua ai le avanoa e fai ai isi tipi. O le avanoa foi e fai ai isi faaopoopoga. A uma loa lena, ona alu loa lea o le faatonuga e tapena al tupe eseese e faatupe ai le Paketi. O lona uiga, o al tupe uma lava ua fuafua lea ua i ai le Ioega a le Kapeneta. A ioeina loa e le Kapeneta ato le Tala o le Tupe, ona tapena loa lea o le Lauga mo le toe silasila iai o le Kapeneta, faatoa pasia ai loa le Tala o le Tupe, ma le Lauga mo le Palemene.

Lau Afioa i le Fofoga Fetalai, e i ai isi Ulu o Matagaluega e manatu, e i le Komiti o Tupe e talosaga ai nisi tupe faaopoopo. E leai se aia oi le Komiti i lalo o le Tulafono e toe faaopoopo ai se seleni. O le Iuga e fai e le Kapeneta, o le Iuga lena faaii. Ona fono loa lea o le Palemene e tolaulau ai e le Minisita o Tupe le Tala o le Tupe a le Kapeneta. A uma loa la ona faataoto le Tala o le Tupe i le Saunoaga a le Minisita o Tupe ona pasi loa lea o le Tala o le Tupe e suesue e le Komiti o Tupe a le Palemene.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le faatolu ai lena ona faatalanoa ia le Tala o le Tupe, ia ma toe valaau foi ia Ulu o Matagaluega e toe o atu, e justify le latou Tala o le Tupe, ma ua taoto foi ma le Iuga a le Kapeneta, e s , s , s se Ulu o le Matagaluega ona toe alu i fafo i le taimi lea. Ia i le Komiti o le Tupe e tali fesili a le Komiti o Tupe e faamaioio lelei mea, ia manino le Komiti o Tupe. E ala ona ou t oia le mea lea, ona mai lava i le tausaga e 1984, na faatonu ai e le Kapeneta o taimi e fai ai fono, ia nofoia e Ulu o Matagaluega ia latou nofoa i totonu o le Palemene latou te fesoasoani mai, e leai nisi o toe ai s l . O tupu ia o le atunuu lea ua fono. A i ai ni mataupu e l g ae le malamalama le Minisita, o latou o Faatonu Sili e aumaia le tuualalo. E le o se tulaga lelei le ave o se tali ae le atoatoa ia te outou o lo o agaia le Malo.

E le o ni upu e avane ai le tulaga ese o le Palemene i le taimi nei ona o lea e maioio lelei le fulisia o le atunuu atoa i le vaega lenai. Ona tupu ae lea o le manatu i le vaega atoa, o le iuga a le vaega atoa, e tatau ia ona fai se faiga. Ia respect le independence o le Palemene. Ia na o le ta o tasi ia Minisita Lagolago, a o le sefulu iva ma le toatolu o Tututoatasi o le a avea outou e tauavea le pitolaau a le Palemene. O le tulaga sa o lava lena e tatau ona faaupu ai. E le o se Itu Agai po o se a, pei o se upu e faameme o ai i lalo le t ua o le tutoatasi o le Palemene, o le a outou tauavea le tulaga taualoa le dignity o le independence o le Palemene lenai. A oo foi la i a outou saunoaga, aua ne o taofia i tua se manatu. O le faanaunautaiga ma ua fa a u lauga tetele na faia i le mea lea, o outou ia sa i ai, o mea ia sa ou faat uaina, good governance, accountability and transparency. O a le uiga o ia mea? aua ne o i ai ni mea e faaalatua, ia manino mea uma, ma e faalagolago atu foi le Kapeneta ia te outou. Ne o te o ua i ai se tulaga foi lele faapea ua tatou fet o i . E faalagolago le Kapeneta ia te outou pei ona silafia e le mafai

ona iloa e le Minisita, po o fau le faauluuluga o le Matagaluega ma nisi, ia po o fau foi le faauluuluga a le Matagaluega ma le Minisita, ae le iloa e le Kapeneta atoa. O le ala lena e t ua ai le galuega a outou o lo o galulue le Komiti o le Palemene o i ina, e fau ai le soifua faa-Faipule, soifua o le faipule i le tofiga o le faipule. Ma o le t ua lena o le tofiga faa-Komiti, e atoa ai le malamalama i galuega o lo o faatino i totonu o le Malo. O i i le Minisita, na o lana ia lava Matagaluega, a outou e lautele le tou vaai i taimi e tou te valaauina ai faauluuluga o Matagaluega. O le mea la lea, o lea ua manino le vaega lea, ou te momoli atu le faamalo i la outou galuega fai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

Sa ou matauina ma le toto saunoaga e faapea, e l tele se tatou tupe o maua, e sa, o le ala foi lena e tatou te agai ai e saili so o se auala e tatou te maua ai fesoasoani. O le aofaiga o le seleni lea e tatou te gaoioi ai le Budget, e \$918, 500,000. Tupe atoa lava lena o lea e tatou te galulue ai, e aofia ai a tatou Tupe Maua, e aofia ai ia Foa po Grants, aofia ai ma mea o Projects ia e fund mai e faalapotopotoga, e aofia ai ma vaegatupe ia lea e ta e faatupe mai Short Term. O lea la e auiliili uma atu lava i totonu o le Tala o le Tupe lena ia seleni e faatino ai a tatou galuega mo le tausaga atoa lena o lo o faagasolo. A o lo o i ai foi ia le isi metotia o lo o faaog e le Kapeneta lea sa saunoa i ai le Afioga Faumui, e fonu ai i le tai tasi fonotaga i le lua masina ma faatalanoa ai ma tulituliloa ai ia nisi o galuega o lo o fai, ina ia mafai ai, afai o se ioega e moomia e le Kapeneta o lea e saofafai ai le Kapeneta i i ina ia faafaigofie ona faatino ia mea uma o lo o moomia.

E i ai le vaega e tasi ou te fia tautala i ai lea sa t ua e le Afioga i le sui a usufono o Anoamaa Sisifo e faatatau lea i gaoioiga a le tatou Malo mo le faaleleia atili o tatou aiaiga o Faiga Palota. O le fonotaga i le aso ananafi na pasia ai ia le faaiuga mo le isi foi Komisi Suesue. E i ai lava le taofi, tuu pea lava i le Komisi Suesue, latou te silasila i nisi foi teuteuga e tataua ona fai. Ae i ai foi isi teuteuga ua uma ona ou fesootei i nisi foi e latou te faatino ia le toe tilotilo atoa i le toe faatulagana o tuaoi e aofia ai ia le atunuu atoa, ona e le toe tagofia le mataupu lena talu mai lava ona Tutoatasi tatou. Ae ua tataua ona toe tilotilo i ai, ona o le tele o mau faaletonu ia e aliali mai pea i faatulagana o tuaoi na i ai i le 1962, o lona uiga, e pei lava ona tulituliloa mai e le Tofa ia Lauofo, o lea ua faatino ia vaega ia.

O le matou galuega, o le a amata atu i i lo itu taumatau le Afioga ia Fiamē, o lea foi ou te matauina, e l tele lava ni mea na lag e



moomia ai ni tali. Ia ona faasolosolo atu lava lea i o. O le a amata matua atu ia le taamilosaga i lenei foi Fonotaga, a o nisi Fonotaga ia toe amata mai lea i faiga sa tatou masani ai. Ia o a ni mea e totoe, ona ou tu atu lea e toe faamanino nisi mea, aø le faaiuga lena lau Afioga ona o lea ou te matau e l tele lava ni mea na ou aafia ai. Ae a i ai ni mea o totoe, ia ona ou toe autaluina lea i le faaiuga.

Lau Afioga i le Fofoga Fetalai, o le faasologa lena o le matou galuega i lenei afaifi.

**FOFOGA FETALAI:** Malo faafetai. Tulai mai lau Afioga i le Sui Palemia.

*23 IUNI 2016*

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaaauau i luga o le faitauga faalua**

**Afioga Hon FIAME NAOMI MATAAFA (Minisita mo Punaoa Faalenatura ma le Siosiomaga):** Ou te talitonu ua lava ma totoe, ma ua paelago ia paia ma mamalu o le Maota o Samoa ua potopoto. O Samoa foi lea o lo o taputapu mai i o tatou faiva. Ae ou te manatu e le tau faaopoopoina foi i se faamatalaga ia paia ma mamalu ia. O paia faale-Malo, paia faale-Atunuu, faapea foi paia faale-Ekalesia.

A o lenei itula ma le avanoa lau Afioga i le Fofoga Fetalai, e tau ia ina faapai atu ma le faaaloalo i lau Afioga ma le Maota. Ma e ua lagona foi ua tuneva le afaifi, e le taumate foi ua vela le fala i Afioga i sui usufono. Ae ui i lea o le tatou valaauina lava ma le taimi o le galuega, e faapea lava ona faaaauau galuega a le Malo, ina nei tei foi ua faateia nisi o o tatou sui usufono fou, pe o se masani lea a le tatou Palemene le tatou fonu faalausosoo, amata mai lava i le taeao seia oo i le tuneva o le po. Ma e fua lava i le galuega o lo o i le Laulau a Fono, aemaise lava le Tala o le Tupe. Aua o le tatou mea faigaluega lea e tua i ai le Malo mo le faatinoina o le atinae o le atunuu, aemaise le tali atu i manaoga o itumalo taitasi, e pei ona saunoa i ai sui usufono mamalu o lenei Maota. O lea e faatalofa atu ai le Matagaluega o Punaoa ma le Siosiomaga. O le tatou Matagaluega lenei o lo o nafa i le tulaga tau punaoa i o tatou eleele, suavai, o a tatou folesi, faapea ma le malosi faafouina. O itu o le tatou siosiomaga, o lo o i ai le Ofisa o le Vaaitau, o le vaaiga o le otaota, o lo o i ai foi le tatou vaega foi lea o le PUMA o lo o aiaia ia aafiaga o le siosiomaga i atinae o lo o faatulai mai totonu o le atunuu mai lea taimi i lea taimi. Ma o le Matagaluega foi lea o lo o nafa ma aafiaga o le tatou atunuu, tainane le lalolagi i suiga o le tau.

Lau Afioga i le Fofoga Fetalai, i lenei felafolafoaiga i luga o le Tala o le Tupe, e momoli atu le faamalo i le tatou Komiti le tamaitai Taitaifono le Sui Taitaifono ma le mamalu o le Komiti, i le maea tapena o le lipoti, o lea ua taatia ma ua silafia ai foi e le Maota, se vaaiga a Komiti o le tatou Palemene i tapenaga a le Malo, e tauala atu i le Tala o le Tupe a le Afioga i le Minisita o Tupe. Ma e matauina i le Matagaluega lenei, sa faamauina e le Komiti le

faaitiitia o le paketi, i nisi o vaega i le faatinoga o gaoioiga. Ou te manatu lau Afioga i le Fofoga Fetalai, e avea foi lea o se luá mo leni Matagaluega e siitia ai le auunaga i auala e aupito sili ona lelei i le faatinoga o ana galuega better efficiency. Ma tatou fesoasoani ai i le Afioga i le Minista i le tau faaputupu o tupe aua lana faasoa. Ma ua talia ma le fiafia le fautuaga a le Komiti ua tuuina mai i le latou lipoti e tusa ai ma le galuega ma le tupe ua faatatau mo le Matagaluega o Punaoa ma le Siosiomaga.

Lau Afioga i le Fofoga Fetalai, e pei e ono ni vaega aoatetele na saunoa mai i ai sui usufono mamalu o le tatou Palemene. O le agaga lava lea o le felafolafoaiga i luga o tatou Tulafono, o le talanoa lea i tulaga o tatou Faiga Faavae, ma o faiga faavae e faasolo mai ai ia gaoioiga a Matagaluega i le faatinoga o a latou auunaga. Ae e le taumate lau Afioga i le Fofoga Fetalai, o le vaega lava lea o taligalu e pei ona mamafa i ai saunoaga a tatou sui usufono, aua lava le puipuia mai o tatou gataifale.

**23 JUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

E le gata foi i lea o le solo o le eleele, ia faaitiitia ai o tatou eleele. O le Faiga Faavae lau Afioga i le Fofoga Fetalai ma le mamalu o le Palemene, na faavae mai ai le tatou taligalu. O le itu lava lea o le puipuia lea o le tatou gataifale ma o tatou eleele solo. E le gata i lea o le puipuia lea o aualatetele, o le tele o auala o le tatou atunuu e pei ona silafia e sui usufono mamalu o le Maota, o lo o faapea lava ona faataamilo i motu o le tatou atunuu, ma o lo o tulaga lava e taulalata i le sami. O le agaga lava lea na faavae ai ia gaoioiga tele ma ua leva tausaga o faasolosolo mai le tatou galuega lea, o le faia lea o o tatou taligalu, ma e i ai lava le faamoemoe i faiga faavae a le Malo, o le a faapena ona faaauau. Ae peitai lau Afioga i le Fofoga Fetalai, aemaise i le luátauina pea o i tatou i aafiaga o ni suiga o le tau i Natural Disasters ma aafiaga e pei ona outou silafia ma o tatou malamalama i ai, ua le gata i o tatou gataifale le galuega o le puipuia mai o le tatou Siosiomaga ma le tatou Punaoa o le tatou eleele, ae ua faapea foi ona afaina i le amata mai lava i le tuasivi se i faasolo mai lava seá oo i le tatou gataifale. Ma ua see atu nei le Malo i se vaaiga ina ia tuufaatasia se faiga faavae lautele, aua e fesootei lava o tatou tuasivi ma o tatou gataifale. O mea e tutupu i luga o le tuasivi e ono aafia ai lo tatou gataifale. O faalavelave faalenatura aemaise lava o afa, lea foi ua oo mai ia tatou le tsunami, o lea lava ua tatou iloa aafiaga o le atunuu. E pei o itu ia e soosoo atu ai foi, e le gata o le puipui mai i lo tatou gataifale, o a tatou auvai, o a tatou folesi ma vaega o le tatou atunuu e apo ai tatou vai, o itu uma lava ia e ao ona lautele ai le fuafuaga a le Malo i ana fuafuaga ma gaoioiga e tatau ona fai, aua e le mafai ona tuese le isi vaega o le eleele, aua o ona aafiaga e tupu mai i isi vaega o le eleele. E le gata la i le tulaga o le natura, ae o gaoioiga foi a le tagata soifua, e pei o le taina o tatou laueleele ia tatou te faamoemoe i ai e apo ai le suavai. A faapea tatou te taina o tatou eleele ia aemaise o tatou auvai, e faapena foi ona tele le afaina o lea punaoa mo i tatou, e le gata i le solo o le palapala ma le afaina ai o tatou laufanua, ae faapea foi le le iloa atu mo le tatou faaogaina o le tele o le tatou suavai.

Lau Afioga i le Fofoga Fetalai, o tulaga lava ia o faiga faavae a le Malo o lea ua faalatele atu, e faaauau pea galuega o tatou taligalu, ae o le a faapea foi ona silasila le Malo i tatou auvai ma isi lava gaoioiga o le puipuia mai o tatou punaoa e agai atu i tuasivi. Ma ua faapena foi la ona soloai mai i talosaga o lo o aumai mo auala faapitoa mo le Tsunami, e pei o auala nei e mafai ai ona tuliloa gofie e tatou tagata le saogalemu i taimi e tutupu ai ai faalavelave faapenei. Saogalemu o tagata ma le agaga lava ma le faiga faavae a le Malo o lea o lo o fautuaina ai le tatou atunuu e siitia o tatou nofoaga i nofoaga maualuluga ia tea ese atu ma le tatou gataifale ma taimi e oo mai ai faalavelave e pei o le Tsunami. O vaega muamua la na, o taligalu mo tatou auala o le Tsunami.

Lau Afioga i le Fofoga Fetalai, e mulimuli ane ona fai atu lea o sau faamatalaga tauaofai i le mataupu lava lenei o le suiga o le tau, a o le a faasolosolo atu pea i mataupu sa laga mai e sui usufono mamalu.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O le isi vaega taua tele sa laga mai o le aoina lea o le tatou lapisi. O vaega lava ia e feagai ma le Malo, o le a le tele o le galuega, o lea lava tatou te silafia e le o sopolia le tatou atunuu atoa i lea auaunaga, ma o se luitau foi lea mo i tatou. Ma e pei lava ona saunoa pea le Afioga i le Palemia i tatou tupe tau faasoaso ma manaoga e tulai mai i lea taimi ma lea taimi, o le isi lea vaega o auaunaga i totonu o le tatou atunuu e faatupulaia pea. O le lapisi, vaeane lo outou paia ma lo outou mamalu, a o a gaoioiga ma le faiga faavae a le tatou Malo. Ma o lea lava o lo o vaavaai i ai le tatou Malo ua amatalia lea auaunaga iinei i le taulaga i le mea o lo o toatele ai le faitauaofai o tagata ma faapea ona tau faasoaso atu i nuu i tua e pei foi o Upolu ma Savaii. Ae pei ona outou saunoa mai, e le o atoatoa ona faasopolia le atunuu i lea auaunaga, ma o le mea lea e luitauina ai le Malo aemaise foi lenei Matagaluega i ana faiga faavae e tali atu ai i lea foi manaoga i totonu o le tatou atunuu.

Ia o le auaunaga lava e faaae i luga o tatou tupe maua, ma o lea foi ua vaavaai le tatou Matagaluega i auala eseese e lenei auaunaga e le gata i le tala o le tupe o lo o faaagaaga e le Malo mo lenei Tala o le Tupe ma le Tala o le Tupe i tausag ao le a faasolo mai.

O lea sa ou maua ma e manaia tele le fautauga a se tasi o sui usufono sa saunoa mai i le mataupu lea o le matata. Ma ou te manatu ua faapea foi ona faasolo i ai le vaai a le Matagaluega i ni auala e mafai ona faasolo mai ai le atunuu i le mataupu lenei o le faatupulaia o otaota ma lapisi i totonu o le tatou atunuu.

O lona fa lau Afioga i le Fofoga Fetalai, o le talanoaina lea o le vai lea e i totonu o le manava o le eleele, o tatou water tables aemaise o le tulaga i lona aafia ona o otaota mai tatou faleese vaeane le Maota ma le faafoifoga mai a le atunuu. A o mea ia e tatou te talanoa i ai, aua o itu ia e ese le afaina o le soifua o le tagata pe a faapa o le a afaina le tatou punaoa lea o le suavai ona o nisi itu faale soifuuga faaletagata, ma o itu ia e tatau onatatau tapena i ai. Ma o lea foi ua amata se polokalame iinei i le taulaga mo le faaluina o le otaota

lea, a o tatou nuu i tua, ua faapea foi ona amata polokalame mo le faia o ni tane mo otaota, o ni tane e anagata. Ma ou te manatu o le isi foi galuega lea ma le auunaga e faapea lava ona faaopoopo ma toe faaleleia ma toe silasila atili i ai le Malo e le gata i le faataotoga o ana faiga faavae, a o le mea aupito sili ona taua, o le faataatiaga o ana polokalame e faatino ai le fofu e tali atu ai i na ituaiga faafitauli.

**FOFOGA FETALAI:** Ou te vaelupeina le saunoaga a le Afioga i le Sui Palemia ona ua tatou taunuu i le tatou malologa, o le a faataatiaese Taulumaga a le Fono Aoa mo lana malologa masani.

*Na faataatiaese Taulumaga a le Fono Aoa mo lana malologa masani i le itula e 9:30 i le po ma toe faaauau i le itula e 10:03 i le po.*

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

*Na toe faaauau felafolafoga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu. 2) 2015/2016 ma le Tulafono Tau Faaofi o le Faatatauina o Tupe 2016/2017.*

**Afioga Hon FIAME NAOMI MATAAFA:** E faaauau ai le tatou galuega. Lau Afioga i le Fofoga Fetalai, na o nai mea laiti lava ia o lo o totoe ona faamaea ai lea o se matou tautalaga. Sa laga le mataupu tau togatogo, ma e o le tasi lenei o vaega taua tele i le tatou Punaoa ma le Siosiomaga, o tatou togatogo, aua e i ai le upu foi lea e fai i togatogo, o faatupu eleele. Ma ou te faamalulu atu i le sui usufono sa saunoa mai i le tulaga ua oo i ai le togatogo lea, masalo o le afioga o Moataa leaga o lea sa laga mai analeila e le Afioga i le sui usufono, ae o le a ou tuliloa ma fesiligia le Matagaluega e tusa ai ma mataupu sa laga mai. E faapena foi i le fale faalelei vaa lea e i le uafu i Satitoa i le fesili taua lea naumai, e uiga i vali ia ua tafi ese ma vaa ua afaina ai le siosiomaga o le gataifale. Ma e faapea foi ona ou faamalulu atu i le Afioga i le sui usufono ona o lea sa saunoa mai nei, ona aua ou te manatu e taua tele se vaaiga i le faatinoga o le galuega lea i le le afaina ai lea o le tatou siosiomaga.

Lau Afioga i le Fofoga Fetalai ona faaiu atu ai lea o se matou faamatalaga i le mataupu lava lea i le suiga o le tau. O lea ua saunoa le Afioga i le Palemia sa auai atu i le masina o Aperila i Pale i Farani i le fono tele a Malo Aufaatasi, o lea ua maua ai se maliega i le tali atu lea o le kelope i aafiaga o tatou i le suiga o le tau. Ma o se taunuuga lelei lenei ua leva ona tuliloa aemaise foi le tagitagi atu a le tatou itulagi o le pasefika, ae o se vaega lea o le lalolagi ua tele lona aafiaga ona o le suiga o le tau. Ma ona faapena foi lea ona sosoo ai ma le fono i Niu Ioka e faapena ona faamautu ai feagaiga aemaise o le itu i lefofo mai o Malo i tupe e mafai onafaatupe ai galuega e tali

atu ai i nei suiga ogaoga. Ma o lea ua maua le tapulaa sa faatulaga a oo loa i ai a tatou tupe ua mafai ona tuuafaatasi ona mafai loa ona faagaoioi le fund lea e mafai ona talosaga i ai atunuu e maua mai ai le fesoasoani. Ma o lea ua nofo sauni le tatou Malo, ou te manatu i le talatalanoa foi a le Kapeneta, ua ave lava le faamuamua a le Kapeneta ma ua faapea ona i ai se fuafuaga o le a taimua lava Minisita mo le Komiti o tapenaga mo le tuuina atu lea o tatou manaoga, o proposals mo le vaegatupe lea. Aua o le mea moni, e le tapenaina e se Matagaluega se tasi, e tele aafiaga o le suiga o le tau, ma e ao ona fai sao uma i ai vaega eseese o le tatou Malo.

O faiga faavae lava a le tatou Malo aemaise le tuuina atu o talosaga faapenei i faalapotopotoga a le lalolagi, e i ai lava Matagaluega e pei o le Matagaluega leni e i ai se vaaiiga o le technical ministry, a o ala lava o mea, e tatau lava ona i ai faamalama o le Ofisa o le Tupe aemaise foi le tatou Matagaluega o le Va i Fafo, a o mea uma ia e tatau ona tagai i ai le Malo ina ia mafai ona faamaopopo tapenaga ia lelei ma mafai ona fesoasoani mai ai lena tupe e tali atu ai i le tele o manaoga e pei ona saunoa mai ai a outou Afioga.

**23 JUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Lau Afioga i le Fofoga Fetalai, o nai mataupu na sa laga mai e sui usufono mamalu, ma e faapea atu sa matou upu faaiu, o le gaoioiga lava ia a le Matagaluega leni, ma e le na o le Matagaluega foi e ao ona galue i ai, ae o letatou atunuu atoa, tatou taitasi, e ao ona tatou puipui i a tatou punaoa, ina ia faapea ona mafai foi i tupulaga o lo o fai mai ona latou maua faamanuiaga i a tatou punaoa nei. E tatau ona tatou tausi i le tatou siosiomaga.

Lau Afioga i le Fofoga Fetalai, e pei a tatou talanoa i nei mea o environmental protection ma mea faapena, ona tatou mafaufau lava lea pei o ni mea mai fafo ma ni mea tatou te le iloa. Ae faamanatu atu i le tatou atunuu i a tatou faasao, o a tatou tapu sa faia i nuu ma afioaga. O le uiga lena o le faasao mai o le tatou siosiomaga mai lea taimi ina ia mafai ona faaauau ai le lelei o le tatou siosiomaga mo se taimi umi.

Ma ou te manatu lau Afioga i le Fofoga Fetalai, o le isi feau taua, aemaise le tele o galuega ma gaoioiga i o tatou taligalu o tatou auala, o tatou aualalaupapa, o tatou alavai ma tulaga uma faapenei, e ao lava ona tatou saili ina ia tatou faaaogaina tekonolosi e aupito lelei ma aupito aoga. Ia, o se matou faamatalaga lea lau Afioga i le Fofoga Fetalai, ia manuia tele le fonotaga a le Palemene. Soifua.

**FOFOGA FETALAI:** Malo faafetai ua taunuu manuia le saunoaga a le Sui Palemia. Ou te tapa lau Afioga i le Minsita mo Pisinisi, Alamanuia ma Leipa e te tulai mai aua tulaga o mea sa laga e sui usufono mamalu.

**Afioga Hon LAUTAFI FIO SELAFI PURCELL:** Faafetai atu i lau Afioga i le Fofoga Fetalai. E faatalofa atu foi i le paia o sui usufono mamalu uma ua tatou faatasi i leni afiafi.

Lau Afioga i le Fofoga Fetalai, na amata mai lava i le taeao analeila o tatou sulaina le alofa ma le agalelei o le Atua e oo mai lava i leni po. Tainane foi

le faalupe ma paepaeulufanua le paia ma le mamalu o Smaoa i ona itu taulagi, mai lava i Saua seia paia Agalega. E fetau lelei lava la le taimi lea o le a fai ai le lauga a Satupaitea, aua e mafai ona ou faapea atu, fai ia outou ma tou sui ua lava na faalupega ua uma ona outou fai. Po o le a lava le toe faaopoopo atu pe toesea e Satupaitea, ele mafai ona suia ai paia ma mamalu o Samoa. O paia lava mai le vavau, o paia lava e le ave. Ona ou faapea lea, ia nuunuu atu faatini o tausala paia uma ia. A ua ou tulai atu ona i lenei afiafi ma tolaulau atu se faamatalaga e ala i ni mataupu sa laga mai e sui usufono mamalu. Lau Afioga e le tele ni sui usufono sa afea Matagaluega e tele ia ou te vaايا, ma sa ou iloina foi e pei na o ni fautuaga ma ni tulaga e fia fesoasoani, ae leai ni manaoga foi lea e tuu mai ia te au i ni mea e mananao ai.

Ma o le a ou amata la i le Matagaluega lea o Pisinisi, Alamanuia ma Leipa i saunoaga sa aafia ai le Matagaluega lea. E pei o tulaga sa laulau mai e sui usufono mamalu, e tatau ona ou faapea atu, o mea tonu lava na e agai i ai le auaunaga a le Matagaluega lenei, o le sailia o galuega a o tatou tagata, sailia o maketi e agai i ai tatou mea e fausia i Samoa.

**23 JUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E fua galuega a le private sector ma galuega faapena mo maketi i fafo. O matafaioi a lenei Matagaluega e taumafai e sue ni a tatou kamupani tetele mai fafo aumai iinei i Samoa, aua a aumai kamupani na, o i ina la e maua ai le isi faamanuiaga e ala i ni galuega mo tatou tagata. E pei o le matafaioi taua lena, lea la e naunau ai e atiae foi le private sector iinei, lea e ala i ai fesoasoani, e feoloolo lava le fesoasoani a le Matagaluega o lo o ave i pisinisi, aua a atiae pisinisi, e toatele foi tagata faigaluega maua ai lea o galuega a tatou tagata o lo o fia maua ni a latou galuega. E i ai foi polokalame e feiloai ai le Matagaluega ma tamaiti foi nei toeitiiti iu a latou aoga, e tapena a latou tusi ma tulaga faapena ina ia faigofie ai ona maua ni a latou galuega pe a amata ona apalai i ni galuega o lo o i totonu o le tatou atunuu. Ua le gata i lena a ua tilotilo foi i ni auala mo i latou e le lelei aoga, a o lo o i ai lava le tomai, e le faapea na o tamaiti ua pasi mai le Iunivesite po ua maua le tikeri i le aoga sa aoga ai, e le na o le pau lena o ni tagata e agavaa i ni galuega. E leai, e oo lava ia i latou nei e nonofo i nuu i tua ua vave ona nonofo ma aoga, e i ai foi tomai la e i ai. O lo o taumafai foi la le Matagaluega e atiae tomai na, lea o lo o galulue vaavaalua ai ma le Matagaluega o Tina ma Tamaitai i le scheme fou lea e atiae ai le tomai o tamaiti nei a nuu i tua ua le lelei a latou aoga. E tatau foi ona fai ni a latou pisinisi i tomai la e ia latou. E pei o le aotelega lena o galuega a le Matagaluega lenei lea sa taea mai manatu o sui usufono, e pei o le isi Tulafono tele lava lea sa pasia i le tausaga na tea nei, o le tatou Tulafono lena e taumafai e faatosina mai ai a tatou falefaigalujega tetele, lea na taua e nisi o sui usufono le Yazaki. O galuega faapena lea e mananao i ai le tatou Malo e aumai, aua e tasi le falefaigaluega faapena ae 500 i le 600 tagata e mafai ona faigaluega ai. Ma ua tele foi luitau o na tulaga, ona pei ona silafia le Yazaki toeitiiti foi taai fala. Aisea? Ua maua foi nisi tagata faigaluega e sili atu le taugofie i isi atunuu o Asia ma tulaga faapena, lea ua fia o i ai kamupani nei, ae o lo o taumafai lava le tatou atunuu e tuu atu i ai ni

faatosina. O le tulafono la lena o lea e tapena le Matagaluega ia oo atu i le tausaga fou ua amata loa ona faaoga. Ia, na pau lava le mea a tatou o le hope, tatou tatalo ia omai ni tagata se toatele e fai ni a latou pisinisi tetele ia maua ai galuega a o tatou tagata.

Sa taua foi le fatosina mai e le Matagaluega e faatosina mai ai kamupani nei, e pei ona ou fai atu, tasi lena vaega tele lava. Omai iinei e fai ni a latou pisinisi, ae a omai iinei e faasafua mea nei o tiute i le uafu i kamupani nei e fia omai e set up ni a latou pisinisi ia faigofie ona aumai mea e amata ai ni a latou pisinisi nei e amata atu i le miliona le tupe foi lea e invest. O lo o i ai foi fesoasoani i kamupani laiti ifo lea e tau o le code 12.1 faapitoa i faatoaga, elei ma mitiafu foi nei e tusi ai igoa, o mea faapena. O small businesses, o lea foi e i ai le fesoasoani a le Matagaluega i tulaga na e amata ai a latou pisinisi. O lo o i ai foi le private sector support facility e fesoasoani foi i le aufaifaatoaga lea e fund mai e le tatou paaga a Niu Sila e fesoasoani e amata ai pisinisi a nai tagata laiti, e i ai foi ma le fesoasoani e ave i le SBEC. Tasi foi lena fesoasoani ina ia atiae lava nai pisinisi laiti a o tatou tagata.

**23 JUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E le o nofoai lava le Matagaluega lenei, o lo o mulimulitaia ma uunai lava a latou galuega fai, ina ia ausia le autu o le latou galuega ma le sini autu o lo o taumafai i ai latou. O lea sa taua e sui usufono mamalu e tataua ona ave ni tupe i le SBEC. Ta te manao lava e ave i ai ni tupe se tele, ae a tatou tilotilo i le Tala o le Tupe, ia o noataga na. Ae taatia mai lou manaoga atonu e i ai lava ni tupe se tele i le lumanai. O lota manao foi ia e ave ni tupe se tele e atiae ai le SBEC. Atonu o le fesoasoani malosi a le SBEC, o le mafai lea ona guarantee e le SBEC loan po o nogatupe a tagata ia e fia fai a latou pisinisi mai le Development Bank. O le fesoasoani tele la lena o lo o fai e le Malo ona ave mo a tatou faipisinisi i lalo o le vaega a le SBEC, e guarantee e latou loans.

O lo o faaauau foi le tatou polokalame lea o le aperenitisi, apprentice scheme lea e faaauau i o i le NUS. E tasi foi lena galuega a le tatou Malo o lo o fai, ina ia atiae ai tomai a o tatou tagata, o le palama, o le faimoli, o le mechanic, ma isi, o mea uma lava tau trades lea o lo o i lalo o le apprentice scheme, o lo o faaauau lava e lea vaega i tausaga uma, ma o lo o alualu lava i luma le toatele foi o alo ma fanau o lo o pasi mai i tausaga uma, o le toatele o i latou o la e ua galulue i latou falefaigaluega, ae ua omai faatili lo latou tomai ona toe o lea faigaluega i falefaigaluega na. A o nisi e le i maua ni a latou galuega, o le a tele lava lo latou tomai pe a pasi mai i le apprentice scheme.

O le vaega lena sa paia mai ai le Matagaluega lea o Leipa. O le Faalapotopotoga o Tagata Tafafao Maimoa mai Fafu, e faafetai tele atu. E ala ona ou faafetai atu i sui usufono sa taua mea nei o tagata tafafao mai fafu, ona o i ina lea e aliali mai ai le faataua e sui usufono mamalu o le tatou atinae lea. E le gata ina ou tou talosaga mai ina ia faaleleia vaega o tou matafaga ua faaleagaina e le sami, aua o i ina e malosi ai le o atu o turisi e faatosina atu ai, a o le naunau foi ina ia faaleleia mataaga i alaalfaga nei, ae faapea foi ona faigofie ona oo i ai. Ia te au la o le Minsita mo le Faalapotopotoga o Tagata

Tafafao Maimoa mai Fafo, o lo o ou naunau ina ia siitia atili le fuainumera o tagata e asiasi maimoa mai i Samoa. Ou te fiafia tele e faalogologo atu o lena e faataua e a outou Afigoa i sui usufono mamalu, ina ia lelei auala aua le saogalemu ma le faatosina mai o turisi. Aua e le taumate o le atinae lea o le lumanai lena ole tatou atunuu. Ma o afigoa i sui usufono, o le sootaga lelei lena i latou itumalo e uunai ai le taua o le atinae lenei o tagata tafafao maimoa mai fafo, aua e le o se atinae na o le Malo e faia, e le o se atinae na o le aufai faletalimalo e aoga i ai, e le faapea na o le au fai beach fale, e leai, e aofia uma ai lava le tatou atunuu, ia lelei uma a latou mea fai ona tosina mai ai lea o tagata e omai i inei. A omai loa i inei, ona maua ai lea o tupe a le tatou Malo a ia tatou galulue faatasi ma alii ma faipule o itumalo ma nuu, ina ia latou silafia le taua o le latou sao i le atinae lenei o mea tau tagata tafafao maimoa mai fafo. Ma e faalagolago tele le Malo i faipule, aua o latou e mafai ona fesootai ma alii ma faipule e matua faamalamalama i ai lo latou sao ma le taua tele o lenei atinae ia Samoa ma lona atinae i le lumanai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

E momoli atu ai lau faafetai i lou faalogologo atu e faataua tele i a outou lauga le tulaga lea.

Sa faapea mai nisi sui usufono e fai lava se promotion mo Savaii, ma ou te manao foi e fai lena mea aua lava a tatou i Savaii. Ia, ae paga lea, o tatou o Samoa, Upolu, Savaii, Manono, Apolima, e alu uma lava le tatoufaatosina lena i fafo, omai tagata i fafo, omai o Samoa o le nuu tele, e fa ona tamai nuu, o le nuu tele lava o Savaii, o mea nei o la e i ai, sosoo ai ma Upolu, o mea ia la e i ai. Ia, Manono, ou te le iloa po o a ni mea o i Manono, ia faapena ma Apolima. Ae omai pea, omai, a tou fia o i Manono e tietie ai i le vaa, o la e i ai vaa o Mulipola e o i ai. O mea faapena. Ae ua i ai foi i Savaii latou, ua set up lava Samoa Savaii, Tourism Authority o lo o taitaifono ai...

**FOFOGA FETALAI:** Tulai mai le Afigoa i le Minisita Lagolago, le sui usufono mo Aiga i le Tai.

**Susuga Mulipola Leiataua Laki (Aiga i le Tai):** Lau Afigoa i le Fofoga Fetalai, na ona faamantu atu lava ne i te i ua galo i lau saunoaga faamolemole na taua le siitia maualuga o atinae tau turisi i Manono na mafua ai foi ona toe siitia le tatou uafu, o se avanoa foi e fesoasoani atili ai aua le faaleleia atili o tatou turisi. Ma le agaga faaaloalo faafetai. A maua foi se avanoa o lau Afigoa, e manaia pe a e afio atu e te silasila ma maimoa i ai. Ma le agaga faaaloalo.

**FOFOGA FETALAI:** E i ai se isi sui usufono e fia saunoa i le Turisi? E lelei ona faapupu mai saunoaga a Minisita, ina ia aua neʻi afea e fesili.

**Afigoa Hon LAUTAFI FIO SELAFI PURCELL (Minisita mo Pisinisi, Alamanuia ma Leipa):** O lea foi ua uma lau Afigoa, pei ona fai atu, o lo o



naunau lava ia aumai o tatou tagata tafafao maimoa mai fafo. O lea foi ua faagaioi se auala ina ia maua ai se vaalele a le tatou atunuu, o options o lo o suesue i ai nisi suesue faapitua i lea foi matafaioi. E silasila po o le a se auala e mafai ai ona maua se tatou vaalele e pule ai tatou. We have more control on the prices and the fares. E pei o le tulaga lena tatou te fiu e fai tatou faletalimalo, ae a taugata lava le taunuu mai o tagata i vaalele, e leai lava nisi e omai. Ae a sailiili ni auala e faafaigofie ona malaga mai tagata tafafao mai fafo. A taua foi e se tasi se Air Service Agreement ma Saina, ua ou faalogo e faapea ua uma ona tusi uma ia mea o la e ua taatia ai ma le peni i luga, toe lava o se lima e saina ai, ona maea lea o lea tulaga. Tasi lena tulaga o le a fesoasoani i le taumafaiga o le aumaiga o tagata tafafao maimoa mai fafo.

Sa taua e le sui usufono mamalu le virus lea, le ZIKA virus, ia atonu o le Minisita o le Soifua Maloloina o le a faalateleina le mataupu lea, ae sa fesoasoani lava foi le Matagaluega o tagata tafafao mai fafo ina ia aua lava ne i faapopoleina tagata mai fafo o lo o fia omai.

**23 JUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Na ave i ai le feau i ala faaonaponei o lea ua contain le tatou Matagaluega o Soifua Maloloina le faamai lea, ae o Samoa is back to business, ae le i tele se pau i lalo o numera o tagata tafafao talu ai le virus scare lea. Ae atonu o le a faalatele atu e le Afioga i le uso a Minisita, pe i ai nisi tulaga mai lana Matagaluega.

O le mataupu lea e uiga i le atinae o Salelologa, mo mea tau fanua, ona e i ai laʻu Matagaluega lea e i ai. Ma sa fai le galuega tele a le Matagaluega lea o le mea lea e i ai le maketi. O le taimi nei po ua ono ea Matagaluega a le Malo lena ua i ai i ina latou ofisa i le fogafale a luga o le maketi i Salelologa. O le manatu ina ia toso atu tagata ina ia amata ona faaoga i ina pei o le centre lena ma atiae ai le town pei o le miti a le Malo sa i ai. E le o nofoai le Malo, o lo o taumafai e fai mea uma ina ia le galuega lea. Ia, lau Afioga i le Fofoga Fetalai, na pau lea o mea na afea ai Matagaluega o lo o ou vaaia. E lelei foi Matagaluega e fiafia i ai tagata lea e ala ai ona le fesili i ai nisi. Ae ou te fia afea lou itumalo ua lava sina lua minute.

Ou te faafetai atu i lou itumalo, atonu lava o i ai nisi o feala i lenei taimi, faafetai lava i lo outou toe lagolago o lenei sui usufono e tauavea lenei lima tausaga. E le natia le faaeaea sa outou tuuina mai, o lo o i luma o le Atua la outou faaaloalo, e i ai se taimi tatou toe talatalanoa ma faafetai aloaia a loʻu nei tagata i lenei faaeaea ua outou aumai. Ia manuia tele leni afaifi.

Lau Afioga i le Fofoga Fetalai, ia manuia tele lou toe tulai mai, e le tau selu atu o lena lava ua silafia, o lou toe tulai mai i le tofi, o se taimi muamua foi lea ua tupu ai lea tulaga. Ia manuia tele le Fonotaga a le tatou Palemene, manuia le tatou afaifi. Soifua.

**FOFOGA FETALAI:** Malo faafetai tapena malo le sauni. E momoli atu le faafetai i lau Afioga i le Minisita mo Pisinisi, Alamanuia ma Leipa ma nisi foi o Matagaluega o i lalo o lau vaaiga. Malo faafetai e tusa ai o lau saunoaga

manino. Ma ou te tapa ma le faaaloalo lau Afioga i le Minisita mo le Soifua Maloloina, tulai mai e saunoa e tusa o mea sa laga e sui usufono mamalu.

**Afioga Hon TUITAMA TALALELEI TUITAMA (Minisita mo le Soifua Maloloina):** Ua liligo le fogatia a ua pau le tuaau ma fuamalu o le Tuiatua. Ua tulili le tai ua taligoligoa foi le gataifale, aua ua paia ma mamalu le Maota nei, i le afio a lau Afioga i le Fofoga Fetalai, afio foi le Afioga i le Palemia faapea le Sui Palemia ma le mamalu o le aiga Kapeneta, ae tainane foi Minisita Lagolago ma le loaloa o le tatou Palemene i afioga i alii ma tamaitai sui usufono o le Maota nei. E faapea foi le i le afifio ai o le Failautusi ma le Ofisa o le Fono ae tainane Faauluuluga o Matagaluega o lo o mafuta mai i lenei afiafi ona o le tatou Fonotaga. O outou paia ma outou sa e tumau e faavavau e le mafai na toe toesea i se leo pe faamatieina foi i sau faamatalaga aua o Samoa lava ua uma ona tofi.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le a taoto la i le taotoga ia sa, ae o le a sagai tonu lau o le fo ma agi faasulu le siu amouli se i molimoli se sao, aua foi le taumafai atu i mataupu sa laga e le mamalu o le Maota, o lo o fesiligia ai lenei Matagaluega ma fia maua i ai se malamalamaga. Ae ou te momoli atu le faafetai tele i sui usufono uma sa afea lenei Matagaluega. Ou te talitonu e tasi lea o Matagaluega o lea sa toetoe lava a saunoa i ai sui usufono uma o le Maota. Ma o le faailoga foi lea o lo outou faatauina o le Matagaluega o Soifua Maloloina, ma ua alagatau foi. Aua o le soifua o lo o gafa ma le soifua o le mamalu o le tatou atunuu, e le tetena foi ia i matou o lo o galulue ma tautuaina le mamalu o le atunuu, e ala i le auaunaga faa-soifua maloloina. Ona o lenei lava mataupu e maaleale lava i taimi uma. A oo loa ina lotea le saogalemu ma le soifua maloloina o le mamalu o le atunuu, e leai lava se e manatu faatauavaa i ai, o le mea lea, faafetai mo finagalo na lagalaga, ia faafetai foi mo le faamanatu ma le faufautua, i nisi o vaega e mafai ai ona taialaina ai, ia ni taumafaiga faatauavaa a le Matagaluega ina ia taunuu le faamoemoe o le tatou Malo. Ma e le mama foi i lenei Matagaluega ia le tiute fai aemaise o le faamuamua a le tatou Malo, i lea tausaga ma lea tausaga ma lea tausaga. E le o laa loa ai le silasila a le Matagaluega ma le aufaigaluega i le faatau lea ma le faamuamua lea o lo o ave e le tatou Malo, i le faatinoga o le auaunaga lea. O le ala foi lea e le faigofie ai le galuega maaleale ma faigata, ona e manatu lava í ..e seu lava le manu ae tagai i le galu. Ae o le a foi se taumafaiga faaleauau, atonu lava o le agaga maualuga lava, ia tu maualuga ia le faatinoga peitai o le tele o taimi o le soifuaga lenei tatou te i ai, e le o gatusa le futia ma le umele i le tele o taimi. E ese lava fuafuaga fai ma le naunautaiga ae sau lava ia mala e atiae, tatou te momoe lava ma le filemu ma le taumafaiga, ae lama lava faafitauli e luitauina ai o tatou naunautaiga ma o tatou taumafaiga, ina ia lelei ma atoatoa se faatinoga o se auaunaga.

Lau Afioa i le Fofoga Fetalai, o le a ou tali atu i le tulaga lautele, e feololo sui usufono sa afea le Matagaluega, ma o le vaega muamua lea ou te fia talanoa i ai, o talosaga a le mamalu o le tatou Palemene, o itumalo sa talosaga mo ni sub centres, po o ni falemai foi. E tusa ma le toa ono i latou na talosagaina i lenei Fonotaga ni falemai o o latou itumalo, ao lea foi ou te nofo ma le mautinoa, i isi foi talosaga na aumai i le la foi Nofoaiga ua mavae atu, e i latou o lo o afifio mai pea. Ma nisi foi talosaga e lei faaleoa i lenei afiafi po o lenei Fonotaga, ao le tulaga lava lea e tasi, e manaomia ni falemai i o latou itumalo. Ona faapea atu lea o sau tala. A mea o le ula lena o faigamea, ae maumau e, pe ana mafai ona faatino uma na mea, o le agaga moni lava lea o le Matagaluega, maumau pe ana faapea e i ai se mafai e faatino ai le galuega lea, o le faigofie foi mo le aufaigaluega lea. Ae a fua i le faaso'a a le Matagaluega, e le mafai ona faataunuaina lena miti, ona e utiuti foi le aufaigaluega, e fua e le gata i le tamaoaiga, ae fua foi i le aufaigaluega e faatino ai le auaunaga.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Aua e leai se aoga o le fai o le galuega, manaia le falemai, manaia i le tilotilo ae leai se isi e faatinoa le galuega o i ai, ona maumau ai lea o le tautiga mo ia galuega, ae peitai ane, i le fuafuaga a le tatou Matagaluega ua uma ona faatulaga falemai faaleitumalo, i strategic location ina ia mafai ai, aua nei taumamao vaega uma o le atunuu. I lena la fuafuaga alualu mamao, ua tulai mai ai District Hospitals e ono, e tolu i Savaii tolu i Upolu nei. O ia District Hospitals o lea e faasauatoa lana auaunaga e 24 itula. Ua vaevaeina ai foi ma health centres, o auaunaga ia e mai le valu i le fa, aso Gafua i le Aso Faraile. O tatou district hospitals la lea ua i ai nei o Leulumoega Poutasi Lalomanu i Upoulu nei o Foaialo faapea foi Sataua ma Safotu i Salafai. O Health centres e i ai Lufilufi o Faleolo, Saanapu ma Vaipouli lea e fa i ai ia Health centres, o lea o lo o faatino ai nei le auaunaga i le mamalu o le tatou atunuu. O le agaga lava lea o lo o tulimataia pea e le Matagaluega, e ave le auaunaga i tua, ia faalatalata le auaunaga i le mea o lo o afifio ma papa aao ai le mamalu o le atunuu. O le taumafaiga lea o lo o fai i le taimi nei, o lea ua atagia mai atonu e mafai ona faataunuaina lea fuafuaga ona o lea ua i ai le tatou aoga faafomai. O le a mafai ai ona faatupulaia le numera o a tatou fomai e faatinoga le auaunaga lea. E tele lava le manao o lo o i ai, e le gata i fomai ia o lo o faaoga e le auaunaga faa soifua maloloina, e tusa e fitusefulu lua ia fomai, sefululua lea faatoa iu mai ma le onosefulu o fomai uma na lesitala o lo o faigaluega nei i le tatou Matagaluega. O le tele o fomai ia, o lo o faatinoa le galuega i le tatou falemai tele i Motootua faapea foi ma nisi o lo o i ai i Tuasivi. I se taimi ona ou oo atu lea i Tuasivi ona o lea sa fesiligia foi le auaunaga lea i Tuasivi, a o lena le faamoemoe, afai e tumau pea ia le faatupulaia o a tatou fomai ia e iu mai i le tatou lava aoga lea, atonu o iina o le a maua ai le tali o manaoga ia o tatou itumalo taitasi ina ia faatele ni a tatou Health Centres po o ni a tatou falemai, e faafaigofie ai i o tatou tagata ona o

ane i ai. Ao le taumafaiga lea o lo o fai nei, ina ia aua nei vava mamao le auaunaga ma le lautele o le atunuu, o lea foi ua amata le isi taumafaiga fou a le Matagaluega, o lea e i ai le Polokalame lea o lo o faasolo nei i nuu e lua lea e pailate ai le taumafaiga lea e taua o le PEN Faasamoa. O le PEN o le Package of Essential Services to treat or to combat NCD or Non Communicable Diseases. O lea la e i ai taumafai ia e fai nei, e involve ai communities, o lea ua toe taumafai atu ai e faaolaola ia Tumama a tina i nuu taitasi, latou te tauaveina le vaega lea. Ua aoaoina ai foi la nisi o tagata lava o o tatou nuu po o le community, ina ia mafai ona latou feoai e fua le toto asiasi i aiga, o ai o totomauluga faamanatu le inu o fualaau ma le toe tului o fualaau, fua le suka. A i ai ni mai latou te silafia ua tataua ona ave e vaai le fomai, ona refer loa lea i district hospital o lea e tau lata atu i lea afioga po o lea alaafaga. O taumafaiga la ia, o taumafai e avatu i tua ia le auaunaga. Ia aua ai ne i taumamao le tausavali mai o tatou gasegase mai nuu i tua, e omai i le falemai tele i Apia po o le o foi i le falemai tele i Tuasivi.

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

E pei o le agaga lena, aua o le taimi nei foi, o lea sa fesiligia ia le anoanoai o i latou ia e tausavali ane i Tuasivi, e taua le 300 i latou o lea e vaai i le aso, out patient. Mo le silafia, o le aofai sao lava o tagata, o le average, lea e vaai i o i Tuasivi, e tusa i le selau limasefulu i le selau valusefulu tagata i le aso. Ma o Tuasivi o lo o i ai le fomai e faigaluega tumau ai e toalua, e toatolu i le fomai pule la o lo o i ai nei i Tuasivi. Ma o lo o i ai fomai e toalua o lo o galulue auauai atu i ai, le Afioga ia Papalii Samuelu Petaia faapena foi ma se tasi o alu ma tamafanau a Salafai lava, o lo o faigaluega i le fale faamamatoto, o lo o ave ai foi lona tasi le aso i le vaiaso, o lo o faigaluega ai foi i Tuasivi e fesoasoani i mai la e i Tuasivi. O Apia nei, e tusa ma le 380 maŋ e vaai i le aso e tasi i le out patient lea. O le average o lea e vaai e le fomai e tasi i le tatou falemai lea, e tusa ma le fitusefulu mai, e toluselau valusefulu, ae toatolu fomai o la e full time i le out patient i taimi uma. O lona uiga o se mea faapena, e tusa o le í e tai oo atu lava i le selau mai i le fomai e tasi i le aso e tasi pe a toluselau valusefulu mai e vaai i le aso. O le ala foi lea o lea ua agai ai fuafuaga agai i tua i falemai ia e i tua, ina ia taumafai e taofi ai le autovaa mai o le atunuu e faatumulia ai le tatou falemai i Apia, ona o tulaga na o le manaomia o le auaunaga lea. E lo o taumafai pea la tatou Matagaluega e silasila mamao ma faasoa agai i tulaga ia la tatou auaunaga ina ia mafai ai ona faamalieina itu uma e tusa ai ma manaoga o le tatou atunuu.

**FOFOGA FETALAI:** Malie le Minisita mo le Soifua Maloloina, se i tulai mai le sui usufono mo Vaisigano Nu. 1.

**Tofa Lopao Natanielu Mua (Vaisigano Nu. 1):** E na ona ou faasao atu lava o fuainumera o maŋ ia na vaaia i Tuasivi, e le 82,000 i le tausaga e 35,000. O lea e i totonu o le lipoti lea o le 2015. Faamolemole ma le faaaloalo

ou te musu e faalavelave, i le saunoaga a le Afioga i le Minisita, ae pei e fai si tele o le fuainumera lea e saunoa mai ai, i le fuainumera sao, lea e i luga o le lipoti a le Ofisa o le Tupe, le Tala o le Tupe. Ma le faaaloalo lava.

**Afioga Hon TUITAMA TALALELEI TUITAMA:** Lau Afioga o lea ou te talanoa i selau aʻo la e talanoa mai i afe. O la e talanoa i le tausaga atoa, o lea ou te talanoa atu i le aso e tasi.

**Tofa Lopao Natanielu Mua:** Pe tausaga atoa au fuainumera lau Afioga i le Minisita e 82,000 i le tausaga, i lau selau limasefulu pe selau valusefulu i le aso. Ma le faaaloalo lava.

**Afioga Hon TUITAMA TALALELEI TUITAMA:** O numera ia, o numera faatoa aumai nei lava. O lau numera lena o le numera o le tausaga lea ua tea. O lea tatou te talanoa i le as .

**23 IUNI 2016**

**Tulafono Tau Faaofi o le Faatatauina o Tupe Faaopoopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

**Tofa Lopao Natanielu Mua:** Lau Afioga ou te musu lava e faatau matatao ma lau Afioga. Ao tupe ia na allocate atu mo lau Afioga i lalo o le paketi lea, o le mea lea e fuafua i fuainumera ia. Ua lava ua uma foi se manatu.

**FOFOGA FETALAI:** Malo fafetai, tatou ave ia le faamaonia i le saunoaga a le Minisita. O ia e feagai tonu ma le Matagaluega. Saunoa le Minisita.

**Afioga Hon TUITAMA TALALELEI TUITAMA:** Faafetai i lau Afioga, manaia foi nai faauilavea faapea e faatei ai le aso, e ui lava ina faale fetai ae le afaina.

Lau Afioga i le Fofoga Fetalai ma le mamalu o le tatou Fono, o le tulaga lena o lea o lo o i ai le mamafa o le galuega lea o lo o feagai nei ma a tatou fomai ia. O le ala la lea e faamalulu atu ai ia i latou na talosagaina Health Centres, o le agaga foi lena o le Matagaluega, ina ia faatele Health centres i isi vaega o le atunuu. Ae mo le taimi nei, o le a taoto ai faapea, se i sau se taimi e talafeagai ai ma gafatia. Ona faasolosolo atu lava lea i ai o le faasoa a le tatou Matagaluega. Sa tele lava na saunoa ma talosagaina ni fomai i tua, atonu o lea ua aofia atu i lau faamatalaga lea sa fai, fomai i tua i tatou falemai i tua. O le agaga foi lena o lea e matamata i ai ma tilotilo i ai le Matagaluega. Aua o le lipoti mai foi lena i tua i a matou asiasiga ia e o nei i tua, o le tala mai lava, e le gata i le aufaigaluega o lo o i ai nei i falemai ia le vasega o tausi soifua, ae faapea foi i tagata o lea sa matou fesootai, o le latou talosaga lava lea, maumau pe ana i ai se fomai, matou te manaomia se fomai. O lea la ua amata ona tilotilo i ai le Matagaluega, i se auala e mafai ai ona faatino le auaunaga lea. O le taimi nei, o falemai uma lava o district hospitals faapea foi ma Health Centre, o lo o alu i ai le fomai faatasi i le vaiaso. O lo o faaaogaina

ai fomai a le auunaga, faapea foi ma fomai tumaoti, o lea o lo o faafigaluega mai, latou te faalavaina le faatinoga o le galuega lea. A o le tulaga tonu lava lena, o le a tilotilo atili i ai le Matagaluega i lona tulaga lea. Talosia se taimi o lenei Paeaiiga ua mafai ona faatino se tulaga faapena, a le o lena ia gafatia le faalua pe afai e le mafai ona nofomau se fomai faalua i le vaiaso ona asiase le fomai i falemai ia i tua, e tau tuumamaina ai le gasolo mai o mai i le tatou falemai tele i Apia ma Tuasivi.

Oo mai lea lau Afioga i le Fofoga Fetalai, o taua lava vailaau ia o lo oí E moni saunoaga ia, na i ai le taimi o lea foi na faasalalau ai le faaletonu o tatou vailaau. Ma e le i nofoai le tatou Matagaluega sa valaauina loa taiulu o le Matagaluega matou feiloai ma matou talanoa ma sailiili po o le a le mafauaga o le tulaga lea. Ona matou tapa foi lea ma le fesoasoani a le Minisita o Tupe faapea foi lana aufaigaluega matou te galulue faatasi i se auala e mafai ai ona foia le faafitauli lea ona o lo o i ai le isi molimau faapea ona o le tuai ona faamatuu mai o grants e faaagaaga mo vailaau, o le ala lea e mafua ai ona tuai mai ona oka fualaau i le isi taimi.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le taimi nei la, ua tele le fesoasoani a le Matagaluega o Tupe, lea ua nafa ma le tulag alena ina ia mautinoa aua ne i motusia a tatou oka, a ua siitia atu foi ma oka a le falemai ia tai ono masina ua aumai le oka ia aua ne i vave ona sioti ae faigofie ona fuafua atu i le isi ono masina itua atu pe afai e i ai ni fualaau e vave uma.

O fualaau lava ia mo falemai i tua, o Aso Lulu uma lava e alu ai le tuluiga o fualau i falemai i nuu i tua. O oka masani lava ua i ai le lisi o vailaau e mafia ona dispense e le aufaigaluega e le o ni fomai. E silafia foi, e i ai vailaau na o le prescription a le fomai e mafai ai ona release fualaau ia i tagata. E le mafai e so o se isi e faigaluega i le falemai ona faia le tulaga lea, se i vagana le fomai. O le ala la lea e le soona tuuina ai fualaau e le mafai ona dispense e i latou o lo o faigaluega ai se i vagana ua taunuu atu le fomai. A oo foi la ina alu atu le fomai lea e alu faatasi i le vaiaso i tua, e alu lava ma ave ma le vaega o le dispensary e mafai ai ona tala uma lava fualaau e le i maua i tua e o ma ave uma, o fualaau masani lava e i ai fualaau toto maualuga, suka, antibiotics, o fualaau uma na, seiloga o le fomai e mafai ona ia prescribe ina, ae le mafai e so o se isi onaí O le ala la lea, afai na o le panadol lava lea e mauai tua i le taimi e le o i ai se fomai, na o le pau foi lena o le fualaau e mafia ona dispense e teine fomai e le o i ai se faatanaga latou te faamatuu atu ai se isi fualaau ne i i ai se faalavelave e tulai mai ai ona afaina ai lea i le Tulafono.

Ona oo mai lea lau Afioga i le Fofoga Fetalai, o lenei lava mataupu ua leva ona tapisa ai nusipepa ma le tatou atunuu i le tulaga lea o le faamai foi lea o le ZIKA, leaga o lea na fesiligia o lea foi ua lafo mai e lou uso a Minisita, out e tali atu i ai i le tulag alea o le ZIKA. E pei ona silafia, o le ZIKA, toetiiti lava aiga faatasi ma le dengue ma le chikungunya. O le virus lea na maua i le tausaga 1947 i le forest i le atunuu o Uganda i Aferika i le taimi lea faatoa

discover ai lea ituaiga virus. Talu ai la lona taimi na maua ai, na mautinoa ai o le virus lea e feaveai e le namu e tau o le Aedes Egypti lea na te feaveaia foi ma le virus o le dengue ma le chigunkunya. O le oo mai la o le faamai lenei ia tatou, o le tausaga lea na tea nei faatoa maua ai le tatou cases muamua iinei. Tusa e tolu cases na maua ia Oketopa ma Novema o le tausaga lea na tea nei. Na pau ai lena o cases e tolu se ioo i letaimi lea po o Fepuari lea na flair up ai loa lea faapea o le ZIKA ua maua i atunuu taulalata mai o Tonga ma Tutuila, masalomia ai ma iinei, ua muamua lava aliae i o i Niu Sila, a o lea e le i maua e i tatou iinei, e ui ina o lea sa ave foi tatou samples e ave e sue. E lua laboratories sa faaoga, o Tahiti e le o positive mai ai le blood mai lava ia Oketopa na amata fai mai ai, o le mai lava o tagata ma sign o le ZIKA, ona tui lea o le toto ave sue. E siaki lava la faapena, ae pei ona silafia, toetiiti lava laina tutusa uma Symptomatology o virus uma nei e tolu, o le fiva, tiga le ulu, tiga sooga o tino, e tiga mata, gagase atoa le tino. Ia, e faapena foi le dengue, e faapena foi le chikungunya, e faigata la ona diagnose on clinical grounds le eseese ga o faamai seiloga e tui le toto ona ave lea e sue mai.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le ala foi lea na tuai ai ona alert tatou i le presence o le ZIKA ona e le i iiai ni faamaoniga faasaienisi ina ia mautinoa ai o le ZIKA lea ae le o le dengue po o le chikungunya aua o le taimi lena o la e ua sasao lava le ZIKA ma le chigungunya ia tatou. O le avega la o blood samples i Niu Sila, na aumai ai loa lea ua maua ai positive cases. Peitai, e le i positive lava se sample na ave i Tahiti, o le ala foi lea na tuai ai ona respond tatou. Ae mo le silafia la, e oo mai i le taimi lenei, tusa ua 24 cases ua confirm ua maua i le ZIKA. E out of 168 blood samples na siaki ma test ma tagata na omai ma symptoms, na o le 24 na faamaonia o le ZIKA. E le o Samoa atoa foi la o lea sa maua ai cases nei, sa tele i le talafatai i matu o Upolu ma le faatausiusiuga lea o Salelologa ma Tafua i Savaii na maua ai cases, ioe, lea e confirm mai ai cases ia e 24. E pei ona silafia, e leai se togafiti, o le togafiti lava o le faamalolo, panadol ma toaga e inu le vaiauli. Ae mo le silafia, e ogaoga aafiaga o le ZIKA, o le faaeteetega o i latou ia e maitaga tina maitaga, ona e i ai le aafiaga o le ZIKA e maua ai latou ia, le condition lea e tau o le microcephaly, pe fananau mai e laiti o latou ulu nai lo tulaga masani e i ai pepe, a o le aumatutua e afaina ai neura o latou tino e maua ai la le condition e tau o le Guillain-Barre Syndrome. O le syndrome lena o le aafiaga o neeves o le tino, e amata mai tumutumu o tamaivae ma tumutumu o tamailima ona progress lea agai luga in a glove and stocking fashion, tusa e faapena la le sosolo mai luga i le tino o le tagata, e faapena e oo ina aafia ai le tino atoa ma tauau ina pipili ai isi tagata.

Ia, lauí

**FOFOGA FETALAI:** Masalo o lea o le a uma mai le saunoaga a le Minisita ae se i tuu atu pea le avanoa i le sui usufono mo Faleata Sisifo.

**Tofa Lealailepule Rimoni Aiafi:** Masalo o lea o le a uma le po o tau faamalamalama mai e le Minisita ae po o le a tonu lava le igoa o le namu, aua e 17 ituaiga namu lea e i Samoa. O le a la le igoa o le namu lea, a o le a foi le pitonuu o Samoa e maua ai le namu lea e i ai le ZIKA. A o lea matua faigofie, na o le panadol lava e inu.

**FOFOGA FETALAI:** E le i aafia le mea lea i lau saunoaga. E le i saunoa i ai le sui usufono lea, aua le talia. Saunoa lau Afioga.

**Tofa Hon TUITAMA TALALELEI TUITAMA:** Mo le silafia, e i ai le aidies, Aedes Polynesiensis, ma le Aedes Egypti latou te feaveaia le virus lea. Faalogo lelei ma le fesili soo. Aua le moe moe ala mai fesili valea.

Sa taua le generator lea e i Foailalo, sa fai le matou asiasiga i Foailalo i le aso tonu lava lea ae le i faataunuaina le tatalaga o Tuasivi, na ou asiasi ai i Foailalo, o la e na ola le generator, masalo po o tua mai na tupu ai le faalavelave lea na lipoti mai, ae ua lelei o le a silasila i ai i le tulaga lea pei ona taua e se tasi o sui usufono.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Lau Afioga i le Fofoga Fetalai, ou te iloa ona pau ai lea, se i vagana le fesiligia i tulaga ia, leaga o lea sa fesiligia mai, ne i te i foi ua ou nofo atu i lalo ae toe tu mai se isi toe fesili. Ia o tulaga faalelelei la na e tupu ai le faalii.

**FOFOGA FETALAI:** O lou finagalo lava ae ua maea mea sa laga e sui usufono. Ia, se i tuu atu ia le avanoa i le sui usufono mo le Itumalo Tu Taulaga i Sisifo.

**Afioga FAUMUINA ASI PAULI WAYNE FONG (Itumalo Tu Taulaga Sisifo):** Lau Afioga i le Fofoga Fetalai, e matau atu o lea ua lamalama faaii foi le saunoaga a le Afioga i le Minisita. Sa le fia faalavelave foi i le tulaga o le sauhoaga, ae sa i ai lava se mataupu sa afea i lau lauga i le tulaga lea o medical insurance po o insurance o tagata faigaluega a le Malo, lea na fesiligia pe le o i ai se scheme a le Malo o lo o i ai mo le agai i luma aua lava le puipuia o faamai e le i oo i le taimi e taunuu ai. Ma le faaaloalo lava.

**Afioga Hon TUITAMA TALALELEI TUITAMA:** Lau Afioga, o lea sa ou le fia talanoa i le mataupu lea, aua o au nei sa tofia foi e le Komiti lea e vaايا le mea lea o le insurance mo i latou ia e ave i fafo ma faamai ia i le tausaga e 1998. O matou la ma le susuga lea ia John Boyle sa matou faia le study lea, sa tofi ai le Komiti a le Kapeneta. Sa uma ona fai le lipoti, o lea na maea lelei lava le galuega, peitai i le filifiliga a le Kapeneta i lena taimi, e le i talafeagai ise taimi e tatau ai ona faatino. Ia, o lo o taoto ai la faapena, ae ua uma ona asiasi i ai le tatou atunuu i le tulaga lea o insurance. Atonu e i ai se taimi e toe laga ai le tulaga lea, ae mo le taimi nei, o lea lava ua ave i luga o le discretion a le fomai i latou o lo o agavaa leaga o lea sa fesili ai foi le tasi sui usufono, o agavaa lava ia o lo o ave ai tatou tagata i fafo pe a faapea e l o



mafai ona togafitia iinei i Samoa se gasegase pe a faapea o le togafitiga o lea o lo o faia i Niu Sila e maua ai sona lelei ma toe recover atoatoa ai lona malosi, ona fai lea I ai o le faaiuga a le Kapeneta mo le auina atu i atunuu mamao.

Mo le silafia foi ua ou tilotilo atu i le Lipoti a le Komiti, o lo o faapea mai ua ala ona alu i luga le tupe mo le soifua maloloina ona o maʻi ia e ave i fafo. Ae mo le silafia, o lea ua alu i lalo le tupe, na o le \$5miliona lea ua faataga mo mai i le tausaga lenei e pei ona avatu i le Tala o le Tupe. O le tausaga na tea nei sa tele atu le tupe, a o lea la ua tuuitiitia i le tausaga nei. O le agaga ia faaitiitia gasegase e ave i fafo, ae ia faatupulaia le auunaga i totonu o le tatou falemai. O lo o faagasolo nei la fuafuaga mo le taimi nei mo le aumaiga o le auunaga lenei e aumai i totonu e faatino ai i le tatou falemai. Atonu e le o toe mamao se taimi ona mafia lea ona faatino le fuafuaga alena ma faaitiitia ai loa gasegase e moomia le ave i fafo ma faaitiitia ai foi le tatou tupe alu.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Lau Afioga i le Fofoga Fetalai, na pau ia o nai mataupu sa afea ai lenei Matagaluega, ae a i ai foi se vaega e le i oo i ai se faamalamalama, o lea lava tatou te faatasi i aso uma, asiati atu i lou ofisa e fai se tatou ipu kofe ma talatalanoa e maua atu ai se tali e faamalieina ai outou finagalo.

Ae avea ia lenei taimi se i ou soso atu ai i si o matou foi itumalo. Le mamalu e i le paia i Aiga faapea foi le mamalu i le Faletolu ma Fuaifale, ua maua le avanoa e momoli atu ai se faafetai tele i le tatou itumalo. Faafetai tele mo le tou faaaloalo maualuga mo le tou filifilia o au e faaauauina le tofi o letatou itumalo. O le agaga maualuga lava ia maua pea le malosi ia faapea foi ona fesoasoani mai le Atua e faatamaoigaina ai le taumafaiga vaivai e tautuaina ai lo outou paia ma lo outou mamalu. O le a foi se taumafaiga ua mafai e la outou sui usufono, ia agalelei le Atua e foai mai pea lona tamaoiga e faatino ai lou valaauina ou te nofoia ai le tatou Nofoa. Ae o moomooga alofa e molimoli atu pea i le tatou itumalo ma le tatou tapuaiga, ia faapea foi le paia i le afaigaluega o lo o faafaletuluia I totnu o le tatou nuu. Ia manuia tele lenei afiafi. Soifua ma ia manuia.

**FOFOGA FETALAI:** Malo faafetai tapena, faafetai saunoa i lau Afioga i le Minisita mo le Soifua Maloloina. Ia, ua manino mea sa laga e sui usufono mamalu ona o le saunoaga manino ma le faamalamalaga i lau Afioga.

Ia, o le avanoa lenei out e tapa ma le faaaloalo lau Afioga i le Minisita mo Leoleo, Falepuipui ma le Tinei Mu.

**Afioga Hon SALA FATA LISATI PINATI (Minisita mo Leoleo, Falepuipui ma le Tinei Mu):** Out e manatu ua vela le fala, ua alofa atu i le Maota aua masalo a maea uma, e lua lava ou minute lea ou te tulai atu ai e fai se tala. E faatalofa atu i lau Afioga i le Fofoga Fetalai, faapea foi i le afio o le

Palemia ma le Sui Palemia, le Aiga Kapeneta faapea foi le Maota o le Fonousu a Samoa aemaise Faaululuga o Maetagaluega eseese o lo o tatou faatasi i lenei afiafi.

E le tele naua ni fesili na afea ai lenei Matagaluega. E tolu Matagaluega, o le Leoleo, Falepuipui ma Tineimu, ae i le aotelega o ia vaega uma pei ona laga e sui usufono, o le aotelega lava ia o le concern o le safety. O le saogalemu o le atunuu mai faalavelave tutupu faafuasei i mu ia. O le saogalemu o tagata i le soona o o taavale, i le leaga o avetaavale, leai ni laisene o avetaavale, le onana o avetaavale, le leaga o galuega a leoleo o faatino, o le l lava o pou ia e talosaga mai ai le atunuu. O le tolu lenei o Paeaiga ua ou tulai atu ai, ma o le lua o Paeaiga lea ua ou umia ai le tofi lenei. O le lima tausaga talu ai, o faafitauli lava nei sa aumai i tausaga uma tausaga uma. A o le agaga lava lea, masalo ua outou faafofoga tonu lava i le upu lea, taatia maia, taatia maia. Ia o le agaga lenei o lea e tau kiliva atu ai le afiafi lenei, aua foi o le concern lenei tout e aumaia, e faapena le agaga o le Faigamalo lenei ma lou nei tagata, matou te puipui. A mea o le aua lea o faigamea. I le mau lea o le a ou avatua, i le taimi na ou tulai mai ai, sa i ai lava faaletonu.

**23 JUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Ae ina ua fai le galuega fesoasoani mai le aufaigaluega aemaise le Afioga i le Palemia ma le Kapeneta, aua ito a team work, a foi lenei e collective responsibility, e galulue ai foi lele e le na o matou. E aafia uma ai lava tatou, e faapena foi le aufaigaluega. Ou te faafetai i le Pulega a le Tineimu, faafetai i le Pulega a Leoleo, ou te faafetai i le Pulega a le Ola Toefuataiga, aua a leai i latou nei, e le aoga lea e tu atu, ioe. Se i tulou lava le paia ma le mamalu o le Maota, o au lava ia na o se auauna. Out e faafetai i le faatuatuga ua aumai e le Afioga i le Palemia, o mea e tutupu, e mafua uma mai lava i lou lotoifale. Afai e te faamaoni i lou aiga, o le a le mea e te le nofo ai e fai mea silisili? Ae afai o mea lelei i le aiga o oe, e tatau foi ona lelei mo isi. Aumai la lenei e fau ai le tatou Malo, aua ne i o tatou saili, a mea la e maua ai le manuia o au po o Tuilaepa po o Lee Hang lea. Ailoga. O i tatou lava, tatou te galulue uma lava, o le goal lava e tasi tatou te suea, o se ai mo Samoa ia manuia Samoa.

E faauma atu sau faamatalaga e faapea, e i ai le upu foi lea e masani ai tatou, walk the talk ea pe a ea. Ia, aua e faapena le tala a lou uncle foi lele o Bush, I read my leaps e faia uma lava mea na tou te finagalo i ai, soifua ma ia manuia.

**Afioga Faumuina Asi Pauli Wayne Fong (Itumalo Tu Taulaga Sisifo):**  
Lau Afioga i le Fofoga Fetalai, faamolemole pe maua se avanoa

**FOFOGA FETALAI:** O lea ua maea le saunoaga a le Afioga i le Minisita, ae faafofoga foi e te maitau mai le sui usufono mamalu, o mea uma lava sa outou saunoa i ai, o le a fai ma faatino.

**Afioga Faumuina Asi Pauli Wayne Fong:** Faafetai i lau Afioga i le Fofoga Fetalai, ae le o talia maia la le vaega lea sa aafia i lau lauga. O lea la na ou fia fesili atu ai, ae ua vave ona nofo i lalo.

**FOFOGA FETALAI:** Malie le Minisita, se i faatea mai ne i te i ua tauleagaina.

**Afioga Faumuina Asi Pauli Wayne Fong:** E laitiiti lava si au fesili lea na fai atu, o lea ua e faafetai mai nei i le Ofisa o Leoleo ma Falepupui, ae sa fesigia po o le a se tulaga o i ai ina ia aua ai ne i toe sosola i tua pagota. Ia pau lava lea o lau fesili sa avatu analeila po o le a se mea ua fai i ai ia aua ai ne i toe tulai mai.

**Afioga Hon SALA FATA LISATI PINATI:** Faafetai. Ia fa ita nei lava e faigata le tali. O lona uiga o le loka faasoloatoa o tagata aua ne i toe tatalaina i tua. Aua o le mea lena e i ai, o le pa lea ua fai nei i le falepuipui lea o le a iai nei, o se falepuipui lelei, e tele tupe o le a alu ai a le Malo, ae le i fai e sauaina ai o tatou tagata faamolemole.

*23 IUNI 2016*

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O le fale lenei o le a fai o le fale mo outou ma au foi lenei, e le faapea na o tagata talepe pe a. E sese loa le tu a le tagata, o uta lava e i ai tatou. O le mea moni lava lea i luma o le Atua o lea e sisila le Atua e fai le nofoaga lea o outou uma lava ia ma au lenei. Ia soifua ma ia manuia.

**Afioga Faumuina Asi Pauli Wayne Fong:** Lau Afioga i le Fofoga Fetalai, faafetai ia, ua lava lea ua malamalama foi i lea tali ua aumai.

**FOFOGA FETALAI:** Faafetai o le mea sili o lea ua malie lou finagalo. E faigofie lava le saunoaga a si alii Minisita, e fai le fale lea ma le pa mo lena itu o le Maota pe a soli le Tulafono, e faapena mo i tatou uma. Faafetai mo le saunoaga a le Minisita mo Leoleo, Falepuipui ma le Tineimu.

O le taimi lenei, tulai maia lau Afioga i le Minisita mo Galuega, Felauaiga ma Atinae Eeseese.

**Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eeseese):** Faafetai atu i lau Afioga i le Fofoga Fetalai mo le avanoa. E muamua ona ou faatulou atu i le pau o le Maota o lo o sasao nei i le afio o lau Afioga i le Fofoga Fetalai, afio lau Afioga i le Palemia ma le Sui Palemia aemaise le paia o le Maota. Afifio Minisita Lagolago tainane foi le paia ma le mamalu o alii ma tamaitai faipule o le Maota. O lo o faavailolo foi alii ma tamaitai o lo o pulea Faalapotopotoga ma Matagaluega a le tatou Malo.

Out e fia faatalofa foi ma faatulou atu i le paia o Samoa, i le Afio o Lana Afioga Mamalu O Le Ao o le Malo ma lau Masiofo, le nofoa seetolu o Sui o

le Fono a Sui Tofia ma outou Masiofo, lau Afioga i le Faamasino Sili ma le Ofisa o le Faamasinoga, ae tainane foi le Aufaigaluega paia a le Atua o lo o nonomanu i nuu ma afioaga ma fatafaitaulaga e fia aua se manuia o Samoa. Ou te fia faatalofa atu foi i si ou Itumalo Tu Taulaga Sasae. E manatu foi ua vela le fala, ae le umi se faamatalaga. O outou sa ma faigata ma outou mamalu o le a le oo i ai se faamatalaga ae faapena ona nuunuu atu ia faatini o tausaga.

Lau Afioga i le Fofoga Fetalai ae le i oo atu se faamatalaga e tali atu i manaoga o le mamalu o le Palemene, e maitau atu e 37 sui usufono o le Palemene na sausaunoa i lenei Tala o le Tupe. A o le i fai atua se tali, e muamua ona avatu le agaga faafetai i le Afioga i le Minisita o Tupe faapea foi le Ofisa Sili o Pulega ma le paia i le Pulega ma le mamalu o le aufaigaluega ona o le Tala o le Tupe ua i lumamea nei. Malo le tapenapena malo le saunia lelei. Ua talia atoatoa e lenei sui usufono lenei Tala o le Tupe.

E fia faamauina foi le agaga faafetai i le Komiti o Tupe i lau Afioga i le Taitaifono ma le paia o le Komiti. Faafetai i la outou Lipoti ua maea tapenapena. E i ai nai mataupu ia ou te fia talanoa ai e uiga i le Lipoti, e tasi lava le mataupu lea e fia faaalua ai se lagona o lalo o le Matagaluega lea o le LTA po o le Land Transport Authority.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoga faaauau i luga o le faitauga faalua**

O lo o matau ai se feeseeseaiga i le Ofisa o Leoleo ma le Matagaluega o le LTA, le vaega foi lenei e faia tickets mo solitulafono i luga o le aualatele mo fine, ma laisene mo le feaveaia ma le faaaogaina o telefoni feaveai, tulaga faapena i le minor offences i luga o le aualatele. O le matau atu i le faamatalaga o le Lipoti, e pei e feteenai le Matagaluega o Leoleo ma le LTA itupe ia e aoina mai faasalaga, offences. I lau maitau atu, e pei e le talafeagai le tulaga lea ona o la e i le Tulafono lava o le LTA, o latou e aoina tupe nei mo faasalaga laiti ia. A o le popolega lea e tulai mai i le faamatalaga o le Lipoti, e le o fiafia le Matagaluega o Leoleo i le ave i le LTA o tupe ia a o la e fai e latou le galuega. O le galuega e fai faatasi e le traffic officers a le Matagaluega o Leoleo ma le LTA, ae peitai ane, i lou popolega a feteenai faapea, e ono le faatinoa ai tiute ai o Leoleo. O lou popolega lea ile maitau atu i le tulaga lea, e pei o lea o le a feteenai I tupe maua, ona ia silafia lelei o tupe ia e le o ni tupe e ave i le CEO a le LTA, pe ave foi i le Komesina o Leoleo, o tupe lava e aumai le taga a le Malo. Ma e tatau ona coordinate ma lagolago le vaega lea e faatino le galuega, aua e ono tulai mai le tulaga lea ua musua leoleo e fai le tulaga lea ona o le tupe lea e le oo ia latou, ae ao e le LTA. A o lau faamatalaga, o tupe lava a le Malo, ae o lau faamatalaga, e le faapea a aumai i lalo o le LTA, ae ona o le Tulafono lea e i lalo o le LTA, e ao e le LTA tupe ia e maua. Ma o le uiga o lau faamatalaga, se i tau silasila ane ai le Afioga i le Minisita mo Leoleo aemaise foi la au nei, aua e tatau ona soalaupule le mea lea, ia mautinoa e faatino e leoleo le galuega e tusa ai ma le Tulafono. Ae aua ne i ave le l maua o le tupe lea ma mea e le faataunuina ai le tiute lea ua tatau ona faia ia maua uma tupe a le Malo i ia ituiga faasalaga.

O le Tala o le Tupe pei ona ou faailoa atu, e 37 sui usufono sa sausaunua ma faaali mai ni talosaga ma ni manaoga. E 35. A o lau maitau, o le tele o nei manaoga, e agai i mea o auala galue, access roads, o le suavai taumafa, o le eletise, o moli auala, aemaise foi ni auala fou e agai atu i nofoaga o mataaga. Pau lava mo le silafia e le mamalu o le Palemene aemaise afioga i sui usufono sa talosaga mai moli auala, o lo o i ai le process o talosaga ia, ia fai mai le talosaga i moli auala ona auala mai lea i le EPC, a o lo o i ai le Komiti a le Kapeneta e iloiloaina talosaga, fai suesuega a le EPC, ona faataunuu lea o le talosaga ai moli auala, ae le mafai ona folafola mai moli auala ae le iloa po o fea le nuu, ae pe fia ni moli e moomia. O le tulaga lena e tataua ona aumai le talosaga tusitusia ina ia manino ma malamalama i ai le EPC, aemaise foi o le Komiti o lo o faafoeina lea tulaga.

A silasila a outou Afioga i le Tala o le Tupe a le LTA, o lea ua faaitiitia i le \$1.54miliona mai le Tala Fatatau o le Tupe i le tausaga ua tuanai. O le uiga la o lau faamatalaga e tau faamanino atu ai le tulaga lea, ona o lau maitau i le tele o talosaga na tuuina mai, i auala galue ma auala fia faaleleia, ou te iloa e faigata ona faatino uma talosaga uma talosaga nei i se tausaga e tasi.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

O lea e avatu ai le tuualalo, tatou onosai ae se i tau faasoa le tatou seleni aemaise lava auala ua moomia ona fai, aua pei o le mea lea o lo o tau tapena i ai ina ia toe fai se asiasiga i auala uma i talosaga uma ia ona vaai lea o le Matagaluega po o fea le mea e ave i ai le faamuamua ona o le le lava o le tatou tupe lea e tau faasoa, ae o le a fai lava se tatou faasoa talafeagai i le tulaga o auala la e o lo o i ai i le taimi nei aemaise foi o le talosaga na tuuina mai, o lo o maitau e le Matagaluega ma au nei ua uma ona fai se asiasiga ina ua uma le afa lea talu ai ma maitau ai ni auala o lo o faapena ona faaleaga tele ma uatatau ona fai se galuega, aemaise foi o ni auala fou faatoa maea ona fai atu i le tausaga ua maea atu nei. Ou te iloa o auala ia ua tataua ona toe onosai mai ae se i faasolo le tatou polokalame i isi afioaga ia e le ioo lava i ai ni auala galue, aemaise o le faamuamua lea o le a ave ina ia fai lelei tatou auala, public roads, po o le a lava se faiga e mafai ona faasao mai lea tausaga i lea tausaga, e lima tausaga le tatou Paeaiga. Ma ou te talitonu a lava lo outou onosai ma aumai lo outou faatuatuaga, e faasoasoa atu lava le polokalame o tatou galuega.

O le tulaga la o galuega ia e pei e tele ai talosaga, o le tulaga lena. Ae aumai le faatuatuaga se i tapena atu ai se polokalame.

E i ai nai mataupu taitasi ia e ese mai mataupu ia, e i ai nai poloketi a le Malo lea e tau faagasolo, ua uma foi ona pasia e le Malo nai project pei o le hydro lea e i ai nai afioaga ia e tolu ou te maitauina ua pasia e le Kapeneta hydro laiti foi nei e fesoasoani i le tatou eletise, aua o le tulaga e fesoasoani ai foi i letapenaga o le tatou renewable energy. O le hydro, o le solar, o le wind mill foi lea ua faagasolo. A o le tala fiafia, o le mea lea e tatalo atu ai i afioaga ia e iai Faleaseela, o Vailoa aemaise foi o Safata, e i ai hydro na ua

uma ona pasia e tapena e faatino e le EPC, e fesoasoani la i le tatou renewable energy. Aua leaga e i ai foi le faamoemoe o le tausaga 2017 e renewable energy ai tatou ia 100%, ae paga lea, o lou lava talitonuga e le mafai ona tatou taunuu i lea tulaga i le 2017 ona e le mafai ona taofia le tatou generating energy ona e le i leva nei e tele le invest a le Malo i le power lea i Fiaga, ae faatali i se taimi se i tau recover le investment, ae o lo o galulue pea le Malo e saili pea hydros ia e fesoasoani tele ma e faaitiitia ai foi le tau o le tatou eletise. A o se tala fiafia i le taimi nei, o lea ua i le Kapeneta nei se talosaga a le EPC e pasia ai le tariff fou e amata i le masina o Ianuari ona faamamalu ma e tele lava se pau o le tau o le eletise mai lea tariff fou ae se i pasia ona faailoa foi lea i le mamalu o le atunuu, aemaise foi le Afioga i le sui usufono.

E i ai la isi mataupu ia o lea ua note uma i lalo a o le tulaga lea pei ona talosagaina e le sui usufono Tu Taulaga i Sisifo ma le sui usufono mo Faleata Sisifo e uiga i le latou pa foi lele i luma o le auala fou lea le four lane i le malae vaalele. Ua uma ona oo atu le faasologa o le galuega, ma o le tulaga ua le mafai ai ona faaauau le pasima ona ua uma le tupe o le poloketi.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

Na i ai la le option na taatia atu mo le silafia e le mamalu o le afioaga aemaise foi sui usufono, ua uma ona faailoa i ai ua leai se tupe, ae na tuu i ai le option e faa-chain link le mea e tau i le faleaoga lea sa fuafua e alu ai le pasima. Peitai ane la ua le lava le seleni ae ua le talia foi e le afioaga le option lea ma out e tali atu, se i taatia maia se i toe maua se tupe. Ae le iloa se tausaga e toe maua ai se tupe, a o lea na avatu le option manaia lea e faaauau ai mo lenei taimi. Ae a i ai se suiga o se tou finagalo ona toe talanoa mai lea ae talosia e le i toe faaaogaina e le LTA le vaegatupe lea.

Lau Afioga i le Fofoga Fetalai, pei na o le pau lea o nai talosga aemaise foi le manaoga o Afioga i sui usufono mo latou itumalo, ae ia maua lava le onosai ma lei

**FOFOGA FETALAI:** Ou te faamalie atu i lau Afioga i le Minisita, se i tulai mai lava le sui usufono mo Aiga i le Tai.

**Susuga Mulipola Leiataua Laki (Aiga i le Tai):** Lau Afioga i le Fofoga Fetalai, sa ou musu e faalavelaveina le tanoa faasau a lau Afioga i le Minisita, ae na ona fia pai atu lava i le talosaga a Aiga i le Tai pei ona folasia i se domestic wharf i le va o Manonotai ma Manonouta, faatasi ai ma lou moli faailoilo aua lava le saogalemu o le feoaiga o motu e lua. Ae le gata foi i lea, o le tulaga i ou vaipaipa faamolemole i le utiuti o le suavai i tuamaota ma tualaoa i le Aiga i le Tai faapea foi ma le motu. O le toe tulai atu lea ma le agaga faaaloalo.

**FOFOGA FETALAI:** Mo le fia faasaoina o le taimi o le Minisita mo Galuega, se i tulai mai le sui usufono mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, faafetai atu lava i lau Afioga i le Minisita, e leai e le toe faafinauina le finagalo, ae pei ona e faafofoga mai, e toalua sui usufono lea ua talosaga i lau Afioga i le vaega lea. E pei foi ona ou talanoa atu, o le pa lea, o le aai tonu, na o le falesa lava ma le faleaoga e leai ma se fale o se aiga o faalavelave i ai. O le ogatotonu tonu o le aai aemaise le taulaga. O le uiga tonu o lau tala lea e fai atu, o lena e saolele lava lau Afioga, ae pei o se mea foi lele e fetuutuunai ail au tofa faale-Atua ma le faatamalii, afai lava o lea ua e finagalo se i maua se tupe toe fai, ou te talitonu o le tulaga tonu lea ia lava foi le onosai a le afioaga ma faamatagofie ai lea vaega ia maea lelei.

Ma lou faaaloalo lava. Faafetai.

**FOFOGA FETALAI:** Ia, tulai maia lau Afioga i le Minisita e faamaea mai lau saunoaga ma faauma mai loa.

**23 IUNI 2016**

**Tulafono Tau Faaofi o le Faatatauina o Tupe Faaopopo (Nu. 2)  
2015/2016 ma le Tulafono Tau Faaofi o le Faatatauina o Tupe 2016/2017  
- felafolafoaiga faaauau i luga o le faitauga faalua**

**Susuga Hon PAPALHITELE NIKO LEE HANG:** O le saunoaga a le Afioga ia Mulipola, masalo o lena ua alu atu i le aotelega o le tali i auala. A o moli faailoilo lea ua maua i au faamaumauga aemaise foi o le uafu lea mo Manono ae se i fai se suesuega i le tulaga lea pe a maua se tupe pe a talafeagai foi ma fuafuaga a le Malo o lo o taumafai nei. A o le tulaga i le talosaga lea a Faleata Sisifo ma le Itumalo Tu Taulaga Sisifo, o le faamatalaga lena i le taimi nei. O le tatalo ia faapena ona toe maua nisi tupe faameaalofa ina ia mafai ona faataunuu le tou galuega. A o le taimi nei ua uma le galuega lea o le four lane ma ua maea ai foi le seleni lea na faaagaaga mo le poloketi lea. Ma le faaaloalo lava.

Lau Afioga i le Fofoga Fetalai, masalo ua maea ai i se faamatalaga e tusa ai ma manaoga mai afioga i sui usufono mai itumalo taitasi, ae faamanuia le Atua i lau Afioga aua foi le tatou galuega mo lena lima tausaga. E pei foi ona ou faamatala atu i Afioga i sui usufono o le Maota, e lima tausaga le tatou Paeaiaga, o lea faatoa amata, ia tatou onosai, atonu lava e uma le lima tausaga ua taunuu uma tatou galuega ia e faatalosagaina mai. Ma le isi mea, o le itumalo lava e mulimuli ai le galuega, o le itumalo lena e manatua e le itumalo o latou sui usufono. A o tatou ia e amata atu nei, e oo atu i le lima tausaga ua galo tatou. Ia tapuai mai ma tuu mai le faatuatuaga.

Ma le faaaloalo lava.

**FOFOGA FETALAI:** Malo faafetai, ua manino itu uma sa laga e sui usufono mamalu, ma ua faapea foi ona aumai ma le fautuaga a le Minisita ia faapena ona maua pea i ai finagalo o sui usufono o le Palemene e lelei foi le

telegese o le faiga o le auala e manatua ai foi e toelaiina ma loomatutua ma le au palota.

Masalo lau Afioga i le Minisita mo Faatoaga, Vaomatua ma Faigafaiva ua ou iloa o lea o le a e tamua i le aso a taeao pe a pule alofa le Atua e aulia i le soifua e mama ma le manuia. Ae ona o lea ua tatou taunuu i le taimi manava, ia ua tatau foi ona fai se tatou malologa. Ona faapea lea, ae tatou te le i tolopo, ou te tapa le sui usufono mo Falealili Sasae na te faaiuina le tatou Fonotaga i se tatalo.

*Na tolopo Taulumaga a le Fono Aoao i le itula e 11:36 i le po seia aulia le itula e 9:00 i le taeao o le Aso Tofi, 24 Iuni 2016.*